



浙江經濟紀略

浙江經濟紀略



浙江省全圖



圖例	
○	縣城
●	鎮
○	鄉
○	村
○	縣界
○	省界
○	國界
○	鐵路
○	公路
○	水運
○	航空
○	森林
○	湖泊
○	山脈
○	河流
○	海岸線
○	領海
○	外海

比例尺 1:2240000

中華民國十七年三月編繪 同年四月出版

浙江經濟紀略

弁言

積縣成省。積省成國。國與省皆以縣爲基礎。故

總理建國大綱。定縣爲自治之單位。蓋一國一省之大。無非由各縣集合而成。一國一省之富源及各種工商事業。亦無非由各縣之富源及工商事業集合而成。是以地方自治開始實行法。其範圍以一縣爲充分之區域。對於地方自治團體。不第爲一政治之組織。亦並爲一經濟之組織。凡百事業。非於經濟上植其基礎。卽不能運用敏活。欲爲一縣謀自治。必先謀整理一縣之經濟。若一縣辦有成效。他縣必爭先倣行。由一縣而推之各縣。以至一省一國。而民國之大本於是乎立矣。

我浙居溫帶之中。東濱大海。西達江西安徽。南達福建。北接江蘇。土地肥沃。物產豐饒。固

總理所謂中國最富之省也。其幅幘袤延。南北距千三百里。東西距八百里。面積約四十萬方里。錢塘江一名之江。合婺港徽港衢港三大源。經建德曲折橫貫以達杭縣海甯入海。劃浙境爲東西兩大區域。江以西爲舊府區凡三。曰杭嘉湖。爲縣二十。江以東爲舊府區凡八。曰甯紹台金衢嚴溫處。爲縣五十五。地方經濟情形。各有不同。除就調查所得。以縣爲單位。分別編述外。茲照全省境內地理上有聯絡關係者。更別爲山區沿海區平原區三大經界。撮要論其大概。

一山區 浙東諸縣。皆山陵地帶。其山脈以仙霞山脈爲主幹。分數支爲楓嶺雁蕩括蒼天台金華昱嶺會稽四明諸山脈。五十餘縣錯雜其間。地勢自南而東北。徐徐傾斜。是以北部諸縣。如紹興蕭山餘姚。東部如黃巖溫嶺等縣。有一部分之平原。犬牙相錯。浙西則有天目莫干兩山脈。杭之富陽餘杭臨安於潛新登昌化。湖之長興武康安吉孝豐等縣。亦爲多山之地。故山

區之範圍。實跨浙東西而有之。其經濟生產力。以農鑛爲主要。工商次之。農產品之著名者。如茶如米如棉花如蠶桑如蕃薯如竹木靛青菸草如柑橘筍棗芥朮。副產物。如紹酒如金腿如紙。均歲有大宗。而尤以茶爲各縣地質所咸宜。紹興之平水茶。行銷及於洋莊。惜仙霞金華諸山脈各縣。講求植茶者尙少。其他各縣。亦不甚發達。棉則以餘姚爲最盛。蕭山次之。蓋近水平沙之地。棉所宜也。紹興之紹酒。金華東陽義烏之南腿南棗。馳名各省。爲他縣所不及。新嵒等縣絲繭產品。每年出運不少。黃巖溫嶺兩縣。產米甚富。力足以資他縣而有餘。皆其最著者也。鑛質之表現者。如煤如鐵如銅如銀鉛如錳錒如印石如明礬如礞石如金精石等類。或爲一縣所特有。或爲各縣所散見。蘊蓄甚厚。而開發者寥寥。僅長興煤類一鑛。稍露頭角。青田石雕琢品。爲世界所共知而已。浙省全境七十餘縣。山區實占地至十分之七而強。不可謂非廣大之寶庫矣。顧山脈最多各縣。尙不免於

貧瘠者。一在交通多阻。水利不修。一在風氣未開。墨守舊轍。誠欲振弊起衰。增進山區各縣經濟生產力。則謀交通上之便利。固爲先務之急。而地方人民之各謀其土物所宜。從事講求。以興未闢之利。亦正不可緩也。

二沿海區 自浙西海甯海鹽平湖諸縣。沿海越杭州灣。循紹興餘姚慈谿鎮海鄞縣定海象山南田甯海臨海黃巖溫嶺玉環樂清瑞安永嘉。迄於平陽等縣。濱海之地。逶迤不下千有餘里。皆爲沿海區。其間海面大小島嶼。星羅棋布。不可縷計。以定海舟山羣島爲中堅。北抵杭州灣以東之馬鞍列島。南抵平陽以南之鎮關島。範圍甚廣。其經濟生產力。以漁鹽爲主要。魚業甯台兩幫爲大。每屆漁汛。漁船入海。大小以千百計。各有其目的地。雖汪洋浩瀚中。而南北各有界限。不相侵越。魚之種類。如鱈黃南北帶烏賊白鯊海蜆。皆犖犖大宗。其他海產物之難悉舉者。亦復不少。每歲所獲魚利。不下數百萬。沿海居民一年之生活。市面商業之盛衰。莫不視乎漁汛。

之豐歉。其關係不可謂不大矣。鹽業以餘姚岱山晒鹽爲中堅。其產地自浙西平湖白沙灣。循沿海各縣濱海地以至平陽鰲江口。成一曲折之弧線。綿長與浙境海岸相終始。其間鹽場林立。每歲產鹽數量。運銷全浙及蘇之五屬。皖之廣德。贛之廣信等處。合之上海租界銷額。共計爲二百四五十萬擔。漁鹽耗鹽漏私之鹽。尙不在內。是皆沿海區至大之富源也。然不講求精進之術。而但安常習故。與時勢進化潮流。不相適應。則利權亦不免爲人所侵奪。近年日本漁船捕魚。不時侵及我領海。恆有所聞。其捕魚之術。輪帆並用。器具技術。講求至精。每年以其海產物如魚翅海參海蝦鮑魚海帶等類。運銷我各省市場。數實至鉅。幾成爲海味類商業之一霸。迴顧我之漁業。直可謂其細已甚耳。吾浙有此廣大之產魚海區。苟能力求改良。集合同業。擴大規模。組設公司。廣造漁輪。本原有之經驗。爲積極之進行。則海產物之發現。必不止今日所得之數。可以斷言。至於鹽業。舊

有煎晒兩種。近年雖多廢煎爲晒。然鹽質粗劣。甚或糝以泥沙雜質。至成黝色。無可自諱。蘇之上海一隅。本我浙鹽行銷區域。外人藉口於吾浙鹽之不潔。竟以洋鹽進口侵銷。他埠亦有製造精鹽侵銷上海各處者。是皆爲吾浙鹽之勁敵。欲謀挽此頹勢。則製造之改良。與夫鹽務稅法之更定。實在所必講矣。

三平原區 浙西杭嘉湖各縣。除近於天目莫干兩山脈之各縣爲山區外。餘悉爲平原。浙東山區各縣。如紹興蕭山餘姚黃巖溫嶺等縣。地多衍沃。棉稻相望。雖未嘗無一部分之平原。特其範圍限於一隅。系統仍不能離乎山區。故論平原者。多以錢塘江下游之杭縣海甯嘉興海鹽平湖嘉善桐鄉崇德吳興德清等縣及餘杭臨安兩縣一部分爲平原系統。其經濟生產力。各以所處地位之衝僻而異。然大要實以絲繭爲農產大宗。茶棉糯米菸草次之。工則綢布織品。及各機織工廠。亦尙興盛。商則以水陸交通便利。百貨雲集

。除山區甬甌兩通商口岸外。杭縣地居平原。且係省會。擅水陸舟車之勝利。尤爲商業之總彙。其他各縣。水道交通四達。繁盛市鎮。亦所在多有。觀於平原區農工商業之發達。似較他區爲優良。然亦有兩大缺點焉。不能利用固有原料。精求製造。而狃於近利。以大多數絲繭出口。缺點一。各地市場。外貨充斥。炫我耳目。耗我人民購買力。缺點二。居今日而欲謀鞏固平原區各縣之富源。則農產當改良。工業尤宜急進。蓋我之原料不待外求。苟能設法研究製造。推廣海外銷路。則生貨貿易。一躍而爲熟貨貿易。商戰勝利。乃可得而言矣。况以地勢論。浙西平湖海鹽間之乍浦港。實扼杭州灣之襟要。

總理建國方略中。定爲吾國四大商港之一。近年上海浚浦局。亦有疏浚杭州灣之計畫。認乍浦港地位之佳。實在上海口岸之上。則其地位之重要可知。雖積沙未去。此種新商港。尙難實現。然將來必有實現之一日。自可

斷言。上海素以通商大埠負世界盛名。若浙西新商港告成。則中外商業集中點。必將移轉於吾浙也。

綜觀浙東西各區之經濟情形。自現狀上言之。固以平原區爲第一。沿海區爲第二。山區爲第三。而自範圍上言之。則山區面積廣大。七八倍於平原。徒以交通不便。風氣閉塞。致利源未能盡闢。仙霞雁蕩括蒼諸山脈中之各縣。尤以崎嶇貧瘠聞於世。然其他部分。固未嘗無水陸可通之途。將來省道諸幹線成立。各屬縣道。脈絡相貫。交通上必煥然改觀。則山區農礦之發展。亦未始無希望。且物產之饒。如著名之紹酒金腿紹綢台緞新嵯絲繭溫台稻米柑橘等類。皆山區中各縣之出品。而茶葉一項。尤爲山區各縣之特產物。全區各山地。無論其交通是否利便。固不宜於植茶。若能盡量推廣。以如許廣大之山場。歲增鉅額之產量。利實不在蠶桑之下。况各礦蘊於地層中者。所在多有。一經開發。利源尤鉅。故山區各縣在經濟上之

地位。仍有重要之價值。沿海區以各縣濱海地。合領海海面羣島爲其區域。範圍面積。亦殊廣漠。雖漁鹽而外。無其他大宗事業。然漁鹽生產力。歲額總在千數百萬以上。亦有自成一種之資格。至於平原區。範圍不過十餘縣。狹小如此。而絲繭茶棉綢布織物之利。成績偉大。已爲全浙富庶之中心。駕山海兩區而上之。若使山海兩區各縣。能各自發達其主要事業。則以面積廣大七八倍之地。而地無遺利。物無棄材。經濟上之生產力。增進發展。與平原各縣同一水平線。人定勝天。吾浙經濟前途。固有極大之希望也。

民國十八年三月嵎縣魏頌唐

5521223
805
2

浙江經濟紀略

目次

第一篇	杭縣	一
第二篇	海甯縣	一〇
第三篇	富陽縣	一五
第四篇	餘杭縣	二五
第五篇	臨安縣	三一
第六篇	於潛縣	三八
第七篇	新登縣	四五
第八篇	昌化縣	五三
第九篇	嘉興縣	五八
第十篇	嘉善縣	六四

浙江經濟紀略 目次

第十一篇	海鹽縣	七〇……八一
第十二篇	崇德縣	八二……八八
第十三篇	平湖縣	八九……九四
第十四篇	桐鄉縣	九五……九九
第十五篇	吳興縣	一〇〇……一一〇
第十六篇	長興縣	一一一……一二八
第十七篇	德清縣	一一九……一二五
第十八篇	武康縣	一二六……一三〇
第十九篇	安吉縣	一三一……一四〇
第二十篇	孝豐縣	一四一……一四九
第二十一篇	鄞縣	一五〇……一五八
第二十二篇	慈谿縣	一五九……一六三

第二十三篇	奉化縣	一六四……一七二
第二十四篇	鎮海縣	一七三……一八〇
第二十五篇	定海縣	一八一……一八六
第二十六篇	象山縣	一八七……一九二
第二十七篇	南田縣	一九三……一九九
第二十八篇	紹興縣	二〇〇……二〇六
第二十九篇	蕭山縣	二〇七……二一三
第三十篇	諸暨縣	二一四……二一九
第三十一篇	餘姚縣	二二〇……二二六
第三十二篇	上虞縣	二二七……二三六
第三十三篇	嵊縣	二三七……二四七
第三十四篇	新昌縣	二四八……二五四

第三十五篇	臨海縣
第三十六篇	黃巖縣
第三十七篇	甯海縣
第三十八篇	溫嶺縣
第三十九篇	天台縣
第四十篇	仙居縣
第四十一篇	金華縣
第四十二篇	蘭谿縣
第四十三篇	東陽縣
第四十四篇	義烏縣
第四十五篇	永康縣
第四十六篇	武義縣

二五五……二六一
二六二……二六九
二七〇……二七六
二七七……二八三
二八四……二九四
二九五……三〇〇
三〇一……三〇六
三〇七……三一三
三一四……三二〇
三二一……三二七
三二八……三三三
三三四……三三九

第四十七篇	浦江縣
第四十八篇	湯溪縣
第四十九篇	衢縣
第五十篇	龍游縣
第五十一篇	江山縣
第五十二篇	常山縣
第五十三篇	開化縣
第五十四篇	建德縣
第五十五篇	淳安縣
第五十六篇	桐廬縣
第五十七篇	遂安縣
第五十八篇	壽昌縣

三四〇……三四九
三五〇……三五六
三五七……三六四
三六五……三六九
三七〇……三七七
三七八……三八六
三八七……三九〇
三九一……三九七
三九八……四〇四
四〇五……四一一
四一二……四一五
四一六……四二二

第五十九篇	分水縣	四二二……四二七
第六十篇	永嘉縣	四二八……四三八
第六十一篇	瑞安縣	四三九……四四九
第六十二篇	樂清縣	四五〇……四五六
第六十三篇	平陽縣	四五七……四六三
第六十四篇	泰順縣	四六四……四六九
第六十五篇	玉環縣	四七〇……四七六
第六十六篇	麗水縣	四七七……四八一
第六十七篇	青田縣	四八二……四八八
第六十八篇	縉雲縣	四八九……四九六
第六十九篇	松陽縣	四九七……五〇一
第七十篇	遂昌縣	五〇二……五〇九

第七十一篇	龍泉縣	五一〇……五一四
第七十二篇	慶元縣	五一五……五二〇
第七十三篇	雲和縣	五二一……五二五
第七十四篇	宣平縣	五二六……五三三
第七十五篇	景甯縣	五三四……五三九

浙江經濟紀略

嵒縣魏頌唐編輯



第一篇 杭縣

考杭縣古稱荒服地。禹貢隸揚州。禹巡會稽。至此舍舟登陸。故以杭名。民國成立。併仁和錢塘爲杭縣。山水之勝。甲於天下。疆域。東至錢塘江中心爲界。北自楊家木橋至油車橋與德清分界。西北自勞家至陡門至梯子嶺與武康分界。西自梯子嶺迄石璫山與餘杭分界。南自石璫山至錢江銅盆沙與富陽分界。照從前劃分自治區域。除城區外。四鄉劃爲十四區。東鄉會堡喬司臨平皋亭四區。南鄉江干上四鄉二區。西鄉西湖欽履二區。北鄉五都西鎮瓶窰調露四區。介於東北兩鄉者。湖墅皋塘二區。面積東西相距。最闊七十里。最狹二十里。南北相距。最長九十里。最短四十里。折中

計算。二千九百二十五平方里。田佔百分之五十二。地佔百分之二十一。山佔百分之二十一。蕩佔百分之六。全境有戶十六萬七千零六十二戶。有丁四十七萬三千零十六人。有口三十四萬六千五百七十六人。

河流。首推錢塘江。自富陽入境。東流至翁家埠。與海甯蕭山分界。次苕溪。自餘杭縣入境。北流至勞家陡門與德清武康分界。次南渠河。自餘杭入境。東流至歸錦橋與下塘河會。次上塘河。自艮山門承城河之水。北流至施家堰。入海甯縣。次新開運河。自北新橋受下塘河之水。北流至五里牌。與德清縣分界。次下塘河。自聖塘閘受西湖之水。北流至奉口陡門與苕溪會。至山脉。境內諸山。實爲天目山之支脈。最高者稱五雲山。東北行即天竺山。南高峯。北高峯。支脈之入城者爲吳山。此外小山甚多。不及枚舉。

地勢西南高而東北卑。西南多山。而東北則沃野平行。地宜桑麻。故居民

亦以東北爲殷富。若論形勢。則縣境東憑錢江。西依苕溪。南則交界嶺一帶。山巒高聳。足以自守。北則滬杭鐵路。自閘口直達上海。交通便利。爲東南一大都會。

氣候溫和。夏令酷暑。約在華氏寒暑表九十度之間。冬令祁寒。約在二十度。民間種作。以晚禾大小麥豆及桑茶爲大宗。氣候均屬相宜。偶值亢旱。或逢霪雨。塘閘蓄洩。亦甚便利。

土壤。分平原山地沙土三類。沃野平衍。可以種稻。陌頭塍沿。可以種桑。山谷深幽。可以種茶。龍井所產。名聞宇宙。沿江沙土。可以種棉。或種花生。亦有利益。

水利。因其地東濱錢江。西通太湖。形勢卑廣。天目山水。自苕溪奔匯。有上塘河下塘河以資蓄水。爲旱潦之備。錢江潮汐。近已漸向東趨。杭患稍息。沿江一帶。舊築磬頭。仍須時加修葺。以殺水勢。又如西湖爲飲水

之源。今雖甘泉甚多。不全仰給湖水。然湖水實爲本源。陰相灌輸。况上塘河一帶。民田皆賴此以救亢旱。所謂決西湖寸水。可以溉上塘千頃也。鄉民不專務農。往往兼業工商。耕耘多係舊法。近年雖經各農會之勸導。關於辨土選種除害等種種方法。漸知改良。然農民限於財力。不克發展。其農具分蠶具墾具漁具三項。關於蠶具者。有蠶箔蠶架蠶網縲絲車烘繭簍桑篋管篋桑剪。關於墾具者。有犁鋤耙鎌草刀。關於漁具者。有網罾釣鈎魚鎗蟹彈蝦籠。以上各項器具。率依舊式。土人運用甚熟。無輕易改換者。一則限於資力。二則囿於習慣也。

蠶業素稱興盛。養蠶技術。雖多守舊。而對於蠶性之考察。尙屬精審。以故每年出絲爲土產大宗。惟近年以蠶與桑之供求。相差懸絕。以致有蠶無桑。其故皆由於蠶桑分途。桑葉昂貴。育蠶者力不能購。則傾棄隨之。至於販賣方法。昔多售絲。今則售繭。以縲絲之手續繁而出息微。蠶戶貪省

事故也。若論新法育蠶。或有新知識而無資本力。或有資本力而無新知識。更憚費重事煩。故不敢輕於嘗試耳。

四鄉桑麻遍野。地利富厚。近來造林。已由公家擇定。將台山勝果山鳳凰山包山小九華山孔家山萬松嶺等處。栽植苗木。成林之期。尙待他年。此外定北區之玉白龍山等處。培養森林。頗呈發達之象。至於縣苗圃。自民國四年成立後。下子發苗。可供造林之用。民間種植桑樹之外。厥惟茶樹。龍井一帶。出茶最佳。惟爲數不多。僅銷國內。其餘鄉山。並無大片林木。亟宜設法勸導。務使私有荒地。悉化林區。以期材木充足。杜塞漏卮。

漁牧兩業。均不發達。其原因在無牧養之場所。官河均不養魚。民蕩間或養殖魚類。爲數不多。不足以供本邑之用。牧養畜類。更無適宜之曠土。故除民間家畜家禽以外。殊不多觀。至魚之種類。有鯉魚青魚大頭魚鱧魚

鱈魚白魚鮑魚蝦蟹鱉等名。畜類有牛羊豬三種。除牛供耕田外。其餘悉佐盤殮之用。

農產物。分主要普通兩種。主要者。有粳稻糯稻大麥小麥大豆白菜青菜蘿葡茶葉等類。普通者。有玉蜀黍落花生蠶豆豌豆南瓜西瓜東瓜茄芋甘蔗芋蕨桃李杏梅枇杷栗柿等類。惟本地糧食。不足供本地半歲之需。全賴上江蘭谿一帶。下游吳興無錫各處。運來接濟。如遇荒歉之年。尤非抬高價目。不足以期招徠。

農民生活。以租種田畝者居多。每年所產。完租以外。所得無多。終歲勤勞。或尙不足以溫飽。實緣生活程度。年高一年。而歲入狀況。一無生色。至於租種關係。大抵以租契定之。普通辦法。下冬完租。或米或錢。各如其約。間亦有預收田租者。不問來年荒熟。各聽天而已。至農業團體。有縣農會。及西湖鄉江干鄉各農會。又有省立之農業學校。及農事試驗場。

。規模尙屬完備。

省會所在。工廠林立。技師薈萃。雇工手續。有長工短工之別。長工以年或月計。短工以日計。無何等契約拘束。大抵合則留。不合則去。悉聽其便。近年大廠工作。漸定規約。如學織綢。則訂定一定年限。限內不准他就。且須覓人保薦。不能自由出入。待遇方法。視其技術如何。成績如何。而定工資之高下。師弟關係。大抵以三年爲學習期間。在此期間內。卽技術已成。亦須爲師服務。不支薪金。然師若收學費與飯金。則弟可以自由。不生以上關係。至於技成之後。各自謀生。除感情之聯絡外。不聞有別種情形。惟近年來米珠薪桂。生活艱難。工人得值微薄。要求加給工資。亦出於萬不得已耳。工藝之精粗。關係出品之良窳。杭垣自工業學校開辦以後。畢業人材。濟濟一時。尤以機織一科爲盛。故綢緞出品。日新月異。大受社會歡迎。此外有縣立第一第二平民習藝所。分竹工籐工織工各

部。出品尙佳。

工作物。可分出色普通及外來三種。出色者。如綢緞紗羅縐紡火柴香粉扇子旱煙藕粉等類。每年運銷他處。價值在一千五百萬元以上。普通者。如荳油麻油菜油桐油醬油黃酒燒酒藥酒麥粉豆粉大布愛國布粗布縐布線襪胰皂燭紙牛革陶瓷金銀銅錫鉛鐵製器木器家具車輛船舶錫箔筆墨鞭炮刺繡絲線等類。供本地及隣邑之用。爲數亦達數百萬元。外來者。首推匹頭。大約以日本貨爲最多。其次蘇皖之米。紹興之酒。鄞縣之蓆。江西之瓷。福建之紙。徽州之漆。川廣之藥材。英美南洋各煙公司之煙。皆屬大宗。

商業素稱繁盛。自拱宸開埠以後。內河輪船交通。愈形發達。迨滬杭路成。商業中心。由拱埠移至城內。於是拱埠漸就衰落。其他著名市鎮。如塘棲瓶窰五都西鎮湖墅三墩臨平等處。均爲鄉間商務中心。各種營業。大部

分可分爲絲綢米茶木布六業。其餘亦應有盡有。商人以甯紹兩幫爲多。徽人次之。

商人販運貨物。自金衢嚴來者。有錢江輪船公司。自蘇滬來者。有杭滬鐵路。及拱埠內河各小輪。運輸稱便。二者相較。自以鐵路爲速。輪船次之。民船又次之。然運費亦以鐵路爲高。其詳細價目。輪船公司。鐵路公司。均有規定。此項運輸事務。商人爲欲圖便利起見。大抵委託轉運公司經理者居多。其運價由買主自理。間有訂立合同者。不在此限。若民船運貨。則視貨物之重量容積。隨時酌定。

市場交易。悉以貨幣爲媒介。惟向有劃洋名目。在平時劃洋與現洋無異。一至銀根緊急。則每元相差。自一分以至五六分不等。小銀幣及銅幣。市價隨時漲落。至各商店招待主顧。誠信和藹。言語則通行杭白。與官話相近。平日商界。素重信用。卽如錢業放款。大都無抵押品。又商業團體。有

杭州總商會。及塘棲瓶窰臨平三墩各商會。以爲商人聯絡情感。互相集合之所。

第二篇 海甯縣

考海甯元明兩朝皆爲縣。清爲州。屬舊杭州府。民國復爲縣。直隸於省。疆域東至天仙府塘。東跨河橋入海鹽縣界。西至翁家埠施家堰鹽官第一橋及臨平湖等處。入杭縣界。南至海。北至許公塘河。接石門縣屬騎塘橋爲界。又至殷家澤接桐鄉縣屬沙渚塘爲界。照從前劃分自治區域。第一城區。第二硤石區。第三袁化區。第四長安區。第五元東區。第六郭周區。第七許村區。第八斜川區。面積共一千九百平方里。全境有戶七萬七千四百五十四戶。有丁十九萬三千六百九十七人。有口十六萬二千零四十人。河流。袁化塘河。自萍江塘河分流六十二里入海鹽縣界。萍江塘河爲德清縣大麻涇之支派。由木縣莊婆堰西北。東流入境四十五里。合入袁化塘河。

洛塘河。自萍江塘分支流入境四十里入嘉興縣界。二十五里塘河。自西湖來。由臨平至長安壩過東二十五里。達縣城之拱宸門。

地勢。全境均係平原。並無山嶽。西南略高。東北稍低。

氣候。最高溫度在華氏九十八度。最低華氏二十八度。土壤西南部。屬砂質壤土。宜於棉麻。東北部。屬壤質砂土。宜於禾稻。水利則有備塘河。上塘河。二十五里塘河。袁化塘河。許公塘河。萍江塘河。洛塘河。皆足以灌溉田畝。

農民深耕者少。均用人力。無以畜力代之者。肥料以人糞尿豆餅厩肥爲主體。農具至爲簡單。墾具爲鎬爲鋤。亦名耨粗。至於耙耨用具爲鐵耙。大都於水田代耕墾之用。蠶具用蠶簾蠶植箔等。均係竹製。概爲舊傳器具。蠶桑素爲發達。近來植桑益廣。飼蠶之家。愈見增加。栽桑方法。或接條後移植。或移植後接條。栽培得宜。葉肥厚而大。不接條之野桑甚稀。移

植期均在春冬之交。養蠶則以清明十日後。大幫收蟻。先十日以種子藏胸際。或被窩中。孵化後。用火育二十三日成熟。普通以衡計算。法以四眠中蠶四觔爲一筐。每筐以收同秤繭八觔爲八分。得八分者。稱爲歲稔。所需蠶種。購自餘杭者居多。間有自製者。縣東之繭。縲絲爲多。城西之繭。大都售於繭行。少縲絲者。縲絲有精粗之別。精細者。間以製經。及行銷於外洋。粗者均銷杭紹南京等處。作織綢之用。近來多方設法改良。如改良土絲傳習所。改良養蠶場。改良蠶業宣傳委員會等。分頭組織舉辦。

林墾一項。硤石區模範森林場。坐落該區星辰殿西偏白衣庵之上。所植松樹柳杉。頗形暢茂。此外縣城內陳園舊址。及東門外小普陀兩處。亦擇爲植樹節植樹地點。所植松柏檉棟楊槐等樹。尙稱發育。

漁業甚微。有海魚河魚之別。捕魚之法。外海用網。內河兼用簍。農民於

池沼。雖有養殖。然規模極小。至畜牧。農家所蓄之豬羊鷄鴨等種。概屬副業。無專營畜牧事業者。

農產物。如米麥棉桑秧黃荳甘蔗各種大豆蔬菜等。內除產棉可分售於滬商。桑秧專行銷各省外。餘僅供本境之食用而已。本邑所產之米。不足供本邑人民之食。向係仰給於蘇皖贛等省。每年輸入米糧。達十成之五六。

佃田習慣。佃戶向地主租田耕種。每畝年納租米八斗至三斗。團體舊有縣農會。及乙種農業學校。現農校已改辦蠶科職業。

人民職業。以蠶桑農業爲大宗。工業一項。尙未發達。無大宗出品。有名之工作物。僅縣城北門外。周順興鐵店之藥刀。行銷滬漢等處。名馳各省。普通者。線襪布疋二種而已。線襪每打價洋。自六角至一元八九角不等。布疋每疋價洋。自三元至四元不等。其自外來者。則以洋廣貨物居多。工業習慣。雇工須憑人口頭薦保。待遇方法。有按工給予工資。有按工作

物之多寡。而計算工資者。至於師徒。由學徒出立關書。或三年卒業。或五年卒業。各工業各有習慣。參差不齊。工廠舊有縣立第一平民習藝所。分絲織棉織兩科。民國十一年停辦。現正籌劃恢復。改辦各種小工藝。此外民立工廠。則有硤石雙山絲廠。規模尙稱宏大。製造線襪織布等廠。爲數甚夥。惟範圍均甚小。不及備述。

商業。城鎮合計不下數千家。以輪軌交通。杭海甯長甯袁汽車路。先後築成。宜其易於發達。然近十年來。無甚消長。入境者。向以米爲大宗。來自安徽江蘇等處。行銷紹屬及本邑。出境者。以絲土布桑秧。爲本地農民所產出之品。絲銷於南京震澤。土布桑秧行銷各省。過境者。則以茶葉烟葉爲大宗。

市鎮向分爲四大鎮。八小鎮。硤石袁化長安路仲爲四大鎮。斜橋郭店周王廟許村等八處。爲八小鎮。商販運貨。以道途遠近。計運脚多寡。錢幣通

用銀幣小銀角及銅幣。行情均隨嘉興市漲落。商業團體。有縣商會。硤石袁化長安各商會。此外絲業米業布業錢業酒醬業。亦各設有公所。

第二篇 富陽縣

考富陽。秦曰富春縣。晉更名富陽。吳越時名富春。宋復名富陽。後因之。民國成立。無改置。疆域之廣。毗連八縣。南北相距計一百二十里。東西計八十里。周圍計二百七十六里。從前劃分自治區域。分在坊區。東北區。西北區。正南區。東南區。西南區。面積三千三百七十五平方里。其田地山塘數目。以原有額征約之。田約一千八百餘頃。(餉田沙田併入)地約一千三百餘頃。(基地及舊有沙地餉地併入)原額及新墾官租沙地約九百餘頃。(牧地併入)山約三千四百餘頃。塘約五十餘頃。共計四項。約六千九百頃。以五百四十畝佔一方里計算。約佔一千三百方里。全境有戶四萬

二千二百三十九。有丁十一萬四千八百五十三人。有口九萬零八百二十三。其中業農者十之六七。有農而兼工者。如造黃白紙及造坑邊各戶。其完全業工者。不過十分之一。業商者不及十之一。鑛業一項。雖有一二講求之人。不聞於鑛務有若何經驗也。

河流以大江爲經。卽富春江是也。上界桐廬縣。自桐洲入境。下至長嶺頭出境。爲錢塘縣界。計長八十五里。東北區支流。經恩波橋入於江者三。一自筱嶺發源。計長三十二里。一自交界嶺發源。計長二十六里。一自望天嶺發源。計長三十四里。西北區支流。經恩波橋入於江者一。自青樹嶺發源。計長四十三里。經湯家埠入於江者一。自柏枝嶺發源。計長二十一里。此江北河流之大略也。正南區支流。經剡浦口入於江者一。自龍門山發源。計長三十一里。經安吳川入於江者一。自大王嶺發源。計長四十三里。東南區支流。經安吳川入於江者一。自向天嶺發源。計長二十三里。

經漁山埠入於江者一。自廳上門發源。計長十七里。西南區支流。經場口埠入於江者一。自金沙渡會合浦桐諸水入境。計長五十三里。經溧水埠入於江者一。自青草嶺發源。計長十三里。此江南河流之大略也。其餘城區恩波橋之水。自爲一流者。有慶春河。自北迤東入於江。至於水力之爲工業利用者。則有水碓。凡溪流經過處。往往製木爲輪。疊石架設。隨水自轉。不舍晝夜。用搗紙料。工倍人力。近有仿造以舂米者。其他浸竹放樹。皆利用水力。

山脈亦分南北兩派。北派以天目山爲鼻祖。經自臨安來者。入境爲仙童山。西盡新城縣境。西南達於江。盡桐廬縣境。西北區諸山屬焉。轉自餘杭來者。入境爲笈嶺。東盡錢塘縣境。東北區諸山屬焉。南派以五洩山爲鼻祖。經自諸暨來者。入境爲響鐵嶺。正南區諸山屬焉。轉自蕭山來者。入境爲向天嶺。其東仍盡蕭山縣境。東北達於江。盡錢塘縣境。轉自浦江來

者。入境爲金沙嶺。其西仍盡浦江縣境。西北達於江。盡桐廬縣境。此南北山脈之大略也。其間山嶺甚多。古蹟名勝亦夥。不及備述。

地勢南西北三邊界皆高。漸趨中央則漸低。東盡邊界爲最低處。自東北區新橋綿亘至西北區青雲區一帶。最爲平行。沿江口岸。皆自南斜趨而北。西北盡錢塘界。與東南盡錢塘界。長短相去至二十里。四境之最險者。莫如雀門嶺。此外無險可扼。其最要者。由餘杭入境爲銅嶺。由錢塘入境爲長嶺頭。由新城入境爲界牌嶺。由蕭山入境爲萬安橋。然縣境一江中分。江防一失。則南北不能相顧。雖謂最險要莫江若可也。

氣候溫度最高不過百度。最低不及五十度。濕度最高至九十餘度。最低至五十三四度。就近年氣候而言。尙無嚴寒酷暑。溫度適中。滋生較易。凡高阜處有水可灌者。仿照諸暨餘姚各縣。改種兩熟。可獲特殊之利。蠶市亦宜改早。併可仿養原蠶。推廣繭絲。其利尤厚。若夫風雨霜雪不時。害

及農功。則氣候之偶變。而非可視爲常程也。

土壤分三種。曰近水。曰近山。曰腹裏。近水多肥。近山多瘠。求其常肥而不至瘠者。惟腹裏。江心擁起。四面近水。若桐洲。若洋漲沙。若中沙。若長沙。無腹裏之可言。其完全腹裏。除西北區之黃天坂。西南區之大塘坂不甚肥。正南區之沙田坂不甚精。約計得十之四五。近山者約十之二三。近水者約十之三一。而山不與焉。山土北厚而南薄。北肥而南瘠。其質則精粗相雜。統計之。精與肥佔十成之五弱。瘠與粗佔十成之五強。水利與農田有特殊之關係。湖塘澳堰。載於舊志者綦詳。但須管理有人。隨時修浚。方可利垂久遠。

農事之比較。江北不如江南遠甚。江北農事。近山最勤亦最早。江南農事。近山者早與北等。而勤亦過之。其次爲腹裏。若下坂則插秧或遲至小暑。且有插秧之後。全不顧問者。一人佃種。輒以數十畝計。力既不勤。糞

尤不多。旱不及車救。水不及補種。卽遇豐稔之歲。秋收亦極減薄。甚可慨也。農具約分四類。關於農具者。如鐵鋤犁手車脚車牛車苗車耨紗稻桶穀籮風車穀簞攏篩大篩木臼石臼等。關於墾具者。如耜掘鍬等。關於蠶具者。如蠶籠蠶網蠶廚桑葉篩繅車洋式繅車等。關於漁具者。如大網小網游絲網手網滾釣簪蟹口魚鎗等。皆係舊式。

人民對於蠶桑。頗有進步。清光緒初不過長沙一帶。及洋浦沙各處。比戶皆蠶。其餘則零星散落。近年育蠶之家。已遍全境。可謂盛矣。蠶廠則墅溪桐洲縣城大源張家埭。均有開設。蠶戶售繭者。約十之五六。繅絲者約十之四五。惟繅絲因襲舊法。罔知改進。故色澤既不鮮艷。絲紋亦欠勻淨。在杭紡盛行時。銷數尙屬可觀。近則日見鈍滯。是以昔之售絲者。多改爲售繭矣。其養蠶栽桑新法。正在研究。

林墾一項。如壺源大源小源漁山里山各處。向係栽植毛竹。以供造紙。及

其他製器之用。其餘童山尙多。人民狃於舊習。未能如法栽種。自承墾條例頒發。凡有官荒民荒。皆許承領墾種。縣境官荒。向無大宗地畝。山則以花塢之百餘畝爲最多數。民荒自洪楊後。五十年來。已盡數開墾。如江南例景九砥柱十一羅山八。江北之靈峯十各莊交界之大培山。佔地不過四百餘畝。山係無糧。但因各莊交界。不啻共有。舊時區劃。爲便於就近人民採樵起見。至今奉若成例。不惟承墾無人。卽有承墾者。亦爲難萬分。惟陽陂湖淤塞各處。約在四百畝左右。其性質與官荒無異。往年經本地人士。稟省試墾。因當地民衆反對而止。林務以苗圃爲先導。現方從事籌設。從前所辦模範森林三處。一鶴山。一花塢。均係官荒。一大塢。係民荒。現在有形迹可尋者。僅花塢一處。然土質瘠薄。發育甚微。其餘兩處。更無成效也。農民對於植茶。向視爲特種生息。近山各處。栽種尤夥。而產茶最多者。首推江北一帶。全邑茶行。達三十餘家。人民皆以鮮葉略加

烘焙。售諸商人。再由商人重製。運銷杭滬等處。

漁牧事項。各船戶皆撐搗小船。是謂九姓漁船。自嚴東關而下。各埠皆有停泊。在縣界內者。約九十餘戶。船以百數十計。有一戶兩船至三船者。謂之子母船。捕得之魚。隨地出賣。近年價額漸高。或係捕獲減少所致。然亦時多時少。未可預言。但一船日用所需。以銀洋三角爲度。則每年所得。必有一萬數千金。此推測各漁戶生計上言之也。至畜牧除家畜豬羊雞鴨外。無專營者。

農產物之主要者。如穀麥繭絲茶桑桐菜子糯穀等類。普通者。如蠶豆黃豆蘆粟細粟玉蜀黍大麥苕麥甘儲芋茆胡麻烟葉以及瓜菜豌豆茄子等類。以本境所出穀麥雜糧計之。民食每虞不足。

佃田向分兩種。一曰租。一曰典。租則當年償穀。典則先一年繳價。全縣皆同。惟龍門一帶。有所謂小賣者。係租戶與租戶之轉移。其始不過預繳

租金。使此田不復爲他人租得。至今視爲成例。非經過小賣。雖有地權。而無行使地力權。惟行使地力權者。仍須向有地權者繳租而已。至縣治虫委員會。早已設立。將來成效。不無可觀。

人民除種田養蠶外。均以造紙爲業。其出色之工作物。有一種細竹簾造紙器。民國十五年。北京國貨展覽會。得特等獎牌。其餘京高紙昌山紙連皮紙各種包紙。亦得二三等獎牌。普通者。如桑皮紙料。剝去桑條。採取擗葉。以待溶化。坑邊紙料。曬乾稻草。攪和石灰。以待製造。又赤松山之農民。兼造穀籬及傘骨。抱家沙何家埭之農民。兼造簞箕。永嘉橋之農民。兼造水車。皆於農隙爲之。藉補生計之缺。此又以農而兼工者也。

工業習慣。有包工。有僱工。包工者。工食在內。僱工者點工供食。當包工僱工之際。或寫承攬。或憑薦保。乃一定之手續。若夫師弟關係。無非三年徒弟。四年伴作。未滿師之先。不能自由。工廠。前雖創設平民習藝

所。暨女子習藝所兩處。卒以辦理不善。銷貨遲滯。停止已久。公帑支絀。無力再辦。實爲富邑工業之大缺點。

商業。視年歲之豐歉爲轉移。年豐則生意盛。歲歉則生意衰。近年來水旱頻仍。各業凋敝。典業自十五年兵燹後。典當兩家。均已收業。現尙乏人繼起。一般貧農。大有告貸無門之概。市鎮。以場口鎮。大源鎮。較爲繁盛。其餘如里山高橋新橋青雲橋等。皆偏僻有限。本邑上通金衢嚴。下達蘇杭紹。水程有輪船循環。陸路有汽車往返。交通尙稱便利。商業賴以維持。惟金衢嚴之出品。紙米柴炭木火腿等貨物。均由水道運至杭之江干。本邑不過一過路碼頭。至本境所出之大小草紙黃白各紙及絲茶等大宗貨物。均販運於蘇杭紹各處銷售。此外尙有冬筍石灰運銷隣縣。全邑灰窯。計三十餘座。產灰之最多最佳者。首推青雲橋。其入境者。如南北貨洋廣貨大布小布藥材磁器等類。至上江靛青雖大半入境。而仍由本邑靛行運售出。

境。運脚有一定章程。或火車。或海船。或民船。照章給發。兩相允洽。惟靛業自洋靛行銷後。靛行頓形蕭條。如不設法改良。斷難持久。錢幣。現洋紙幣。一律通行。小銀角及銅元。隨時漲落。城鄉市鎮無異。商業習慣。以權衡而論。有用十五兩三錢作一斤者。有用十四兩四錢作一斤者。有用十六兩作一斤者。有用十六兩八錢作一斤者。買賣均各相安。三節收賬。年終清賬。並有一月一收者。交換大都以錢洋易貨者居多。以貨易貨者少。代辦亦尚信用。各業有各業之團體。如靛業南貨業酒業京貨布業米業等。皆限於一業。自設商會以後。萃各業商人。成一大團體矣。

第四篇 餘杭縣

考餘杭爲禹杭舊地。秦置餘杭縣。元明清均屬杭州府。民國廢府制。直隸於省。疆域。東界杭縣長橋。西界臨安杜鵑橋。南界富陽篠嶺。北界武康馬頭山。東南界杭縣西溪。西北界安吉獨松關。從前自治區域。分城區東

區南區西區北一區北二區。面積計二千八百平方里。田佔十七萬六千八百七十二畝。地佔五萬四千二百九十八畝。山佔二十二萬六千六百十六畝。蕩佔一萬一千二百三十四畝。全境有戶二萬九千五百四十一。有丁七萬一千九百三十一人。有口五萬四千十六人。其中業農者居多數。業工商者次之。

河流。南苕溪自臨安縣來。經石門渡烏龍澗古牛墩龍舌嘴。至瓶窰鎮入杭縣界。支流。北苕溪出獨松關之分水嶺。經淨橋大橋竹山橋陶村入於南苕。南湖納蒼步嶺石孟嶺水。流爲南渠河。卽餘杭塘河。經螺螄港靈源至長橋鎮。入杭縣界。山脉則天目山脉。由孝豐界上來者。曰新嶺。卽銀山嶺。自安吉來者。曰羊凹關。卽銅菱關。地勢自東北步步高上西南。形勢自西北偏斜東南。險要在縣西北七十五里。有獨松關。關路險狹。東南直走臨安。北向武康。西北道出安吉。趨廣德。爲本邑之門戶。浙省之要隘。

又有羊凹關幽嶺關馬頭關新嶺關。均爲出入孔道。

氣候。除非常寒暑外。普通寒暑。照華氏表升至九十六度大熱。降至三十度大冷。民間種作。全賴夏秋風雨時行。庶幾西成有望。若陰雨連綿。則水驟漲數丈。亢旱半月。則河乾蕩涸。

土壤。瘠土佔十成之五。肥土佔十成之三。精粗各佔十成之一。瘠土宜榆橡松竹等。粗土宜茶棉桑麻。

水利有南上下二湖。創自漢時。因三茗水合。奔勢益湧。直流瀑漲。不能遽泄。則泛溢爲害。於是築南上下二湖。爲石門函。引流而囊蓄之。以殺水勢。蓋自淤積有區。非特餘邑田疇虛舍。少受汪洋漂沒之患。卽杭嘉湖三郡。咸被其澤。又有南北中三茗溪。灌溉田七萬七千五百餘畝。又有南渠河。灌溉田一萬四千六百餘畝。至陡門堰筧溪河衝要之處。不及備述。農民耕耘。多沿舊習。一般老農播穀分秧。耨田耘草。較之普通農民。收

穫較豐。工作亦見精良。農具。如鋤頭、芟子、四齒鐵扒、雙齒鐵扒、刮子、耨扒等。蠶具。如大蠶、小蠶、繭切葉、墩切葉、刀、小蠶筐、三脚架、火缸、大蘆簾、小蘆簾、葉筵、簾等。漁具。如打網、夾網、扳網、游絲網等。惟漁具購自紹郡者多。漁戶雖能自結。總不若紹郡之精良。蠶具、墾具。皆出自本邑。

育蠶之家。向稱興盛。近來逐漸加增。更有進步。其採集種籽之法。就鮮繭中揀選白淨堅厚者。留以生種。薄弱者繅絲。且生種之蠶。自筮、烏飼、葉眠、繅過、繅及火候等。在三更屬注意。故所產之種。類多精良。所以杭嘉湖業蠶之戶。必欲來餘購種。不待繭子落山。即羣來訂定。惟恐蛾子落紙。欲購不得。售種之家。亦以利之所在。不肯輕易新法。

林墾一項。官荒民荒。約計十一萬四千四百餘畝。土性礮瘠。開掘維艱。故認墾亦屬寥寥。苗圃及模範森林。已籌經設成立。種植茶樹。類多外來客民。土著植茶甚少。均以普通法種之。

漁牧事業。水產魚介苔藻。惟南渠河及官河中所生。均由魚戶自行割取。魚蕩東鄉最多。西北次之。蕩戶均於春間拋入魚秧。初夏刈割苔藻。漸次喂養。至冬季網捕。大者售市。小者留蕩復養。至畜牧有豬羊鷄鴨等物。無專營是業者。

農產物。米豆麥玉蜀黍番薯芝蔴芋苧桑葉茶葉等類。惟邑中山多田少。民食素稱不足。全賴外來客米接濟。

農民佃田。有租典兩種。租田按秋收之豐歉。定繳米之多寡。典田視田畝之優劣。定典價之高低。典價愈高。付錢愈早。甚有上年冬季預付。亦有本年分兩季付楚者。租息不清。即行另招他佃。禾稻生蟲。多由雨後陽氣不力。潮濕蒸化而來。無可預防。驅除之法。大都以石灰雷公藤汁殺之。工作物。習藝所籐竹料。出有籐芯編成各色花樣。可稱出色。又造有荷包床四方花椅推車等件。其普通者。種類甚夥。難以備述。其外來者。有綫

衫褲線氈等物。

工業習慣。傭工皆憑薦保。雇傭工資。視生活定之。學徒習藝。亦憑荐保說合。三年內無工資。學成後。留作幫師。或自出營業。或幫人工作。悉聽其便。

商業盛衰。係乎本邑出產絲茶紙棉各物。從前絲茶紙棉銷路暢旺。商市亦隨之大盛。光復後。上項各物。倏然停滯。市面亦衰落。近今稍見起色。然不如前之興盛。市鎮除城區外。東鄉有閑林倉前二鎮。北鄉有橫湖雙溪二鎮。其入境貨。米布南貨醃臘等物爲大宗。出境貨。本邑絲茶黃白紙南場紙大簾紙毛竹等物爲大宗。其經過者。南貨醃臘布疋等物。茶葉上市。有往臨於新昌等縣肩販茶葉。至本邑閑林鎮茶葉行銷售。閑林有船販南場紙往江蘇嘉湖等處銷售後。轉運米麥黃豆等物回餘行銷於市。至運腳價值。省垣便於船運。其價輕。由肩挑至臨安。其價貴。錢幣市面。隨時漲落。

。未能一律。

商業習慣。各商店購貨。直接向省城上海批發。並無交換代辦手續。其貨物均由內河小船裝運而來。團體。除縣商會外。另有繭壳業木業米業當商醬園南貨業菸業藥材業醃臘業茶筍業磨坊業布業各公所。以資聯絡。

第五篇 臨安縣

考臨安。後漢析置臨水縣。晉更名臨安。唐復置臨水。旋改臨安。宋改順化軍。尋廢軍復縣。南京以爲府名。元明清因之。民國成立。仍名臨安縣。疆域廣五十三里。縱一百一十里。東至餘杭縣杜木橋。西至於潛縣橫塘。南至新登縣三口。北至孝豐縣倪嶺。東南至富陽青樹嶺。西南至新登縣笏嶺。東北至餘杭縣進賢村。西北至於潛縣西天目山。從前自治區域。東爲城區安南區穀靈區。南爲新奉區慶鳳區。西爲金永區福興區。北爲高慶區山川區。面積三千四百平方里。原額田地山蕩。一千九百五十八頃五十

三畝零，田九百八十二頃三畝零。地三百九十五頃九分零。山五百五十五頃三十八畝零。蕩二十六頃五十七畝零。歷年報墾。共一千七百六頃三十三畝零。計居原額十分之八七。全境有戶一萬七千六百三十九。有丁五萬一千八百零七人。有口三萬四千三百十七人。

河流山脉。苕溪之水。發源於天目。羣山萬壑。合注江湖。天目之山。分三大脉。一支自東南行。經縣之橫嶺白雲諸峯。飛舞而至錢塘。一支自東北行。經縣之大錢徑山而北。孝豐以外諸山。皆其所孕。一支自西南向東行。經縣之穆公雙林諸山。包含於南北二脉之中。溪流瀉洩。蜿蜒而下。其勢甚急。南北二鄉。多業紙者。利用之。徧設水碓以舂竹。約三百家。橫畝鎮之業木香粉者。用水碓以舂樹葉。亦有二百家。此皆得天然之利也。

地勢西北鄉爲最高。南鄉次之。東鄉稍下。居萬山之中。以山氣之消長爲

寒燥。大都最高溫度。達攝氏九十度。最低三十度。溼度與溫度相差無幾。風霜雨雪。無大變易。惟畏旱不畏水。二十年中。水旱偏災時有。近年來已稍稍發現螟患。但收穫尚佳。

土質。十分之六係壤土。肥而精。宜稻麥及普通植物品。十分之三係砂質壤土。瘠而粗。祇宜種雜糧。十分之一係砂質礫土。與農產物不相宜。農民均狃於舊習。無改良之可言。

水利。山高水陡。洩而不停。灌溉農田。全資堰蕩。由各田戶捐穀易錢歲修。農事將興。舊例在四月初一由縣出示封堰。不准雜物出入。農事告登。舊例在八月初一由縣出示開堰。堰蕩甚多。不及備述。

近年來客民遷入日多。耕耘之事。互相競勝。故尚精細。然其農具則皆用舊式。如墾具則用舊式犁鋤耙。蠶具則用舊式蠶架蠶箔繅車。漁具則用舊式魚網魚叉。蠶桑一項。向稱茂盛。近更發達。蠶種多購自餘杭。自製者

少。人民對於新法養蠶。均以爲不便。蓋編氓之家。屋宇小而資本微。故憚於效法。

林墾。官荒無。民荒間有。亦無大片段地。苗圃已設立一處。墾地三十畝。苗木分配各區栽植。尙有效果。模範森林。亦祇縣政府左右一處。計地三十二畝。生活力尙屬強盛。農民種植茶麻。雜樹居多。近年來尤以植茶爲最。植茶方法。先播種於田圃。三年移植山間。惟製茶不甚講求。粗細不一。其細者銷至上海。每年約出產二十萬元。

漁業素不講求。近年來人民各在其私有蕩中。稍有養蓄。亦爲數不多。市上除溪魚外。大都均由餘杭來。就地出產者。春夏有黃鱔。秋冬有鱉。至蓄牧。山地爲宜。易於蕃育。而亦無兼營者。是棄其自然之利也。

主要及普通各農產物。爲粳稻糯稻大麥小麥蕎麥蠶豆豌豆黃豆青豆玉蜀黍蘿蔔芝蔴山薯白果棉花白菜各種瓜等。皆供本地之食用。豐年僅足自給。

若遇荒年。則不足。邑中無正式米舖。須至杭墅河購辦。以資接濟。農民已產甚少。半係佃人之田而耕種之。佃田之法。佃戶應繳佃價一次。每畝一元至二元不等。謂之押租。自佃之後。上等田常年納租穀約二百觔。中等以下。常年納一百餘觔。荒年則落田均分。東南兩鄉。用石灰壅田。西北兩鄉。用石礮及石膏壅田。防災方法。以儲水爲第一主要。蟲病則委之天災。無驅除預防之法。團體已組織農民協會。於螟害亦稍知研究。工作物無出色者。普通以紙爲出品大宗。有五色薄胚海放昌山折表黃元。及皮紙白紙黃紙數種。上銷至徽甯等處。下由簾運至餘杭之平窰。此外惟造紙之竹簾。較他處爲細。又竹工編製籃筐。尙不惡劣。均家製自用。並無銷場。其餘用器。物精者。雇工家製。粗者均來自餘杭。木香粉爲臨邑專門之利。其製法以各種樹葉。在水碓中舂杵。取其飛揚之末屑。和水搗之成粉。而爲各種供獻所用香類之原料。業此者均在北鄉。製造戶約四百

餘家。往年價額。每年可達十六七萬元。近來逐漸減少。亦在十萬元左右。僱傭習慣。如篾作木作泥作成衣作箍桶作。東陽人居多。甯紹人間或有之。每日每工自二角至三角。均由雇用之家。供給飯食。收用藝徒。不貼飯資。三年滿師。粗工以四年半爲滿。第一次生意。由業師保薦。縣內無工廠。僅私設之紙廠。磚瓦廠等。

商業。約分絲業笋乾業紙業茶業青黃豆業木香業竹木柴炭等業。遠者銷至蘇滬徽甯。近者至餘杭而止。以甯紹徽州人爲最多。絲繭年銷三十萬餘元。各種紙張。年銷四十萬餘元。次木香粉。年銷十萬餘元。次笋乾年銷二十萬元。次青豆黃豆。年銷六萬餘元。次茶葉。年銷約二十萬元。次黑白芝麻。年銷一萬三千餘元。此外竹木柴炭。約計五十萬元。其餘貨物。均由外來。至經過者。於潛昌化甯國徽州貨物。來往均由驢負。

市鎮。以城區西門外爲城鎮。東爲青山鎮。西爲青雲橋鎮。南爲亭子頭鎮。北爲橫畝鎮。商人販運之道路。出西門通於潛昌化徽州甯國一帶。出東門通餘杭水路。如紙業青豆業木香業。上運至徽甯。下運至餘杭。竹木柴炭及零星山貨。半銷本境。半至餘杭。有用船簰由青龍口至餘杭者。有山肩挑及驢負至餘杭於潛者。其運價視道里之遠近計之。錢幣照餘杭市行情。漲落一律。

商業習慣。進出買賣。一概劃一。均係自行交易。無代辦人。絲茶主顧。均在蘇滬。團體。西門內設有商會一處。附設城西學校。屋宇不寬。鑛業。前清時有富陽人周姓。在甘山脚下。劃地數十畝。集資開掘。據稱確係白煤。可爲燃料之用。卒以資本不繼。中途停止。至今無後起者。

第六篇 於潛縣

考於潛。漢以後隸丹陽吳興錢塘餘杭等郡。唐置州。後廢州爲縣。隸杭州

。南宋屬畿內。明初改隸杭州府。清因之。民國廢府制。直隸於省。疆域。東至橫塘嶺。與臨安縣分界。南至印渚埠。與分水縣分界。西至界頭莊。與昌化縣分界。北至千秋關。與安徽甯國縣分界。照從前劃分自治區域爲五。第一城區。第二藻溪鄉。第三柴溪鄉。第四太陽鄉。第五泗洲鄉。面積約計六千六百六十平方里。田地約佔十分之三。山約佔十分之七。全境有戶一萬二千七百十九。有丁三萬五千零三十二人。有口二萬四千六百十六人。其中從事農工商各業人數。除女子老幼殘疾不計外。約居全縣人口十分之三。

地處山間。本無河道。惟山水自高下流。衝激成澗。合衆澗而成溪。厥名天目溪。可由縣北后渚橋。舟行至分水縣界之印渚渡。計程五十五里。以下直達桐江。可爲工業上利用之水力。僅有水碓碾米一種而已。至山脉最著名爲西天目山。在縣北四十五里。與東天目山對峙。高三千五百丈。延

袤五百五十里。連亘杭湖徽甯四舊府屬。

地勢。上達黟歙。下繞杭湖。後界宣城。前隣建德。故北鄉最高。南鄉最低。至於險要地點。以距縣五十里之千秋關。爲浙省西北屏障。孔夫關。豪遷關等次之。北鄉山多土厚。故森林茂盛。東西南三鄉。土地較爲平曠。大抵從事農桑者居多。

高山環繞。較爲寒冷。最高溫度爲華氏八十八度。最低三十二度。最高濕度爲百分之四十。最低爲百分之十五。嚴冬得雪。可免蟲災。晚春多霜。有害農作。雨水過多。山洪陡發。沖決田地。若過少又易致旱荒。然因溪水宣洩甚易。與其旱也甯水。故歷年災歎。大都患旱也。

土壤一項。大約溪澗兩旁之田地。土質較肥。土粒亦較精。若山麓接壤之地。則土質瘠薄。土粒粗鬆矣。肥土宜播種稻麥豆菜桑樹等類。山地僅植茶柳桐竹及其他樹木。約計肥土佔十成之三。瘠土佔十成之七。

水利如城西觀政堰。溉田一千一百餘畝。又黃山堰。經邑街導入黃山坂。灌田七百餘畝。自此以下。則有官堰扶西堰葉村堰城后堰。灌田俱在二三百畝以上。他如東西北區之支流。或灌數千畝。或灌數百畝。近因洪水爲災。屢被冲坍。灌溉水量。不及從前矣。

農民生產。全恃農業。邑中之田。多種秈稻。其種糯稻者。不過十成之一。穫稻之後。約有十成之二三。播種小麥油菜。名曰春花。多不分租。佃戶利之。在山坡者曰塢田。歲收四五成。近溪澗者曰堰田。歲收七八成。耕耘均用舊法。每年收穫稻麥各一次。農具。如墾具則有犁鉏鎗鏟鋤鎌稻桶篋遮篷篩草耙草刀柴刀等類。蠶具如大筐小籠筐架蠶橈繅絲車葉部葉籃桑剪籬簾等類。漁具有網兜等類。均係本地出產。照舊式製造。尙無缺點。近年育蠶之家。較前發達。桑葉產量。亦逐漸增多。惟風氣未開。人民對於新法養蠶栽桑。多不信用。非設法勸導。不足以啓其知識。至於蠶種

均購自餘杭新昌曠縣。近來有多育餘杭種之傾向。

林墾以地勢位置而論。最爲相宜。惜地方人民。不知從事經營。全縣有山五萬餘畝。而有森林者不及十分之一。牛山濯濯。所在皆是。近十餘年來。外縣移住之民。多租山開墾播種苞米桐子。以西南兩區墾種最廣。桐子一項。出產增加尤鉅。占農產物第三位。但祇知開墾。而不隨植木苗造成新林。殊爲可惜。本邑產茶不豐。惟南區川前川後長前三鄉。出產較多。均係綠茶。質地尙佳。尤以天目山頂所產者曰雲霧茶。善消積滯。不可多得。時屆穀雨。婦孺老幼。均上山採茶。計斤給工。鄉人大半賴以資生。惟培植製焙之法。不知講求。故出產未能豐盛。近有徽商收買鮮茶。設廠製造。但廠所不多。利益亦屬微薄。

漁牧一項。以羣山環繞。水源出自天目。溪身狹小。水淺流急。沙礫充塞。水不停蓄。魚介稀少。苔藻不生。間有池塘。無非蓄水以資灌溉。不能

養魚。農民從事畝。對於畜牧。向無專業。猪牛產自本地。滋養亦未見繁盛。

農產物。以穀麥豆苞米桐油菜子爲大宗。於朮青荳山核桃等次之。北區嘉前嘉後二鄉。出產筍乾。商人收買。販售杭滬等屬。爲數甚鉅。穀麥苞米三種。豐年統計百餘萬石。惟本地絕少囤戶。均運銷於紹屬。倘遇荒歉。則民食遂虞不足矣。

租田習慣。視佃戶之勤惰。爲佃種久暫之標準。至遇水旱偏災。人力無從救濟。將來水利興修。或可稍資補救。田稻蟲病驅除方法。除捕殺生蟲外。至秋收後。剷除害根。以期滅絕而已。

農業團體。從前雖有農會。但因毫無成績。已不存在。農民協會。尙未組織。至農事試驗場苗圃。從未辦過。模範森林。亦有名無實。

工業甚不發達。現在尙無製造工廠。工藝出品最著名者。僅北區波后嘉后

惟后三鄉。家庭手工所製之桃花紙。係採穀樹皮製成。以春季造者最佳。故有是名。杭甯紹三屬傘舖悉資之。而用以襯衣。最爲合宜。又採桑皮造者爲桑皮紙。製扇面用之。桃花紙每年產額約七八百條。每條三千張。價值八元四五角。桑皮紙年產三四百條。每條三千張。價值四元五六角。前項皮紙。於潛出產者。較他處擅名。以製造之原料及技術。均非他處所能及也。此外普通木器。如桌椅床架箱盆桶犁耙風箱水車等類。竹器如簞箱籬篩籃箕筴等類。鐵器如刀剪鋤鋤斧鋸鑿鉋等類。皆係自購原料。僱工製造。至外來者。有皮鞋洋傘毛巾肥皂等類。可以通銷。銷數尙廣。

民間僱傭習慣。工資按日算給。商店僱工。以年計算。訂立成約。與店夥受同等之待遇。工作期間。久暫向不規定。至各業工人所帶藝徒。三年內所得工資。藝徒僅得少許。大部分歸諸藝師。學業期滿。方可自由工作。商業以左通杭湖。右通徽歙。南通分水新登。北通甯國孝豐。實商旅往來

之要道。自前清遭洪楊兵燹後。市鎮爲墟。雖歷年經營。仍未能恢復舊觀。城區店舖。約五十餘家。其餘東區藻溪鎮。南區印渚鎮麻車埠。西區太陽鎮。北區后渚鎮。少則十餘家。多亦不過二三十家。入境之貨。如食鹽糖酒洋貨布疋南貨洋油豆油藥材烟葉磁器等類。出境者。爲穀米豆麥繭絲桐油桐油柴炭松杉小筍乾桃花紙桑皮紙等類。至經過者爲徽州之茶葉昌化之柴炭等類。均屬大宗。

商人販運貨物。水道經分水至桐廬。直達杭紹等處。陸路則北通甯國孝豐。西通昌化。東北通臨安。直達餘杭。其運腳價值。水道由杭紹至桐廬。由桐廬至本城。陸路由杭州至餘杭。由餘杭至本城。均以道里之遠近。計算多寡。錢幣行情。市面時有漲落。不能一定。

商民買賣。向係現錢交易。惟辦貨批發。間有掛欠。上行賬款。照舊歷端陽中秋年終結算歸清。如交換代辦運輸貨物等事。有用票據者。有口頭約

定者。商家普通習慣。與杭紹比較。無甚差異。團體有商務分會一處。

第七篇 新登縣

考新登五代梁開平初改置。宋復改新登爲新城。元明清因之。民國避重名復改爲新登。疆域。東界富陽衆團石碑。南界桐廬白峯嶺。西界於潛寶福山。北界臨安金嶺。此爲四正。至東南界富陽高平嶺。東北界臨安吳村。西南界分水桐嶺。西北界於潛浮雲嶺。此爲四隅。照從前劃分自治區域。計城區新南區安中區嶺西區。面積一千七百五十平方里。田佔十四分之五分八厘二。地佔十四分之三分六厘。山佔十四分之三分五厘。塘則照田納稅。佔數已計在田內。全境有戶一萬二千四百三十六。有丁三萬四千六百十五人。有口二萬五千五百四十五人。其中業農者。居百分之六十六。工居百分之四。商居百分之三。

河流。縣西北之葛溪。發源於百丈嶺。逶迤西南行。入雙港口。縣東南之

松溪。導源於臨安之綿溪南行雙港口。自松葛二溪至雙溪口會合爲龜江。曲屈南行二十里。至上港口入桐江。此爲境內之經流。其餘細流。支分派別。不能枚舉。均入松葛二溪。至水之堪爲工業上利用者。僅有春穀之水碓。造紙之洗料而已。

山脉。自天目山分支。至青牛嶺入邑境。析而爲三。峯巒起伏。縱橫森峙。而脈絡之可尋者。中支西來。結束爲縣。左右二支。勢若拱抱。其轉折處。添出無數山阜。形雖錯雜。而脈仍一貫相連。

地勢。西自巖石嶺以上最高。多邱陵斜坡。南自淩川而下最低。常有水患。其居中各鄉。平原居多。比較略佔優勝。至其險要。西有巖石嶺。又西有馬嶺浮雲嶺。西南有桐嶺白峯嶺。南有將臺山高平嶺。北有黃嶺。

地在叢山石齒間。最高溫度有九十六度。最低僅七度。風雨常有。雹不多見。霜雪則因時而異。與農業上無特殊利害。惟遇大雨爲災。因地勢高阜

。山洪瀉下。沖沒田廬爲最甚。據老農云。夏天溫度不高。禾不發育。冬寒無甚損害。逢立春及二月二三月三諸日下雨。歲必歉收。風偃禾稼。雹損花息。人所共畏。冬雪多則歲豐。春雪多則歲歉。凡此皆關於農業之利害也。至於旱災。以民國三年爲最烈。水災惟縣南之太平昌西二鄉。時有所聞。以其地居一邑之下游也。

土壤。境內肥土約佔十成之四。瘠土約佔十成之六。肥土性粘膩。種植宜稻。瘠土性燥而鬆。宜豆麥苞蘿穠稌等雜糧。桑柘竹木。亦甚相宜。

水利。有胡公渠溉田五千畝。劉公堰溉田千餘畝。新堰灌田甚廣。官塘溉田八頃八十畝。將來如疏濬。其經費由受益田畝攤派。其餘塘堰數十。範圍甚小。不及具載。

春夏之交。蠶事甚忙。農事亦相繼而至。播種以後。刈麥插禾。村少閒人。凡耕田均以牛。初則將土翻犁。繼之以鋤。終之以耨。使土質細而軟。

然後插禾。經過旬餘。拔草耘田放料。均宜及時。凡耕地亦牛犁之後加鋤下種。其苗長至五六寸時。以耜削之。使其土鬆根動。易於發榮滋長。並可除去害虫。田家成法相傳如此。農具無新發明之器械。其沿用者。墾具如犁鋤鉞鏟等類。或僱工自製。或購自外縣。又地處山僻。罕有以漁爲業者。所有漁具。大率用網用釣。均係舊式。

育蠶之家。近因繭行發達。蠶亦增加。是以蠶事頗有進步。種子除自備外。非購自本邑。卽來自嶧縣。至於養蠶栽桑。尙少研究新法。

林墾一項。境內官荒山地不過十餘畝。民荒地約四百畝。均係砂淤石礫。難以墾種。是以無人承墾。造林擇定公有民有山地兩處。共計六十餘畝。現已有人墾種。設法栽植。又永昌東洲新登數鄉。植茶方法。頗能研究。三月栽種。及長則施以肥料。砍去細雜柴薪。採茶時又禁攙和其他嫩葉。惟烘焙仍照舊法。

漁牧兩項。以溪流一線。僅足灌溉田禾。不能蓄養水產。間有鄉民值農隙時於各處溪中或田間。捕獲鱗介。攜往街市售賣者有之。並無專營水產之人。至畜牧普通以牛與豬鷄爲多數。皆由自己飼養保護。

農產物。稻爲主要。其餘如大麥小麥菜子蠶豆黃豆苞蘿穠榛芝蔴粟穀蕃芋白菜瓜蘿葡等爲普通。自用多。則出售。民食豐年尙有餘。惟現在社會生活程度日高。家無蓄積者居多。一遇災荒。卽難支持。

全縣農田。向以八擔爲一畝。大於他縣一倍。佃田習慣。視田畝之肥瘠。每畝每年納租。有三百二十觔者。有二百八十觔者。惟須當時言定數量。秋收後挑送上門。過風過秤。若遇歲歉。難免短少。又有一種佃田。出錢而不出穀。名爲典租者。每畝年約需洋五六元不等。凡典租金須預繳半數。亦有全數先繳者。但承種人無論償穀償錢。須有契約。至於設堰挑塘。預防天旱。若遇山洪暴發。絕無救濟方法。遇有虫害。用菜油和水。以噴

筒撒布苗上。使嗅其氣而化。或用竹枝將稻葉挑剔。以斷其絲。爲驅除方法。凡播種時。必於秧田先下石灰。勤除雜草。其插禾及耘田拔草時。亦須撒布石灰。以殺虫草。亦預防災害之一法也。

工業。除縣立平民習藝所外。無別項工廠。民間紡織。均屬粗布。惟習藝所出有愛國布及花格子布。又紙有三號屏紙京邊紙桑皮紙蠶生紙雨傘紙坑邊紙及磚瓦粗碗等。出貨不多。皆屬普通。無出色者。

人民日用器具。如木器竹器。均雇匠自製。銅錫鐵器等。亦有工匠上門包做。多來自舊金華府屬。其餘均購自店舖。少外來者。至其習慣。人民對於外來之工匠。包工則有承攬。零工則給酒飯工資。無論師弟。一律照給。地僻而小。商業素不發展。經理商店之人。多自外來。從前人民以經商爲末務。故除布帛菽粟貿易外。無商務之可言。自各處重商主義。影響及於境內。於是始趨重商業。迨蘭行盛行。而蠶業亦日有起色。其入境者。

布疋以外。南貨中之豆油糖燄。洋貨中之洋油肥皂等爲大宗。其出境者。絲茶繭子柴炭竹木以及坑邊紙桑皮紙石灰等爲大宗。如遇豐年。則穀米出境。亦屬不少。至經過者。則於潛分水臨安亦有竹木柴炭。經過本邑松葛二溪。由龜江而達錢江者。但爲數不多耳。

市鎮。除城市外。如縣西之三溪口洞橋鎮。東北之松溪鎮永昌鎮。南之淶川埠。皆寥寥小市。惟淶川埠可通舟楫。餘祇通竹筏。淶川爲一邑山貨總匯之區。亦僅設有牙行二家。無商埠之可言。其商業之較大者。約可分爲八種。如絲業蠶業茶業柴炭板木業白料青竹業草紙業桑皮紙業石灰業。以上各業之貨。均係土產。故營商者亦以本地人居多。絲繭茶銷售於上海。紙則運銷甯波紹興等處。竹木柴炭石灰。運銷隣縣及甯紹等處。

商販道路。西北境之山貨。由葛溪直下淶渚過行。始易簾而船。由龜江而入錢江。至輸入之貨。或進自龜江。易簾而送各處。或來自富邑。肩挑而

抵街衢。甚不便利。至運費。凡外江入境之貨。載至淶渚埠。易船而簾。每簾載重量。祇可千觔左右。運至城市。每簾需洋一元二三角。其由富陽肩挑到城者。每百觔大洋一元。大約肩挑貨不過十五分之一。至出境山貨。大約每簾每十里需洋八角左右。至淶川埠必須過行上塘。惟坑邊紙一項。由客商以竹筏直送到船。而不過行上塘。此係常例。並無爭執。市面錢幣銀元小角銅元。均隨時漲落。惟繭行絲商付出之尾數。小角不貼水。銅元當十。無折無扣。團體。有商務分會一所。慣例以穀米交換其他貨物者有之。委辦事件。必須素所親信。或有來往之人。習慣上有盡義務。亦有受報酬者。關於主顧一項。近已由商會議定規章。如本店一老主顧。前賬未清。復改他店交易。他店若漫與往來。則其前所欠之賬。應向該店索取。此通例也。普通賬目。分作三節收取。端陽中秋僅完半數不等。至年終必須一律完清。商店多係徽州紹興人。故言語性情。無隔閡也。

第八篇 昌化縣

考昌化漢爲於潛地。宋始改名昌化。元明清迄今。俱仍舊稱。疆域。東界頭溪。與於潛縣界。東南洪嶺。南沈嶺。與分水縣界。西南貢嶺。與淳安縣界。西昱嶺關。與安徽省歙縣界。西北厥嶺。與安徽績溪縣界。北黃花關。與安徽甯國縣界。東北羅紋嶺外。又與於潛縣界。從前自治區域。分城區(併東區)南區西區北區。面積計四千三百五十平方里。田約佔百分之三十五。地約佔百分之二十八。山約佔百分之十八。蕩約佔百分之十九。全境有戶一萬七千九百零六。有丁四萬二千九百六十一人。有口三萬五千五百四十五人。業農者約百分之四十八。業工者約百分之十九。業商者約百分之五。業鑛者約千分之一。

河流。僅湯家灣至大漏灘河流一道。計程五十里。其間造有水碓十餘處。皆山間小溪。舟不能行。山脉發源於安徽黃山。由邑境迤邐達於天目。百

丈千頃柳相諸山。其高度皆在一千五百丈以上。

地勢。邑西之昱嶺關。至邑東之蘆嶺關。爲自徽至杭要道。昱嶺險要。與於潛之千秋關。餘杭之獨松關並稱。惟自西至東。道路甚爲平坦。間有一二小嶺。並不高峻。其餘南北兩方。則山路崎嶇。不易行矣。

地處山麓。最高溫度在攝氏寒暑表九十四度。最低冰度下三度。霜雨下降。情形與省垣相同。雨雹時甚少。雪則以境多高山。春季穀雨前。間有積雪。田畝喜雨惡旱。以旱易爲患。水退甚速也。

土壤。山多沙土。略帶黏土。田爲黏土。略含沙性。溪流則純係沙質。田種宜稻。山種宜松杉等木及山核桃莢肉。

水利。全境溪凡三十。自安徽績溪縣流至績嶺南入界。由東北流旋折至洙柳鎮。計四十八里。水勢湍急。舟楫不通。自洙柳至湯家灣。計十七里。名無他溪。僅通小舟木簰。自湯家灣至平葛橋。計十五里。名晚溪。自平

葛橋至烏龍堰。計九里。名雙溪。自烏龍堰至河橋鎮。計八里。名三溪。自河橋鎮經大漏灘至柯老相公殿。計十八里。總計可通舟行者六十七里。餘皆小溪。不能行舟。其間堰共七十有九。計塘三。塘用以蓄水灌溉。大者溉田百餘畝。小者不過數十畝。堰則用以障溪流之水。免致有水時被冲。無水時立涸。常年小修。由有關係各田主任之。

農民於栽種耕耘等事。皆墨守舊法。農具如水車耙耜茅刀鋸刀柴刀籬頭鐮頭刮子山耜兩齒鉗風箱稻桶篩類箕類。蠶具如蠶篩蠶架。漁具如網魚叉等。多係舊式。無新發明者。

蠶業。在杭屬中。本非興盛之處。現在稍知競爭。較前已有進步。蠶種採自餘杭。絲由各戶自做。近年開設繭行兩家。售繭者約十分之四。人民安於習慣。對於新法養蠶栽桑。不知效法。亟須創辦蠶業傳習所暨模範桑園。以示提倡而資改良。

林墾。荒田照原額計七千一百九十二畝。地三千四百六十六畝。因係畸零散處。現雖逐漸給民領墾。然爲數無多。模範森林。在縣後山創辦一處。計面積五十畝。

漁牧。以邑僅河流一道。水清而溜。且多灘石。無甚水產。間有池養鱸魚。年產不過一二百觔。至畜牧並無專營之戶。普通畜牧。亦無特別保護方法。

農產物。如松木杉木茶葉肉山核桃稻穀小麥等類。價目不一。運銷杭紹甯波等處。本邑所產稻穀。不敷民食。常年尙須取給於潛暨安徽之寧國縣。以補不足。

農業習慣。田畝由業主招人租種。面立契約。每畝年繳租穀一百三四十觔。佃戶有事故或抗租。則更換之。若遇旱年。成災較易。雖有塘堰。亦不足以資補救。水災較旱災爲少。虫及風雹等災則更少矣。

工業。普通工作物之銷行外處者。有銅煖鍋一種。銷稱出色。其餘著名者少。外來者亦少。僱傭習慣。俱係口頭契約。無用書面者。待遇亦無特殊之點。師弟傳授。以三年爲限。限滿卽脫離關係。

商業。自前清遭洪楊兵燹後。蕭條達於極點。雖經逐年經營。以交通不便。難復舊觀。市鎮。除城區外。以南鄉河橋爲首鎮。舖戶亦祇數十家。西鄉之頰口鎮。北鄉之烏石鎮。舖戶更屬寥寥。入境貨。如糖錫箔洋布水旱烟。檉子煤油竹布紹酒豆油米等爲大宗。出境貨，多係農產物。如木炭紙等項。多運銷於杭紹。荳肉運銷於杭甯紹。茶運銷於蘇杭滬。俱係本地人自行運售。並無行號代表名義。惟絲多係外來客商運出。其經過者。僅有由徽運杭之茶葉筍乾等物。至本邑商人運出之木炭荳肉等貨。水路由湯家灣或晚溪雙溪河橋大漏灘。經於潛分水桐廬各縣河道。以達錢江。陸路自西境昱嶺關至東境蘆嶺關。爲徽杭要道。徽商暨邑境之由陸運者。俱由此道

。其運價視道路之遠近。陸路較昂。水路較輕。市面錢幣。銀元銀角銅元。隨時漲落。不能一定。商業習慣。以有易無。交換之道。雖各視其物之所值。而又必須以素相買賣之物爲斷。若運輸則必須自雇船夫挑載。並無轉運公司爲之代辦。

鑛業有一都朱穴莊青山潭鎔鑛。前經開採。因出數不敷開支廢止。又有理同鑛務公司。鑛區八百二十三畝零。其開採最旺時。每二三日可出砂一噸。嗣因出數漸少。鎔值日跌。虧耗停歇。又有十一都鴿山莊大鴿山煤鑛。因交通不便。無人探採。

第九篇 嘉興縣

考嘉興初爲長水縣。備李本吳越戰地。東漢始改嘉興縣。析嘉境西北爲秀水。清因之。民國初合併。改爲嘉禾。因與湘省縣名相同。又改稱嘉興縣。疆域。東至白馬堰及鍾埭鎮。與平湖縣交界。東北至三店。與嘉善縣交

界。西北至濮院鎮及陡門。與桐鄉縣交界。南至沈蕩鎮王道閘。與海鹽縣交界。西南至王店區施公廟橋。與海甯縣交界。北至王江涇區。與江蘇吳江縣交界。從前自治區域。分城區王店新塍雙橋東柵陶涇濮院王江涇廉讓渠東尖墩角新豐新篁栖鳳塘匯三店玉溪鍾埭漢塘鳳石餘賢南匯梅湖池西澄溪。共二十五區。面積計六千零五十六平方里。其田地蕩灘原額共計一百五十二萬三千四百八十三畝零。全境有戶十萬零二百十七。有丁二十五萬一千一百九十二人。有口十九萬八千一百零九人。

境內有二山。一曰胥山。高僅十五丈。一曰艾山。高僅二丈。河流衆多。港汊紛岐。志稱經水數百。支水數千。其名繁不勝舉。今挈其最古最大。統屬諸水者分述之。一長水。發自海甯。貫硤石而入境。北達以入江。二谷水。發自平湖之吳小湖。亦由硤石入境。曲折赴松江而趨海。此二水有合流處。今稱爲海甯平湖運河等塘者卽是。凡屬鴛湖彪湖及各蕩悉屬之。

。再由此分支旁注。引爲溝渠。灌溉諸田。實農業莫大之水利。與工業無甚利用。

地勢。係屬平原。東南高而西北低。在陸無險可扼。惟因水道縱橫。轉可以資扼守。自滬杭鐵道開通。轉運甚便。軍事以時勢爲變遷。似水陸均爲衝要。

氣候溫和。最高溫度在華氏表九十八度。最低二十二度。所最患者爲久雨。因縣境低窪。平時灌溉甚便。一逢澇雨。農田卽被淹沒。易成災歉。

土壤。肥者約十之六。瘠者約十之四。土質潤細。最宜於稻。而桑麥等次之。

水利。沿河所引溝渠。數極繁曠。無由考其原起。所有管理方法。歲修經費。均由附近各鄉分派擔任。

農田以每年耕種三次者爲精。二次者爲粗。但大多數農民。每年僅種水稻

一次。勤者於割稻後播種蠶豆或油菜。農具。治地用犁用鋤。養蠶用架用車。業漁用網用罟。均係舊用物品。價值無一定。

蠶桑素稱興盛。近來採用新法。間亦有之。詳加觀察。似栽桑之培肥搜虫。尙爲適中。而於養蠶未能擇種留良。尙多缺點。至取絲向係沿用舊車。近日添設新式絲廠三家。以資提倡。販賣方法。現在境內有繭廠百餘家。鄉民取其便利。十分之九售繭。十分之一繅絲。

漁業。有天然水產者。如鯉魚鯽魚白魚鱖魚等。年產約八萬餘觔。有由池塘養殖者。爲鯖魚鱒魚鱖魚等。年產約五萬餘觔。至民間畜牧牛隻。以供耕稼。豬羊雞鴨。以供民食。均係沿用常法。並無專營畜牧者。

農產物。以穀麥豆桑葉爲大宗。菜蔬瓜果次之。就本邑人口計之。共有四十餘萬。年歲豐稔。出米二百餘萬石。民食有餘。卽遇歉收。若不販運出境。尙可自支。惟嘉邑農民。多紹興籍者。秋收以後。運回紹興。故嘉邑

生產雖富。而農民實窮。

田產分自種租種兩種。其自行耕種者爲己產。租與他人者曰租田。租田按年收租。視田地之高下。每畝約收七八斗不等。有收三四斗者。曰餘花。其錢糧歸種戶自行完納。至防除害虫等法。多以石灰洋油等物。並燃點誘蛾燈。採捕卵塊。餘無別法。團體。農民協會各區均有組織。但其目的。爲減短租額。而無注意及收量之增加。種植法之改良者。

工業。出色之工作物。銅錫器銷場最廣。又花素各綢。產額在萬疋以上。次爲線絲各襪。產額在五萬打以外。均推銷外埠。爲社會歡迎。大工廠有緯成絲廠。嘉禾布廠。竟成紙廠。厚生及秀綸絲廠。普通者。如本廠所織之愛國布甬布杜紗小布等類。間有運銷他邑。其餘竹木各工作。祇足供本地之用。至由外來者。如染色之顏料。圖畫之儀器。學校之鉛筆粉筆。織襪之洋棉毛絨。製衣之大呢羽毛。縫紉機器。織襪機器均是。

僱工習慣。有長工。其工資按年計算。短工則按月日計算。大抵均有保荐。至待遇視其技藝之優劣。有貧民子弟入店爲徒者。須待三年期滿出師。方有薪工。

商業素稱繁盛。自前清咸同間。罹兵燹後。市面頓衰。近來內港小輪。滬杭鐵路。水陸通行甚便。似商務可望發達。惟連年警告頻傳。影響所及。商務頗屬停滯。市鎮。有王店鎮新塍鎮油車港新篁鎮新豐鎮王江涇鍾埭鎮。餘如鳳橋餘賢埭徐婆寺石佛寺等。均爲鄉村市集。東柵南堰塘匯。均爲附郭市集。入境貨如洋布洋紗洋廣雜貨藥材蘇緞顏料南北貨醃臘紅白糖皮貨磁器黃豆襄餅菸漆桐油等爲大宗。出境貨。絲繭米豆菜子等爲大宗。至經過者。則有茶葉紙竹木等貨。以上各商業。本地人居多。甯紹徽蘇等幫次之。商界之人。坐賈者居其多數。百貨由滬杭各埠及出產地運銷。運價由火車裝運者。依照轉運公司定價。由船裝運者。按貨計值。錢幣視滬市

價爲低昂。團體。在城有縣商會。新塍有鎮商會。另有典業公會。米業繭業錢業醃臘業顏料業酒業肉業等各公所。均依習慣自相集合。交易概用現洋。語言均本地方言。尙無窒礙。現又有各種工會。及各業商民協會。衛生會。航空同志會等。

第十篇 嘉善縣

考嘉善明以前本嘉興地。宣德五年。始析置嘉善縣。仍屬嘉興府。清因之。民國廢府制。直隸於省。疆域。東至江蘇松江縣界。西至嘉興縣界。南至嘉興縣界。北至江蘇吳江縣青浦縣界。東南至平湖縣界。面積九百五十八方里。田地約佔九百方里。蕩約佔十八方里。山無。全境有戶四萬六千九百。有丁十二萬三千二百八十三人。有口九萬七千六百二十八人。其中農約佔十分之七。商約佔十分之二。工約佔十分之一。土地平坦。並無山脈。河道窄小。曲折縱橫。祇供農田灌溉之用。地勢東

南較西北爲高。四境均係平原。無甚險要。因其地勢平衍。河流縱橫。於農最宜。兼之水陸交通。均稱便利。故工商業亦頗發達。

氣候。最高溫度在華氏表九十五六度。最低在冰點以下五六度。適合緯度三十一度零。雨量之多。連綿一月者有之。害及田稻。浸水時間過多。難免發芽之患。如欲改良。非疏通水利。不足以見效。

土壤。均係黏質壤土。地力肥沃。土質精細。宜種稻麥及一切果實。惟酸性太多。亦一缺點。欲求改良之法。當用堆肥或攪入沙土。最爲合法。水利。縣境南鄉數十圩。地勢高厚。河流狹淺。若逢旱歲。小港濱底。易於乾涸。灌溉農田。苦無蓄。至西北各鄉。則又地勢低窪。河流寬大。雨量稍多。低田卽遭淹沒。其故由於水道咽喉。未能暢達直瀉。卽近年以來迭告潦災之大原因也。自光緒年間。蘇省鋪設鐵路。將屠家塘壩斷。而浙西瀉水之門戶。頓形淤塞。所恃以宣洩之六店灣一支。又因鐵路築橋。

港脉填狹。致東向之水。輒爲浦潮所激。一遇霖霖。上游來水匯集。河水頓漲。圩岸爲之淹沒。其他若華亭塘與茜涇塘。以及張涇匯迤東北之支港。皆係瀉水咽喉。昔寬今狹。而西北各鄉一帶。雖經前次撥款。興修圩岸。然非先去障礙之淤泥。斷難收一勞永逸之計。

農民種植。晚稻居多。因蠶事畢後。再行耕種插秧。時約在芒種前後。先行整地。用犁鋤等耕鋤土壤。再用碎土器粉碎土塊。使地面均平。而後播種子於作線上。以一定之距離。點點播下。每一熟耕耘三次。除去雜草。使之十分蕃殖。農具種類。墾具如犁鋤耙鈔鐵搭鏟地龍等類。蠶具如蠶架蠶簾桑剪桑刀桑篩等類。漁具與漁網漁筍等類。均係舊式。製法粗簡。價值亦廉。

蠶桑素稱興盛。東北爲少。西南最多。蠶種多由餘杭及紹興來。亦間有自製者。微粒子毒。居有十分之六七。至新法二字。農民皆不知所云。地方

上亦無人提倡。以致蠶病蔓延。預防無法。蠶家虧負。時有所聞。非官紳切實勸導。難期振作。而勸導之方法。莫妙於設立蠶桑傳習所。招收各區學生。授以新法新理。畢業後到各處宣傳。一切土種。均由所中檢查。方能收效。此根本上之計劃也。

林墾一項。查地丁徵冊。原荒白田。計四萬二百四十三畝零。並無商人承墾。仍由業戶自行陸續墾熟。照章納糧。又以地屬水鄉。不宜造林。故無森林可言。

漁牧。以遠離江海。並無大宗漁業。更無苔藻等類。惟鄉民瀝水爲池。養殖其中。隨用網罟。捕獲出售者。種類頗夥。尤以蝦蟹魴鯽產銷爲多。數量年約六萬三千餘觔。至於畜牧事項。無專營此業者。

農產物之主要者。如粳稻糯稻大麥小麥蠶豆桑葉地骨皮等類。普通者。如西瓜菱桃梅李大頭菜等類。其餘供本地需用者。不能枚舉。民食以米爲大

宗。尙有補助之大小麥山薯及各種雜糧。自可支持。

農民租種田畝者。居十分之八九。租價不等。每畝自四五斗起至一石。長短關係。在承種時雙方議定。還租時依據各公所爲標準。愈早愈短。至於水旱蟲荒。驅除預防各法。甚爲簡單。防水災之法。建築圩岸。遇旱災則以車運水。或用人力。或用牛力。如遇螟蝗等害。農人皆束手無策。近年來雖設有除螟事務所。亦少效力。若非天然驅除。任其蔓延。不堪收拾矣。團體則有縣農會。因無經費解散。又有乙種農業學校。亦因風氣未開。不甚發達。又有農事試驗場一所。開辦已近十年。而農民仍守舊法。少有改良者。

工業。普通之工作物。爲磚瓦土燒黃酒醬菜豆油菜豆餅絲布土器銅錫鐵器漆器金銀首飾臘燭糕餅雨傘釘鞋蓑衣竹笠及其他之瑣屑什物。至外來者。爲捲烟草帽洋酒洋麵洋鹽。近年輸入。有增無減。惟草帽一項。以民

國元年爲最盛。

僱用工人。分長工短工兩項。長工以一年半年爲期。雙方預先訂定。短工按日計工。均由僱用者供給飯食。逢端陽中秋除夕等節。例備酒食相待。每月初二十六等日。必須饌以魚肉。俗名輪董。藝徒學習時期。三年至六年不等。其他關於工藝手續之接替。尋常建築等項。由某工匠承攬工作之後。無故不得中途變更。又如裁縫髹漆等項。時常受其僱用之老主顧。同業中人。無故不得兜攬。工廠。縣立之平民習藝所。業已停辦。其餘惟永徵震泰公廣穗豐各榨油廠。皆係民立。又有窯業公會一所。組織尙稱完備。

商業。因毗連蘇境。易受時局影響。市鎮。縣城之北干窰西塘丁棚俞匯。東北楓涇清涼庵。東南張匯大雲寺。西北楊廟洪家灘天壬莊陶莊。合計大小商店約一千數百家。入境貨之大宗。洋油烟酒暨各種洋貨外。有茶葉食

鹽紹酒綢緞布疋木竹醃臘火腿水旱烟等類。出境者。審貨米油乾繭土燒等類。至經過者。惟海甯平審等處所產之柴炭。尙稱大宗。此外若嘉興紹興等處地方之乾繭。由火車運滬。亦由此經過者不少。

商人運貨。由上海來者。陸路火車。水路由黃浦入楓涇塘。由杭州來者。陸路火車。水路由大關沿運河直達。運腳價值。除由火車轉運外。分包運僱運兩種。大概以貨物輕重貴賤。與所僱船隻之大小。及道路遠近。工程繁簡。雙方臨時議價。至錢幣之漲落。則照嘉興市面兌換一律。

商界除米業中有以陳米(即冬春米)向行換易新米外。餘無交換之貿易。南北貨醃臘油豆等業。向滬進貨。有間接爲之代辦者。俗稱買頭。亦曰使客。運輸費非預先雙方言定者。均由主顧擔負。團體則有縣商會。因無人主持。遂無形停頓。

第十一篇 海鹽縣

考海鹽故越地。自秦置縣。迄今疆域五折。治城四徙而不易舊名。東西距六十四里。南北距八十四里。東至海半里。西至海甯縣界六十三里。南至海甯縣界四十八里。北至平湖縣界三十六里。東南至海二里。西南至海甯縣界五十里。東北至平湖縣界四十里。西北至嘉興縣界四十里。照從前自治區域。分爲城區沈蕩鎮區歙城鄉區通元鄉區澈浦鄉區西塘鄉區。共計六區。面積計二千一百十四方里。除河流不計外。田佔百分之九五。山佔百分之三。蕩佔百分之二。全境有戶五萬零七百十五。有丁十一萬二千五百三十四人。有口十萬零五十四人。其中業農者。居十分之七以上。業工者。居十分之一不足。業商者。居十分之二。

水利。自杭州天目諸山歷海甯硤川分流而來。統會於官塘。官塘自歙城而北歷黃道閘。至嘉興境。自嘉興而北附太湖入海。其東則過雙溪橋五十里。爲平湖橫塘。東入當湖。自歙城而東。分流入尙胥橋五十里。北達橫塘。

。其東流至西關而北者。爲陶涇塘五十里。並北注於當湖。自當湖而東北。則附吳松江入海。至山脉天目東支。自海甯來。綿亘海上爲談仙嶺。突出海濱爲葫蘆山。屏蔽澉浦。建炮臺有寨基山。其餘東北各山。亭立海中。近於海岸。此天目東支之盡處也。

地勢。東南高阜。西北低窪。至全邑形勢。以澉浦爲海防要隘。沈蕩鎮爲入鹽門戶。均稱險要。

氣候。依攝氏寒暑表。春秋溫度。平均七十度。夏高至九十度。冬低至二十八度。近年來冬令少雪。致農田發現蟲災。而且患風患旱。頻年有之。西北低處。亦間患水。東濱大海。土質不齊。西南部分。土黏而硬近瘠。約佔十分之六。東北部分。土鬆而潤較肥。約佔十分之三。沿海一帶。有沙土質。約佔十分之一。種植宜於穀豆。而雜糧瓜菓次之。地質使然。無特殊改良方法。

地勢。南高北下。水皆北趨。夏秋之際。十日不雨。則耕者憂之。故水利視他邑尤急。唐於縣西開古涇。實爲水利之始。宋濬官塘橫塘招寶塘烏坵塘陶涇塘。明復濬陶涇塘。及沿海浦港。清雍正道光間。濬白洋河。同治間挑濬澈浦城河長河新河等處。自光緒朝迄民國。疏濬各鄉支流。及城河等處。亦復不少。近數十年來。水旱偏災。雖無時蔑有。而河流脈絡貫通。灌溉田地。前人開濬之功。民到於今。受其賜矣。然欲爲久遠之規畫。以濬關泖河爲重要問題。蓋泖通浙西。以平湖泖浦塘爲總匯。塘東以橫橋西行之水爲正流。暗潮內灌。由庫港至嘉屬。而鹽邑獨承其先。旁流七邑。西漸省會。泖河果能盡闢。則歲旱水涸。引泖入內以灌田。歲潦水高。由泖洩浦以入海。往來條達。實天然一大水利也。

農民凡種稻先擇種。糞秧田。浸穀種。近年因螟害劇烈。惟種早稻可免。故種早稻者多。其糞以豬羊灰豆餅。或以草入之河泥。爛而用之。無雨則

用桔槔以澆水。近水者單車。水稍遠者上下接用雙車。悉用人力。用牛車澆水者甚少。近有購用機器車水者。農具如鐵鋤鐵鎬犁刀鐵簽秧馬秧傘蓑衣笠帽水車鐵盪鏟刀打稻床木礮風車等類。蠶具如桑剪葉刀竹筴竹籬蠶架葉蓆蘆簾棚荐絲車行灶等類。漁具如漁網漁叉漁釣麥弓竹簾漁榔捻筴漁簾等類。均係舊式。尙稱便利。

農家比戶養蠶。田間宅傍。均栽桑樹。蠶種產自餘杭。本地種間亦有之。桑種由農家自行培養者居多。由湖州一路販運而至者亦復不少。蠶荒之年。葉難暢銷。恃東北路平湖嘉興等處。販運而去。蠶熟之年。葉不敷飼。恃西南路海甯縣屬之郭店斜橋周王廟等處餘葉之區。遞相接濟。維持調護。雖藉人力。而蠶汎衰旺。半視天時之寒暖適宜與否以爲衡。蠶戶皆墨守成法。無大進步。不過對於蠶桑觀念。皆視爲一種天然之美利。現有縣立蠶業改良場。及省辦蠶業指導所。均爲改良蠶業之機關。對於蠶戶頗有成

效。苟能持久而擴充之。庶幾普及。但縹絲車不肯改良。亦育蠶家一大弊害也。

林墾。糧不跟土。田賦混淆。洪楊劫後。滿目荒蕪。迨光緒中葉。客民入境。報墾者甚多。現查田賦冊列未墾田地五萬三千三百七十九畝零。未墾山六千二百七十五畝零。其中荒丁絕戶。雖屬不少。而隱匿侵佔。亦或難免。均係民荒。散處四鄉。且俗尙農桑。既無大宗曠土。又鑒於田中不得有木之義。故對於森林無創造之可言。雖澈浦一區。間有山峯。而各戶畝分。自爲畛域。種松種茶。隨地皆有。惟松多茶少耳。至苗木一項。雖就地歲有茁發。不敷分植。提倡擴充。應須另闢苗圃也。

漁牧。水產魚介。僅供鮮食。苔藻取以糞田。漁家無養殖專區。皆就通行河道張網捕捉。或設罾埋籠。或持桿垂釣。或用捻籬。或用圍簾。至畜牧事業。農家祇就宅旁餘舍。用欄柵圈養豬羊兩種而已。

農產物。如粳米糯米小麥大小豆芸薹子黃麻皮白麻皮茶葉瓜菓菜蔬芋茭大蒜胡葱茄子地瓠蘿蔔春韭等。食用有餘。則銷售外境。本邑米穀。不足自食。惟豐年尙不虞缺乏。且隣邑平湖嘉興。均爲餘米之區。一遇匱乏。隨時可以輸入接濟。

佃田習慣。凡向業主領地耕作。並不先納地價。祇有訂立租契時。每畝納錢三四百文。俗稱納契錢。退地時概不給還。若甲佃不願承管。讓渡乙佃。上等田地。須由乙佃出錢於甲佃。俗稱頂首錢。每畝自七八元至一二元不等。次等田地。則無此項頂首錢。然讓渡之先。必須經業主允許。方准履行。再由新佃另立租契。並繳納契錢如前。凡佃戶應納租穀。有米麥豆三種。米額每畝八斗至一石二斗。麥豆每畝四斗至六斗不等。折錢完納亦可。若米額一種。大熟之年。不過照額實收十分之八。凡歉收及全荒之年。或減收。或全免。各就秋收分數以爲衡。至於短額訂租。俗謂之板租者。

。則不在此例。佃戶欠租。不能繳納時。業主有勒令退佃之權。若佃戶不願承租租田。未經業主允許。雖欲退田而不能。防害方法。春末夏初。將籽種用去冬所儲雪水浸透。爲預防蟲災之一法。遇蟲災發見時。趁日中水熱。用菜油或煤油洒撒田水中。爲臨時除蟲之一法。雨水過多之年。須用石膏研細。洒在田中。爲補救水浸莖霉之一法。

工業。有縣立第一平民習藝所。初注重絲織品。出品如雙穗緞綿底緞電光紗景星紗蟬翼紗等。木質優良。光澤鮮艷。頗爲社會歡迎。嗣以經費不敷而罷。現有籐工木工二科。出品尙佳。又有特產之極細桃心竹編製襯衫。炎暑禦汗。最爲適宜。手工精良。殆無其匹。爲本邑特製品。他處無仿造者。惜一歲之間。製成者無多耳。又香品四遠馳名。而於羅漢盤香安息盤香兩種爲最著。普通者。飲食類如豆油菜子油棉油黃酒飴糖旱菸菜豆粉麥粉等。又小蟹名沙虎。及燻魚子壘菜醬葷亦屬名產。服用類如花緞春紗杜

絹杜紡綿綢大布愛國布柳條布扣布夏布緞帽緞鞋釘靴鞋金銀首飾。以及清油燭桐油燭普通磚燧炮雨傘木製家具。銅錫製器鐵製器竹製器漆器等。又澉浦夏布。分粗細兩種。每年銷五六千疋。爲一大宗出產。至外來者。飲食類如麻油燒酒高粱酒冰糖白糖紅糖紙捲菸水烟罐頭食物餅乾麥粉等。服用類如杭緞蘇緞湖縐濮綢玉山夏布廣東夏布廣葛熟羅杭紡杭官紗絲絨綿綢被面竹布絨布斜紋布線毯麻布錦布被面大呢洋襪汗衫毛巾手套衛生衣褲扇子各種胰皂洋燭生熟漆黃白蠟火柴洋燈罩平片玻璃鏡子各種紙類各種皮革化妝品金銀箔筆墨玩具陶器磁器石器骨角器象牙器鐘表玻璃器洋鍼洋釘草蓆竹蓆洋傘梳篦柳籐製器等。均從外路輸入。以濟日用。

僱用習慣。分臨時長期兩種。臨時者按日計資。長期者或一季。或一年及數年。均無契約之訂立。設有不合。可隨時開除。工資則按月結算。至待遇方法。除傭給之外。有包餽供餽兩種。若僱傭以營業爲主旨。其集夥設

肆。招徒授藝者。平日用素饌居多。每月大葷二次。小葷二次。至藝徒學藝。必先拜師。並寫立關書。訂定滿師年限。年限以內。得有傭給者。歸師收入。屆滿師年限。仍留在師處傭工。所得傭給。由師扣其十分之二三。否則仍留習幾月或一年。所謂補工也。滿師時備具魚肉籃或酒席。或准禮四元八元以謝師。爲之師者。亦購器具以贈之。例如木匠。購贈鋸斧。縫工購贈剪尺是也。

其他承攬契約。凡包工者。材料由出攬人供給。工料兼包者。材料歸承攬人採辦。定約後。物價騰貴。用費不足。不得向出攬人索加。或解除前約。工作上有瑕疵。出攬人得要求承攬人修補。雖修補甚大。承攬人不得拒絕。至承攬重要工作。必先訂定保固年限。在限內設有毀損。應由承攬人賠修。若遇天災事變而毀損者。不在此例。保固契約。以橋路工程爲多。商業。城市稱盛。澈浦次之。沈蕩又次之。自兵燹後。城市爲墟。迄今數

十年。未能恢復原狀。僅恃西城外及距離北城里許之慶豐橋兩市。供附郭人民之貿易。澉浦一市。亦見凋敝。惟沈蕩鎮漸興。其餘歙城鄉通元鄉西塘鄉。均偏僻小市。無盛衰之足言也。入境貨。如農田肥料之豆餅。飲品之燒酒醃臘。製造品之杉木毛竹洋紗棉花。服用品之布疋草蓆。雜用品之煤油篋炭等。出境貨如引鹽蠶絲湖羊山羊大蒜扣布。又經過貨。由海甯一帶載運至上海者。如山柴栗炭粗號紙貨等。均爲大宗。商人行業。當業以徽州人居多。染業以紹興人居多。醃臘業以甯波人居多。其餘各業本地人佔多數。本地人在外埠經商者。以上海醬業洋貨布業爲最多。

販運道路。一自縣城西南至袁花爲一路。一自縣城直西迤北至硤石爲一路。一自縣城迤北偏西至新篁爲一路。一自縣城直北偏東至平湖爲一路。以上爲商販通行之路。均係水程。運費。在本境內輸運各貨。有以石數計。有以件數計。若載運出境。則又量載運之多少。程度之遠近。以定運脚。

凡非大宗貨物。由購者自運。或寄航代裝。若絲若布若羊若蒜。爲數較多者。由售出之家僱船包送。運費於貨價外。另訂爲多。市面交易。以銀圓爲本位。紙幣照大銀圓一律通用。並無折扣。惟金融問題。除當舖木行綢莊醬園基本稍厚外。多有周轉不靈之時。其故由於本地無錢莊可通。隨時少大宗生意。且多賒賬。每年向例。惟年終一季歸還。是以年來各業。獲利甚少。維持現狀。則尙有餘焉。

商業。絕少交換。不過於鄉僻小市。及零碎物品。偶有行之者。例如以紡紗。向紗莊換棉花。菜子向油坊換油。榆皮換香。舊鐵換糖之類。又商民欲購何種貨物。托人代辦者。須先函托。由代辦寄以貨樣。示其價格。一經承諾。卽價有漲落。代辦人但求貨樣符合。生意盈虧。均歸採購人承值。其素相交易者。稱舊主顧。初次交易者。稱新主顧。欲廣招徠。必用承蒙交易。格外克己之商人口頭訣。設法以招徠之。

團體。海鹽商會。原有兩處。一在縣城西門外。一在沈蕩鎮。因城鎮距離較遠。商務同一繁盛。故分設兩商會也。近又有繭業公會之設立。其組織均改爲委員制矣。

第十二篇 崇德縣

考崇德爲古越地。清康熙元年改石門縣。民國初。因與湘省縣名相同。復改崇德縣。疆域。東至桐鄉縣募化鄉界二十里。西至德清縣金鵝鄉界二十五里。南至海甯縣昌亭鄉界十里。北至桐鄉縣保甯鄉界二十里。此四正之境也。東南至海甯縣元吉鄉界四十里。西南至德清縣金鵝鄉界二十五里。東北至桐鄉縣清風鄉界三十里。西北至吳興縣界三十里。此四隅之境也。東西廣五十二里。南北袤二十七里。從前自治區域。分城區上墅芝村洲泉太平義馬石灣羔羊張褚肇昌東萬錢林等爲十二區。面積一千一百七十七方里。已墾未墾田地共佔五十萬二千七百三十五畝。全境有戶四萬三千七百九

十三。有丁十一萬五千九百五十人。有口九萬一千一百人。其中農業約佔十分之六。工業約佔十分之二。學界約佔十分之一。

河流。運河由杭縣經邑城之西南隅。北行入桐鄉縣界。裏塘河。由德清縣經邑城之西隅。東行入桐鄉縣界。含山蕩河。由德清縣經邑城之西北隅。北行入吳興縣界。南沙渚塘河。由城南運河東行達海甯北界。北沙渚塘河。由城北運河東行達桐鄉南界。中沙渚塘河。由城北運河東行達桐鄉東南界。以上數河。水力均堪爲工業上所利用。其餘細流曲港四百餘處。不及備載。山脉則因地勢平衍。故無山嶺邱陵。矗峙其間也。

地處溫帶適中。最高溫度爲八十六度。最低爲四十九度。濕度最高爲七十九度。最低爲五十八度。歷來霜雪甚稀。每屆舊歷四五月間。風雨較多。若遇水災。塘西（卽運河之西）各區。受害最烈。蓋其地屬低窪故也。

土壤。肥瘠精粗參半。栽種稻麥等。頗爲合宜。惟素稱蠶桑興盛之區。故

對於栽種植物。以桑樹爲最多。餘如烏桕菸葉等。亦與土地相宜。至他項絕少栽種。

水利。全邑港汊紛歧。運河橫貫東西。附郭之運河。灌田二千六百餘畝。次之則有三港兩濱。灌田約三千三百餘畝。芝村鄉計港有九。灌田約七千六百餘畝。計濱十七。灌田約四千六百餘畝。上墅鄉計港有九。灌田六千三百餘畝。計濱十九。灌田約九千八百餘畝。以上爲第一區水利。義馬鄉計港有八。灌田約一萬七千餘畝。洲泉鄉濱港。灌田約一萬五千八百餘畝。太平鄉計港有四。灌田約萬畝。計濱十八。灌田約九千畝。以上爲第二區水利。石灣鄉羔羊鄉張楮鄉一帶。皆運河。灌田約五萬餘畝。以上爲第三區水利。肇昌鄉計塘有二。灌田約萬畝。計港十七。灌田約一萬九千畝。計濱十四。灌田約六千餘畝。東萬鄉計塘有二。灌田約萬畝。計港有七。灌田約二萬畝。計濱十六。灌田約一萬一千畝。錢林鄉計塘有二。計涇

有一。灌田共約二萬五千餘畝。以上爲第四區水利。至其創設時代。除運河創自隋煬帝外。餘皆年遠難稽。

農事全資人工。不借牛力。耕作悉是男丁。不雜婦女。種植田稻。每年收穫兩次。其種植之法。於清明節前後。車水灌入田內。用人力翻土耙平。加以肥料。將禾苗插下。名曰早禾。越兩星期後。所插之禾。名曰晚禾。早禾勤加培養。至大暑節近。即可收穫。晚禾須至霜降節後。方可收割。但早禾不過十之二三耳。所有收穫稻穀。即時除去稻桿。晒儲於倉。其他各農產物。或種於田。或種於地均有之。至農具均係舊式。墾具如犁耙鋤刀斧頭等。蠶具如竹籬竹筐山簾窠盆袋柱竹籬湖州把柴切葉墩切葉刀蠶筍鵝毛蠶網棚荇秤蠶籬飼蠶機停葉簾等。漁具如竹籠絲網絲鈎等。以上各物。雖不甚精。尙屬可用。

蠶桑素稱興盛。近益發達。惟農民墨守舊法。至於採集蠶種。以採購餘杭

新昌曠縣樵種爲最多。然亦有自行採集者。其採集方法。擇繭之良者。攤於簾中。使其寒溫適度。俟蛾出卽以蛾之雌雄相聯合。歷數小時之久。將雌雄蛾解散。生子後。再安放於紙上。懸於通空氣之處。迨至乾後。收而藏之。若桑葉則收集大葉桑紫皮桑荷葉桑青皮大種各桑居多。其種籽均由鄉民採擇桑葚。取子下種。販賣方法。蠶種則於市鎮設攤出售。桑葉則於春間投行寄賣。迨至養成之後。繭子則由各商來崇收買。細絲則售於杭州南京震澤等處。肥絲則售於桐濮紹興王江涇等處。亦有來崇採辦者。惜對於養蠶新法。均具消極觀念耳。

林墾一項。以地皆平原沃壤。並無荒山可以造林。設立苗圃。所種惟桑柳銀杏梧桐白楊等苗木。至茶樹向不播種。因菊花爲本邑農產物一大宗。民間習慣。多以菊花代茶。故對於茶樹。多不講求種植也。

漁牧。水產物。魚類則有鱧魚白魚鮑魚鱖魚鯉魚數種。年計數量。約得六

十萬觔左右。介類則有蛤之一種。年計數量十萬觔左右。其間如鯉鯖鱧三種。多爲家蓄之魚。由鄉民開浚池塘。購苗養殖。故不甚發達。且爲居民日常用品。隨捕隨賣。並無製造方法。畜牧。豬羊爲多。鷄鴨次之。但僅供食品。並無以此營業者。至驢馬牛隻則缺如也。

農產物。如早穀晚穀糯穀麥菜子黃豆蠶豆桐子菊花菸葉紅蘿葡萄黃芽菜芋茢芥菜等類。各物數量價目。豐歉不同。統計全邑田內收穫。僅足支八個月之食。一遇災荒。尤爲拮据。其不足之數。歷向蘇州無錫常熟等處採購。間亦有裝運來崇販賣者。

農民佃田。分活租板租兩種。其成立要素。則由佃田之農民。向業主訂立佃契約。契載共田若干畝。年納租額若干觔。大概每田一畝。最多數約納租穀三百觔。少亦二百觔以外。驅除預防災害虫病等方法。或用菜油。或用洋油。或用石灰以洒之。或用青礬水以殺之。均能見效。團體。一爲縣

農會。一爲公立樹藝場。一爲苗圃。均經先後籌設。

工業一項。縣立第一平民習藝所製造品。以羅緞布疋洋襪爲大宗。年計數量值銀約在二萬元以上。織物精良。亦甚暢銷。又有惠工襪廠所出線襪絲光襪兩種。且有手搖機器四十部。貨品甚佳。暢銷於本省及上海等處。其他如靴鞋漆器五金製器竹製器。均本地銷售。並不運銷於他處。至外來者。綢類如綾羅緞縐等。布類如竹布夏布洋布斜紋布等。糖類如冰糖白糖紅糖等。其他如胰皂火油火柴等。均係仰給於他處。

民間年輕子弟。投師學藝。無論何項工作。訂以三年爲限。亦有延長至四年五年者。限內聽師指揮。年終略給工資。迨限滿後。方得自由營業。至居民僱工。如泥木雕漆裁縫等。均係按日給資。

地處衝要。水陸交通。上達杭紹。下通蘇滬。商旅往來。向稱絡繹。自前清遭兵燹後。市鎮爲墟。商業頓落。光緒初。漸漸復元。近數十年。迭遭

水旱之災。商務又稍形減色。市鎮。卽城區石灣泉洲高橋靈安五處。商業除絲行繭行外。如綢緞南貨雜貨藥舖。設店甚小。均係土著。無外來客商。入境貨。以綢緞布疋洋紗竹木磁器南北貨柴炭等爲大宗。出境貨。首推絲繭兩項。菸葉次之。羊皮羊毛吐頭杜布菊花又次之。至經過者。如絲繭茶棉竹木六陳磚瓦柴煤八鮮洋油洋貨南北貨等。均爲大宗。

東臨硤石。西接新市。南近長安。北連烏鎮。相距不過數十里。運河上通杭紹。下達蘇滬。商旅往來。交通極便。各商運貨。水道居多。其運價視貨之粗細輕重遠近以定之。若用人工挑運。道路均不多遠。市面錢幣。隨時漲落。向以嘉興硤石爲標準。團體。城區設有商務分會。石灣洲泉兩處設有商務分所。此外另有縣立乙種商業學校。

第十三篇 平湖縣

考平湖舊爲海鹽縣。明宣德五年。析海鹽東北境當湖鎮置平湖縣。隸嘉興

府。清仍之。民國廢府制。直隸於省。疆域。東至張堰。與江蘇金山縣交界。西至萬程橋。與嘉興縣交界。南至海。北至楓涇北鎮。與江蘇松江縣交界。從前自治區域。分城區乍浦新埭新倉四區。面積計一千四百八十里。其田地山蕩約有五十餘萬畝。全境有戶五萬三千二百七十六。有丁十四萬六千五百二十三人。有口十二萬七千九百九十八人。其中業農者。居十分之七以上。業工者。居十分之二以上。業商者居十分之二。

河流。有漢塘海鹽塘乍浦塘獨山塘廣陳塘黃姑塘官莊塘魚圻塘邱坎塘倪莊塘趙涇港。其遠源發於天目山。近源發於澉浦諸山。可通舟楫者。惟黃姑塘爲最長有四十餘里。其餘自數里至三十餘里不等。至山嶽僅乍浦有九峯。係指雅山苦竹山湯山陳山觀山暈頂山高公山益山獨山言之。其中陳山稍峻。亦不過高八百餘尺。山脉亦不甚遠。

地勢。全境形係斜長。惟東南稍高。西北略低。除東南之乍浦全公亭等處

足資防衛外。其道途平坦。或水陸交通。有與商務相關係者。則有新墟新倉各市鎮。

氣候。溫度最高時有華氏九十五度。最低時有二十三度。苗秀時倘遇大風。則稻花必傷。苗秀而未實時。倘遇降霜。則稻早枯而多癘穀。收成必歉。冬雪於農田有利。春雪則有害。歷年水旱情形。如逢亢旱。苟使車水無缺。以人力挽救之。尙可不至成災。若雨水過多。則稻不發揚。根多浸爛。爲害滋甚。

土質。肥瘠精粗。各佔半數。種植禾稻大小麥棉花薑豆桑菜等物。均沿舊法。並無特別種類。

水利。凡灌溉田畝之塘河支流。多係天然形勢。並非人力鑿成。間或有之。亦非鉅工。其經費大都由灌溉之田主負擔。

農業。春季將田畝轉。乾晒數日。用牛屙水駛扒。然後插秧。謂之春耕。

入夏稻苗滋長。將田中害苗之草芟除之。謂之夏耘。精者耘三次。粗者耘兩次。至於收成豐歉。雖曰由天。亦半因工作勤惰。肥料之適宜與否而分。其耕田之器具如犁耙耖。耘草之器具如翻耙。開掘則用鐵鋤。收割則用鈔鎌。車水之器具。視地形之高下。定長短之差度。故水車之式。有自七尺至二十五尺之不同。車水之人。亦有二人至八人之不等。收穫脫穀器具曰礮。均係舊式。並無精細新異之製。至於捕魚。則用罾網兜鈎。養蠶則用竹簾。以紙糊之。或製蠶架。架有九層。可儲九簾。

人民對於蠶桑事業。近年大有進步。採種栽桑各方法。間有仿用新法。各項荒地。墾復者已居多數。惟與隣境壤地毗連處所。及零星散處各鄉之官荒民荒。不過一二百頃。

水產物。均在通行水港。所有種類。惟菱菱魚蝦蟹鱧而已。菱菱種取諸本地。魚蝦蟹鱧。係天生之種。其採菱割菱。用木桶鐵鍬。捕捉魚蝦蟹鱧。

用篩網兜鈎之類。至於畜牧。皆係農人兼業。無專營者。

農產物以穀爲最著。大小麥次之。棉花蠶桑又次之。年歲豐稔。出穀約有一百餘萬石。民食固自有餘。卽稍歉收。若非販運出境。亦可自支。

農民自田自種者。名曰自田。向業主租種者。名曰租田。租田有田底田面之分。佃戶購置田面。有永小作權。田主不得自由撤佃。其業主收租。或錢或米不等。至於驅除預防災害虫病方法。均依習慣。用石灰洋油等類。團體。舊有縣農會。乍浦新倉新埭衙前等市農會。辦理選種。辨別土性。及森林苗圃等事。

工業。其出色之工作物。線絲各襪。產額約七萬三千打。推銷甚廣。普通者。杜紗小布等類。間有運銷他邑者。其餘金木各工作。祇供本地之用。工業習慣。以技術之精粗。計工資之多寡。其僱傭手續。屬於口頭契約者有之。屬於書面契約者亦有之。

商業盛衰。視乎年歲之豐歉。市鎮共有二十三處。東鄉有新倉廣陳徐家埭韓家廟新廟周家汙泗里橋趙家橋全公亭衙前金四娘橋十二處。南鄉有乍浦虎嘯橋廟橋虹霓堰秀平橋林家埭思古橋七處。西鄉有青蓮寺馬厰廟二處。北鄉有新埭大通橋時村三處。入境貨。以洋貨綢緞南北貨醃臘京貨藥材爲大宗。其出境者。以蠶繭棉花爲大宗。薑及菜子西瓜次之。至經過者。惟乍浦鎮稍有魚鯨木板等貨過塘內運。

商人運貨赴上海。水路由邑之東鄉青陽匯等處。赴杭州。水路由邑之西鄉出界境橋過嘉興崇德等處。至運腳價值。肩挑較船載大有低昂。市面錢幣行情。大抵依江蘇上海及嘉興等處爲標準。

團體。除商會暨商民協會外。如陸陳錢業南貨烟紙蠶繭等行。均另立公所。訂定規則。以資遵守。其異鄉人民。寄居營商者。如安徽福建各幫。並建設會館。以爲集會議事公共場所。

第十四篇 桐鄉縣

考桐鄉唐屬嘉興。五代時分隸嘉興崇德。宋元屬崇德。明宣德五年。以崇德地大民夥。析崇德之募化千金保甯永新清風梧桐六鄉。置縣治於梧桐鄉。名其縣曰桐鄉。疆域。東至嘉興縣。南至海寧縣。西至崇德縣。北至江蘇吳江縣。從前自治區域。劃分六區。一城區。二青爐區。三濮院區。四石涇區。五日暉區。六玉溪區。面積九百六十四方里。內田四千三百九頃七十八畝零。地八百八十二頃七畝零。義塚地五十九畝零。山三頃七十九畝零。蕩十三頃四十二畝零。全境有戶三萬五千零十三。有丁九萬二千五百六十人。有口七萬二千零三十八人。業農者居十分之六。業工者居十分之一。業商者居十分之二。

運河水源。來自天目。從石門灣入桐境。至正家窰出桐境。經流四十里。白馬塘金牛塘水。均自運河入至青鎮出境。經流十七里。妙智港水。自運

河來。南入濮院鎮。經流七里。長水塘水。自海甯來。過桐境。北入嘉興縣界。經流八里。沙渚塘水。自羔羊來。過桐境東入嘉興縣界。經流三十六里。爰山史山。在縣治東南三十五里千金鄉。自硤石發蹤。高二十餘丈。週三里餘。

地勢。運河之南較高。運河之北較低。四境均無險要之處。

氣候。最高溫度在華氏寒暑表九十度。最低三十一度。稻開花時。懼風大。結子時。懼霜濃。梅雨慮過多。春雪慮過厚。歷年水災。皆因梅雨之水未退。至夏末秋初。忽遭大雨。河水頓漲。田禾淹沒。其旱也亦由梅雨過少。至初秋無雨。則田河皆涸。水無可辱矣。

土壤。有紅砂泥性堅鬆。宜種菸。有青脂泥性凝滯。宜種稻。全境土壤。肥者不過二成。瘠者實有八成。

水利。北枕爛溪。南接長水。中貫運河。灌溉田畝。咸賴乎此。至蓄水溝

渠。桐境均無。

民間不畜耕牛。凡耕耘等事。均用人力。各照舊法。並無精粗之別。但施用肥料。不無輕重。實限於資本也。農具如水車穀礮稻桶風車稻床肥桶葉篩蠶籠煙篩篩子甯夾土篳鐵耙刮子泥鏟桑剪芟子鍬子拷佬石白白杵篋衣簍笠蒲衣等。均係本地出產。農民使用已久。尙稱便利。

蠶桑向來興盛。近因桑多老萎。葉不敷飼。價額昂貴。急宜勸導鄉農多植新桑。至蠶種於採繭時擇堅厚者。俟蛾出雌雄交後。將雌蛾分布紙上生子。由餘杭販來者。爲餘杭種。由本地蛾生者。爲土種。育蠶之家。均先時定購。用餘杭種者十之四。用土種者十之六。桑種於甚熟後。採甚醜爛。淘取其子。下子於極鬆泥中。敷以稻稈灰。俟芽出長尺餘。名曰桑秧。分種於田。次年夏初葉盛。摘去雜條。是爲毛桑。次年清明。即可接秒。法剪樹上桑條約三寸半長削尖。插入毛桑皮內。以泥裹結。活後發斜眼須摘

去。是爲大種桑。即可捆販他省。或由他處之桑客來購。照市價點株分售。惟人民對於新法養蠶栽桑。尙多漠視。

居民無養魚者。祇有漁戶。以捕魚爲業。隨獲隨賣。均屬零星。無從計數。畜牧無專營之人。惟農家各蓄猪牛一二頭。各自飼養而已。

農產物。如粳米糯米黃豆煙葉棉花蠶絲等。數量價目。不能一定。以本境所收穀米。不敷闔邑民食甚鉅。全賴嘉興硤石等處。由商運售。通年計之。約缺十分之四。

田地由業主分租與佃戶。每年每畝租息。最高者一石二斗。最低者三斗。以田地之肥瘠。定租息之多寡。至災害虫病。先事無預防方法。均須臨時酌施。團體。舊有縣農會。青爐市農會。玉溪鄉農會。石涇鄉農會。濮院鄉農會。又有縣立之乙種農業學校一所。

工業。第一平民習藝所。仿造紙菸。頗有進步。現因經費不足。停歇已有

數年。又濮院機織濮綢。每年產額約二萬六千餘疋。運銷杭滬各處。此外青爐鎮青鎮沈亦昌冶坊。所製食鍋。早已廣銷江浙。其餘竹器次之。毡毯更次之。至外來者。以洋布爲最多。磁器次之。磚瓦更次之。

僱傭習慣。以一年爲度。無故不得辭退。平日工作。悉聽主人指揮。學徒從師。以三年爲度。限滿去留。各聽其便。

商業。全賴運銷土貨。若絲綢菸葉桐子等。各種銷路暢旺。各業貿易。亦因之生色。市鎮共有九處。一城區。二青爐鎮。三濮院鎮。四玉溪鎮。五屠甸鎮。六爐鎮。七亭子橋。八陳莊。九日暉橋。入境貨。如木料麩餅米南北貨綢緞洋貨藥材紙貨廣貨等類。均由上海嘉興杭州運來。出境貨。細絲由嘉興硤石運銷上海。肥絲由杭州運銷紹興。或由新塍運銷盛澤。或由青鎮運銷湖州。濮綢統由上海分運山東直隸等省。菸葉由嘉興運銷上海。或由蘇州運銷丹陽丹徒等處。至經過貨。有自杭來者。以紙類爲大宗。有

自滬來者。以洋貨爲大宗。各貨出進。均由水道運輸。水脚每百里平均約計洋二角。錢幣。各市鎮通行銀洋。價額漲落。以嘉興市價爲標準。由商會邀集各業。共同議決。通告全市一律折兌。惟典業自行議定。向不照市。商業習慣。各牙行收買土貨。由客來行直接購買。隨時運去。各商店售貨。向大埠各行函購。隨時運來。並無代辦等事。購買貨物之人。均係本地鎮鄉土民。各號商人。均操土語。外來行旅甚少。團體有城區商會。烏青鎮商會。屠甸商務分會。玉溪鎮商務分會。濮院鎮商務分會。此外另有典業公所一處。

第十五篇 吳興縣

考吳興隋唐至宋元明清均屬湖州。民國合併烏程歸安二縣爲吳興縣。疆域。東界桐鄉及江蘇震澤縣。南界崇德石門灣武康等縣。西界長興縣。北界

江蘇吳縣。從前自治區域。分城鎮鄉爲二十五區。面積約計一萬七千平方里。田地山蕩佔百分之八十。未闢之荒山白地。佔百分之二十。全境有戶十六萬九千二百三十七。有丁四十二萬四千八百五十一人。有口三十萬八千四十一人。農佔十分之六。工商佔十分之三。學界不過佔十分之一。河流水道之來源。先由裏塘河。經城東南過昇山橋至南潯。東入震澤界。其二爲小梅港。自縣北經白雀塘橋東至小梅口入太湖。其三爲東苕溪。自縣北分支經毗山渡至大錢口入太湖。其四爲瀾溪塘河。自東南經東北過烏鎮入震澤界。又本縣西區西塘河自下莊橋經錢山漾折至城南。其二爲苕溪。自長興來經目山渡潘店霽水橋而至城西。又本縣東苕溪。自德清樂安橋入界。經南雙林菱湖荻港。穿錢山漾而至縣城。又吳興塘河。由菱湖分派過練市。至獅子廟入桐鄉縣界。諸河均通輪船。交通至便。至崇山峻嶺。大半屬於西南。去縣城迤西一百五十里。與武康交界。中有莫干山脉分兩

岐支。一向東南行四十里。迄德清縣城。一向東北行約百里。迄吳興城南峴山。縣之西北十八里有弁山。廣約百里。直接長興縣界。而鳳凰山則在山之盡處。縣西白鶴山。縣北小梅山。均與長興縣接壤。小雷山在太湖中去岸二十里。與江蘇吳縣分界。其他如埭溪鎮之梅峯山。耀武關之莫干嶺。均爲吳邑著名山嶺。路徑崎嶇。行人甚少。各山土質不勻。其肥沃者。均可栽種樹木。礮瘠者。則砂石間雜。滋長匪易。

地勢平坦。惟西南多山。全境港灣交錯。輪帆四達。江浙往還。至爲迅捷。祇因北濱太湖之故。盜匪出沒無常。雖有水陸軍警。棋布星羅。而肆行搶劫之事。尙不能免。其險要當可想見。且長興安吉界於西。江蘇吳江界於北。水陸兩便。一有事故。竄逸較易。扼要駐防。尤慮不濟。於是設立保衛團。擴充陸警。多備槍彈。力謀自衛。始得相安無事也。

氣候。四時寒暖。尙屬勻調。最高溫度。約攝氏九十度。最低約三十度。

惟近年來冬令少雪。夏秋常患多雨。居民易罹濕溫之病。并有大水之災。全邑山多田少。其比例爲四與三。田土肥沃。栽種桑樹及稻麥等項。頗稱合宜。山土肥壯。堪植竹木。惟居民專事蠶桑。造林一項。絕少研究。故材木出產甚少。求過於供。不得不借材異地。此一缺點。

地勢低窪。河港舛錯。素稱澤國。西南又多山水。山水發時。傾洩特甚。其大河有二。曰南條。曰西條。南條原出天目山之陽。經餘杭臨安達吳興爲苕溪。西條源出天目山之陰。經孝豐安吉達吳興爲霅溪。兩水匯於碧浪湖。北流入太湖。故太湖爲蓄洩之藪。當兩水匯合時。受南來諸水衝阻。速率頓失。泥沙下沈。最易淤塞。而濱湖三十六澗港。又爲太湖受水之門戶。澗港一塞。全邑之水必致泛濫。橫行四境。農田均遭其害。是以治本之策。當以疏濬澗港及碧浪湖菜花涇爲最要。清同光間。曾經邑人籌有經費三萬四千元。存典生息。爲歲修澗港之用。數十年來。辦理頗屬得當。

惟碧浪湖淤塞日甚。急宜從事疏濬。須水流暢達。吳邑可無水患之虞。水利農田。實利賴焉。

農事。春耕夏耘。秋收冬藏。仍其舊慣。用人力者多。間亦有用畜力者。其機械多舊式。墾具則有鐵製鋤頭鐵耙犁耙三種。外裝竹木柄竹製橈竿以去草。鐵製稻鏢以叉禾。木製礮床風車以去糠粃。漁具則有網罟叉竿釣竿蝦籠。大漾蕩中有用竹籐。以上各種器具。皆農家常備之物。年年添新換舊。各區均有自製。不藉外來。其價值大小不等。均爲農家財力所能購者。

蠶桑向爲大宗出產。種植桑樹。不惜工本。以求其發達。近年絲價日昂。更具樂觀。田稻收後。卽從事於桑園。修剪桑枝。捕虫施肥。不遺餘力。二三月有桑秧販自餘杭。鄉人之欲補種者。各視其地積所容及育蠶多少產葉盈絀以爲準。惟飼蠶方法。沿用舊慣。鄉人保守故常。畏難憚改。所以

新法育蠶。鮮有研究仿效者。

未墾荒地。雖不多見。而迤山一帶。廢棄者亦有之。居民慣於植桑。森林事業。向無人提倡。雖青銅門外。設立苗圃一所。購樹栽植。一無實效。惟邱成山官荒一片。連同無主民荒約五十畝。業經僱工開墾。栽種松柏樹棟梧桐苗木等樹。

漁牧。鱗介之類。有天然與人造之別。沿河港灣。例得捕魚。各漁戶網取魚蝦。喚賣市上。爲天然所有之利。人造者。私家自置池蕩。於每年春季。合併至九江購買魚秧蓄養。秋冬採取。以鯖魚爲上品。鯉鱧次之。售之本池魚行。並有運赴蘇州滬上發賣者。畜牧亦爲鄉民兼營之業。富戶豬羊並蓄。貧戶僅蓄綿羊。豬必預購食料。非富有者不畜。羊則僅食野草及枯桑葉。祇用人工採取。故畜羊者多。然至多亦不過每戶羊五六頭。豬三四頭。並無專營畜牧。成一大公司者。

農產物以稻爲主要。有秈熟糯秈早晚之別。以晚稻爲最多數。豆類爲附屬品。有黃豆蠶豆赤豆豌豆藜豆等種。所產米糧。供本邑民食。豐年約短百分之三十。若遇災歉。則拮据更甚。所幸江蘇糧食。來源富足。尙不致恐慌云。

農民均有自管之業。按時從事耕作。潦則車水於外。旱則灌水於田。產多人少。則招人承租。產少人多。則佃田耕種。受授則有證人立約。書明年限租穀數目。屆時繳納。崇尚信實。至於預防蟲害。有用桐油水。有用巴豆水。用器激射滅殺者。團體。舊時設有縣農會。因無經常費。徒具虛名。無裨實際。

工業。第一平民習藝所。初時僅設木器縫衣織襪等科。嗣因改良絲織。特設龍頭機。延聘藝師。教織華絲葛。織成入市銷售。嘆爲僅見。一經提倡。未及一年。商辦改良絲織公司。踵起仿效。如麗生義成大豐粹華中華錦

成益康各絲織廠。更有經天經華各布廠。綜計九廠。共綢機一百七十架。布機六十二架。織工額數均在二十人以上。至於織綢土機。城鄉共計約二千架。如逢絲價低廉。開機尤多。所僱織工。半屬丹陽人。其出色之工作物。首推龍頭機所織之華絲葛。次則土機湖縐袷綾。亦爲特出品。運銷南北各省。並香港日本等處。種類如嵌地清地散花二尺尺九廣衣杭衣尺素尺七素二一素生絲生緊線花順紆團龍綾龍鳳綾鶴綾花綾素絹雙絲絹。他如各種毛筆鷄毫羊毫狼毫長柄羽扇短柄羽扇玫瑰花等。皆爲大宗。普通者如棉織綢棉織布藤織布綿兜包頭縐毛毯等類。至外來之貨。則有東西各國製造綢布。充斥市廛。居民喜購者多。土貨銷路。大受影響。近年絲價日昂。絲織各物。幾爲洋貨所抑置。急宜設法勸導。挽利權而杜漏卮。國課生計。兩有關係。

僱用工人手續。大都憑口頭契約。然亦有訂立字據。載明年限者。至機工

及其他木縫等工。秋冬二季。兼作夜工。有爲藝師督責者。有爲個人自主。或受人之僱用者。其待遇方法。必另加薪資。以酬其勞。惟土機織工。每當新絲開工之時。結合團體。要求加給工資。龍頭機則因工價較多。故無此習慣。

團體。有舊湖屬機業公所。及吳興絲織公會等。專以劃一機工。改良絲織。聯絡工人之感情爲宗旨。

商業。素以絲織爲大宗。絲分細肥兩種。細絲以輯里產爲最著名。城鎮設行場。對客買落。復加揀選。運至南潯。縲成經絲。由申售給洋商。當極盛時。全縣每年銷數竟達三萬包。惟近四十年來。城中每年售出。不過二千餘包。南潯約計五千包。菱湖三千包。雙林三千包。其他各處約千包。全邑統計。每年售出一萬四千包左右。至肥絲產自菱湖。及德清新市塘棲等處。銷行江浙各省。爲織綢緞之原料。每年售出在七千包以外。湖縲則

各綢莊購自城鄉各機戶。極盛時各莊銷數約三千萬疋。此外綾羅紗緞綿綢綿兜及冬夏布疋。合計銷數約二百萬元。自上海之絲廠興。而吳邑輯里絲。銷數漸減。南潯經絲。因條分不及廠絲之勻細。洋商喜購廠絲。輯里之產。遂爲抑置。肥絲銷額。亦因此而逐漸減少。揆厥原因。實由塘棲等處。連年添設繭行。鄉人售繭者多。縲絲者少。售繭既多。則繭衣紆片。皆連帶而去。非特出絲不多。卽綿綢棉兜等物。亦因之減少。而綢緞布疋。復因洋貨充斥。銷路銳減。湖縲莊號。較昔雖多。銷額反少於前。彼盛此衰。相爲倚伏。至湖筆本爲著名土產。祇因用者漸少。產額未見其多。以致銷數皆不及從前。商業式微。於此可見矣。

市鎮。除城區外。如南潯烏鎮練市菱湖雙林塢溪織里虹星橋湖溇大錢。均爲交易之總樞。其間商務以南潯爲最著。入境貨之大宗。如米麥茶糖港布洋紗烟片藥材楮蓆黃豆餅紗緞粗布葛布羽綢醃臘蕪香煙本國紙油鹽洋布

麵粉煤油鮮豬顏料錫箔外國紙木料皮鞋緞帽皮貨洋廣貨杭線徽嚴漆桐油煤鐵等類。出境者。絲細縐綿綢麻布絨綾羊毛筆鳥羽扇絲吐竹茶葉玫瑰花湖羊等類爲大宗。至經過者。如各地所產毛竹茶葉柴炭玫瑰花。均由境內出運蘇中。其他貨物。由外埠運銷本地。無假道吳興者。

商販道路。東由南潯至江蘇之震澤而達上海。南通德清杭州。西走安吉孝豐。北抵湖溇而達蘇常。其間支港相通。一葦可達。商賈往來。絡繹於途。且東南之嘉興。通有鐵路。江浙往返更便。惟西走安孝。間有水陸兼行者。至運送貨物。率多用船。惟就城鎮內轉運。則用人力。市面錢幣。兌價漲落。春季由布業主之。冬季由南貨業主之。自中國銀行。於此發行鈔票。民間稱便。惟錢莊賬款進出。均用現銀。手續雖繁。信用穩固。各店肆貿易。現金欠賬。平日通行。欠賬以端午中秋年終三節結算。以年終爲大結束。除夕通宵收取。達於天明。始得休息。各業中如有倒閉事項。由

商會處分判斷。平時銷售貨物。同業議定價格。互相遵守。雖有參差。無甚上下。至批發各貨。照原價格加運費。由各經理直接交易。並無掙客說合。惟絲縐等貨。代客買賣。中取佣鈔。主顧由申蘇杭來者爲多。輪運船隻。約分三種。城鎮則僱專船。間有由班輪者。鄉區則由航船寄運者爲多。城區設有商會。又菱湖雙林各設商務分所。此外另有典業錢業紗羅業絲業絲絹業肥絲業綢布業米業衣業藥業酒業南貨業木業等。或建造會館。或設立公所。各舉代表。處理其事。

第十六篇 長興縣

考長興元升州。明清復爲縣。民國仍名長興縣。疆域。東西相距一百五十里。南北相距一百五十里。東至吳興縣界三十五里。以白鶴嶺爲界。西至廣德縣界一百里。以龍目嶺爲界。南至安吉縣界六十里。以野山隴爲界。

北至宜興縣界六十里。以懸脚嶺爲界。從前自治區域。分城區四安合溪和平虹溪大義白阜林鄉弁鄉安吉鄉辰鄉。共十一區。面積約計二千四百零二方里。田地山蕩佔十分之六。全境有戶五萬三千九百六十三。有丁十四萬二千五百四十一人。有口九萬三千六百零一人。業農者約九萬人。業工者四千人。業商者五千人。礦業不過百人。

長邑三面阻山。一臂當水。山多則水之發源處亦多。每遇山水驟發。田間浸沒。前人因鑿三十六漚港以疏淪之。邑水發源。計有三處。西南自廣德諸山發源。經西安鎮爲四安溪。南自天目諸山發源。由安吉之梅溪入鎮爲苕溪。西自顧渚白峴諸山發源爲合溪。諸水東注吳興。東北注太湖。有經縣治者。有不經縣治者。總分洩三十六港口。以歸入於太湖。舊時每漚港各設一閘。蓋湖爲諸水之委。而各漚則諸水入湖門戶。設牘板以啓閉。旱則引湖水內注。潦則導湖水外瀉。雖有天災。不至大害。漚港利於農田。

實非淺鮮。

地勢。西北高而斜。東南低而平。方山區地形爲最高。謝公區次之。而方山區一莊至八莊爲尤高。山田無水可灌。水患較他處輕。旱災較他處獨重。險要之處。西與安徽廣德之四安。北與宜興交界之懸腳嶺東川界西川界。太湖口之夾浦新塘爲最。其防務重要之地。則爲張家澗槐花壩水口鎮鴻橋呂山林城橋白阜埠等處。

氣候。最高溫度華氏表九十度。最低二十四度。風霜雨雪之有關農業利害者。七八月之間。如遇西風。氣候失時。則田禾出穗多白色不實。內有蛀蟲。冬至後常下雪。則來年田禾蟲少。清明後多雨。則植物暢茂。

土壤。肥田佔十之四。瘠土佔十之六。高地種植松杉竹楓櫟樟橡樹等及山芋爲宜。平地種植稻麥菜豆果桑麻茶樹等爲宜。

農事於冬至前後耕。清明後佈穀。芒種時種秧。小暑時耩耘。秋風時刈穫。

。冬至時碾米。春以水牛耕田三次。夏耘草四次。耘草方法有三。一刀耘草。二耙耘草。三手足耘草。普通以刀耘草爲多數。秋收以鎌割稻。以板桶取稻粒。冬則製蒸穀米。仿古時越國遺法。用木礱製糙米。用石臼製熟米。近來漸知改良。製熟米有用機器者。比石臼製米精細而速。其餘農事。經農家屢次試驗。因地制宜。亦有進步。農具有鋤犁剗水車風車穀桶鎌箕畚尿桶等。蠶具有蠶篷蠶籬蠶架篩葉篩絲車山棚橫楞等。漁具則用網。各種器具。均係舊式。價值貴賤不一。

蠶桑向稱興盛。大都取用新昌太湖蠶種飼育。是項蠶種。由各行商販賣。採自縣屬虹溪鎮夾浦地方。但收成往往歉薄。研究改良。實不容緩。至栽桑一層。城鄉各處。凡河岸隄塘。以及田畔橋邊。莫不綠陰遍地。已視爲自然之利。桑種有二。曰青皮桑。曰白皮桑。白皮較青皮爲佳。故人民觀念。樂於栽種白皮桑。而不喜青皮桑。其葉之肥美長大爲遠近所樂購者。

一因土質肥沃。兼之肥料豐厚。故其葉柔潤而美。二因栽時以野桑爲根。以園桑接幹。故其葉長大而有力。

官有荒山。計四千一百餘畝。民有荒山甚少。其中野山塢官荒一處。面積七方里。浮雲山一處。面積二方里。均由本邑民人承領墾植。其城西五峯山官荒一百三十餘畝。及和平野山塢五十餘畝。亦已作爲官有模範森林。又苗圃一處。計地十八畝零。種植槭椿銀杏松柏冬青栗油茶等樹。各項種籽。歷年於植樹節時。分發各農民種植。成績頗佳。各鄉人民注重蠶桑。兼事耕耘。生活力尙強。

水產物以魚爲大宗。用網捕獲。年計產額約四十餘萬觔。惟製造方法。尙未研究。至畜牧普通以水牛爲最多。農家藉以力田。次則豬羊鷄鴨。均有殖養者。

農產物。以稻台州秈銀條秈麥蠶豆黃豆油菜子爲大宗。赤小豆豌豆綠豆。

間有種植。爲數不多。普通者。青梅光桃山楂木梨白棗柿楊梅栗子落花生。南瓜菠菜韭菜茄子薺菜芥菜冬瓜白菜莧菜黃芽菜黃瓜絲瓜冬筍苧麻蘿蔔白朮柴胡蒼朮首烏青蒿前胡淡竹葉桔梗梔子紫蘇山芋蒜苗蒿菜扁蒲等。每年產額。亦屬不少。

佃戶關係。秋收納租穀。亦有納租米者。每畝租額。納穀九斗。納米七斗。保證金一元。其驅除預防蟲病方法。如遇桑樹生白蟲。則用巴豆洋油除之。禾稻生蟲。則用豆油除之。菜蔬生蟲。則用泥土與礱砒燒乾研末散在葉上除之。其他如僱傭農工等事。則視時候之閒忙。及其人之經驗程度如何。定工資之多寡。團體。舊有縣農會。四安箬西東區各鄉農會等。縣農會因主持無人。早經解散。惟箬西鄉農會。辨別土宜。勸令人民遵照新法。廣種桑茶。研究驅除預防災害病蟲方法。辦理稍有成績。

商業。自前清遭洪楊劫後。衰敗已達極點。光緒初年。地方官以荒田荒地

設法招墾。於是兩湖三江河南安慶溫台各處客民。紛至沓來。商賈因之振興。市面亦日形活動。城鄉商務。入境貨。首推鹽油。次綢布。又次則豆麥毛豬南貨京貨菸葉醃臘煤鐵桐油藥材紙酒等物。出境者。以絲茶繭爲大宗。次山貨毛竹柴炭石灰鮮筍等物。由安徽廣德運輸入境者。以稻米爲大宗。

市鎮。以縣城四安鎮虹星橋夾浦四處爲最盛。林城橋和平鎮合溪鎮鈕店橋呂山鎮胥倉橋水口鎮鼎甲橋白阜埠小溪口天平橋李家港八字橋潼橋橫山橋新塘小沉瀆等處次之。夾浦水鄉。四安山鄉。惟虹星橋水陸交通。爲全邑之樞紐。各處所產穀米絲繭山貨。均係販賣性質。城內現有錢莊兩處。惟資本有限。金融上悉準吳興錢市。

商家銀錢貨物往來。或由航船。或由信局。運腳價值不一。亦有商號與運船脚夫自行承包裝運一年或半年者。錢幣情形。均視吳興市面爲轉移。

商業習慣。素稱樸實。凡有殷實商家。均係店東自行主管。交換。以紙幣銀幣銅幣互相流通。如代辦穀米山貨等類。均由各牙行代為買賣。主顧分山水兩客。言語土客不一。除本省人外。以河南口音為最多。運輸外貨。用裝船分班往還。貨品多由過棧行代僱車船裝送。團體。有長興商會。四安鎮商會。成績頗良。

鑛業。蘊蓄最富。前經開採之鑛。有長興煤鑛。廣興煤鑛。大有石鑛。廣生石鑛等公司。長興鑛區。計占領面積五千零五十五畝三分。廣興鑛區。於民國九年移轉長興鑛開採。大有石鑛。計租領石山十畝。廣生石鑛。計租領石山二十八畝。華商石鑛。計領石山二十三畝。興業石鑛。計領石山五百四十畝。大興石鑛。租領石山八十四畝。瑞泰石鑛。領有石山八十畝。以上各鑛。除大有石鑛。每年可採青黃白石三千餘噸。廣生石鑛。可採白石一萬三千餘噸外。華商興業大興瑞泰等鑛。每年各採青白石二萬噸左

右。其長興煤礦。在民國十四年江浙戰爭時。損失甚鉅。因以停頓。至未經探採者。尙有縣屬至德區四十莊青草塢景牛山地方。鐵鑛一處。鑛苗亦極豐富。

第十七篇 德清縣

考德清唐置武源縣。天寶初始名德清。至今仍之。疆域。東與崇德接壤。西與武康接壤。南與杭縣接壤。北與吳興接壤。從前自治區域。分爲城區大麻新市新塘龍潭洛舍白雲雷甸松山三山仁壽安國。共計十二區。面積六千一百三十八方里。田佔三十七萬六千七百一畝零。地佔七萬九千八百五十四畝零。山佔三萬三千三百六十七畝零。蕩佔五萬五千三十四畝零。全境有戶四萬一千五百零九。有丁十萬一千三十人。有口七萬七千九百八十八人。業農者居十分之七以上。業工者居十分之一不足。業商者如之。河流。適當天目下流。水勢奔放。止一餘不溪通其歸墟。其來自西南而趨

西北者。則縣西各區。與武康前溪之水會合。入吳興書溪而下太湖。其來自東南而趨東方者。則入城南關。經過縣東南各區而流入崇德等處。山有南北脉。北山山脉。來自天目。其最高者。曰東主山。高約二百丈。在縣北半里。南山山脉。來自武康。其最高者曰金鵝山。高約二百三十丈。在縣西二里。曰吳羞山。高約二百丈。在縣南半里。

境內西偏多山。東偏與北則多水。縣之西境。羣山連絡。氣脉不斷。地勢高而斜。縣之東北。溪漾脚接。百川貫注。地勢平而低。至論險要。均無當焉。

氣候。濕度最高三十五六分。溫度最高九十七八分。

土壤。向有東肥西瘠之語。約計肥者六成。瘠者四成。各項田畝。除種稻外。最宜廣植桑秧。至不合栽桑之處。則勸令植竹茶等物。以期土無肥磽。均可穫利。

水利。地勢低窪。大溪巨漾。儼同碁布。桑麻徧野。灌溉極易。山鄉田畝。本屬稀少。且有泉水。亦鮮乾涸。故歷來旱災少而水患多。因境內水源發自天目。經臨安餘杭。匯合三苕之水。直入縣城之大溪（即餘不溪並餘不分溪）而併入太湖。爲苕溪之正幹。每屆夏秋之間。諸水汹涌而下。縣屬大南門外。適當其衝。有塘一條。塘內烟戶萬家。田畝萬頃。藉以捍衛。萬一潰決。則塘內生命田廬。均遭淹沒。最爲危險。故名之曰險塘。除此塘外。尚有龜迴壩一處。亦關緊要。至於山水之發。漲速退遲。係由霽溪太湖等處。久未疏治之故。現在預防方法。惟有將各區堤塘培土增高。期免水潦之害。

農事。春時墾地修桑。夏時耘田播種。芟草澆肥。春夏之交。比戶育蠶。次則耕種副產物及搜除害虫等事。早稻約於九月內收穫。晚稻十一月內收穫。收穫既畢。耕種豆麥及菜并礬穀春米等項。極忙時間。四五六等月爲

最。因田事蠶事。須同時并舉也。以上諸項。東南各區。尙見勤精。西北次之。至農具。凡墾具蠶具漁具。皆係舊式。墾具如耒耜鐮刀鋤頭水車風車礮臼等件。均甚笨重。蠶具如蠶籠蠶筐葉篩切葉刀去沙網縲絲車。俱不及現在新出者。漁具。細網則用生絲績成。粗網則用苧麻績成。均係漁家自製。

民間對於蠶桑。極爲注重。蠶種除取諸本地外。僅有餘杭蠶種。民間尙樂採取。本地蠶種。無銷售別處者。育蠶栽桑方法。均具成見。無一新法。官荒民荒。近有湖南及溫州等處客民承墾。尙無荒蕪之處。大南門外演武場舊址。設立森林模範場一所。所種苗木。生活力尙強。又現擬在澉村太平庵基地。設立苗圃。

水產物捕獲。年約值銀十萬元。均售鮮品。並無製造方法。至畜牧僅豬羊兩種。近來飼羊者。漸見繁盛。每年約可出產十餘萬元之譜。

農產物之主要者。如粳米糯米及麥。又春夏蠶絲亂絲及絲吐等。境內所有之蠶。祇有春蠶夏蠶二種。每屆收繭後。均卽繅絲。其有不堪製絲之繭。揀去製成湖綿。爲被服裝綿及織綿綢之用。普通者。如大麥小麥大豆芋甘蔗菸葉白菜蠶豆枇杷梅桃李菱油菜等物。均行銷境內及由外來客船販運出境。至民食常恃外來米糧接濟。以補不足。

邑中無大業戶。以田租於佃戶者。至多不過十畝。上等之田。每畝納租六七斗。次則四五斗或三四斗。其僱用工人。有全年計算工資者。有半年計算者。有按日計工者。至於驅除害虫之方法。或用燈火以誘其蛾。或用毒汁以滅其種。鮮有取效新法者。團體。舊有私立蠶業學校一所。并農業試驗場一所。嗣因經費不敷停辦。此外有縣農會。太平鄉梅莊鄉新市鎮溪山鄉各農會。現均停止。

出色之工作物。向以綿綢絲綢爲最。年產約銀一萬元。銷售本境及蘇杭等

處。以作被服之用。次則有燭芯一項。行銷各省。以作澆造油燭之需。比年來洋燭盛行。銷路銳減。年產約銀六萬元。又賽珍珠一物。年產約一千數百元。行銷江浙。係用爲裝飾之品。普通者。如豆油麻油菜油棉油豆餅菜餅黃酒燒酒白酒醬油旱烟豆粉麥粉大布柳條布愛國布格子布桂花格布清油燭牛油燭普通獸皮珠料家具金銀製器銅錫製器鐵製器餅乾類竹製器柳籐製器雨傘香類金銀箔類筆類革製器鞭炮玩具棕繩燈籠洋鐵製器簿摺封簽飲食器豆腐等類。其外來者。各種瓷器磚瓦石塊窰貨粗細紙料花素縐緞紅白提糖桐油徽漆及洋貨羽呢綢布皂燭顏料火柴洋油等件。均爲大宗。

工界每年陰歷元月初四五日開工。僱傭手續。如木工土工金工石工染織工茶食工等。均由介紹人雙方說合。按工給值。視其各業之高下。及受僱者手藝之優劣。以定工資之多寡。設或彼此不洽。即可辭退。學徒須扣足三年。方爲滿業。三年內無工資。至第四五年謂之半作。每年給資半數。第

六年學業既精。照司務待遇。按日給予工資。現因工會成立。已有所改革。例如學徒有補習夜校。城區新市兩處。均已設立。凡有學徒。均令每夜補受教育。工廠則有城內第一平民習藝所。縲絲傳習所。又洛舍鄉楊洪興布廠暨祥綸茗溪利農公利改良土絲廠。最大者可容女工八百餘人。

商業。從前以綢布業洋廣貨業絲業爲最盛。藥業南貨業油餅糧雜貨業次之。其餘各業。亦尙平穩。惟現因金融未見敏活。物價又極騰貴。賺賤非易。各業因皆縮小營業。市鎮以城內及新市鎮兩處爲最盛。洛舍次之。入境貨。油糧食茶葉酒醬綢料各種藥材南貨均爲大宗。其出境者。以蠶絲爲大宗。

商販道路。往回蘇杭等處。由嘉興崇德水道。金衢嚴等處。由杭縣水道。吳興長興等處。由菱湖荻港水道。武康上柏等處。或由二都旱道。或由大洋溪水道。至運脚。由蘇滬杭吳等處往回一次。專送則費多。便帶則費少。

。市面錢幣。銀元小角兌換。時有漲落。並無一定。商人擴充營業。廣放鄉賬。以陰歷年終爲一大結束。各主顧歸賬。延欠尙少。近因銀根艱窘。收賬爲難。爰均縮小營業。不敢濫做交易。卽有上等主顧。照常通融交易。亦須三節清款。其對於主顧。言語和平。應酬周至。各店向上行辦貨。則全憑介紹。與上行訂有擔保約據。方可開明貨單。隨時批貨。每貨一批。當付現銀四五成。夏秋兩節。略事結束。至年終收清。設有倒閉等事。卽憑介紹者清理。輸運方法。均由店家自便。團體。則有城區商會。及新市鎮商會。又新設商民協會。

第十八篇 武康縣

考武康漢初平間置永安縣。至晉名武康。宋乃統稱上縣。前清因元明之舊。定武康爲中邑。民國亦仍其制。疆域。東界德清金鷄山。西界安吉銅峴山。南界餘杭馬頭關。北界吳興桃塢嶺。東南界杭縣界頭村。東西七十

九里。南北四十五里。從前自治區域。分城區阜溪區湘溪區封禺區長安區英溪區。共計六區。面積三千五百五十五方里。計田十萬六千四百四十畝。全境有戶一萬四千六百八十八。有丁三萬三千四百八十五人。有口二萬四千四百十四人。業農者居十分之三。業商者居十之三。業工者居十之四。

河流山脉。東南自天目分支西北有銅峴山。因之水流冲激。各區有小塘以分其勢。山水上下宣洩。足以爲水碓等用。

地勢。東南平坦。餘均山脉連亘。山之高度以高峯山爲最。其險要以銅峴山之銅嶺爲最。

氣候。最高溫度在八十分以上。最低在四十分以下。其溫度平均時。最宜育蠶。霖雨時行。農民賴以栽種。惟春陰多雨。有損蠶桑。

土壤。山多田少。其膏腴能種禾苗栽插桑秧者。約十分之四。餘均山地。

向植毛竹茶樹等物。

西南多山。每值山洪暴發。水勢下注。向築壩堰以疏洩之。舊有七十二堰。全境田畝。賴以灌溉。至明嘉靖間。僅有二十二堰。現在淤塞益多。亦無脩濬專款。

農事。均仍舊法。其育蠶繅絲。均用竹架木車。墾具向用犁鋤耒耜水車等項。並無改良新具。近年人民已知蠶桑之利益。較前數年日見進步。惟因繭價昂貴。人民均以鮮繭出售。繅絲者日見其少。

官荒極少。自兵燹以後。溫甯甯紹等處客民。聚集承墾認業。苗圃設在湘溪南場。地約十餘畝。模範森林三處。均在城區。一鳥迴山。一石城山。一棋盤頂。生活力尙強。植茶多在莫千山一帶。惟烘焙方法。尙未精究。現均輸運至滬烘製。

地多溪水。並無巨浸大河。漁業不盛。養殖以家池塘水爲多。捕魚用線網

竹單。魚類多鯉、鯽、鱖、鯉。價額每年約四千數百元。畜牧僅農家餵養豬、羊、雞、鴨。無專營者。

農產物之主要者。米、麥、豆等類。普通者。瓜、菜、筍等類。民食。秋收豐稔則有餘。所產穀米。可以運銷隣境。

佃田關係。向業主書立契約。如收成歉損。業主應減讓田租。其有發生虫害時。應由佃戶擔任捕捉之責。水旱災害。亦由佃戶任預防之責。團體僅有縣農會二處。

出色之工作物。有織布竹篾。其齒細薄如紙。上下兩排。布置緊密。爲織機必須之物。外人不見仿造。運銷於江蘇等處。年產五千餘張。價約二元以上。普通者。磚瓦產額僅供本地之用。價值每萬約三十元。竹篾年約三十萬把。每把值洋三分。缸每隻價約二元。運銷蘇杭等處。其餘細緻物品。均由杭滬輸入。

僱傭關係。或以月計。或以年計。學徒則均以三年爲學成之期。工廠。設有貧民習藝所。內容注重染織竹工及窰業等科。前因災後款絀。暫行停辦。迄未恢復。

絲茶從前咸運銷英德等國。自滬上設立絲廠。及本茶製法不精。銷路漸滯。又境內繭行向止一家。近來添設五家。因之土絲日減。惟竹木一項。近年出產較多。行銷頗廣。

市鎮。城區上柏鎮三橋埠頭鎮塘涇市二都市楊墳市四都市長安市。合計店舖不過四百家。入境貨。布疋南貨油鹽爲大宗。出境貨。絲米茶竹爲大宗。

商販道路。一杭州。一湖州。遠至蘇州上海等處。其運費或自杭州。或自湖州。或自蘇滬。均視道路之遠近。計其多寡。錢幣市面。隨時略有上落。團體。城區及上柏鎮。均設有商務分會。依商會選舉法辦理。

第十九篇 安吉縣

考安吉自後漢分置安吉縣。至今仍之。疆域。東西廣八十里。南北長七十里。東至武康縣界三十五里。以銅峴山爲界。西至安徽廣德縣界四十里。以苦峴山爲界。南至孝豐縣界二十里。以獅子渡爲界。北至長興縣界四十里。以小溪口爲界。從前自治區域。分爲城東西南北五區。面積計五千六百方里。田地蕩約佔百分之六十。山佔百分之四十。全境有戶一萬七千七百八十五。有丁四萬八千五百九十八人。有口三萬二千四百六十三人。其中業農者五萬二千人。業工者四千七百人。業商者四千五百人。

諸山起自天目。玉磬金鐘之蒼翠。尤爲一縣佳境。其脉由孝豐餘杭邊界折入。亦有自安徽廣德入境者。惟皆不離苕溪左右與苕溪支流諸水之源。故自天目隨水道分行。至餘武吳興與安吉間。爲獨松高陽銅峴諸山。卽東溪所自出。石門四面三山諸山。卽四公溪所自出。至孝豐廣德與安吉間。爲

青松回車環山嶺諸山。卽裏溪所自出。梅家山杜家山諸山。卽渾水瀆所自出。境內羣山環繞。不可殫紀。惟皆係天目山之餘脉。並無高至數千尺以上之山。最高者。在茗溪左爲鳳凰山。縣東三十里。銅鄉山高約一百四十五丈。馬頭山高數百丈。香爐山高數百丈。以形似故名。四州山在茗溪。右爲金鐘玉磬郭公九龍諸山。大要東南重峯峻嶺。西北則漸委蛇曼衍云。茗溪自天目浮玉廣茗諸山發源。一名龍溪。東北流經孝豐縣至獅子渡入境爲西溪。東北經縣城東至塔潭會東溪。又北經漕埠橋會裏溪。又北經烏山分二支。一支東出會四公溪出吳山口。一支北經萬埭橋會渾水瀆過梅溪荆灣口。合流入長興界。計長約七十里有奇。此水通貫縣境之中部。爲主要河道。其支流不及備敘。

境內東南多山。地勢高斜。西北漸就低平。西鄉形勢。尤覺散漫。至其險要。則東南山鄉之獨松關太和山高隴嶺。及自安吉通道孝豐之石虎山。皆

陸路所經。爲臨餘武孝諸縣往來要地。而遞鋪鎮實爲集中之點。自地鋪沿溪而下。則經安吉縣城至烏山與浮石山對峙。爲縣城內戶。自是北經梅溪荆灣。東經曉墅至小溪口市。爲水陸要衝。小溪口當安長交界處所。係縣境外戶。其地尤爲扼要。至西鄉則禹家橋上舍橋。係通廣德及四安要道。舊時曾設鋪汛。涼蓬亭亦其要點。惟祇筦鑰陸道。於水程無甚關係。

氣候。最高溫度。在華氏表九十度左右。最低三十度弱。風霜雨雪之影響農業者。並無特殊利害。惟雨雪少則旱蝗易致。雨雪多則水潦堪虞。旱則東南爲焦土。潦則西北爲澤國。地勢使然也。

土壤。肥瘠各居其半。東鄉山土粗鬆。透水易而貯水難。西鄉雖多平山。土硬而礮。所含滋養力少。至田畝則西鄉多青泥土。北鄉多黏土。其數約佔七成。南鄉及近城地方。多夾砂土。其餘皆係水冲之田。植物。宜竹桑松杉橡。亦土產之一種。惟不多覩。穀類。則稻多而豆麥少。園圃果蔬之

類。亦不甚發達。

水利。四鄉各有不同。東南山原。水難蓄積。一遇小旱。則車戽無門。故恆苦旱。而恃塘壩以濟之。北鄉瀕溪。然去山不遠。一遇山水暴發。橫流莫遏。防之稍懈。則堤壞而潦。故恆苦水。而恃堤壩以禦之。西鄉雖號砥平。然水源易涸。非預蓄亦難免暵乾。且同一南鄉。而近南者常苦旱。近北者常苦水。其膏腴無患者甚少。凡屬溝壩塘埭所以爲容水洩水及禦水計者。皆農家命脈所在。按照縣志水利門所載。其灌溉田畝。實逾於今額不少。惟溝壩塘埭之制。則尙無大變更。至溝渠則皆係因小溪之自然而爲之。並無悉以人力鑿成者。間或爲往來通水而設。則皆由受灌田畝。擔負經費。通力合作。隨修隨派。其於塘壩埭亦然。惟塘則有係各戶所獨有者。管理之法。向隨田畝所在共同擔任。或議立公約遵守。並不責定一人。農事。則民雜五方。耕耘方法不一。惟於水田多駕牛以耕。大約土質肥沃

處。必於冬前先行耕就。以俟凍結。而後暖化。藉免虫火等災。至春則用犁二次。使土翻起。並於犁後。加用鐵耖。使土平均。然後栽插。當插秧時。必引繩以爲列行。將半月則用耖於苗科行間。耖去稗草。如是者三次。復有以耖耘之者。迨耖畢。瀉水令乾。謂之瀉田。俟其土裂。以水浸灌之。乃用肥或菜餅屑撒田中。俟穀成熟。方可去水。其或雨澤愆期。則車戽之勞。晝夜不息。其時忙工極貴。勞費蓋不可殫述。近時田中肥料多種。一種紫雲英。卽俗所謂草子者。連花帶莖。和水土耕起。使爛化爲泥。其滋養力最厚。亦惟肥田最能發育。此外則仍多用菜餅或肥糞云。農具。耕田器具曰犁曰耖。耘草器具曰耖。耖有二種。耖耖耖耖是也。掘地則有鋤。鋤之屬。鋤卽齒鋤。鋤卽板鋤。收割之具用鎌刀。至水車其形狹長。俗稱有三人頭四人頭五人頭不等。如五人所踏之車。則於輪軸上環列木鍵爲五。以符人足所踏之數。長短之差度。視地形之高下。及所灌田之多寡爲準。

。近有業主合股購置機器車水者。此外收穫脫穀之具。曰脫穀桶。其形橢圓。兩端稍尖。以木製之。當穫稻時。則將稻把就桶舉撲。傾入其中。均尚適用。至蠶具則有蠶架蠶簾蠶籠等項。蠶架有高至七層或九層者。簾與籠置費俱微。繅絲則用絲車。漁具多用罾網之類。惟近山處無魚可撈。故此種器具。無甚佳者。

育蠶之戶。向以西北鄉爲多。東南山鄉甚少。近年桑地日闕。人知植桑飼蠶之利。凡屬隙地。靡不種桑。故養蠶戶數。多至百分之八十五而強。核計每歲所出繭多至五六千石。惟飼蠶悉仍舊法。卽栽桑亦然。其於新法所具觀念。徒以向係興盛。無待他求。故非就育蠶最盛之戶。力爲提倡。不足以移風氣。至採集種籽之法。則取色潔形正之繭而去其外叢。以爲配蛾產卵之預備。迨其既出。則純任自然。並不假以人力。其種籽亦有數種。大約以來自紹屬者爲最壯硬而能多育。所有販賣方法。則繭多而絲少。以

繭行收買鮮繭。民間利在速售。故繅絲者。日寥寥也。
林墾一項。自前清洪楊亂後。各荒地逐漸墾復。計官荒地。尙餘十成之四。其成大片段處。均在東西兩鄉。惟皆土瘠多石。故當從前報墾時。民間多棄置勿取。查有西鄉靈一二暨晏一二五等莊。官荒山產。二千餘畝。堪以造林。又荆七靈九靈七靈六等莊之浮雲山地方。接連嘉興縣屬。荒山約共三萬數千畝。已由雲野林業公司具書承領。作爲造林之用。至於苗圃及模範森林。剏辦各一所。計李王山林地五十二畝。內種松苗三萬株。其餘官荒地一百零一畝五分。以土瘠尙未佈種。習藝所前苗圃二畝。內種橡種二斗。橡苗共活五千餘株。以地狹小。僅止此數。此外則有學校園一所。係東區三社小學所創。地在安八莊神遊塢東南部。暨金一莊漲子塢底。合計二百零五畝。茶樹則東南山鄉有之。所產芽茶綠茶。色香味俱備。其地每歲必鋤掘數次。惟茶田無多。產額甚少。業此者不過百餘戶云。

漁牧。以地處山僻。溪水清淺。水產不蕃。魚介尙或有之。苔藻絕無。故業漁者甚少。間有採購魚苗在私有池塘養殖者。亦係零星事業。其捕獲方法。率以網取。年產五萬餘觔。共值四千餘元。至畜牧則純係農家兼營。牛供耕田之用。羊家供境內之食。並無專營者。

農產物。普通以黃秬稻糯稻爲大宗。大麥小麥馬鈴薯之類。僅供本邑之食用。以安吉人口計算。年豐產穀四十八萬餘石。民食自是有餘。惟遇販運出境及荒歉之歲。則時虞不足。每屆夏秋。常藉客米以資接濟。

田產除由業主僱工自種外。凡佃田者。納租之多寡。悉視田之肥瘠爲準。最高每畝至二石。最低不過數斗。若遇農忙。僱工甚難。至預防災害。則開築塘壩以備旱。修濬溝堤以備潦。驅除蟲病。則用桐油或豆油燒之。或用石灰以殺之。團體。有縣農會苗圃等處。

出色之工作物。北區梅溪鎮。出黃沙火盆。專供蠶房之用。每年運銷吳興

等處。約八千餘具。普通者。爲陶器甌瓦五金製器金銀器銅錫器竹木製器等。其餘飲食用品。如菜油白酒餡糖澱粉及餅乾之類居多。絲棉織物。間或有之。

關於僱傭手續。約言之爲夥爲徒。大略夥用口頭契約。徒用書面契約者爲多。待遇方法。各業不同。夥則有不計成件。而專以月日計工資者。有專計成件。而不以月日計工資者。至於徒。則未滿期者。食其食。事其事。受其約束。期滿服務。年數不等。酌給津貼亦不等。各從其契約定之。

商務自前清遭洪楊兵燹後。元氣大傷。自後甯紹溫台及湘鄂皖豫各地商民。貿遷輻輳。接踵而來。現在城區及北區之梅溪。南區之遞鋪小溪口。東區之曉墅。比較前清末葉。大有進步。入境貨。以油鹽布疋南貨爲大宗。京貨雜貨次之。至出境者。以蠶繭穀米及楠竹小竹爲多數。絲茶筍栗等次。

之。經過者。孝豐之竹木柴炭米穀絲繭茶筍及各山貨。均由遞鋪梅溪經過。餘杭茶筍之過境者次之。

商販道路。大略輸出之貨。多由南而北。自遞鋪經本城以達梅溪。或由曉墅直至吳興。輸入之貨。多由北而南。自梅溪或曉墅經過本城以達遞鋪。而曉墅則爲東區貨物輸轉之點。其水陸關鍵。恆以梅溪遞鋪爲起止。陸運舟運筏運。悉視溪水大小定之。至運脚。各市鎮情形不同。肩運船運筏運。隨溪水之漲落。路程之遠近。臨時酌定。惟遞鋪較昂。錢幣視吳興市面爲標準。

商界多以錢幣直接交易。本境向無銀錢行號。其售貨及進貨。除以現金兌易。由各商自向吳興錢貨行商輪轉外。另有一種信用素著之竹行。代各商出立期票。屆期卽由該行代付。商民便之。然與代辦性質迥別。至錢貨往來。均由航船筏夫代運。主顧以本邑及孝豐人爲多。惟米穀及蠶繭竹木多

售往杭滬蘇湖等處。商人多甯紹及湘皖人。語言不齊。在境日久。尙易別。團體。有安吉商會遞鋪商會。總工會。縣農民協會。教職員聯合會。教育委員會。建設委員會。縣公款公產委員會。

第二十篇 孝豐縣

考孝豐向名原鄉。唐初爲安吉縣舊治。明析置孝豐。屬湖州府。清仍之。民國廢府制隸省。疆域。東西廣一百三十里。南北袤一百二十五里。東至武康縣。以菱湖嶺爲界。西至安徽甯國縣。以孔夫關爲界。南至臨安縣。以烏山關爲界。北至安吉縣。以沿干小溪爲界。東南至餘杭縣。以幽嶺爲界。西南至於潛縣。以耶采關爲界。西北至安徽廣德縣。以苦峴山爲界。東北至安吉遞鋪鎮。以穆王城爲界。從前自治區域。劃爲城區靈岩鄉南嶼鄉移風鄉廣茗鄉金石鄉通德鄉太平鄉永和鄉永福一區永福二區永福鄉廣安鄉。計十二區。面積約共一千四百一十三方里。內田十二萬二千二百八十

八畝。地四萬九千六百五十五畝。山四十四萬九千零十三畝。蕩九百零七畝。全境有戶一萬六千一百三十八。有丁四萬八千零三十人。有口三萬四千四百三十七人。業農者三萬餘人。業工者四百餘人。業商者八百餘人。河流。水源有五。曰雪水。發源於西鄉宮圖天井堂。曰苕水。發源於南鄉剛圖天目山十二龍潭千畝田。及友圖董嶺深景二塢西天目支山中。均於北鄉長潭會合出安吉。曰小苕溪。發源於動圖大溪山。曰南嶼山水。發源於靜圖南嶼山。均出安吉至馬家渡與苕溪會合。曰混泥港水。發源於亨圖金鷄嶺。出鄣吳村至梅溪。水流湍急。人民因沿溪作碓。利用水力以舂米及造黃紙香粉等。於工業上頗有裨益。惜水淺不能通舟。

山脉亦有五。實發源於徽州之箬嶺。蜿蜒東行至西鄉徵圖唐舍關。一束而爲洞王山焉。山之西爲西天目山。高三萬六千尺。西北行。爲縲舍大抗坑金鷄嶺烏石山鄣孝山皈山。又出鄣吳村至長興安吉等縣。北行踰抗嶺結龍

塘山。出孝豐城。至鐵鈹山而止。東北行。出天目山章村過羅村。走東山至姚家嶺而止。又東北行。出大溪山俞嶺市嶺高梧嶺。踰南嶼山。走武曲嶺。過靈峯山。至安吉而止。又東行之山脉出東天目山。入臨安境。其中東北行出小浮玉山。過景村。走武康。下吳興。凡高處產竹木及茶等甚富。地勢。西南高而東北低。若西鄉之宮圖。與北鄉之良圖較。約高二十餘丈不等。近城一帶。方圍二十餘里。寬平如坻。餘則二三里或六七里。均傾斜不平。險要之處。如南鄉之耶采關唐舍關傲天關孔夫關。西鄉之分龍關鐵嶺關。西北鄉之虎嶺關瓜嶺關。東鄉之烏山幽嶺獨松關等。均係皖浙咽喉。萬山高峻。形勢雄險。百二秦關。無逾於是。氣候溫和。夏不甚暑。冬不甚寒。溫度最高爲攝氏寒暑表八十度。最低爲四十度。惟地居上游。水流湍急。往往旬日不雨。則溪流盡涸。一月不雨

。則禾苗枯萎。是以雨水充足。農業上收成必豐。冬雪以三尺爲瑞。旋風年或間有一次。於農業稍有損害。雹則數年難遇。

土壤。山多田少。田之肥者約三萬餘畝。瘠者約九萬餘畝。宜種稻。山之肥者約五萬八千餘畝。宜種竹。瘠者約五十三萬四千餘畝。宜種茶及雜木。水利。近溪之田。約三萬餘畝。人民或作壩。或開溝。灌溉便利。溝渠之大者凡六。曰新溝葵家溝。在銀場莊。灌田八百餘畝。曰黃紙溝用五溝。在興旺莊。灌田一千餘畝。曰樸樹溝。在高村。灌田四百餘畝。曰水築溝。在響川莊。灌田二百餘畝。

農民普通耕作。每年於陰歷二月半後耕耜。一面修理田塍。貯水灌潤。施以肥料。至穀雨時布穀種。俟秧出六七寸許。於小滿前後。分種各田。名曰種秧。種秧之際。祇憑手法眼力。縱橫均成直線。間有用繩準之者。種後逾二星期。用耒耘之。間有用手耨之者。耘凡三次。始畢。收割大概在

中秋節後。間亦有成熟較早。於節前刈穫者。此外種植蔬菜。整地作畦。驅蟲施肥等事。亦尚合法。惟不知構造溫床。以促其生長。是爲缺點。農具如水車牛車。均出於安吉梅溪鎮。篾笠犁鋤鈹鏈籬簸箕篩施肥桶杓除螟燈打穀桶晒穀簞除草鋤風車等。均出於本邑。墾具如兩齒鋤四齒鋤鏟等。均舊式。蠶具如鵝翎埭刀截葉板小扁桑剪桑篩梯桑架。皆本邑出品。蘆簾出於吳興。土人間有用篾簞代之者。然不能烘催。漁具有二種。一用竹筏。放鷓鴣噙取。一用鳧水桶。用繩鈎製置篾簞中。先晚投於水中。次晨乘鳧水桶取之。

蠶桑向不發達。蓋育蠶之時。正採製茶葉筍乾期間。茶葉筍乾之利。與蠶桑相埒。而其採製與銷售。亦較飼蠶種桑爲易。近來人民對於蠶桑事業。雖漸知注重。惟養蠶種桑。仍多沿用舊法。種子以由陝縣購來者爲優。土產較劣。

官荒山七處。共約一千三百餘畝。因地處幽僻。距離村落。異常寫遠。且山多石質。故無人承墾。惟民間私有荒山荒地甚多。亦以土質礮瘠。不宜種植者居其強半。至種茶之山。約千餘畝。每年產額豐歉不等。種茶之法。寒露前收子晒乾。次年清明下種。芒種時出土。從此隨時保護。禁放牛羊。施以肥料。至第四年可以摘茶。

河道。雖有苕源五處。然雨至則水漲丈餘。水退則河乾石出。而蓄水渠塘。又復寥寥。是以魚介出產甚少。所有不過鱒鰕蝦鯽。至每年冬所售鯉鱖等魚。均由武康縣上柏鎮等處肩販來孝。並非本地出產。至畜牧並無專營者。緣該地人民。均以山息爲生計。若游牧牲畜。恐被蹂躪。故人民牧放牛犢。均以私有田地爲限。所以保護山息也。

農產物。如穀麥苞蘿菸葉薯芋茱瓜豆茶白菜黃芽菜雪裏烘蘿蔔筍乾竹松板松段柴炭等。內除竹木柴炭可以運銷外埠外。其餘各物。僅供本地之用。

又本邑食米產額。以現有人口用量計算。不敷尙多。雖有苞蘿豆麥雜糧從中補助。仍非仰給他處不可。

農民種自有田者約五千餘戶。種佃田者約七千餘戶。凡佃戶與業主。須先訂契約。載明效用時間及年租數量。以爲憑據。每畝並先付押租洋一元。然亦有不付者。租穀之率。大概上等田每畝一百八十觔。中等田一百二十觔。下等田百觔至八十觔不等。每年於秋收後照繳。不得過遲。山田祇防旱災。不虞水患。天旱時大壩水田。尙無妨礙。惟小壩田及無塘壩之田。則坐視無救。蝗螟起時。用燈置水盆中。夜間燃放田間。俟蟲撲燈落水自絕。又苗間綿蟲起時。用洋油酒於田中。綿蟲遇油卽死。惟苗節出水。苗心被食無救。團體。舊有縣農會。及廣安鄉之林業會。

地處萬山之中。民俗質樸。祇有普通工作物。如鐵木石磚瓦等。僅供本地之銷用。

工業習慣。如建築房屋等。大概分包工僱工二種。包工經雙方議明價物。由工人包辦。惟須訂契約。僱工則論工計值。並無契約。其工資分日計月計年計三種。學徒須得親友或同鄉之介紹擔保。方得就師。膳宿費由業師負擔。滿師之期。自一年至三年不等。要以三年爲多。

商業。前清光緒間。頗稱發達。光復後。土匪蠶起。旱災連年。民不聊生。商業大受影響。近來交通稍便。風氣漸開。洋廣綢緞各貨。輸入者日增。商店較前增多。市鎮除城區商務較盛外。餘如章村報福壇杭圩唐福山河港口赤塢西畝等處。商舖多則三十餘家。少則十餘家。入境貨。以糖油鹽布疋綢緞煤油草蓆菸絲藥材洋廣雜貨海味南貨等爲大宗。出境貨。以竹木茶繭柴炭粗紙菸葉香粉筴乾爲大宗。

商人販運貨物。水道自縣城東門外。溯苕溪直下。過唐福鎮。越安吉而至吳興。旱道自出北門十五里至唐福鎮。北行十里至安吉縣界。又五里過石

虎山。又十五里穿安吉縣城。再北行三十里至梅溪鎮。運價自吳興縣城由水路運至安吉縣屬之梅溪鎮。轉由竹筏運至孝豐縣城。分貨物之粗細。計運值之多寡。市面錢幣。隨時漲落。

商人交易。大半現幣。亦有向來認識得欠至節底給價者。言語因五方雜處。不能統一。惟甯紹吳興等處言語。與孝豐略同。是以商業上頗佔優勝。運輸貨件。大概皆由吳興縣經梅溪安吉而至孝豐。團體。舊有商務分會及酒業公所。

鑛業一項。有銀鑛一。在西鄉角圖銀場莊。明嘉靖間。曾經開採。因民人滋事。且鎔化不得法。利不敷本停辦。又煤鑛三。一在西鄉射圖赤塢莊。清光緒間。曾由民人合資開採。一在南鄉和圖楊坑橋。民國二年間。經地方官紳合股開採。一在任圖和塔莊。民國三年間。由民人集股開採。均因煤嫩不能着火。且資本不繼。先後停辦。又有未經探採之鑛二。一在革圖

之塘河莊。約二百餘畝。一在商圖之銅坑莊。約一百餘畝。均產煤。惟質尙嫩。又石鑛一所。在西鄉宮圖高村莊。其石深灰色。與教育用品之石板相似。土人用代陶瓦。

第二十一篇 鄞縣

考鄞縣自梁陳以前。爲鄞鄮句章三縣地。隋爲句章縣。唐爲鄞縣。五代以來。沿用今名。疆域。東以育王寺隴東河頭舖爲界。西以潘巖嶺爲界。南以傅壩河爲界。北以陳橋渡舖爲界。東西相距。計六十五里。南北相距。計六十六里。東南以金鵝山嶺爲界。西北以西渡江心爲界。東南距西北。計一百二十五里。西南距東北。計二百十五里。從前自治區域。分高嘉鹽梅同道章遠同善鳴鳳大成漁源塘界首南永和利益天然西成豐和桃源鄞江鄞溪等十八區。自治停辦。併高嘉鹽梅爲一區。同道章遠爲一區。同善鳴鳳爲一區。塘界首南爲一區。永和利益天然爲一區。餘均仍舊計十二區。面

積四千二百餘方里。其間田地山蕩。約佔八十四萬九千餘畝。全縣有戶十七萬七千九百二十二。有丁三十九萬五千五百五十人。有口三十三萬四千八百七十二人。其間業農者約十分之五。業工者約十分之一而強。業商者約十分之二而強。

河流。甬江由慈溪縣境流入。至新江橋。與鄞江合。又折而北爲大浹江。流入鎮海縣境。鄞江自奉化縣流入鄞南至東烏龍碛前與甬江合。小浹江自五鄉碛分後塘河之水。北行入鎮海縣境。鄞奉橋水自奉化流入。至更樓壩與銅浦合。前塘河自道陳壘發源北行。至大石碛止。銅盆浦雲龍碛分前塘河之水。至更樓壩前。與鄞奉橋水合。一里與鄞江合。東中塘河自東錢湖過莫枝堰至橫石橋。與前塘河合。西塘河自浹石嶺發源。曲折向東南行。至望京門。西中塘河自將軍山前分西塘河之水。至望春橋。與西塘河合。南塘河自仗錫嶺東北發源。東北行至長春門。裏弄港自惠明橋分南河之水。

。東北行至集士鎮。與中西塘河合。新塘河自控湖橋與橫港分。至望春橋與西塘河合。後塘河自太白山發源。至四明碑前。與前塘河合。

山脉。分東西兩部。自奉化縣折入起頂爲金峨山。分一支東北行。越馬嶺至西山而止。一支東行。爲白巖山。爲鄞奉交界。自白巖山起。共分兩支。其一支越王家嶺。折而東北行。越銅壇嶺瞻器嶺支水嶺獅子山起頂爲福泉山。又越筆架山綠巖山瞻崎嶺蔡家山天童嶺大頭山起頂爲太白山。至此又分一支北行向鎮海縣。其餘脉。仍自太白山西北行。越育王嶺魚山嶺橫嶼山至石禿山而止。爲鄞鎮交界。西部自餘姚縣葑羊嶺折入起頂爲四明山。自四明山起共分二支。其一支東行。至塔山。爲鄞奉交界。又一小支越大風嶺石筍山至上化山而止。其二支東北行。越分水嶺硤石嶺與餘姚交界。又越四分嶺石陳嶺潘嶼嶺至青木山而止。與慈谿交界。硤石嶺又分一小支東南行。越黃巖嶼嶺版漳嶺至錫山而止。

地勢。東南濱海低窪。西北多山較高。

氣候尙屬溫和。最高溫度爲八十五度。最低溫度爲四十五度。

土壤。田土較肥。於栽種稻麥等項。頗稱合宜。惟山土多瘠。除栽植樹木外。間有可以種植蕃薯者。樹木祇宜松柏。計土壤瘠者居十分之三。肥者居十分之七。

水利。東鄉田畝。多賴東錢湖。以資灌溉。查東錢湖一名黃金湖。四面環山。受七十二溪之水。周八百頃。湖岸疊石爲塘。互八十里。又於其傍各爲石碶。水溢則分洩之。使注於江。唐宋以後。修堤濬湖。相繼不絕。鄞奉鎮三縣之田。俱資灌溉。說者謂甯波農事之修廢。係於東錢湖之開塞。現該湖淤塞之處甚多。有三縣設立之工程局。從事修濬。其餘水道。如前塘河後塘河南塘河西塘河新塘河等。均屬往來官河。其附近灌溉田畝。多少不等。

所種稻類。有早晚二種。年可收穫兩次。每當冬至前後。用牛架犁。翻土使鬆。至次年清明節。乃車水灌田。復翻而耜之。加以肥料。將早苗插下。越十餘日。早禾成活。復將晚禾間插。大加肥料。動耘數次。不使莠蔓滋生。至大暑節。早禾成熟。先收穫之。然後培養晚禾。至霜降節後。亦可收穫。冬季種豆麥油菜不等。所用農具。如犁耜耨等。均係舊式。車水灌田。多用牛車。婦女多任織蓆織布。或織草帽草履等工作。種桑育蠶者甚鮮。

人烟稠密。山少田多。可墾之地。均經墾種。荒產稀少。縣署左首。辦有模範桑園。計地四畝。又西門外有紀念林。計地六畝。然一係縣丞署廢址。一係製藥局廢址。土壤甚瘠。且多瓦片。種植未能發達。近來添設苗圃一所。圃址在南鄉橫溪埕窰。離縣城四十里。面積約二十餘畝。培養樹種。劃分五區。一播種區。二插條區。三換床區。四試驗區。五標本區。山

場所產。均係松櫟。僅供炊料。其造屋製器所需。以福建運來之木居多。水產物。外海以黃魚墨魚帶魚蚶子爲大宗。內河以鱖魚鱧魚白魚鯽魚蝦蟹等類爲大宗。年產約三百四十萬觔。率皆隨捕隨賣。製造方法。或晒乾。或鹽鹹。或用冰裝運他處。漁具均係用網。網係苧織。畜牧。各家餵養鷄鴨豬羊。以供食品。未有以爲營業者。

農產物。以粳米糯米大麥小麥豆爲主要。落花生棉花貝母次之。瓜果等類更次之。民食不足以自給。向恃鄰縣及溫台鎮江等處。以資接濟。

農民佃田。先向業主訂立佃契。議定租額。多則每畝納租三百觔。少或二百觔。視田之肥瘠而定。按期清繳。倘遇災歉。先請業主勘驗。輕則減讓。重則豁免。至於驅除害蟲之法。普通多用石灰殺之。一切新法。俱未講求。團體。城區有市農會。及高嘉鄉農會兩處。

工業。縣立平民習藝所。內設木漆器織巾織布織蓆四科。又甯波工廠。專

造各種機械。又商辦和豐紡績廠。造棉紗。又通利源榨油廠。專造棉油及棉餅。又正大火柴廠。專造火柴。此外如織布織巾織蓆。以及皂燭碾米翻沙等小工廠。共有十餘家。人民對於工藝上。頗具樂觀。日有進步。其出色之工作物。如和豐紡績廠之棉紗。甯波工廠之各種機械。各小工廠之木漆器及草蓆。成品極良。銷路極廣。普通者。如通利源榨油廠之棉油棉餅。正大廠之火柴。光明公司之肥皂洋燭。餘如黃酒豆醬等。皆爲出產之大宗。至外來者。磁器洋油玻璃井玻璃製品羽毛呢絨等。均爲大宗。近來各鄉婦女。多編草帽爲業。其原料來自外國。製成後。運銷外洋。每年值銀約三百萬元。

民間子弟。約十四五歲時。投師習藝。不論何項工藝。均訂三年爲期。限滿方可自由營業。至民間僱用工匠。按日給資。團體頗堅。無論何種營業。均集資設立公所。其集資方法。大率入行有費。每年又酌取若干。存儲

生息。作爲工人身後之撫卹金。立法美善。又同行規約。訂有罰則。違反者須繳罰金。整齊劃一。爲他處所不及也。

俗尙勤勉敏捷。耐苦任勞。自唐宋以還。海舶往來。市廛所會。萬商之淵。坐肆售貨。朝夕從事。故子弟之學。競習爲商。商日益衆。縣城東門外江北岸。有商埠一處。清道光間訂約。咸豐十一年開放。馬路四條。南北約五里。東西約三里。此商埠開闢後。商務較繁。若滬杭甬鐵路。能銜接一氣。則甬埠商業。當較前更盛也。

市鎮。東鄉十處。甬東市東津新市港迴龍橋東雅橋邱隘五鄉硯東吳寶幢小白。東北鄉一處。梅墟。東南鄉二十二處。廟跟四港三橋下應東婆渡桃江定橋董村前徐莫枝堰陶公山觀音莊雲龍硯大堰頭橫滋莢村徐東埭韓嶺下水大畧蟠松塘頭。南鄉十八處。南郭石硯李家橋樸社路頭高塘橋雅道橋姜山東林斗門橋胡家墳周家埭虎嘯園走馬塘蔡郎橋元貞橋百梁橋董家跳。西南

鄉七處。布金寺橫漲橋石馬塘前虞唇蛟衝王家橋鄞江橋。西鄉十三處。西郭望春橋新莊賣麵橋十字港高橋石塘黃公林青墊鳳巖橫街頭清道鎮小溪鎮。共計大小七十餘處。入境貨。以煤油煤炭木板石礮綢緞洋布羽緞及南貨藥材等爲大宗。餘如糖類及玻璃製器次之。出境貨。以草蓆棉紗魚類木器貝母等爲大宗。至經過者。如棉花棉子。由餘姚慈谿而來。轉運於上海及海門溫州等處。煤油及南北果品。各種藥材。由上海而來。轉運於隣境各縣。

商人運貨。本邑輪運。均由鎮海出口。至上海。約一夜可到。至海門。約一日夜可達。至溫州。約兩日可達。餘如定海象山南田鎮海慈谿奉化餘姚等縣。均一日可以往來。至紹興則由杭甬鐵路直達百官。僱船前往。亦一日可到。交通可稱便利。陸路。若杭甬路成。即可直抵杭縣。南門外有鄞奉省道。汽車直達奉化。水路。甬江內有汽船通奉化餘姚。塘河中亦有汽

船通四鄉。較淺之處。有划船竹筏。至輪船火車航船。運輸貨物。其價值。視貨之大小輕重。路之遠近。隨時酌定。錢幣銀元銀角銅元。照市隨時漲落。

各商號購辦貨物。不用現洋。惟憑計簿。日書其出入之數。夜持簿向錢肆彙錄之。次日互對。謂之過賬。現在已將過賬名目革除。改爲匯劃。市上皆操普通言語。至輸運貨物。俱由輪船或火車。惟偏僻之處。則仍用航船。團體。除寧波商會外。尙有各業之公所公會。均私立團體。

礦業。有本邑與奉化交界之銀山岡地方。發現鉛礦。民國六年。有商民探實。因招股爲難。迄未進行。

第二十二篇 慈谿縣

考慈谿古名句章。唐始改爲慈谿。歷五代宋元明清均仍舊稱。民國因之。疆域。東至海邊三十六里。西至陸家埠六十里。東西相距九十六里。南至

瞭舍三十里。北至羊浦海邊六十八里。南北相距九十八里。從前劃分自治區域。合金沙鄞垸兩鄉及縣城爲城區。以縣東之獅陽靈陽化東駱駝橋四鄉爲東區。縣南之嶼安江安明孝藍溪四鄉爲南區。縣西之金川鄉。壤地較廣。定爲西區。縣北六鄉。地面遼闊。戶口亦繁。因劃爲兩區。以東安師橋龍三鄉爲東北區。鳴鶴昌明永義三鄉爲西北區。共計六區。面積約三千四百餘方里。田佔十分之六。山佔十分之三。地佔十分之一。全境有戶七萬二千四百六十五。有丁十六萬九千六百五十人。有口十三萬九千六百二十九人。其間業農者佔十分之五。士工商亦佔十分之五。

河流。以前江後江爲最著。前江距縣治南十五里。卽姚江。自餘姚縣流入邑西之丈亭。岐而爲二。分前後江。前江由車厰至青林渡入鄞縣境。與甬江合。後江距縣治五十里。由丈亭分派四十五里至夾田橋。貫東鄉。入鎮海縣境。以上兩江。爲縣境東西南三面水利農田之冠。而於工業上無利用

之能力。

山脉。以縣北爲最多。要皆叢爾培塿。爲居民墾種植物及雜糧。而浮碧山障於縣北。赭山峙於縣南。昔稱名勝。今則荒蕪。

縣境南北兩鄉多山。北濱海岸。東西皆平坦。無險要之可言。

氣候。比閩省略寒四五度。較蘇省略溫二三度。霜雪則應時而降。風雨亦無僭期之患。土質輒膩。稻分三種。曰早稻。立秋收穫。曰湖白。中秋收穫。曰晚青。霜降收穫。農事專藉人工與牛力爲之。普通所用之農具。係水車犁鋤鋤鏟。收穫器具。則爲鎌刀稻桶。並無新發明之農具。農民向不知種桑育蠶。故蠶具缺如。

向無官荒。卽民間所有隙地。大率栽種雜糧。故森林一項。絕少研究。

其地亦無漁場。每於漁汛之時。漁船放洋外海。有巡船保護。平時之網捕於縣境沿海各地。雖無巡船。而漁民自相集合。互爲巡警。以資捍禦。所

捕之魚。以黃魚爲最。至於畜牧。則爲牛羊犬豕鷄鴨之類。專供耕作及食品之用。

農產物以稻爲主要。而棉花及玉蜀黍蕎麥大麥小麥次之。民食雖歲時豐稔。尙欠一二月糧食。故每年必須乞糴鄰邑。以資接濟。

農家佃田。分大買小買二種。小買隨時換立契約。大買爲永久佃作權。其納租時期及數量。待秋穫時訂定。每畝納租穀一百五六十觔不等。此等習慣。由來已久。尙無紛爭之弊。惟防災驅蟲。襲用舊日祈禱之法。實緣農民之堅於迷信也。

團體。舊有縣農會。現已取消。縣北有錦堂學校一所。現改爲小學。又農林試驗場已停辦。

商業向不發達。現雖稍有進步。究不得謂之繁盛。因大宗商務。趨注於甯波上海。本城及鄉間市鎮，均係小販商品。供日用所需而已。

市鎮。除城區外。如北鄉之觀海衛沈師橋鳴鶴場宓家埭裘家松浦東埠頭。南鄉之半浦赭山車厩羅江大隱黃墓陸家埠。東鄉之河頭市文溪長石橋駱駝橋童市裘市費家市莊橋洪塘楊徐。西鄉之二六市三七市上新橋祝家渡漁溪丈亭鍾家門頭。共計三十一處。入境貨。如紹酒鮮魚海物綢緞洋貨均爲大宗。出境貨。以棉花爲大宗。依據十六年棉花驗水所統計。年約值銀二百餘萬元。毛竹楊梅茶葉等物次之。

商人運貨。縣城南面傍火車大路。東入鄞縣。西入餘姚。爲商販經過之要道。至於貨物出入。以火車運載者多。若以人力轉運者。以重量與道里計算其運費之多少。錢幣漲落。均以上海寧波爲轉移。

商家頗重信義。如買賣貨品。先行議定價格。無增減及變換等弊。惟市面狹小。不能有大宗代辦及大商主顧。團體。舊有縣商會。及縣北觀海衛縣南陸埠鎮各商務分所。

第二十三篇 奉化縣

考奉化舊名鄞。屬會稽郡。明改奉化縣。隸寧波府。今府制已廢。直隸於省。疆域。東至鄞縣藤嶺。西至新昌六詔嶺。南至甯海柵墟嶺。北至鄞縣北渡前。從前自治區域。分城區進化外連山裏連山松林東忠義西忠義金溪長壽禽孝剡源十一區。面積二百七十五方里。田地山約三千三百餘頃。全境有戶六萬六千四百四十二。有丁十四萬一千四百九十六人。有口十一萬七千二百六十二人。其中業農者有六萬五千餘人。業工者四萬四千餘人。業商者五萬四千人。

河流。縣境之水。惟忠義一鄉。東南流入海。餘俱發源西南。流歸東北。入奉化江。

山脉。由鎮亭山東北行。過大雷至華頂三台。爲縣治主山。由鎮亭北行過剡界嶺唐興嶺至山窗山。爲四明正脉。由鎮亭東行。過雲蓋雨施。至金峨

諸山。爲四明之東護脉。地勢長於東西。短於南北。西南較高。

氣候。據華氏寒暑表。最高溫度九十度。最低三十度。雨量以四五月及九月間之交爲多。惟二三月間。溫度過低。於春作及蠶業。均有損害。七八月間。烈風暴雨。於晚禾與果木。頗爲減色。罹水災者。以松林東西忠義三鄉爲最烈。至旱荒則近數十年來。未經發現。

土壤。約分三種。一曰青子泥。卽粘土。其性柔粘。氣水不易疏通。植物難於生育。鄉民以之製甌瓦及缸甕。甚耐用。二曰砂泥。卽砂土。色有黃黑。黃者良。宜於禾穀。黑者又名油砂。栽竹及種菜蔬外。他非所宜。三曰黑土。卽壤土。凡百植物。均無不宜。統計粘土約佔十分之二。砂土約佔十分之三。壤土約佔十分之五。至於改良方法。普通或行客土。或令休閑。或燒土以使膨軟。或耕鋤以受風化。地之低濕者。濬溝以洩之。土之高燥者。引流以灌之。惟無特殊之方法耳。

層巒疊嶂。溪流湍急。盈虛無常。久旱則西北一帶。田疇龜坼。久雨則東南一帶。田禾漂沒。故講求水利。實爲當務之急。縣屬之水。考之縣志。以十溪四河爲最大。十溪。一縣溪。二西溪。三龍溪。四南溪。五北溪。六剡溪。七雙溪。八金溪。九棠溪。十松溪。四河。一北杜河。二趙河。三范家河。四市河。要皆自港入溪。自溪入河。匯歸東北而達大江。

農事分春秋二季。春耕主種水稻。秋耕主種冬作。春耕於清明前後。用牛犁耕起土塊。然後進水田間。再用耙就水中縱橫往來數次。使土細熟而且平坦。乃下糞播種於其中。是謂秧田。秧田成後。越數日。卽整本田。本田亦用牛犁耕之。一面修理田塍。並以耙縱橫耙平之。令土勻而水渾。卽可插秧。插後逾十五六日。水澄泥沉。秧根亦固。乃去草一次。既完。將晚稻參布早稻之間。秧針下土深二寸。防早稻成熟致壓仆也。小暑前後。再各去草一次。至大暑前後。便可刈稻矣。早稻刈完。晚稻未收。立秋前

後。再去草一次。蹈入泥中。令其爛化。至處暑再去草一次。及霜降後。禾成熟登場。天氣晴時。即以耕牛犁翻田土。造畦。高約二尺。乃種冬作。是爲秋耕。農具。如牛犁牛耙耨車長車鋤頭鐵扒鐮刀麥行碎柴刀鋸鋤簞籃單絲蘿雙絲蘿遮簾稻床連耬稻桶畚箕米篩糠篩篩穀筲籬籬攤穀筲拉搔筲土箕土篩袋帚水桶抄水棚水抄斗耘田簾刀蒲蓑衣笠帽水桶扁担糞桶料杓等。蠶具。如絲車絲灶切桑砧蠶植蠶網腰子式蠶筲圓形蠶筲飼蠶凳桑剪桑梯桑鈎桑籃桑鋸接桑刀草梳擔桑凳等。漁具。網類如船網袴脚網布欄網三角網扳罾網趕罾網游絲網旋網擋網等。釣類如竿釣繩釣通常釣擬餌釣等。墾具如銖耜扳耜斧鶴嘴斧等。以上均係舊式。

養蠶之家。向頗不乏。惟皆冒昧從事。近年西北一帶居民。如禽孝長壽進化各鄉。孜孜以蠶爲務。頗有進步。然於新法改良。類抱消極主義。若採集種籽。與其販賣方法。未始一無可取。其採選種子。先擇佳繭。雌雄分

置於筐。俟蛾出齊。乃使交尾。交已。雄蛾別置於一筐。雌蛾則排列於已裱糊之皮紙上。令自產子。產就之子。上篩石灰末。靜置七日。子變黑色。即刷去石灰。懸於高爽清涼。無烟通風之處。約過十八日後。擇天氣晴明。日未出時。以長流水浴之。仍懸原處。至三伏日。再如前法浴之。臘月浸鹽滷中一晝夜。又浸淡水中一日。至河中洗濯令乾云。若販賣方法。當春繭採收之時。有繭商向產繭家。量繭之優劣。定價之高下。收而置之行中。漸次繅絲。轉販於外。倘繭家不願出售。即自行繅絲。有絲商來戶收買。不必自貨於市。

官荒山地。自一畝至十畝以上者。約計不下千餘畝。或係童山沙地。或係義塚所在。並無人民承墾。惟松林鄉之八鄉巖。官荒五十畝。由縣農會闢作模範森林場。縣署右側。隙地九畝。該會亦改作森林苗圃。至民荒山地。爲數尤鉅。加外連山區之爛萬地。約計山地二千餘畝。人民不知栽種。

殊爲可惜。又有民荒山地二百餘畝。已由公民開作農園三處。栽種果木。兼植雜樹。

東南濱海。水產豐饒。惜養殖捕捉。不知改良。製造亦乏研究。故年產不過數十萬觔。茲先述養殖法。多就海濱築堤成塘。潴鹽水於其中。以養介類。其最著者曰蚶子。曰毛蚶。曰牡蠣。獲利頗豐。又其捕獲法。凡捕黃魚鮓鱖烏賊力魚用網。鯊魚鰻魚用鈎獲之。彈塗以竹爲筒。插入泥中。潮退取之。帶魚米魚。有用鈎者。亦有用網者。餘不備述。

製造法。首乾製品。有素乾鹽乾之別。素乾分日乾風乾火乾。鹽乾者漬鹽而後乾之於日光也。次鹽製品。有白糝鹽漬立鹽漬之分。又有稱醃醬者。次醃藏品。有糟浸醬油浸酒浸諸品。

畜牧。除馬牛驢羊豕雞鵝鴨外。飼養蜜蜂。歷來頗盛。獲利甚鉅。每一桶貯蜂一羣。入冬令。包圍以簍。免寒氣之侵入。收蜜。則於春日花盛時

行之。每年一桶收一次。白蜜質最佳。至沍寒時。結晶如沙糖。亦稱沙蜜。白蜜之殘餘。榨其巢而得之者曰黃蜜。品質較劣。蜜之渣滓。貯囊置沸水中。壓以木片。蠟質盡出。是爲黃蠟。

農產物。以穀爲大宗。穀麥類。如糯穀早穀晚穀小麥大麥玉蜀黍蕎麥等。菽穀類。如豉豆豌豆蠶豆綠豆扁豆帶豆社交豆落化生黃豆等。蔬菜類。如白菜蒸菜莧菜菠薐菘蓬芥菜蒿菜油菜黃芽菜雪裏烘菜葱韭蒜薑芋甘藷蘿蔔菱筍茄子豆夾等。瓜果類。如桃梅李杏枇杷楊梅銀杏橘柑柿石榴栗櫻桃白蒲棗西瓜南瓜冬瓜黃瓜絲瓜甜瓜胡瓜等。此外如芝蔴芸薑芋麻綠麻棉竹靛青茶桐子等。以上各物。數量價目。視年收之豐歉。民食。西南山多而田少。食常不足。民貧而勤。山陂水涯。徧植雜糧。東北一望平原。稻麥如雲。食常有餘。合一邑而通籌之。則僅敷而無餘也。

佃田關係。業有大小。租亦有上下。上則二百餘觔。下則百餘觔。大業爲

田主。小業爲佃戶。不幸而水旱告災。預防無法。則請龍迎神。奔走祈禱。其事雖愚。其情可憫。至於驅除蟲病。惟菜蔬間有用菜蟲藥毒之。而禾稻則無聞焉。

團體。舊有縣農會。及農事試驗場模範桑園模範森林場森林苗圃各一所。此外有農園三處。均係租賃民山。栽種果木及蔬菜等。其餘市農會甚夥。不及備載。

商業。各鎮市面。向以大橋鎮爲最。海物自甯波縣交界及松林區濱海而來。山物自裏外連山區會集。而甯波旅客。必出於此。故貿易特盛。自民國元年大火後。市面頓形衰落。其後街房次第建築。迄今已復舊觀。此外如西塢鎮。雖有市面。然距甬江太近。一水相通。貿易不甚興旺。蕭鎮溪口亭下等處。各有市面。多山物竹木茶筍之類。新嵒過客亦多。由此南渡江口。多蒲蒹蒲履布疋之類。間有穀產。餘如方橋陡疊橋等處。爲鄞奉交界

。每值市期。除南北貨外。魚肉蔬筍。各因其時。自四方負擔而至。然貿易無多。惟葦湖一鎮。爲山珍海錯會聚之處。但值市期則熱鬧。非市期亦寂寞也。入境貨。以洋廣雜貨綢緞布疋川廣藥材錫鐵銅鐵閩廣糖色膠州各貨。及北洋鮮鹹魚鯨。新曠烟葉花生等爲大宗。出境貨。以竹木柴炭茶筍絲繭等爲大宗。至經過者。以竹紙白朮等物爲大宗。

商人販運貨物。海物自甯海縣交界。及松林區濱海等處而來。山物自裏外連山區而來。其脚費。或人力。或船裝。各以道路遠近計算。至錢幣漲落。以甬江錢業公所行市爲標準。

商人貿易。必以金錢交換貨物。或向甬江販運貨物至奉。必託甬江各行號夥友代辦之。八鄉言語。各有不同。其運輸貨品。大抵由甬至奉居多。團體。有縣商會。設在大橋鎮。其餘各市鎮。均有商務分所。團體力頗堅。鑛業。前經探探者。如縣屬東忠義鄉。與鄞縣交界毘連之大咸鄉。有銀山

崗鉛鑛。清光緒二十三年。曾經開採。後因松巖等數十村人民。力阻進行。事遂中止。

第二十四篇 鎮海縣

考鎮海歷宋元明。皆名定海。至清康熙時。改昌國爲定海縣。改定海爲鎮海縣。疆域。東至鄞縣界。以定海洋爲界。西至西緒鄉。接慈谿縣界。南至泰邱鄉。接鄞縣界。北至海。從前自治區域。分爲城區柴橋鎮崇邱靈岩海晏鄞縣東管西管前緒東緒西緒泰邱十鄉。面積一千八百七十五方里。內田佔四千零二十七頃八十九畝。地佔五百四十三頃九十九畝。山佔六百六十頃四十七畝。蕩佔一百七十四頃十二畝。尙有荒絕戶田地三百三十一頃二十畝。全境有戶九萬三千五百零八。有丁二十萬四千零七十七人。有口十七萬七千零五十人。內業商者約八萬八千七百人。業工者約五千人。業農者約十萬一千四百人。

枕海爲城。海水自大浹奔騰而西。六十里至甬江分二脈。南流爲董。入奉川。北自桃花渡。經鉄沙至慈邑之丈亭入河。自河而東。復蜿蜒百餘里。迴至邑之西管鄉。西管鄉之水溢。則被東管鄉內外道。由東門浦以入海。至招寶山梓蔭山。皆發脈於鎮北伏龍山。

地勢。三方距海。中央微隆。四面斜落。形如伏背。海道輻輳。南則粵廣。東則日本。北控高麗。商船往來。絡繹不絕。縣城在浹江之北。海關在縣城之東。北有招寶山。與南岸之金鷄山。屹然對峙。極爲海口重要。金雞山之東北爲望海山。又名竺山。其北與西均臨海。三山相對。以跨甬口。非獨甯郡之咽喉。實亦浙省之門戶也。

氣候。照華氏寒暑表。最高不過百度。最低不下二十度。至於風霜雨雪。大致春雨最多。一雨有十餘日之久。夏則大雨時行。溝澮之盈。可立而待。秋冬兩季。雨不甚大。亦不久。霜降於季秋以後。止於季春以前。雪則

在春冬之交。秋際時有颶風。往往挾潮以至。爲害田禾。他如水旱情形。邑屬瀕海。中經以大浹江。雖有洪水。宣洩自速。惟水道多屬無源。雨暘不容愆期。

土壤分三種。一爲油泥。居十分之四。此種土性最粘。空水氣不易疏通。植物自難發育。以之製瓦則宜。一爲沙土。居十分之二。此種土色。有黃有白。以之種竹木則宜。一爲夾沙油泥。農書所謂兩和土是也。居十分之四。此種土。凡百植物。皆無不宜。

水道。在縣治之西北。有夾江河中大河二河。直貫東西管二鄉。有大圍西河二河。橫亘東西緒前緒三鄉。益以鳳浦沈窰靈緒白沙四湖。在縣治之西南。崇邱一鄉。則有小浹江謝墅河。受東錢湖之水。靈巖泰邱海晏三鄉。有河三。曰地埭。曰蘆江。曰楊洛。有溪七。曰啓霞。曰盤巖。曰雁潭。曰瑞巖。曰慈巖。曰章家。曰楊家。霸衢一帶之鄉。盡是山田。城中之河

。卽大壕河也。各河所灌溉之田畝。大都皆在二萬畝以上。現在各河失修甚多。以澁江河中大河爲最甚。

農民對於稻作物。以三耕三耘爲定例。對於園藝作物。耕耘各得其宜。尙稱精細。惟於田畔之宿草。及畦間鋤下之草莖。未能去之淨盡。以清害蟲之巢穴。殊屬缺點。農具因鎮海不宜種桑。蠶具故不多見。墾具有牛車脚踏車絳車鮑魚犁虎魚犁平齒耙畹耙耜頭板耜株耜鴉嘴耜鷹尾耜花耜鐮鋤豆鋤平耙混耙紗耙落田耙雁爪耙麥春畹銚鎌刀灣刀茅刀快刀稻刀推刀土箕噴壺等類。漁具有漁輪網稀捕挂竹筴魚繩篋笄溜網椿竹扛繩獨落草繩網等類。

土質肥美。多係農田。鎮北東西緒鄉一帶。則多植棉。楊梅出產亦不少。靈巖泰邱海晏霽靄各鄉。產茶及金柑甚鉅。各鄉山場。多闢而栽荳麥甘藷。卽間或有植松者。惟不合造林法度。商人亦無組織公司公會以造林者。

崇邱鄉陳山地方。民有荒山二百餘畝。曾經劃造模範森林一所。限於經費。無甚成績。至植茶方法。冬令則就茶樹根旁土上次第鋤鬆。施以淡質肥料。其頂幹老枝。用剪修除。春令穀雨前後採摘之。謂之頭茶。夏令小滿前後採摘之。謂之二茶。尙屬合法。

海產魚品。均係天然之物。非藉養殖而成。每年捕獲。約計銀四五十萬元。至蓄養介類。惟蠶子一種。產於縣治之南昆亭三山等處。其法每屆清明節後。向象山海濱收買蠶秧。散佈於潮汎漲落之塗灘。名爲蠶田。一二年即可採捕。迨三年。則蠶子肥壯。製爲蠶干。可以遠銷。苔藻之類。除招寶山下天生紫菜外。餘乏別種。畜牧。鄉間雖有兼畜豬隻之家。爲數有限。牛羊鷄鴨以及蜜蜂等類。農家間有養之。亦無何等保護方法。

農產物。禾穀類。如早稻火稻六十日羅江尖餘姚種黃大蓮白光秈紅光秈湖白紅湖白水底清霜下晚早糯頭糯虎皮糯臘脂糯桂花糯晚糯晚青紅晚青白粳

等。豆麥類。西風三夜齊野稻黃巖種紅牙鬚白寶蓮大麥小麥蕎麥米麥蘆稈
玉蜀黍蠶豆豌豆黃豆梅豆豇豆赤豆菘豆扁豆帶豆油豆等。蔬菜類。茄大椒
茴香葵韭葱蒜白菜油菜芥菜黃芽菜莧菜菠陵雪裏紅蒿菜杓子菜苤菜香菜薺
菜薑蕪大頭菜蘆服芋甘藷蕨等。瓜果類。黃瓜西瓜菜瓜黃金瓜蜜筒瓜香瓜
絲瓜南瓜冬瓜早蒲秋蒲桃李臙脂李梅杏柿楊梅金橘等。紡績用之棉麻美棉
紫棉苧麻黃麻葦麻等。染料用之蓼藍烏葉五倍子。茶類之茶葉。藥物類之
紅花百合獨葉一枝花薄荷藿香菖蒲艾木香夏枯草車前杷子益母草省頭草梔
子蓖麻子金銀花牛膝等。或本地食用。或運銷外境。本邑田少人多。民食
不敷甚鉅。倘遇災歉。由紳商捐款購穀平糶。尙不致有缺乏。

種田制度。分爲三種。曰租田。曰便田。曰分稻田。租田租額。以穀計。
每田一畝。自二百數十觔至數十觔不等。繳租時期。分早稻六成。晚稻四
成。間有折銀者。亦照穀價計算。如遇天旱水荒。在江之北各鄉。則曰各

照大例。卽由富有田產者。與大佃戶。商定減若干成。而小業戶主卽援以爲例也。在江之南各鄉。則曰限同均分。卽業主與佃戶。將所種之稻。各分其半也。其便田租額。均以銀計。每田一畝。自六元至數角不等。繳納時期。在首年秋季。卽遇天旱水荒。亦無商量地步。其分稻田。則無定額。每年將所種之稻。各分其半。惟業主未到田監視。則佃戶不先收穫。誠恐無確實證據也。至承佃手續。大都由佃戶或業主。挽中說合。三面訂定租便分稻之辦法及租額。並水旱如何辦理等情。卽由佃戶書立租契。繳存業主。雖至退佃之日。亦不收回塗銷。至業主租田與佃戶。所有該田之副產物。一概貸與之。亦無一定年限。如彼此合意。竟有數十百年之佃東。蟲病向不甚烈。農民亦無驅除預防之法。現由縣政府組織治蟲委員會。隨時防察。團體。有縣農民協會。各區村農民協會。及農事試驗場。模範森林場。苗圃。或由縣籌辦。或由本地人民組織成立。

工業。有公益廠。搖紗織布。每日可出布約百餘疋。其布外銷居多數。本銷有限。手工業則草帽花邊二種。業此者不下數千人。行銷甚廣。其餘則皆民間食用物品。

僱傭工匠。按日計價。或長年計價。均有之。學徒拜師。以三年爲滿。同業團體尙堅。

邑人富於冒險進取性。出外業航運及工商業者甚衆。類多獲利。在津漢滬等處。執商界之牛耳。本地商業。從前市面甚衰。後稍繁盛。現在城廂內外。以南西兩門。市集較旺。惟因交通便利。人民購貴重物品者。多趨上海甯波。故本邑無大商業。此外鄉村集市。則每月集有定期。頗稱發達。入境貨。以木石柴及麥豆等爲大宗。出境貨。以棉花茶葉等爲大宗。至經過貨。由甯波出口往外。由外進口來甯。經過此間。以樹木等爲大宗。運脚就道途之遠近。及貨物之貴賤。以定其價值。市面錢幣漲落。悉照甯波

行情爲準。商人貿易。有現錢。有賒欠。店內所無之貨物。主顧托令代辦者亦有之。

第二十五篇 定海縣

考定海。俗呼舟山。春秋甬東地。唐建翁山縣。宋改昌國縣。元明因之。清康熙間。改舊定海縣曰鎮海。而更昌國爲定海縣。民國成立。仍以定海縣名。疆域。東至石馬山。與日本界。南至隆嶼。與象山縣界。西至蛟門。與鎮海縣界。北至大磧。界江蘇。從前自治區域。分城區及岱山鎮並吳洞蘆蒲洛舵展茅三安千礮景陶協和登步東靖靈和金一金二金三册子謝南謝北三益人和紫微岑椴蘭秀長塗衢山二十四鄉。合計二十六區。民國八年。改編自治區域。以在城甬東爲第一區。吳洞蘆蒲洛舵展茅爲第二區。三安千礮景陶爲第三區。三益人和紫微岑椴爲第四區。金一金二金三册子謝南謝北爲第五區。東靖靈利爲第六區。協和登步爲第七區。長塗蘭秀爲第八

區。岱山爲第九區。衢山大羊山爲第十區。面積計五千八百方里。田地山蕩約計三千九百餘頃。全境有戶八萬七千八百六十二。有丁二十二萬四千一百三十三人。有口十八萬九千八百四十五人。其中業漁兼業農者約七萬餘人。業工者約二萬餘人。業商者約五萬餘人。

島嶼三百餘。零星分布。中間雖有河道。均係細流。山脉亦起伏靡常。其水力。並無堪爲工業所利用者。

地勢。高低不一。縣治所在之舟山島。其地南北狹而東西斜長。挺居海中。爲浙省沿海最大之島。左有普陀册子。右有大謝金塘長塗岱衢峙於前。六橫桃花障其後。四面環抱。隨處可拋錨避風。至全境之最險要處。莫如入口之港。地名定海港。該處潮風甚疾。兼多暗礁。非熟於航海者。頗不易入。港口有礮臺。西蔽鎮海口。南翼象山港。實全邑之要衝。惜久已廢圯矣。輪舶往來。交通便利。與商務有關係者。除城區之箭頭外。則沈家

門與岱山二處耳。

四面環海。氣候溫度。最高時有華氏表九十三度。最低時普通在三十度左右。地居海中。濕度較高。夏季多颶風。恆傷禾稼。冬季略有霜雪。

近海一帶。以塗築塘成田。其性鹹。約佔十分之四五。近山性淡。土質極薄。沙礫居多。約佔十分之三五。肥精土壤。約佔十分之二。沿海之田。祇能種單季中稻。淡田可種早稻晚青兩季。山地皆種大小麥蕃芋等雜糧。近年略有栽種靛青。

河流淺短。節節灌注。並無公鑿溝渠。除金塘一鄉河道有十餘里外。其餘祇有五六里。各處海島。築塗成田。以千餘畝為最多坂數。每塘自由開鑿河道。各資灌溉。亦甚淺短。一遇乾旱。便多歉收。

沿海蕩田。水深不能犁耕。用耙平之。耘草一二次。民塗田先耕後耙。耘草三四次。農具用犁耙耨鎌稻桶籬簍。皆就地僱工所製。或向鐵店購買。

漁具用網。有麻網草網絲網之別。其名有對漁網漲網串網大捕網之分。溜網大捕網甚粗。絲網最精。其網由漁戶自結。或由台州甯波購來。居民養蠶者極少。故蠶具缺乏。

城區鎮鰲山一處。有官荒五十餘畝。本擬作爲森林試驗場。後由官產處標賣。至各鄉民山。泥土較厚之處。開種雜糧。不能種雜糧之處。栽種松木。祇供柴薪之用。不成材料。此外雜樹野生。聽其滋長。既無栽植之人。故無成林之望。民間種茶。山地居多。然大率就田旁隙地等處佈種。每年出產無多。比之浙西。有天淵之別。

地處海邊。無河道養殖魚鮮。惟六橫順母塗二處。就海邊塗場養殖蛭子。塗邊用竹桿作標。名爲蛭田。每年於清明節前。採秧撒種。或一二年可收。夏季用手拾取鮮蛭。煮熟晒乾。十觔可晒三觔。近來因輪舶往來便利。鮮蛭可裝運上海。不復晒乾。海產黃魚。用網捕獲。或以鮮魚冰之。裝至

上海。或破開以鹽漬之。隔一宵後。洗去鹽質。晒乾成鯫。目魚亦用網捕。或賣鮮。或晒鯫。名爲螟輔鯫。至畜牧並無專營之家。

農產物。普通種稻。年出早穀十餘萬石。中季蘆白花貢晚稻等約三萬石。晚青五萬石。糯穀二萬餘石。大麥十二萬觔。小麥四十八萬餘觔。蕃茹六十五萬觔。近來晒乾居多。運往外地。以年收穀米計之。僅足供三月之食。惟貧戶多以雜糧及蕃茹絲和食。不敷之糧。由甯波海門等處運來接濟。租田。向例佃戶與業主訂立契約。於立秋後繳租。肥瘠田平均。每畝約二百觔左右。或有作拚。以穀觔折洋。預先一年。除利息付現。每畝二元至六元不等。病蟲向來尙少。或有螟蟲。以菜油敷之。可以驅除。團體。僅有縣農民協會籌備處。縣立苗圃。設在孔廟前隙地。及南門外租用民地。共計十畝零。

工業。醬油最佳。餘如木質之頭梳。頗受社會歡迎。普通者。飲食類之菜

子油棉油黃酒燒酒旱菸馬鈴薯粉。服用類之大布柳條布。器皿類之金銀製器鐵製器銅錫製器石器。日用類之青油燭熟漆生漆釘葦蓆雨傘扇子香類燭炮花甌普通甌瓦等類。至外來者。如鉛筆粉筆墨油煤油圖書儀器紙墨石硯眼鏡鐘表肥皂顏料。以及縫紉製麵之機器等。或係本國貨。或係舶來品。皆非本地人所能製也。

僱傭手續。大抵皆屬口頭契約。待遇以技術之精粗。定工資之多寡。師弟之間。例如關於工作上或生意上遇有可以分利之處。則互相推荐。俾共謀利益。工廠有省立水產製品模範工廠一所。及電燈電話精鹽公司各一所。輪船未通以前。惟漁業獨盛。自輪船往來。交通便利。商務始有起色。市鎮。除城區及衛頭最稱繁盛外。沈家門岱山衛山瀝港。亦不失市鎮氣象。至六橫桃花大展白泉長塗等處。雖有街市。生意亦微。入境貨。以米木洋廣各物爲大宗。出境貨。以鹽蕃茹海產物爲大宗。至經過者。以海產物及

洋廣各貨爲大宗。商販道路往來。均需船舶。除縣屬各島。往來航路繁多。且因潮水沙礁之關係。時有變更外。約計有三。一北行經穿山鎮海達甯波上海。二南行赴象山石浦抵台溫等處。三西南行至福建廈門等處。運費本按路程給值。但既有輪船帆船之別。復有航船僱船之分。故無一定標準。錢幣市上適用者。鷹洋龍洋銀角銅元。各種鈔洋鈔角。亦均通行。現洋升水。漲落無定。舟山有通商銀行。沈家門有中國銀行。境內商販。大抵以過帳洋卽劃洋進出交易。商業約分放帳現款二種。代辦則取用金。主顧多直接交易。有時亦用居間人。言語皆本地普通話。運輸任客家自便。或爲代裝。照取各費。團體。除縣商會沈家門商會岱山商會分事務所外。尙有旅定商民所組織之航業公所漁業公所等。城區之衙頭暨沈家門岱山鎮均有之。

第二十六篇 象山縣

考象山隋以前屬會稽郡。唐神龍間立縣治於此。以山形名之曰象山。明清均隸甯波府。民國元年。縣屬之南田。建設縣治。以昌石鎮奠南鄉劃歸南田管轄。民國二年。仍以昌石鎮奠南鄉改歸象山。疆域。東至定海。南至南田。北至鄞縣。均以海爲界。西至甯海。以碓蒼山爲界。縣北崇山以外。卽屬海港。極少居民。故行政區域。除縣治外。僅分東西南三鄉。從前自治區域。計分城區及東之懷珠磐安寶海。南之靖南奠南昌石。西之西一西二西三西四西五。共爲十二區。面積計五千九百三十七方里。田佔十分之一。地佔十分之三。山佔十分之六。蕩甚少。全境有戶五萬二千零四十六。有丁十一萬九千九百七十三人。有口九萬二千九百二十九人。其中業農者居十分之六。業工者居十分之一不足。業商者不過二十分之一。業漁者約十分之一不足。

河流。除沿海港灣外。無舟行五十里之河川。其堪爲工業上所利用者。有

水碓水車兩項。

山脉。發源於天台。數百里至磻蒼山。爲甯海象山界。越數里爲西鄉之丹山。高約五千尺。爲象邑祖山。東出二十里爲大河婆嶺。又二十里爲石鼓嶺。又二十里突起一大山。曰九項山。至此山勢分張。南經大山各山而入昌圍衛。北折十餘里。過彭姥嶺。一峯秀出。是爲象山。他如西鄉之蒙頂山。大雷山。五雷山。東鄉之珠山。南鄉之五獅山。均高五千尺以上。地勢係屬半島。西高而東南低。除城南附郭。及南鄉東陳田洋湖。西鄉牆頭四周。東鄉海墩着衣亭等處。地稍平坦。有田數萬畝。或萬餘畝外。餘均岡巒起伏。突兀不平。此外則有海港一處。位置於縣境之北。港灣數十里。四山環繞。水深浪靜。建築軍港。洵爲合宜。海風甚大。氣候不勻。溫度高低無常。華氏寒暑表。高達百零幾度。低至二十餘度。於農業尙無特殊利害。

土質。約分爲黏質壤土。砂質壤土。礫質壤土。及壤土。四種。黏質約十分之一。宜種水稻小麥雲苔等。壤土約十分之三。宜種粟玉蜀黍及蔬菜等。砂質約十分之四。宜種大麥苜蓿及蘿蔔馬鈴薯等。礫質約十分之二。宜種楮竹等。

境內河川。源於山谷。天然溪澗。不事人工。灌溉尙稱便利。沿海一帶。造築海塘。各設碶門。以時啓閉。

人民業農。實佔半數。胼手胝足。耕耨以時。農事尙稱精細。耕耘器具。捕魚網罟。均係舊式。墾具與普通農具同。亦未有使用機器者。種桑者極少。一邑之大。惟東陳陳姓有桑田數十畝。尙稱培植得法。其餘模範桑園一所。植桑千餘株。

官荒約萬餘畝。均係新漲海塗。由人民圈築開墾。森林一項。全邑祇有松竹。餘則雜木。縣署後公山。栽種松秧五十萬株。連年逢植樹節。添購松

柏各秧補種。茶葉亦爲本地出產。蒙頂珠山。向稱佳品。但所產不多耳。漁業頗爲暢盛。每屆漁汛。舊甯溫台各屬漁船。陸續駛來。以石浦爵溪兩處爲場所。在洋採捕。由沐船載往甯紹等處銷售。內以黃花魚爲大宗。年產一百二十餘萬觔。鮑魚白魚帶魚及其他各種。年產約十餘萬元。已製造之魚翅魚膠鮑骨鹽乾魚等。年亦約數萬元。蛤蚧苔藻之類。雖有不多。畜牧以豬爲最。年產一萬七千餘頭。除本地自用外。尙可行銷寧波上海等處。牛約六千餘頭。僅供本地農作之用。鷄鵝鴨羊等。亦有半數出口。以上各物。皆由民家隨意豢養。並無專營者。

農產物。穀類有粳稻糯稻麥粟。豆類有豌豆蠶豆。果類有楊梅桃李枇杷。蔬類有芥菜雪裏烘白菜茄瓜芋之屬。紡織類有棉花苧麻。食品類有甘蔗蘿蔔馬鈴薯筍。藥材類有半夏貝母瓜萎生薑。雜糧又有薯絲一種。其出品大宗。以穀爲最。薯絲次之。苧麻棉花又次之。此外如毛竹松木。亦爲大宗。

出產。穀米自食甚足。惟私運出口者多。賴有薯絲爲之補助。民食尙可無慮。倘遇青黃不接。各村社倉。可以接濟。

農業習慣。佃戶於收穫時。照約償租。惟中戶之田。亦有上年由佃戶先繳租價。次年耕作。收成如何。與業主無關。是曰典租。害蟲尙少。無須捕治。團體有縣農會一處。

交通不便。既無就地巨賈。亦無外來富商。商業未見發達。近來洋貨充斥。人民樂於購買。市鎮以石浦鎮較爲繁盛。城區次之。泗洲頭四山下南堡等又次之。東鄉之爵溪。當漁汛時。頗形暢盛。此外各處商業。均甚蕭條。城區店舖。本地人居多。石浦以福建人居多。至行業僅有石浦魚行。作本地生意。又有石浦漁業銀行一所。係由鎮海漁業銀行分設於此。入境貨。以洋油洋布洋糖磁器棉紗絲綢紗緞漆器杉木毛六官堆紙等爲大宗。出境貨。以鹽魚麻棉薯絲糯米猪鴨等爲大宗。如石浦爵溪之黃花魚鯊魚。及沿

海各地所出之鹽。年產可得數十萬元。

商人販運。象城及石浦與甯波。輪船可通。洋貨及綢緞布疋等物。均由甯波販運。出口貨物。亦由甯波運往他處。市面錢幣。通用甯波莊票。若取現。照甬市扣除申水。

商業除店舖外。尙有一定市期。四鄉農民。肩挑柴米蔬菜鷄鴨等及其他製作物品。到市售賣。以其所有。易其所無。小村店貨。均販自城鎮。貨物價格無定。臨時面議。城鄉鎮間運輸貨品。除沿海一帶便於船運外。餘均需用人力。

礦業。西二鄉上黃村破後山弗礦。礦區約十八畝。已有商人領照開採。餘如東鄉湯吞白螺山之煤礦。磨脚村之鐵礦鉛礦。南鄉東溪村隔嶺山木頭吞底等處之弗礦。歷經礦師試探。成分品質。均尙純良。

第二十七篇 南田縣

考南田係屬海外荒島。累朝懸爲封禁之地。清光緒初始行弛禁招墾。定名曰浙江南田撫民廳。民國改廳爲縣。疆域。東南至大洋。西北至臨海甯海兩縣海面。北至象山之石浦海面。共分十都一百零八畝。從前自治區域。分爲四區。以一二三四都爲桃源鄉。五六七都爲蓬萊鄉。八九都爲三山鄉。十都爲瀛洲鄉。因縣治設在桃源鄉之樊巖。故卽以桃源鄉爲城區。面積一百三十方里。田地約佔十分之七。山約佔十分之三。全境有戶四千八百五十一。有丁一萬一千六百六十二人。有口八千八百二十九人。其中業農者約佔百分之五十。業工者約佔百分之十五。業商者約佔百分之七。河流。桃源鄉之鶴浦河。由樊巖蜿蜒以至鴨嘴。長二十里。又一小河。由小百丈經過蟹厰至鴨嘴。長十二里。餘鄉各島。均係小河。最長者祇二三里。或斷或續。爲農民蓄水灌田之用。不通舟楫。境內河水緩流。山瀑山溪。均不甚大。故水力不足爲工業上所利用。山嶺頗多。最高者爲北盤基

山。花畧山。南山。鴨浦山。龍頭山。高度均在五千尺以上。各島除山地外。餘均平坦。可供耕種。綜全邑大勢論之。東南均屬大海。北與象山犬牙相錯。近隔一海。西與臨海甯海。肩背相望。勢如張翼。東北又與定海島縣。遙相對峙。卽象山軍港。亦卽恃爲第一重要門戶。實於國防上最佔形勢。於軍事上亦最有價值。各島分峙海中。險要之處。不一而足。其桃源鄉一島。要塞共有四處。最要者爲金漆門楊柳坑一處。由彼入內。則有水葫蘆爲之要隘。大有一夫當關。萬夫莫敵之勢。現由外海水警。常駐巡船一艘。並四都保衛團。集資就彼築室建堡。持械輪守。以資防衛。其次則爲吉港與高砍頭鴨嘴三處。除鴨嘴有外海水警常駐巡船一艘外。其吉港高砍頭二處。則持會哨以爲防察。蓬萊鄉之龍泉塘一島。北依三門灣爲固。西以保珠塘爲險。至於東之烏巖。則有三隘。爲丁版畧。直落畧。黃沙畧。有保衛團丁。逐步邏守。其餘各小島。如花畧。如坦塘。

如打鼓嶼。如坦頭山。如花峙山。如新埭之南北漁山。則皆幅幘狹小。烟戶稀少。苟非國防有事。必無如許分駐之兵。惟有責成外海水警。不時巡護而已。

氣候。溫度最高升至八十度。最低降至三十度。濕度則無甚高低。適得其中。風則通年常居十分之五。既大且勁。雨則春夏多於秋冬。雪冬春間時常有之。但不甚大。

土質肥瘠。各鄉不同。種植各異。如桃源蓬萊兩鄉平坦地。均係膠土。尙稱肥美。瀛洲三山兩鄉平坦地。黃土多含沙質。約占十分之八。並無肥沃之土。故桃源蓬萊。以稻豆麥菜爲宜。瀛洲三山。以桑麻蕃薯瓜果花生爲宜。棉花忌風。前已試種。成績不佳。山惟桃源鄉。石骨嶙峋。土質礮薄。約佔十分之九。淺土之性。松杉宜之。其餘鄉山土層稍厚。棕柏宜之。水利。最大者蓬萊鄉之龍泉塘。由鄞象殷富。出資圈築。計丈出實在塗田

一萬四千畝有奇。當時提出一成。計田一千四百畝有奇。留儲爲塘內善後公益經費恆產。其餘塗田。照各戶出資之多寡分派。作爲築戶世業。該鄉田畝得資灌溉者二萬餘畝。又桃源鄉之鶴浦塘。計圈入塗田約八千五百餘畝。於鶴浦河口。建造碶門。以攔截海水。復將鶴浦河自樊畧至鴨嘴。從事脩濬。兩岸田畝。得資灌溉者二萬一千餘畝。

立夏節後。卽一律插秧佈種。早晚稻同時佈種。不分先後。法以早晚稻同畝間種。肥料不用豆餅而以雜草和泥晒乾煨之。作爲肥料。種後每耘三四次。至陰歷六月中。早稻卽已收穫。晚稻須至九月中。方可收穫。春熟豆麥等類。間有種者。但不甚多。旱地則均種蕃薯。至於農具。厚水車或用牛力。或用足踏。或用手搖。耕田用犁。曳以牛力。田爬則以小方木板排列鐵齒。或用竹齒。裝以長柄。用以耘草。礮穀用石礮。舂米用石臼。墾具惟鋤一種。漁具用網。邑無蠶桑。故無蠶具。

水產物。無養殖製造之可言。即捕捉亦用漁網舊法。金漆門楊柳坑一帶海面。爲漁船薈萃之所。每屆漁汛。常有一千六七百艘。因本邑並無商市。均由漁戶隨捕隨往象山之石浦銷售。漁船多係閩台兩幫。本邑約佔十分之四。至於畜牧。無專營者。

農產物之主要者。爲粳米糯米蕃薯等。普通者。爲大麥小麥大豆小豆落花生南瓜冬瓜蘿蔔薑粟梅白菜油菜棉等。蓋米居十分之六。蕃薯居十分之四。以蕃薯切絲晒乾和米爲炊。貧民大半用以度日。或竟全用薯絲充食。計本地之米。供本地之需。約餘十分之一。蕃薯約餘十分之三。豆麥菜子。爲數甚微。

佃戶承種田畝。對於業戶。以平分穀石爲原則。以折繳租價爲例外。然分穀之制。佃戶無特殊利益。弊在懈怠。折租之法。佃戶無妻子家室。患在欠逃。至於納賦之責。在於業主。耕種資本。出於佃戶。無論分穀折租。

均屬一律。驅除預防蟲病方法。以油水偏洒稻葉。或用雜草在田岸。夜間燃燒。誘至扑殺。尙覺便易。團體。有縣農會一所。

草萊初闢。並無商市。每逢五十爲市日。亦祇尋常食物。無大宗商貨之可言。惟鳴嘴市與石浦相隔一水。且爲本邑出入要道。倘能於該處擴充市屋。及租賃小輪。逐日來往。開設旅店。便利商客。將來可成一大商市也。市鎮。民國四年。由臨海縣商民集資設立興市公司。在鳴嘴建造市房二十餘所。招商設店。已有商店十餘家。入境貨。爲民間日用零星物品。出境貨。蕃蘆一項。每年約萬餘擔。又金漆門一帶。海面之魚。均由漁戶隨捕隨往象山之石浦銷售。爲數頗巨。

商販由鳴嘴至象山之石浦。海道十五里。小輪航船。均可通行。金漆門龍泉塘。各由該處海道。經達石浦。約四五十里。祇以本境商市未興。金融周轉。賴有石浦。以致雖有農漁產品。而不能自成主體。運貨均用駁船。

大都不按件計算。祇論每船運費若干。市面錢幣。大洋銀角銅元。皆聽石浦行情。以爲漲落。

第二十八篇 紹興縣

考紹興古荒服地。禹東巡會諸侯於塗山。名其山曰會稽。秦置會稽山陰縣。宋元明清隸紹興府。民國廢府治。併山會兩縣爲紹興縣。疆域。東至曹江中流上虞界。西至錢清江蕭山界。南至南轆溪口之中流嵗縣界。北至瓜瀝村海止。從前自治區域。分一城四鎮七十二鄉。面積八千零十八方里。其間山約佔十分之三。田約佔十分之三。地約佔十分之二。蕩約佔十分之二。全境有戶二十三萬九千六百九十三。有丁六十三萬七千七百十六人。有口五十二萬六千五百二十人。內業農者居十分之四。業工者居十分之三。業商者居十分之二。其餘各業約居十分之一。

河流。運河一名官河。在縣治中心。自縣東境曹娥起。經縣城至西境西小

江入蕭山。迄西興。橫亘二百里。鑑湖在城南。分東鑑西鑑。東西各二十餘里。此外西有青田湖秋湖芝塘湖屨石湖。東有賀家湖康家湖。南有簞膠河。北有狹獐湖瓜滸湖銅盤湖。周圍或三十里十餘里五六里不等。舟楫處處可通。頗稱便利。惟水勢平衍。不堪爲工業上利用。

山脈。臥龍山亭山雲門山玉山若耶山豐山刻石山。皆其支脉。其山巖質少。土質多。栽種竹木。最爲相宜。故會稽東南竹箭。稱美品焉。

棟樹下三江等處。直通外海。船舶可以直達。東有曹娥。爲由甯入紹之所。西則錢清。爲由杭入紹之所。

氣候。溫度最高爲九十至九五。最低爲二十至二五。濕度最高爲九十。最低爲七五。至風霜雨雪。於農業上有關係者。夏季多風。稻多癘穀。秋際風潮。棉花大損。霜雪過多。油菜小麥有礙。至水旱偏災。旱則山田受害。水田尙可灌救。水則受害較深。僅恃三江等閘。以爲宣洩。

土壤。水田較肥。栽種晚稻小麥油菜等項。最爲相宜。山田粗瘠。宜種早稻。水田約佔十分之六。山田約佔十分之四。山地亦精粗參半。細膩者可種茶樹毛竹。粗者種松樹雜木而已。

面山背海。鹽潮泛濫。地本斥鹵。自東至曹娥。西至蕭山。建築海塘。堵禦鹽潮。始成沃壤。晉濬運河。漢鑿鑑湖。此外尙有青田等湖。明建三江應宿閘。及時啓閉。宣洩有方。遂臻美備。灌田九十餘萬畝。惟海塘延長二百里。潮汎泛濫。險工迭出。一有衝突。內地盡成澤國。爲害滋大。歲修之費。多或三五萬。少則數千元。河道各須脩浚。隨時就地籌捐。塘閘向由紳士經理。

農民自冬間收穫後。卽鋤田播種蠶豆小麥。或種油菜。收子榨油。名曰春花。及麥豆成熟。清明後灌水入田。以牛駕犁。翻土耙平。佈種晚稻。至霜降前後收穫。山田不種春花。俱種早禾。名曰火稻。每年兩次。清明後

佈種。大暑收穫。卽時犁轉插禾。至霜降收穫稻穀。除去稻稈。晒儲於倉。旱地間種蕃籔。沙地則種黃豆木棉。黃豆三月佈種。八月收成。棉花四月下種。八月成熟。一切耕耘方法。俱循舊習。至農具。鋤以翻土。耜以起土。犁以轉土。耨以碎土。耖以平土。割稻用鎌。攤麥用鍬。水車有牛車人力車兩種。人力車居多。打稻則有稻桶。蠶具。惟竹篋竹簞。漁具。冬間取魚蕩所蓄之魚。用烏大網。平時大水及散蕩時。則用大罾捕大魚。用撒網捕小魚。用遊絲或用鸕鶿釣竿。蝦籠專以捕蝦。蠶桑素來興盛。南方山鄉。養蠶較多。水鄉甚少。山中平地及城鄉隙地。多有栽桑。每屆蠶市前。赴各處估價採買。每年約產桑葉三百餘萬觔。蠶繭約出二十餘萬觔。育蠶之家。均循舊習。不明新理。官荒民荒極少。並無商人承墾。模範森林及苗圃。均未設立。民人栽種竹木。每年砍伐販賣及作紙料外。尙可掘筍圖利。木則僅供柴薪。平水各鄉

。種茶較多。其法將山鋤鬆。種以茶秧。約計四年後。每樹可採青葉四五兩。利息較優。惟近來銷路日見衰落。種植亦不廣溥。爲可惜耳。

河道頗多。民間於寬深之處。築箔蓄魚。俗稱魚蕩。蕩中專養鱖二魚。

每年三月購種。放入蕩中。至秋冬捕取。鱖二種。產額較多。銷路亦廣。約計年產二百八十餘萬觔。爲本地日食者十之七。運銷餘姚甯波者十之三。大者間亦晒乾。並無別項製造方法。此外天產之鱖魚鯉魚鯽魚鱸魚青魚草魚鰻魚鱗魚以及蚌螺蝦蟹之類。既無專育之所。隨捕隨賣。畜牧惟豬羊牛隻。民間亦有豢養。豬羊供食品。牛則爲耕田之用。

農產物之主要者。如早米粳米糯米大麥小麥等類。餘如大豆黃豆綠豆烏缸豆蠶豆玉蜀黍花生麻棉茶番薯白菜蘿蔔韭菜油菜紫茄蒲芥菜菠菜筍藕菱菱柿桃李梨栗榧西瓜絲瓜東瓜南瓜芋楊梅等。皆爲雜物。其數量價值。豐歉不同。民食以米爲大宗。麥與番薯等物次之。計本地出產。豐年不過十分

之六。不敷糧食。均由金衢嚴等處。採運接濟。

田畝有大買小頂名目。卽田面田根是也。業戶祇買田面。連根買者甚少。田根由農民買賣。農民買受田根。向業戶認佃耕種。每年普通租額。每畝以穀二百五十觔爲率。亦有三百觔二百觔者。視田之高下定之。近來民情刁頑。每多抗欠。業戶如欲另招耕種。佃戶多方阻撓。習氣最爲惡劣。病蟲災害。有以礬油等物治之。

工業。出色之工作物。以絲織品爲優。如紡綢生紗。名爲生貨。年產約二十餘萬疋。花緞素緞甯綢。名爲熟貨。年產約二萬疋。官紗年產約一萬四千疋。鐵花一千三百方。紙扇年產三十萬把。黃酒年產五萬餘缸。錫箔年產一百六十萬塊。惟酒與錫箔。係銷耗品。爲可惜耳。普通者。六名紙年產三萬三千餘擔。土布年產二十萬疋。磚瓦年產一千五百萬塊。石灰年產二千萬觔。木器竹器鐵器件數不計。至外來者。江西之磁器夏布。甯波之

草蓆。松江嘉興之蔻布標布。嵊縣宜興之缸甕。諸暨之酒壘。徽嚴之漆皆是。

僱傭工匠。或以月日計。或以工作物之多寡計。並無一定。子弟投師習藝。以三年爲限。聽師指揮。不給工資。限滿方可自由營業。工廠。有縣立平民習藝所。此外機坊紙廠扇作坊錫箔作坊酒坊。不下千數百處。或在家中。或另賃屋。資本大小不等。

商業。以絲茶爲重。前清道咸間。五口通商。初許互市。彼時洋莊絲茶通銷。販售獲利。商人起家者不一。自光緒丙子。洋莊絲茶失敗。不能復振。商業因之衰落。現在出洋之平水綠茶。捐稅逐年增加。以致折本者居多。市鎮。東鄉距城七十里有東關鎮。二十里有皋埠鎮。西鄉距城三十里有柯橋鎮。西北距城四十里有安昌鎮。東南距城三十里有平水市。入境貨。除舶來品之呢羽布疋外。以米麥爲大宗。出境貨。若酒若箔若綢緞若絲茶

若木棉。皆爲大宗。至經過者。甯波赴蕭山臨浦義橋之海味魚鮫。以及臨浦柯橋之米麥。赴新嵒餘上者。均爲大宗。

商人運貨。紹興車路未通。各貨多以船運。運值不昂。惟較火車遲鈍耳。市面錢幣。照杭匯市價爲漲落。紹邑係劃洋碼頭。近來現洋缺乏。升水日大。商家赴境外辦貨。均用現洋。受虧不少。團體。除縣商會外。另有各業之會館及公所。

第二十九篇 蕭山縣

考蕭山舊名餘暨。唐更今名。因城西半里有蕭山。故名。東北隅一帶沙地。本屬海寧南境之地。故名南沙。自清初錢江改徙。遂與本縣東境錢清場地毗連。於嘉慶十七年。改由本縣管轄。疆域。西北錢塘江與杭縣分界。東有浦陽江。俗名西小江與紹興分界。南界諸暨嶽嶺。西南界富陽黃嶺。東北至海。東西六十里。南北九十里。面積約計五千五百方里。田約三千

八百六十四頃二十畝。佔全縣面積百分之十三。地約四千四百五十頃二十畝。佔全縣面積百分之十五。山約五千九百餘頃。佔全縣面積百分之二十。蕩約一千五百餘頃。佔全縣面積百分之五。全境有戶十萬五千八百五十一。有丁二十八萬六千五百零八人。有口二十三萬六千九百二十四人。縣境西南有石牛山脉。南行入富陽縣界。南有壕嶺山脉。東南行入諸暨縣界。運河自西興起。東行過縣城。至衙前。折而南行。至錢清出境。經流四十五里。西小江與紹興縣分界。自麻溪壩起。東北行至楊汎橋。折而東南行。至錢清出境。經流六十里。浦陽江與紹興縣分界。自新江口北行。至臨浦入錢塘江。過境三十里。至境內水力。惟有上南鄉之水碓。堪爲春紙之利用。

地勢平坦。無高山峻嶺。惟東南之壕嶺山脉。約高出地面一百三十四丈。因有低斜於東北之勢。東西左近各鄉。皆爲平原。西江北海塘外一帶。沙

地相望。全境地勢。約成階級地。平原約佔四分之三。南部因有石牛嶽嶺山脉。地勢較高。其古來堪爲戰事上之險要者。西興鄉之固陵城。桃源鄉之尖山浮橋。河上鄉之庚青嶺是也。

氣候。溫度適中。與省城相同。最高升至攝氏九十四五度。最低降至二十度左右。雨澤勻調。少疾風大雪。於農事相宜。近年惟南沙一帶。迭受風災。沙地坍塌。收成大減。

東南與紹興縣接壤。土質肥美。最宜秈稻。正南與諸暨連界。多山。土帶沙礫。蔬果亦屬相宜。西北沿江一帶。沙土雖鬆。然棉花桑葉。實以該處爲最盛。

水利。一曰湘湖。灌田十四萬六千八百餘畝。近多淤淺之處。一曰白馬湖。溉田四百餘畝。一曰詹家湖。係白馬湖西南之別浸。今已湮廢。一曰瓜瀝湖。溉田六千餘畝。一曰周家湖。其廣四百畝。此外有勞湖戚家湖等。

大者能溉田數千畝。小者或僅溉田數百畝。其最要者莫如西江塘。堤岸約四千餘丈。塘外爲富陽江。受金衢嚴徽四屬之水。上源之高。勢若建瓴。蕭邑在其下流。獨賴此一帶之塘捍之。次之爲北海塘。橫亘四十餘里。以捍海潮。兩塘外蔽江海。內則支河流貫。均有堰有閘。以資啓閉。

農民耕耘力穡之外。勤於蠶桑。農具。蠶具如蠶筐蠶架蠶網桑篩桑剪桑刀之類。多係本地出產。墾具如犁鋤耜耙之類。本地工匠。均能製造。漁具如網罟罾鮓之類。漁民皆能自製。各種器具。大小精粗不一。價目不一。蠶桑素稱發達。東北沙地一帶。田禾易至歉收。人民依蠶桑爲生命。歲同入繭價。綜計有二百餘萬之多。雖養蠶不用新法。而業久專精。其成績之優。較之用新法者。不相上下。惟土法縲絲。不能行銷外洋。故恆以鮮繭售於繭行。

荒山甚少。並無苗圃及森林模範場。民間注意蠶桑。魚蕩屬少數。捕捉之

法。均用網罟。魚蝦隨獲隨售。湖河所生苔藻。不中食品。卽畜牧亦向不講求。需用牛豕之屬。多購自他處。

農產物。穀類以晚稻爲大宗。年產約五十餘萬石。次之早稻年產有四十餘萬石。糯稻有五萬四千餘石。大麥有一萬四千餘石。小麥約二十萬石。菜子十八萬餘石。此外瓜菓蔬菜之類。農民隨處零星栽種。藥材類如銀花夏枯草藿香薄荷亦有之。菸葉年產有二十餘萬觔。棉花年產約有三千二百萬觔。麻年產約八萬餘觔。蠶繭。春繭年產有一百四十餘萬觔。夏繭有二十三萬七千餘觔。以上各物。價值隨時漲縮不同。或供本地食用。或銷售外境。至穀米尙不足供本邑人民之食。須藉他處販運入境。以資接濟。

農民租種田畝。秋收後。各業戶收取租米。或穀。或照時價折銀。遇有歉收之年。則減成收取。每田一畝。自二石至一石數斗。或不及一石。多寡不一。以田之肥瘠爲差。其驅除害蟲預防災病等法。種植蔬菜。間於下種

時。先用石黃研末。篩於地面。即能殺蟲。其預防稻苗萎黃之病。則往往用石灰石膏等壅於田內。即能免患。團體。舊有縣農會一處。

工業。以舊合義和現改慶雲公司之絲。通惠公之紗。習藝所仿造西法布。尙稱出色。絲之產額。二萬六千觔。行銷外洋。紗之產額。四千九百二十箱。行銷內地。西法布之出品不多。

工人有常僱暫僱之別。暫僱則計日給價。常僱者或以月或以年計算。由主人供膳。工頭承攬造作。必憑中人書立券約。藝徒以三年爲期。此三年內。師得享有藝徒工值之權利。徒亦不貼膳費於其師。工廠。有縣立平民習藝所。此外並有慶雲絲廠。通惠公紗廠。湘湖各磚瓦廠。慶泰源陳豫昇仁懋明記聚盛各榨油廠。龜山地方各花邊廠。

商業。境內貿易。以米業油業南貨業雜貨業爲大宗。境外貿易。以紙業絲綢業棉麻布疋煙葉等業爲大宗。從前境內貿易。成本輕而獲利厚。上列各

商。穩健者多。卽境外貿易之紙業布疋業。亦較近今爲旺。惟絲繭及棉麻等業。不甚發達。近今則南貨業油業。爲隣縣各埠同業所牽動。頗形衰落。惟境外貿易之絲繭業棉麻業。頗有蒸蒸日上之勢。

市鎮。如臨浦義橋西興聞堰新壩錢江瓜瀝龜山頭蓬長河浦沿所前河上店戴村樓家塔赭山塢靖江殿倉前尖山新灣底等處。其入境貨。米最多。鹹鯨等貨次之。洋貨又次之。出境貨。絲繭棉麻菸葉紙貨爲大宗。布疋次之。至經過者。如紹酒穀米絲繭棉花綢緞錫箔洋廣各貨爲大宗。

商人販運。在上海或杭嘉湖等地。大率由西興鎮渡錢江。分道而往。間有山瓜瀝龜山等塘外沙頭渡錢江者。販運在甯紹等地。均由運河水路分售。在金衢嚴等地。以及諸暨富陽各縣。均由水路到義橋或臨浦。再由錢江或浦陽江水路而往。運脚。視天氣之晴雨。時間之遲早。農民之閒忙。道路之夷險。而定其多寡。大率水路較陸路爲廉。錢幣。市面漲落靡常。紙幣

有通用者。有不通用者。

普通習慣。如收賬之按年節或按月等類。與他處相同。銀錢交換。除上單本票外。流行一種竹簽。即可代現銀通用。代辦主顧。均由各種牙行介紹。各貨運輸。概由轉運公司或過塘行代辦。團體。除城區商會外。另有義橋臨浦各商會。及瓜瀝龔山頭蓬靖江殿赭山聞堰各商務分所。

第三十篇 諸暨縣

考諸暨爲古暨國。秦始皇立諸暨縣。元明清屬紹興府。民國廢府制隸省。疆域。東至古博嶺駐日嶺與紹興縣界。西至五洩山與富陽浦江兩縣交界。南至善坑嶺白巖山與義烏縣界。北至兔石頭與紹興蕭山兩縣交界。東北至白水山與紹興縣界。西北至雀門嶺與富陽縣界。西南至日入柱山與浦江縣界。東南至宣家山與嵊縣界。又至白水嶺與東陽縣界。從前自治區域。分一城七十一鄉。面積共計一百十六萬二千七百九十三畝零。田佔十分中之七。

分零零二三。地佔十分中之一分三零七三。山佔十分中之一分四零七七。蕩佔十分中之二釐六七八。全境有戶十一萬二千八百六十三。有丁三十萬零七十二人。有口二十三萬九千一百八十六人。其中業農者約計二十七萬二千人。業工者約計九千五百人。業商者約計一萬一千人。礦業約計四十人。

河道。著名者以浦陽江爲最。發源浦江縣。自南而北。縣以上爲上西江。東爲上東江。縣以下爲下西江。東爲下東江。下東江之東爲楓橋江。下西江之西有五洩溪。縣西又有鳳桐江。係自爲一流。以外均屬細流。其水堪爲工業所利用者，惟五洩溪。此溪發源於富陽紫園。終年瀑布。無竭涸時。如能仿照新法。設造汽機。可望工業之發達。此外各山溪流。築堤引水。不過可設水碓舂米及造紙之原料而已。

山脈。始南則日入柱爲浦江界。句乘巢句爲義烏界。次東則東白爲東陽界

。上谷爲嵗縣界。駐日爲紹興縣界。次西則五洩爲富陽縣界。

全境長方形。東南西三面俱高。北方最低。其險要處。南之善坑嶺白巖山。北之兔石頭。西之雀門嶺。東南之宣家山。足資防衛。道途。東西多山嶺。南北多平坦。年來江沙淤塞。稍晴則舟不能行。於交通頗感不便。

氣候。溫度最高時華氏一百零二度。最低時三十二度。濕度最高時七十五度。最低時四十度。霜雪多少不等。風災罕有。惟雨多則北鄉田禾盡遭淹沒。蓋暨邑少容水之區。而河流又被沙淤故也。

土質有四。一砂質壤土。二黏土。三砂土。四礫土。砂質壤土佔十分之六。黏土佔十分之二。砂土礫土各佔十分之一。宜種桑茶果木桐樹禾稻。

農民耕耘之事。水田用牛。大都先耕後耖。間有先耕次耖後耖者。耘用人力。湖田以手耘之。山田用圈耙耘之。燥土先犁後耙。中間以鋤成畦。惟黏土必須冬耕一次。以便土壤鬆化。農具。有犁耙耖滾耙板耨齒耨坭旆柴

刀鏟長水車短水車稻桶等類。蠶具。有竹製蠶籩及木製蠶架。架分十乘。可架十籩。以上器具。價值不一。多係舊式。

絲繭爲大宗出產。而一般農民。對於養蠶栽桑。墨守舊法。故種籽絕少研究。其來邑採運者。多滬上或外埠人。近來開設繭行。日見其多。並設改良養蠶模範場。養蠶之家。頗有仿效新法者。

荒地墾復者居多。模範森林。業已栽種三處。水產物。魚菱藕皆有之。捕魚方法。大概用網。惟邑城東有鷺鷥灣村。皆養鷺鷥。在浦陽江捕魚。採菱用木桶。挖藕用鐵鍬。畜牧並無專營。不過爲農家之附產物耳。

農產物。以稻爲最。玉蜀黍及大小麥次之。豆粟及苕麥又次之。他如桑茶桃李梨花紅楊梅白菓桐榴樺芋苧薺蘿葡萄花生白菜黃芽菜南瓜西瓜東瓜朮半夏芍藥等皆有之。年計產穀二百數十萬石。加以副產物。卽稍歉收。民食尙足自給。

農民有業田佃田之別。業田曰大賣。佃田曰小賣。業田完糧收租。佃田耕種納租。又有業田與佃田併賣者曰起業田。自種自收。或招人佈種到田分收。至驅除蟲病方法。用煙筋菜油黃柴根。肥料用人糞尿草木灰石灰油粕。油晶青礬石膏厩肥綠肥等項。團體。舊有縣農會及乙種農業學校各一處。工藝智識。因僻處山陬。未能發展。各項工業。均照舊式。無新奇出色之工作物。普通工藝。概由人民僱工匠製造。就外購用者甚少。僱傭之家。大都按日供膳給資。又有訂定包工者。學徒以三年爲限。此三年中不過酌給津貼。

商業。年來尙屬活潑。如果金融流通。市面尙可發展。鎮市共計二十處。以大東楓橋鎮爲最繁盛。南鄉之牌頭鎮。西鄉之草塔鎮三都市。北鄉之姚公埠鎮次之。小東鄉之澧浦鎮陳蔡市街亭市安華市外陳市高城頭市王家井市。西鄉之應店街市白門市大橋頭市。北鄉之巔口市阮家埠市趙家埠市直

埠市湯家店市又次之。入境貨。以食鹽滷品菸葉綢緞布帛棉紗錫箔煤油等爲大宗。出境貨。以絲茶苧麻蜂糖桐油水菓等爲大宗。至經過者。以金腿牛隻牛皮煤油腐皮綢緞布帛棉紗爲大宗。

商人販運。陸路通東陽義烏浦江三縣。約百餘里。航路下達杭紹等處。約二百餘里。運價陸運較昂。航運較低。市面錢幣。銀元銀角銅元。均隨時漲落。團體。舊有縣商會及楓橋鎮王家井牌頭鎮三都鎮各商務分所。

礦業一項。從前探採之礦。北鄉有鼓樓山莊煤礦一處。前經招工試探。因煤質不佳。卽行停止。至現在探採之礦。小東鄉高塢坑鋅礦。三百六十五畝。北鄉亢塢山煤礦。五百十五畝。小東鄉吾家塢鋅鉛礦。五百五十四畝二分。小東鄉銀峯尖鋅礦。四百二十七畝。吾家塢洞巖山鋅礦。五十二畝。搗白灣鋅礦。八十五畝。銀亢尖弗石礦。五十五畝。大西鄉奇塢楊煤礦。二百八十畝。銀洞石礎灣鉛礦。五十六畝。以上各礦。或已經試探。或

正在進行。

第三十一篇 餘姚縣

考餘姚爲虞舜支庶所封之地。舜姚姓。故曰餘姚。漢設餘姚縣。元改餘姚州。明清仍改爲縣。今因之。疆域。東至慈谿縣界。南至嵗縣及奉化縣界。西至上虞縣界。北至海濱。東西中橫廣五十五里。南橫廣九十里。北橫廣一百四十里。南北袤一百九十六里。從前自治區域。分城區龍泉鄉彭橋鄉滄山鄉保德鄉白沙鄉勝山鄉林西鄉林東鄉通德鄉雙雁鄉鳳亭鄉鳳鳴鄉南溪鄉南嵐鄉屯溪鄉豐溪鄉雲樓鄉方橋鄉天華鄉朗霞鄉青港鄉四門鄉湖隄鄉臨山鄉牟山鄉中河鄉蘭塘鄉上塘鄉治山鄉雲溪鄉雲塘鄉雲城鄉雲和鄉雲漾鄉雲潭鄉雲墅鄉柯東鄉沐仁鄉義一鄉柯義鄉義三鄉義四鄉義五鄉。共計四十四區。面積一千零二十六方里。內田佔六千零七十四頃六十一畝零。地佔八百八十六頃二十二畝零。山佔一千九百零二頃四十八畝零。蕩佔八頃

五十六畝零。全境有戶十三萬八千四百一十一。有丁三十五萬五千三百九十九人。有口二十八萬五千一百六十二人。其中業農者約三十萬人。業工者約八萬人。業商者約二十萬人。

河流。以姚江爲主體。源出上虞縣之太平山。東流過縣城之南。又經慈谿界。而東入於海。其支流之大者。曰菁江。在縣西五十里。源出四明山。北流匯姚江。曰東橫河。在縣東北二十五里。源出燭溪湖。西流過石堰。又南北而入於姚江。曰制河。源出縣東北三十五里之小山中。西流而匯於東橫河。曰西橫河。源出於縣西之牟山湖。東南流入於姚江。

山脈。以秘圖山龍泉山大黃山竹山白山爲縣之鎮山。其西走者。則有西石頭山童山風山伯山澣塘山馬渚山竺山姜山。東行者則有小黃山烈山九里山桐下湖山蜀山。迤北則有勝歸山鑊劍山松山柏山巖公山眉山歷山。東北則有治山屯山陳山磨山茅山孤山石匱山梅梁山許朗山真武山石屋山包山蔡山

金山破山吳山懸泥山繆山游源山仙居山。西北則有塔子嶺點兵山石姥山東山鶯山老寨山姚邱山。南則以四明山爲主脉。崇巒疊嶂。高峻幽險。其山則隨地異名。不勝枚舉。而過雷巖大雷峯白水泉諸處。瀑布懸空。水力甚大。於工業上頗可利用。

地勢。南北高而中央低。自縣城迤北而至海濱。迤南而至四明山脉。均作傾斜形。南境則因崇山環繞。故其地勢尤高於北部。

氣候。據華氏表。溫度最高九十五度。最低二十六度。地近海濱。風害極大。每年秋季。棉花水稻等。往往受害。霜害雖輕於風。而植物類。如桑葉烟草葡萄等。大抵亦受害非淺。惟雨水四時調和。水旱之災較少。降雪之時。冬季爲多。不獨無害。且能凍死害蟲。保護地溫。故農民以冬雪之有無。占年歲之豐歉。

土壤。砂質壤土。占十成之六。砂質埴土。占十成之二。植質埴土。與腐

質壤土。各占十成之一。土質尙屬精肥。種植禾穀豆麥蔬菜果樹等類。無不相宜。惟姚北一帶。地處海濱。土質多鹹。農民晒鹽爲業。現已逐漸改良。用犬屎爲肥料。能使土質發淡。得以種植豆棉等類。

農民耕耘等事。無不力求精細。至於種稻植棉。尤屬注意。農具仍用舊式。邇來東北兩鄉。蠶桑最有進步。桑種出自湖州。蠶種半由鄉間所出。半向農校購買。飼育手續。間或仿照新法者有之。至販賣方法。有賣繭者。有賣絲者。而要以賣繭者爲多。

官荒如櫻山湖燭溪湖。早經淤塞。開墾成田。畝數不少。又演武場十八畝零。辦理農事試驗場。社稷壇荒地。約十畝零。開辦模範森林場。苗木興盛。蔚然可觀。苗圃由農事試驗場內。另劃定地一方。所出苗木。民間亦樂於取用。植茶南鄉最稱發達。一切栽植焙製等法。亦屬完善。

沿海人民。全賴水產。鮑魚梅魚白蟹黃蛤坭螺苔菜白蝦等類。出產最豐。

價亦昂貴。年產約十八萬五千餘觔。捕獲之法。大抵用網。亦有用鈎釣者。製造之法。除用鹽醃外。鮮賣者爲多。至於畜牧。並無專營。農家略養之。僅作副產。

農產物。加稻子棉花茶葉蠶豆小麥靛青麥冬等類。爲數不少。然全邑所出之糧。僅供民間半年之食。全賴外來接濟。

農民佃種田畝。盡納租之義務。享永種之權利。每年義務已盡。雖業主不能奪其權利。蓋轉移種植之權。屬於佃田者。而業主無預也。農民對於此種習慣。最富團結力。其餘如驅除災害。預防蟲病等事。均以迎神祈禱爲習慣。此種惡習。印腦已深。非理可喻。團體。有縣農會。暨乙種農業學校農事試驗場苗圃模範森林場棉業改良場。辦理尙有成績。

工業。惟平民習藝所所出藤器及織物。頗受社會歡迎。又有一種方轎竹籃。最爲著名。惟工匠高抬身價。不肯多製。是以產額無多。普通之工作物

。則有木器竹器銅錫器草帽等。此外石工。亦尙彫琢可觀。又工廠有軋花廠。打包廠。棉子製油廠。電燈廠。至外來。爲鄞縣之木器。江西乍浦之磁器。以及紙張杭緞湖縐之類。

僱傭工匠。並無契約。有常年者。有臨時者。臨時僱傭之工資。較常年爲貴。師弟間頗富感情。

商業。以錢當木醬四業。爲各業之冠。次則南貨業京廣雜貨藥業冰鮮水菓等業。其足以代表各該業者。地址均在城區。至各業所作生意。多與甬埠交易。以本地人爲最多。甯波人亦不少。杭紹人次之。皆稱棧。

市鎮。南曰梁衝。東南曰陸家埠。東曰橫河彭橋白沙路勝山道路頭破山路雙河。東北曰澹山坎鎮。北曰歷山天元市長河市周港廊廈。西北曰第四門臨山黃家埠上塘馬家堰。西曰馬渚。入境貨。外國出品以煤油洋紗洋布爲大宗。本國出品以冰鮮米油南貨及京廣雜貨爲大宗。出境貨。以木棉爲最

。絲繭茶葉麥冬大豆香粉次之。商人運貨。東達甯波。陸有火車。水有輪船。西達杭紹。雖有火車。因曹娥江橋工未成。至百官爲止。南至四明大嵐山。均屬陸道。極南則山路崎嶇。頗有障礙。北至海濱。陸路平坦。尙易行走。水路雖有民船或航船。往來行駛。港曲堰多。殊形不便。運脚。除甯波至曹百車運別有規定外。水運無一定標準。市面錢幣。以銀洋爲本位。角子銅元爲輔幣。制錢甚少。銀洋依照甬市通行過賬。現幣則有升水減水之別。

買賣貨物。隨銀洋市面作價。有現有欠。欠賬。分端午重陽或中秋年終三節收款。鄉間多在年終。一次結束。無有以貨相交換者。代辦商。雖或有之。但無一定契約。凡屬買主。統曰主顧。言語通用方言。與外路客人相交接。官話尙可通行。運輸。除火車設有轉運公司外。餘無一定機關。由各船戶承攬裝載。

第三十二篇 上虞縣

考上虞。唐虞時。爲舜支庶封地。舜避丹朱於此。故以名縣。百官從之。故縣北有百官橋。明清均屬紹興府。民國廢府制而縣名仍舊。疆域。東至青賢嶺。東北至孫郎橋。東南至錢庫嶺。均餘姚縣界。南至覆卮山。嵊縣界。西南至三界市。舊會稽縣及嵊縣界。西南至曹娥江西岸。舊會稽縣界。西北至黃家堰。堰外爲舜江。隔江爲舊會稽縣界。北抵海。海北爲海鹽縣界。東西廣五十三里。南北袤一百三十里。從前自治區域。分城區。縣東謝家橋鄉。縣南丁宅街鄉下管鄉大澤鄉章家埠鎮。縣西南蒿壩鄉。縣西梁湖鄉百官鎮崧廈鎮。會上合併滙海所鄉。縣北橫塘廟鄉小越鄉謝家塘鄉。面積二千九百二十五方里。田計四千五百四十頃。約佔八百二十三方里。地一千零六十頃。約佔二百方里。山四千九百四十九頃。約佔七百六十四方里。蕩池三十五頃。約佔六方里。全境有戶六萬九千八百六十一。有

丁十七萬二千六百六十一人。有口十四萬四千六百七十七人。

河流之著名者。一曰四十里河。自曹娥江之梁湖壩起。次第納洪山。皂李西溪諸湖及諸山溪之水。東南流。至裏梁湖鎮。又東南流至西黃浦橋。又東流至落馬橋。又東北流至新堰壩。流過下木橋。至界橋。一曰通明江。自老通明閘。承四十里河之三支水起。東北流至謝家橋市。又東北渡過安家渡橋至永思橋。與餘姚縣分界。一曰馬渚橫河。自曹娥江之百官壩起。納衆小溪之水。東北流至石堰北。又東流。過驛亭鎮。至萬甯橋南爲西泊湖。又東流至馬慢橋。南爲東泊湖。又東流至長壩。與餘姚縣分界。一曰百官河。接龍山以下諸溪之水。入街河。東由文昌閣。出穰草堰。達弓家路。佛迹山。爲甯紹往來通衢。西由教場橋。至新建前江。爲崧鎮抵七都之通港。自崧鎮至瀝海所濱江。隔江爲舊會稽縣界。一曰白龍潭。發源於嵯縣交界之扇眼山。西北流經十五都之阮莊下塘陰潭石窟南堡諸村。至念

魚山北麓。會黑龍潭溪。入曹娥江。一曰黑龍潭溪。發源於南鄉之將軍帽山。北流經十九都之紅橋鎮阮生阪諸村。納諸小流徑下管市。至雙溪村。拆而西流。經丁宅街。迤邐至念魚山北麓。會白龍潭溪。入曹娥江。至水力堪爲工業上所利用者。惟南鄉十九二十兩都。間設有水碓。或舂米。或舂紙。均可適用。

山脉之著名者。一曰覆卮山。上虞南境。接連嵯邑。重巒疊嶂。爲一帶山。而山峯之最高秀者。爲覆卮山。南屬嵯境。北爲上虞。山勢西趨。前阻大江。周圍七十餘里。山民開墾。饒有良田。其餘峯巒絡繹不止。一曰將軍帽山。爲全縣山脉之主。擘分三大支。其西一支。向西北趨至章鎮之姜山。其中一支。向北趨至西莊村之啓文塔。其東一支。向東北趨至附城之唐郎山。又達邑之東鄉。至附近高墩村之覆鐘山。三支之中。西支山脉長而狹。中支面積廣於西支。而延長不及。其山脉之延長。而面積又廣大者

。惟東一支。半與姚邑連界。一曰上舍嶺。西南鄉之山。皆由此過破。此山之山脉。近祖西百樓。遠祖將軍帽山。橫亘一氣。坤山爲西南諸山之發脉。北出一支。達城中之金疊山。西南趨。一支達大江附近之戚家山。至象田嶺。而山勢爲之一束。自象田山西趨者。有謝傳東山諸名勝。其直北偏西趨者。至黃茆嶺。而山勢又爲之一束。其沿大江北趨者。直達梁湖之岱頭山。其偏東向北趨者。達附近運河之洪山。鳳亭山。一曰蘭芎山。是山爲西北鄉諸山之祖。亦可分爲三支。其向西一支。俯瞰娥江。石勢險阻。其向北一支。東北趨至白馬湖。又北趨如趙巒之富峯山。小越之福祈山。皆其支脉之特大者。至夏蓋山。而懸崖勒馬。帆峙海濱。洵稱奇特。其向東一支。東趨過孝聞嶺。而起山峯特大之縣後山。爲建築縣治之主峯。又東趨而爲蘿巖。又折而北趨。有蘭阜。有南山。爲蘿巖帶山之特出焉。氣候。最高溫度。達華氏寒暑表九十七度。最低至十八度。

土壤。南鄉重山疊嶺。砂礫土居多。東西北三鄉。土性黏濕。卽山土亦不如南鄉之多砂。而沿江沿海。又係沖積土。故全縣土壤。砂礫居十分之四。黏濕居十分之一。北面濱海。西南傍江。而內地河港交錯。湖蕩紛披。邇來大江淤淺。水患頻仍。苟無堤埂。歲恆不穀。以言疏濬。此尤急急。而湖之淤積爲田。其犖犖大者。如夏蓋湖上妃湖大渣湖等。已無湖之舊觀。其餘如流水之冷浦溪溝。停水之湖蕩池瀝。無處不宜興修。

農民以種稻爲大宗。每於秋收後。視田土之瘠薄者。佈種苜蓿。卽俗名草籽。有紅花黃花兩種。或埦田。或板田。種法不一。以爲次年綠肥之用。而田土之較肥者。則佈種蠶豆大麥小麥金花菜等。名爲春花。俟其成熟。收穫販賣。以作種田資本。又有種秋作者。如白菜蘿蔔收麥油豆等。收穫既竣。仍可佈種苜蓿。而種稻之先。須耕兩次。耙一次。耨一次。耕則翻其底土。耙則破其土塊。耨則平其高低。必至土似泥漿。而後種稻焉。既

種之後。則中耕一次。耘三次。或施肥。或不施肥。各視其稻爲之。農具。耕水田則用犁。用耙。用耨。以牛引之。墾陸地。則用耜。用鋤。以人運之。而鋤則有四齒有兩齒者。耜則有制耜。用以開荒。有半斬。用以闢草。其耜之式。有闊板耜。有窄板耜。各視其便用之。又有畹銑以鏟泥。有築鎚以下種。有銛子以祛細草。割稻之刀。刃有齒。銛麻之刀。刃在背。制各不同。至戽水之具。有牛車。有踏車。有牽車。有戽桶。水面之高下不同。吸水之器具亦異。蠶具。育蠶之家。幼時用筐。大時用籠。置籠則有蠶架。採桑則有桑筍。而育蠶之多者。不及多置蠶籠。或用簞以安置之。惟縲絲之車。粗笨不靈。技又拙劣。故縲出之絲。光質俱遜。不能與湖絲競。漁具則有漩網。以手持網而撒之。有拖網。以網貫繩而拖之。有罾。垂於水面。有板罾沉於水底。俱以麻線爲之。有釣鈎。有漁叉。以制魚之死命。有罾。有篩。有蝦籠。以迷魚之去路。此皆漁家常備之具也。

蠶桑向不發展。自新嵎飼蠶。獲利頗厚。爲農家歲入之大宗。故本邑西南兩鄉。與嵎縣接壤者。亦皆種桑飼蠶。逐年推廣。蠶戶之多。與嵎縣不相上下。而他鄉尙未勃興。惟成熟之後。悉數賣繭。縲絲者少。至於新法養蠶。素不研究。非特無此學識。亦限於經濟力。不能如新法之設備完全耳。

邑中無大片荒山。可以指爲官荒。卽如東鄉之魏白羊山。荒廢無主。可以指爲官荒。然亦不過百餘畝。且半屬餘姚縣境。至於民荒。所在皆是。半由於造林之智識毫無。半由於民間之生計日蹙。智識無則不知種植。生機蹙則肆行偷竊。是以童山濯濯。彌望皆然。模範森林。舊辦兩區。苗圃係栽種松秧楓杉桐栗。近多有注意於造林者。植茶則惟南鄉高山爲最適。種戶亦最多。質厚味美。爲各鄉所不及。現在茶葉發達。年盛一年。可與蠶業比隆矣。

西北鄉濱海之區。向有漁船。赴近海捕魚。其捕得者。類皆用鹽醃晒。銷售本境。而內地河湖池蕩。素不注意養殖。祇捕取天然魚蝦。近年北鄉之孔家白。西鄉之西窰窰西溪湖等。編箔造簍。以養鮓鱧鱖。第所養之魚不多。概係鮮售。不供製造。至畜牧牛羊豬雞。民家各自餵養。以備祭祀賓客之需。並無集合資本。專營此業者。

農產物之最主要。首推早稻。餘如沿江沙地之種玉蜀黍。北鄉濱海之產棉花。東鄉之糯稻。南鄉之落花生番薯荸薺。各視土宜。以行種植。而大小麥蠶豆黃豆油菜等類。幾於無處不種。統計所產之穀。供民間一年之糧。尙虞不敷。倘遇歉收。則必仰給於外來。以資接濟。

田土之權。全握於業主。佃戶不能主張。惟東鄉尙有永消作權。俗名小賣。又名頂頭田。種戶與種戶自相授受。業主退處於無權。倘業主與佃戶雙方妥議。既經歸頂者。則作權仍在業主。邇來北鄉之南北湖。因人多田少

。欲種田者。亦須出頂價而頂進之。惟業主方面。並不明認。此與東鄉稍有區別。其餘如鄉田無頂價。權操業主矣。至發生災害蟲病。皆倭諸天數。絕不講驅除預防之法。團體。則有縣農民協會及春澤墾牧公司等處。

出色之工作物。惟習藝所用杜氏機紡織洋線緞及席法布等。尙有可觀。餘如木器竹器金器黃縑紙土布土綢。皆係普通。

僱用工人。除工資外。加之酒飯。投師學習者。以三年爲限。工廠。錦綸織布廠所出布疋。均係次等。萬祥鐵鍋廠所出鐵鍋。尙能通銷。

商業因地處偏僻。向不興盛。市鎮。如城中及東城門外。東鄉之謝家橋永和市夾塘。南鄉之章家埠下管丁宅街。西鄉之蒿壩上浦梁湖百官崧廈章陸瀝海所。北鄉之橫塘廟五夫小越五車堰馬家堰謝家塘岑倉堰等處。入境貨。糖鹹貨海味布疋及各種雜貨爲大宗。出境貨。以南鄉之茶葉竹紙。沿海之蠶繭。西北鄉之棉花爲大宗。至經過者。以米糧布疋紙塊菸葉茶酒等物

爲大宗。各業本地人居多。

商人運貨。東路至餘姚甯波爲水路。南路至嵊縣新昌台州爲陸路。西路轉南至嵊縣新昌爲水路。西路至紹興爲水路。運費向論貨物件數。件有大小。大率以觔數若干。及道途遠近爲標準。錢幣行情。向聽紹興市面。隨時漲落。並無一定。商人辦貨。如南貨雜貨。托客代辦。運輸。托過塘行經理。近亦有托轉運公司經理者。

鑛業。未經探採者。東鄉有金沙嶺。發現鑛苗。係雲母石鑛。成質甚少。不足開採。又北鄉大山下地方。有鉛鑛。成質亦少。惟南鄉二十都地方有鐵鑛。就其鑛苗視之。成質不少。尙可開採。

第三十三篇 嵊縣

考嵊縣。漢置縣曰剡。唐初立剡州。兼置剡城縣。五代吳越。改剡曰贍。置新昌縣。宋初復爲剡。後改嵊。元明清相承爲嵊縣。民國因之。疆域。

東至奉化縣交界唐塢嶺一百里。南至新昌縣交界黃坑橋二十里。西至東陽縣交界白峯嶺九十里。北至舊會稽縣交界三界鎮六十里。東南至新昌縣交界陳公嶺八十里。西南至東陽縣交界關陽嶺九十五里。東北至上虞縣交界姥山大橋六十五里。西北至諸暨縣交界趙角嶺九十五里。從前自治區域。分爲城區崇仁區長樂區太平區開元區桃源區白鶴區雨錢區輔仁區剡源區安當區平義區方昇區順安區東土區德政區靈芝區游孝區游康區崇康區靈箴金區忠孝庭區。共計二十二區。面積東西廣一百七十六里。南北袤七十里。周凡六百三十里。田佔十分之四。地佔十分之三。山佔十分之二。全境有戶十萬三千九百六十一。有丁二十四萬一千五百六十二人。有口十八萬六千二百零一人。其中業農者約十分之五。業工者十分之二。業商者十分之二五。

河流。剡溪中貫。發源縣西剡源鄉之分水岡。東北行十里。經白雁坑董家

坑而至道胡尖。有籐巴溪之水。自西來會。復自道胡尖北。經茶坊璠田山口東南行二十四里。而至剡城。有珠溪之水。自南來會。又自剡城東行十一里。經馮家潭孔村。而至鴨舍坂。有羅松溪之水來自西北會合。自鴨舍坂東北行二里至下白陽。有富潤溪之水。自西北來會。又自下白陽東北曲行十三里。經下沈後愛孫村。而至江田。有江田溪之水。自西北來會。又自江田東北行十九里。經孟愛下馬等處而至嵊城東橋。有潭盪烏巖合流之溪水。自西南來會。又自嵊城東橋屈曲北行十三里。另經中渡艇湖蔣家埠。而至黃澤溪口。有黃澤溪之水。自東南來會。又自黃澤溪口曲折北行七里屠家埠。有新澗溪之水。自東南來會。又自屠家埠西北行二里。至了溪口。有了溪之水。自西南來會。又自了溪口北行三里。至強口溪口。有強口溪之水。自西來會。又自強口溪口北行八里。經東西鮑等處。而至嵊溪口。有嵊溪之水。自東來會。又自嵊溪口北行四里。經清風嶺。而至嵎浦

。有迴溪之水。自西來會。又自嵒浦北行八里。經馬門山釣魚潭。而至三界鎮。是爲剡溪下游之終點。卽上虞娥江之起點也。

山脉。東西北三面跨山。山嶺大而最著名者。在縣東曰四明山。自天台山起至鄞縣境止。周圍佔嵒鄞奉餘虞五縣地。共二千餘里。以金鐘峯爲最高度計五千尺。在東北曰覆卮山。四明山起至上虞界止。周圍一百餘里。最高度三千尺。在東稍南曰陳公嶺。天台山起奉化界止。周圍六十餘里。最高度二千尺。在正西曰塘陽嶺。自陳公嶺起至東林嶺止。周圍百餘里。最高度三千八百尺。在西稍南曰白峯嶺。自東陽境起至木魚岡止。周圍六十里。最高度二千八百尺。在西南曰九洲山。自東陽境起至貴門山止。周圍七里餘。最高度三千尺。在西稍南曰太白山。自東陽境起至下王村止。周圍一百餘里。最高度四千九百尺。在正北曰大嵒山。自天竺尖起至清風嶺止。周圍八十餘里。最高度四千尺。

地勢。南北高。東西低。平斜不一。以險要論。據姚會之上游。作溫白之門戶。東屹四明。西巍太白。南隆天姥。北峙大嵛。襟山帶江。地稱阨塞。雖通三郡。界六邑。其陸詔白峯勞績上館諸嶺。行不得併。度必須緣。惟自虞至新爲孔道。而清風峻隘。三溪阻深。亦未易梯航也。氣候。據華氏寒暑表。最高不過百度。最低不過三十度。空氣濕度。與半雨水地相等。無高低特殊之點。烈風少。十月初旬降霜。三月間霜卽斷絕。雪量纖微。惟春雨最多。一雨有十餘日之多。夏秋冬三季。雖雨不過數日卽止。關於農業。實害少而利多。凡遇水災。多在秋期。潮汐時起。大雨三日。北風緊迫。則山澗諸水驟下。潮浪逆擁。互相激戰。洪水橫流。必成澤國。旱在大暑前後。一逢早期。若彌月不雨。則農作物受害特甚。所幸早有沿溪兩岸低濕之田。水有平坡高原傾瀉之地。不致全部受害。亦嵊之優點也。

土壤。大別有五。一砂質壤土。全部分之平田及地。實佔多數。內中灰色最上。(東鄉上北鄉)白色次之。(西鄉)黃白色又次之。(南鄉)黃色爲最次。(北鄉)然皆細膩肥腴。凡百植物皆宜。二黏土。此土瘠而細。黃色。西北諸山最多。宜種茶白朮麥豆玉蜀黍栗松杉梓竹棉及蔬屬果屬。三沙土。東南諸山最多。其土瘠而粗。帶有細石。宜種桑菸茶松落花生馬鈴薯。四壇土。此土瘠而剛。南山間有之。惟種桑豆麥爲宜。五砂礫土。多在溪澗兩岸。其土瘠而極粗。祇宜松毛竹杞柳桑柘。總計肥而精者。約佔全部十成之六。瘠而細及瘠而粗者。十成之三。瘠而極粗者。十成之一。全縣之田。平原恃塘。沿溪恃礮。礮之制近溝。廣深略同。陂塘之大者。與渠相似。邑中塘礮甚夥。不及備述。

農民以種稻爲主體。耕耘方法。插禾前一月。用牛犁轉一次。耙二次。耨二次。插禾以後。或跪耨。或立耨。跪耨用手。立耨用耙。均以五次爲限。

。卽竟全功。並不知用雁爪之利。至土之蓄水。以深根爲宜。土質鬆細。六寸已足。土質堅硬。必須深至十寸。方爲合格。農具。蠶具用篋車籬蠶篋網架剪刀桑剪篋簇等類。墾具用犁耙鋤鎌鍬箕桶畚箕秧籃籬簞水車等類。漁具用網罾罟鉄槍等類。

蠶桑素稱興盛。其原因在光緒初年。穀價甚賤。絲價甚貴。種桑育蠶。獲利較厚。遂將旱田高地。改植桑秧。於是桑林遍野。蠶戶驟增。而繭商之開設繭行。亦因之而起。然猶售絲者多。售繭者少。自光緒十五年後。繭價絲價。兩相比較。售絲不如售繭。遂一律售繭。以省人工。至光緒十九年間。繭歲極豐。以鮮繭三觔。折作乾繭一觔計算。竟有九千餘石。自是而後。逐年減少。惟近年春夏兩繭。較前稍有進步。而較諸光緒十九年。實無進步之可言。至種籽。爲出產蠶桑之母。非嚴格採集。於蠶桑前途。大有障礙。按種之最良者。爲白皮桑種。龍王塘（新昌縣地界）繭種。採集

此種。尤爲必要。然此猶據表面而言。若切實研究。凡下種之家。非於種之萌芽蛾之生子時。先將受有微病形狀無改者。滅除淨盡。卽白皮桑種。龍王塘繭種。栽培養育。於蠶桑前途。仍有障礙。是採集之先。須從選擇入手。選擇維何。凡購種家。於桑之方面。將秧審視一週。果係單春白皮桑種。而外皮結實。根鬚絕無隱傷者。方爲合格。蠶子方面。查悉確係龍王塘繭種。將子細視。全體灰色。并無淡白微黃細點。及微癩子粒。然後購買。此採集之方法也。販運習慣。販夫將早春選定若干擔。議明價目。照數劃付。然後運入本縣或諸暨及餘杭臨安吉孝豐於潛昌化等處。銷售蠶子。販客向養蠶趕速之家。（照普通蠶戶摘繭早半月或十日）擇其繭之堅實光白者。按劬價買。（價照市增加一角或數分不等）運回出子。自子出齊後。卽趕赴嘉湖殷實行家。小住一月。定期發賣。事畢回家。至秋初往收未清賬款。此販賣之方法也。他如檢驗蠶種。改良蠶具。鑑別燥濕。導引

光線。爲養蠶家最注重之方法。擇種栽桑。定以尺寸。施肥驅蟲。改遵近法。近雖竭力勸導。尙無聽之者。

官荒民荒。并無商人承墾。其由縣創辦模範森林者。現有西鄉白鶴鄉天荒山一處。計二十八畝。又有東關外拱明橋下直北西岸沙灘一處。撥作苗圃。計二十餘畝。至植茶方法。每逢九月。將黑色極老茶子。一律採收。於十二月初旬施種。蓋以焦炭牛圈。約至翌年仲春。茶芽漸茁。再閱一年。至清明時。生活力強。可以移植。惟移植時。必先轉土留孔。留孔以後。卽取茶苗兩株。插入孔內。護以焦炭。使成一篷。每篷距離縱橫三尺。移植既畢。收益有期。三年之中。削草施灰。年各一次。疊至三次。枝幹發育嫩葉。每年復開地一次。削草一次。逐年增加。最盛之篷。青葉可達十觔。水鄉宜漁。山鄉宜牧。嵊爲山縣。畜牧最宜。而全縣並無專營畜牧之家。惟牛羊豕鷄鴨等。平民擇要飼養而已。漁惟西北鄉之廣利塘。素養

魚苗。每歲捕獲魚介。約五六千觔。

農產物之主要者。早稻類如諸暨早仙居早龍游早黃巖早青蚤占城白皮暴黃皮稻等。晚稻類如白黏晚青師姑秈黃棟秈下露白新城晚早大青等。糯稻類如青糯珍珠糯虎皮糯丹陽糯江西糯高脚糯落霜糯等。普通者。雜糧類如大麥小麥米麥收麥粟苞蘿黃荳白豆青豆豇豆細豆菘豆羅漢豆蠶豆油麻等。園蔬類如黃瓜西瓜香瓜南瓜冬瓜絲瓜菠菜白菜九星菜黃芽菜油菜蘿蔔茼蒿韭菜蔥冬筍薯芋落花生等。果實類如桃李梨石榴棗等。竹木類如毛竹早竹松杉梓栗楓桑等。此外如茶菸朮麻棉繭紙等。均爲大宗出產。以全邑人口計算。民食不敷甚鉅。若遇災歉。更難支持。

田有自種者。有佃種者。民田半由自種。公田悉歸佃種。其佃種習慣。凡地主之田。租與佃戶。所有水稻外之副業。一概佃戶主之。無一定之年限。穀石租金。苟非延欠短少。有永久不更換者。其所收租額。向按每畝之

收穫。定分租納金之多寡。普通規則。田一畝約三石。地主分其半。若租金則按石折價。至於轉佃一層。公田實居多數。蓋因公田佃戶。素不更換。佃戶雖已轉佃。租價但由原佃戶繳付。公家自不便責問。是以轉佃者多。惟佃戶田主。最畏歉收。歉收之病。大半起於蟲害。凡稻之幹與葉。發現焦色或白色者。其中必有食髓蟲焦稻蟲浮塵子。此蟲之發生。多由太陽斜射中之雨。(俗名白頭雨一名白撞雨)其繁衍亦最速。農民於驅除預防之法。惟酒以石灰水及石油兩種。團體。舊有縣農會及試驗場。

工業。有平民習藝所。分織染籐工竹工木工等科。布疋毛巾。價廉物美。通行社會。竹器精緻絕倫。木器全做新式。籐器銷售。亦稱發達。其出色者以竹絲籃爲最。次之惟楸圓烏竹椅籐椅。皆行銷本處。至外來者筆線襪扇等物。

平常工藝。按日僱傭。遇大工程。則訂約包攬。藝徒投師習藝。訂期三年

。如銀銅等工徒。宜自出飯資。泥木等工師。宜小給工資。成衣篋匠等徒。不出飯資。師不給價。惟三年以內。聽師指揮。三年以外。可以自由營業。

商業。向以繭茶兩項爲最盛。均由各商販運至中銷售。惟綠茶近因日本錫蘭印度出茶不少。故銷路阻滯。頗受影響。此外各商店。似較從前稍有發展。市鎮。如崇仁長樂開元甘霖石璜三界等處。入境物。以糧食鹹貨布疋藥材洋廣雜貨等爲大宗。出境貨。以繭茶菸葉白朮四種爲大宗。至經過者惟新昌縣之菸葉白朮。各商營業。除本地人外。甯紹人居多。

商販盡在甯紹杭滬四處。甯滬兩處。其道路由南門上船至百官。改車至甯。趁輪至滬。杭紹兩處。亦由南門上船至曹娥。改輪至紹而杭。運費按貨計算。市面洋價漲落。皆照紹市。

交換以現金易物爲多。除欠則分端節中秋年終三節清賬。言語均操土音。

各種貨物。皆由過塘行運輸。至代辦主顧。與甯紹各處相同。鑛業。未經探探者。查有平義鄉毫嶺施家坵地方。發現螢石。即弗石。屬於鑛例第三類之鑛質。現有士紳發起。集股組織公司。請領探照試辦。

第三十四篇 新昌縣

考新昌。自吳越王錢鏐時。始析剡東鄙十三縣。爲新昌縣。治石牛鎮。後唐晉漢周皆沿之。宋元明清。屬紹興府。民國裁府治。直隸於省。疆域。西界嵊縣東陽。北界嵊縣。東界甯海奉化。南界天台東陽。東西廣二百二十里。南北袤一百四十五里。周圍四百四十二里。境內固有區域。在城置坊六。在鄉分都三十九。民國元年。劃分自治區。以城內六坊。附廓一坊。及離城不及十里之一二四都。又二十都一部分各村爲城區。以舊有十八都至三十都。及三十三都三十八九都。又二十都一部分各村爲東區。名沃州鎮。現因該鎮區域較廣。又將二十都一部分。及三十八九都。析爲大東區

。又名舊東鄉。其餘各都爲小東區。又名新東鄉。以舊有一二都十三都至十七都各村爲南區。名彩煙鄉。以舊有四都至十都十二都各村爲西區。名澄潭鄉。以舊有三十八九都各村爲北區。名黃澤鄉。合計城一鄉五。面積四千七百八十三方里。田一十九萬八千一百零五畝。約佔百分之十。園圃山地十一萬二千四百十五畝。約佔百分之五。其餘山嶺溪流。約佔百分之八十五。全境有戶六萬零五百七十五。有丁十三萬四千七百八十二人。有口十萬七千二百九十四人。其中農業十分之八。工商各業十分之一。

河流。東溪在縣東。源自天台石橋瀑水北經石筒出青壇沃州。別一源出南州北經小將與青壇合。下流過東北而西。三溪合流入嵎。橫溪在縣東北。源自蔡崎經藕岸西流至嵎。赤土溪在縣東。源自會墅嶺經班竹赤土西流與東溪會。皇渡溪在縣東南。源自天台萬年山經下洲槐潭合流至嵎。澄潭溪

在縣西南。源自東陽過澄潭村入嵎。黃澤溪在縣北。源自四明奉化。由沙溪北至杜潭。別一源出天台甯海。由三坑經塘家洲北流匯潭入嵎。耶渡溪在縣西南。源自東陽過槐潭入嵎。以上各溪。旱則乾。潦則溢。並無一定深淺尺寸。不通舟楫。間用以製水碓水磨而已。

山脉。大湖山在縣東。發脉甯波四明山至高雪巖止。天姥山在縣東南。發脉東陽括蒼山經關嶺入縣界止。芭蕉山在縣東南。發脉天台萬年山至黃泥碭止。庵頂山在縣南。發脉東陽玉山經彩煙山至東鄉儒畧止。東山在縣西。發脉庵頂山至嵎西南鄉止。黃家山在縣北。發脉蘆墅山。至長山入嵎縣東鄉止。沃洲山在縣東南。發脉自四明山。與天台對峙。至黃柏尖入甯海境。境內山脉。皆由天台東陽甯波等縣入境。迤邐而至於嵎。故地勢東南高而西北低。城區道路平坦。東區高低度均差二十米達。南區高度十五米達。低度十三米達。西區高度二米達。低度一米達。北區高低度均差三米

達。山嶺崎嶇。平坦之地。不過佔全境十分之二。

氣候。溫度最高九十八度。最低二十度。雨量稀少。濕度約佔百分之二十。農田所患惟旱。泉田礮田二種。尙能蓄水。坑田天田。一遇旱乾。無法救濟。

土質尙厚。砂土約佔十分之八。黃泥土與香灰土。各佔十分之一。所種植物。以豆麥早秈玉蜀黍及菸朮桑茶等物爲宜。

水利。一曰礮。新邑在萬山中。地勢欹仄。水流湍激。故無閘壩陂蕩溝滄之類。溪流三支。一東溪。一黃澤溪。一澄潭溪。幹合支分。皆下趨嵎之剡溪。舊於水勢注處。砌石爲泚。引水溉田。名之曰礮。二曰堤。新邑舊有二堤。一爲東堤。在縣東。袤延三里。一爲後溪堤。在縣西十里。皆以捍禦水患。三曰塘。新邑舊有官塘六。民塘十一。大小自數畝至數十畝不等。所以蓄水注田。備禦旱患。

農民耕耘甚勤。種植物產。以稻菸尤桑爲最精。種茶次之。農具。蠶具笑以竹爲之。圓如籩。所以攤繭。樹以木爲之。所以攔笑。墾具犁鋤耙耜稻桶等類。俱係本地自製。習用便利。

蠶桑歷來稱盛。每年產額。達四十萬元。近年地力稍減。農民不知改用新法栽桑。漸見退步。蠶業尙如舊。採集種籽。俱由本地留存播種。至販買之法。僅將原繭及蠶子兩項出售。不能製絲。實一缺點。蓋一則保守舊習。一則無資本家提倡。是以對於新法。不甚信仰。

醴泉村沿溪一帶。有官荒沙塗三十畝。指定爲模範森林地點。分植梓擦松三種林木。苗圃指定縣署左側及後旁圍地。共計十一畝。植茶之法。於春秋兩季。取茶子播種於地。壅以焦炭糞水。近年茶價不高。農民祇守舊法。頗少研究。

農產物之主要種類。有早秈小麥菸葉綠茶桑葉白朮花生蠶繭等。普通種類

。如晚穀早糯大麥大豆小豆苧麻竹筍松木等。中稔之年。僅敷五月之食。雜糧足抵兩月。尙缺五月。仰給杭嘉黃太等處。由台紹運入。以資接濟。佃田關係。佃戶並無小賣。業主自由招種。佃戶每年每畝出錢二百文。卽可種田。至秋收還租。佃種期間。并無一定。若於前一年預交稍價。則次年種田。不必還租。謂之稍戶。近年稍價自四五元至八九元不等。至農田所患惟旱。泉田礮田。可以蓄水灌溉。是爲上田。坑田天田。俱係開墾山谷而成。一遇亢旱。無法救濟。故每年平均收穫之量。祇及中稔。罕有樂歲。至蟲害則因地勢高燥。頗少蝗蟲之患。惟夏秋霖雨。間生螟螣等蟲。捕捉之法。向用桐油洒於田間。蟲卽自斃。

工業。出色之工作物。如木器家具。製作堅樸。竹籃製造精細。竹椅供用輕便。棉綢織造細密。普通者。如酒紙磚瓦油類。竹帚蘆帚銅錫器鐵器石器。以上各物。年產數量價目不一。

僱傭關係。計分包貨包工包飯供飯四種。工價各藝不同。藝徒學藝。俱以三年爲限。工廠則有平民習藝所。及普利布廠。恆德鑊廠。石萬選紙廠。及蓋日陽傘廠等。

商業。如菸葉茶繭等出產。不爲不多。然商業未能日見起色者。皆由生貨輸出。不能增進利益。苟能集合資本。創辦縲絲廠紙菸公司茶棧等。則營業發達。當較勝於前。市鎮。如北下區之黃澤鎮。北上區之大明市鎮。西上區之澄潭鎮及鏡嶺鎮黃婆灘。東區之儒畧鎮及大市聚鎮。商務均屬繁盛。入境貨。以洋布姚布棉花米油餅豆麥等爲大宗。出境貨。以繭菸白朮茶葉等爲大宗。

商人販運貨物。自本境輦運嵊縣。由嵊縣裝船。經曹娥蒿壩等處。抵百官裝車。直至甯波販賣。或另運他處。如杭州紹興一帶亦有之。但新昌舟楫不通。出入各貨。陸運爲多。至其運費。到甯波紹興杭州上海嵊縣。各處

不一。市面錢幣。現洋紙幣。一律通用。銀角銅元。隨時上落。商人交易。熟貨少。生貨多。現銀少。賒賬多。代辦則惟礦行。主顧則皆本地。言語則台屬金華甯紹皆有。尙無隔閡。

鑛業。未經探採者。如東西鄉發見弗石。及含有錳質鑛石。惟地面不過三百餘畝。曾經鄉民將石質攜至上海試驗。堪作顏料。每噸可值洋十數元。

第三十五篇 臨海縣

考臨海。唐爲台州治。元爲路治。明清爲府治。民國廢府治。縣仍之。疆域。東一百八十里牛頭山入海。西七十里黃沙嶺入仙居縣。南四十五里黃土嶺入黃巖縣。北六十五里杜潭嶺入天台縣。是爲四正。東南一百二十六里海門山入海。西南五十里括蒼山入仙居縣。東北六十里甯和嶺入甯海縣。西北六十五里黃振嶺入天台縣。是爲四隅。東西廣二百四十里。南北袤一百十五里。從前全縣分二十二自治區。在城者爲城區。在鄉者東

鄉有大固鄉大邵鎮溪路鄉東浪鄉廣福鄉五區。南鄉有昌國鄉長田鄉海霞鄉三區。西鄉有西定鄉保中鄉白箬鄉小嶺鄉四區。北鄉有石鼓鄉靖安鄉黃檀鄉三區。海鄉有湧章鎮大汾鄉承恩鄉芙桃鎮城關鄉二南鄉六區。面積甚廣。其中田佔六十七萬四千七百三十畝。地佔二十萬三千四百十二畝。山佔二十二萬五千一百八十六畝。蕩佔七千八百零九畝。他如湖泊之類。合計佔一百數十餘畝。全境有戶十三萬四千六百六十六。有丁二十九萬六千八百三十人。有口二十四萬七百四十九人。而以業農者居多數。工商等業次之。

境內諸山。起自天姥。延袤數百里。奔赴靈江。郡城有大固山。山勢逶迤。環抱縣治如屏障。小固山峙於前。與大固山相望。高七十丈。周圍約四里。里閘間蛤嶺雙峯。如入几席。他如縣東九十一里之東刊山。又名天柱山。縣東一百零五里之玉峴山石筍山合旗山。縣東南一百二十里之金鰲山。

。縣南三十里之蓋竹山等。皆境內有名之大山。石骨嶙峋。奇形萬狀。洞天福地。在在皆是。

河流。自天台仙居至三江。合流而下海門。潮汐逆折。紆縈環繞。西南靈江。循小江而北通東湖。郡城三面遶水。波光川容。掩映吞吐。蘭亭楚澤。詎遑多讓。其餘鄉東一百八十里。地臨大海。舟楫往來。尤爲便利。縣西十五里之三江。承天台關嶺仙居永安二溪與郡城外靈江之水。內地運輸灌溉。尤利賴之。

台州當山海之會。臨海附廓。尤稱險固。論者以浙屬十一郡。惟台郡最據險要。西南二面臨大江。西北崇岡絕壁。危堞倚空。如蠶叢鳥道。一人扼險。萬夫莫過。且四郊山勢。如來如去。如迎如護。惟東南頗平坦。復有大湖深濠澶漫。故明季倭夷雖數至城下。終無能爲。循江而南一百二十里。則有海門。與隔江前所。兩城對峙。形同唇齒。勢若輔車。交扼互援。

明代設水師七千以守。最爲重地。古人云。環千峯而拱揖。會三江之蜿蜒。倚山瀕海。易以捍守之區也。

氣候。溫度最高達華氏表一百度。最低則爲三十度。濕度則甚高。惟其地近海多風。於農作物有害。且時遭旱災。如久雨不止。則山洪暴發。潮汐洶湧。尤爲臨邑之大患。

全境沃土。惟近海江河等處有之。宜種稻麥豆粟等物。山土則以種茶葉蕃薯苞粟靛青。或以造林。頗多興盛。

地本負山濱海。靈雨連綿。則西北萬山之水。由三江而下。容之則狹。洩之則難。其患在潦。及夏秋時。偶逢亢陽。田塍溝渠之水。苦無所蓄。其患又在旱。是以昔人有閘陡門塘堰埭壩溝圳圩岸之設。以節水流。有專官以董其事。今則舊跡或已湮沒。或已失脩。存者亦不如前之多。

農家每年於清明後播種。施加肥料。耘二三次。歷夏而繁茂。至秋即可收

穫。不幸而遇水旱之災。則農事首受影響。蠶具有蠶篩蠶簾蠶架桶盤絲車等類。墾具有鋤耜耜等類。漁具有網。皆係因陋就簡。無新發明者。蠶桑。全境可分東西南北四區。東區蠶業。選擇種子。最爲不良。致春夏養蠶。每多失敗。南區育蠶之事。較有進步。且地紳出爲提倡。組織桑園。人民皆知飼蠶利益。桑園頗多。每年產桑。約在萬餘元以上。培壅方法。亦尙合宜。惟不知擇選種子。以致未能發達。西區土性。最宜種桑。惟所種之桑。皆係高刈。湖桑種植甚少。北區人民固陋執拗。積習難返。蠶業由父老遺傳。婦女口授。以飼蠶爲婦女之事。不加注意。近賴官廳之勸導。士紳之提倡。風氣頗開。所種桑樹尙多。脩剪培壅諸法。似略有領悟。惟桑種不良。所種半多高刈。當勸諭改種湖桑。以期振興。境內山地及海漲沙塗。官民荒地甚多。或築蕩。或墾種。或造林。可分爲四區。東區造林之利

。已有領悟。樹木發育。尙爲暢茂。南區地瘠民貧。採樵爲業。濫伐之風盛。自示禁後。人民亦知森林利益。頗多種植。而培壅茶樹。尙屬適宜。惟採茶方法。不甚講究。西區松杉居多。栽植亦甚合宜。惟遭風吹倒者甚多。其他自然生成之林。人民藉爲採薪之需。種植茶樹。農民頗知其利。時加培護。兼有培壅一種楊梅樹。爲收入大宗。北區山多田少。故林業甲於他區。所有標樣之松杉及栽植之雪梨。尙稱茂盛。至於烏石嶺等村。巖石纒纒。荆棘滿目。間有土質較厚者。栽植毛竹。聽其自然。不甚暢茂。其在後田上灣姚宅下店一帶。所種多松杉毛竹柵子楊梅。且有成片林場。而柵樹散植於園林隙地。任其天然發育。如能提倡林場。其獲利當倍於茅竹松杉楊梅等樹也。

水產物之最著者。鱗類有石首鱸鯧鯉鱒魴鱠鱧墨魚江瑤柱等。介類有螺蛤螯蚶蝦蟹等。海鄉魚船下海者。約四千對。捕帶魚。向由閩人專利。近來

海鄉各戶。習其術。歲入甚優。其餘漁家。在沿海沿河網捕。並無養殖。亦無特殊之製造法。大抵運銷於外者。用鹽鹹醃。惟白鯊製法。南北稍有不同。銷路頗遠。畜牧有牛羊豬鷄鴨鵝等。皆農家一種副產物。並無專營是業者。

農產物。稻類分早禾晚禾。麥類分大麥小麥莠麥。豆類分黃豆赤豆菜豆蠶豆豇豆白豆及其他粟與芝麻菜蔬。果類有楊梅梨橙柑桃杏栗柿櫻桃菱枇杷葡萄甘蔗棗等品。皆爲出產之大宗。以本地所產之米。供本地人民之食。尙屬有餘。每年可以接濟隣邑。如遇水旱荒年。亦不虞無收。團體。舊有縣農會一所。

商業。近以海門爲貿易之中心。居浙東重要地。沿海岸商賈雲集。交通稱便。在城區有東門外市朝天門市興善門市大街頭市。在鄉有章安市張家渡市等處。全縣合計商舖千餘家。入境貨。以南貨綢緞布疋文具器械油棉紗

捲菸肥料洋貨等爲大宗。出境貨。以米麥豆竹松杉桐棉花茶葉蠶絲楊梅梨橙等爲大宗。以上各商業。本地人居多。外來者甚少。

商販道路。邑西十五里達三江。由江入溪。八十里至仙居縣。九十七里入天台縣。南大江。東南一百里。入黃岩縣。又八十里。出海門。此水道也。至陸運。視物之輕重。貨品之高低。道路之遠近。時日之閒忙。隨時增減。錢幣。現洋鈔票。一律通用。行情時有漲落。團體。舊有縣商會。此外有各業之會館及商人旅臨之同鄉會等。

第三十六篇 黃巖縣

考黃巖漢屬會稽。唐置永甯縣。屬台州。天授初更名黃巖。元升州。明洪武再改爲縣。成化析縣南方巖繁昌太平三鄉爲太平縣。清仍舊。民國因之。疆域。東至海。北成舖嶺界臨海。西蒼山界仙居。麀山界永嘉。南隘門嶺界樂清。大溪鎮界溫嶺。東南金清港澤國鎮均界溫嶺。東北三江口。西

北義城嶺。均界臨海。西南車嶺界樂清。斯爲四正四隅。從前自治區域。分城中爲一區。路橋院橋兩鎮爲二區。其餘鎮東西山東山徐山靈濟洪家沙北前沙南後沙南鎮鮑正淦金清下梁同仁啓明橫街新橋同蟾梅山涇清鼓嶼孝友萬全古竹茅畚臨江秀川甯溪烏巖潮濟元同拱辰三十二鄉。各爲一區。後復劃全境爲縣城及東鄉東南鄉南鄉西鄉北鄉。共六區。面積九千一百餘里。田約五千五百一十四頃六十三畝零。地一千二百頃七十八畝零。山八百三十三頃五十四畝零。塘一百三十八頃六畝零。全境有戶十一萬九千五百零四。有丁二十五萬六千零二十六人。有口二十一萬八千零十一人。農業約佔十分之八強。工商十分之一。餘爲軍學漁各界。

河流。黃巖溪源出西鄉大寺基岡。屈曲東流過甯溪鎮。至潭頭。會五部溪。東達烏巖。會柔極溪與楊溪。至長潭。乃稱永甯江。再東流經縣城北。南會南官河。至仙浦。東西二仙浦挾東官河自南來注之。復東流至三江口。

。與臨海東來之靈江相接。南官河起縣城北之常豐閘。東南流經白楓橋。至溫嶺毗連之澤國鎮。西江南源出太湖山。北源出柏嘉山。流經呂白洋。會合北流。至夏家洋入澄江。

山脉。一雁蕩自樂清東來。至太湖山入境。迴環拱揖。因地異名。南行者爲盤山。蜿蜒入溫嶺境。東行者爲鍾堂山。起伏靡常。一括蒼自仙居東來。至蒼山入境。其東爲五部山。與括蒼仙都相連。境內有靈石翠屏紫霄諸山。各有勝概。縣東南孤立之山。以永甯山爲最著。蓋因縣之舊稱得名。地勢。城廓附近。及東南之路橋。南之院橋等處。多屬平坦。餘皆山隩叢雜。尤以西鄉爲最。如金清之於海口。璜山頭土嶼山頭洲黃土嶺三港口。皆縣治門戶。盤山嶺隘門嶺繡嶺唐嶺山坑嶺佛嶺十四坑嶺溫州坑嶺車嶺禦營嶺蒼溪金竹溪石雪嶺包下坑界牌嶺王家寮義城嶺東嶺山舟大左等嶺。以及茅畚沙埠。均爲險要之區。

氣候溫和。至高九十度。最低四十度。濕度高爲八十二度。低在五六度之間。土壤。東南海塗可種花蚶。沿岸沖積之地。宜種木棉。澄江兩岸及澄江支流西江沿岸。土性不黏。略帶潮流鹹質。宜種蜜橘。艦洋湖流域一帶。灌溉便利。土性膠黏。宜種蔞草荸薺。其餘荳麥稻梁菜蔬。隨地可植。惟山隩高燥之區。如坡度較平者。多種甘藷蕃芋之類。否則或種竹柏松杉樟茶等品。合計沃壤約十分之四五。餘皆粗瘠。

農民於清明節車水灌田。以牛架犁。翻土耙平。施用肥料。布種秧苗。斯爲早稻。閱十餘日。加插晚禾。勤去莠草。助其發育。大暑前後。早禾收穫。霜降後。復收晚稻。每屆收成。將稻分扎成把。就桶打落穀粒。風晒儲倉。其菜子荳麥。按時收取。山中所植甘藷。冬間挖取。鏢絲晒乾。與米糧並爲養生資料。田禾成熟後。於冬令種以草苜蓿或紫雲英。來年耕鋤以爲肥料。至農具有鐵鋤耙耨草刀木稻桶風車牛犁水車竹籬之屬。蠶具則

用篋籩盛儲。飼以桑葉。四眠後。用稻麥桿扎把。置蠶於上。使之作繭。名曰上山。種桑養蠶之家。向來不多。近來金清鼓嶼二鄉。得蠶業畢業生之提倡。頗見發達。漁具有絲線網竹籠釣鈎之屬。悉用舊法製造。

官荒民荒。除無可耕植山巖不計外。平地多屬畸零荒塚。鮮可耕之荒野。縣內創辦模範森林一百數十畝。模範桑園一處。縣立苗圃一處。

水產物以炊蝦爲大宗。鰻石首魚白蟹沙蟹泥螺鱒魚蛤蜊血蛤帶魚墨魚勒魚鯉淡菜田蟹黃鱔鱉。亦復不少。花蛆與煙。種於沿海沙塗。其餘於海上河塘捕獲。價值不等。年產約百數十萬觔。至畜牧牛羊豬鷄鵝鴨等。各鄉均有餵養者。

農產物以稻爲大宗。次之爲甘藷大麥小麥蜜橘。又次爲蘭草荸薺荳類棉花茶葉筍綠蕪芋山藥甘蔗等。酒及柿澁桐油菜油靛青等。亦有出產。或行銷外處。或本地自用。其數量價格不一。以本地所產稻糧。供本地民食。有

盈無絀。倘遇水旱偏災。間赴他處購米接濟。亦所不免。

田畝有上下皮名目。所有人可隨便僱種者。謂之連佃田。如甲有田地。須乙布種或聽乙僱種者。謂之佃田。佃田俗稱上皮。則田俗稱下皮。佃田係永佃之田。佃主得以自由典賣其佃權。則田負納稅之義務。有收租之權利。水田每畝年產穀自八石至五石不等。繳租數量。連佃田年繳四石至二石五斗。則田減半。亦有俟收成到田均分者。至預防蟲害。多墾烟經或禁水。團體。舊有縣農會。此外涇清鄉有鄉農會。西鄉有乙種農業學校。

工業。北門外有泰平罐頭公司製造廠。所製天台清汁筍枇杷。路橋有小木毛巾廠所織毛巾。城內有林元豐。路橋有普明各市廠所織電光斜紋柳條布疋線襪。及甯溪烏巖兩鄉山民所製之中青紙。路橋同蟾梅山各鎮鄉家庭婦女所織之草蓆。同蟾家庭婦女所製燭芯。橫街啓明兩鄉家庭婦女所織絹及絹紗棉布。城內師竹館所製竹簧器皿。城內家庭婦女所製紙扇等。皆有盛

名。行銷甚廣。餘如農人所用之水車鋤耜。家中日用之桌椅櫥桶等。均係本縣自製。然皆舊式。

學徒無論何項工藝。須憑荐主立約。以三年爲期。限內聽師指揮。期滿准其自由營業。

商業。自輪船興後。可行駛小輪以達海門。由海門再達上海寧波溫州。今復黃甯直接。輪運既通。舶來品固逐漸輸入。然就地出產。如橘果冬筍茶葉菸葉紙扇草蓆燭芯絹及絹紗棉布飴糖金彈餅楊梅乾柿澁桐油松板柴炭之輸出者。年計爲數不少。商業日形發達。市鎮。如城區之大井頭。東鄉之三港口石塘岡東山頭洪家場界牌頭水陡門橫下陳靈香店三甲長浦橫塘下陳石柱殿。東南鄉之璜山頭桐嶼羅洋路橋石曲泉井白楓橋新橋管橫街四甲街鼎橋街洋嶼殿下梁楊府廟小五份雙關廟竿蓬捲洞橋金清港南新市。南鄉之土嶼十里舖店頭沙門店院橋高橋頭沙埠街。西鄉之焦坑頭陀橋小澧橋茅畚潮

濟烏巖溪甯溪小坑。北鄉之嶼下。計五十處。其中以城區路橋爲最盛。洪家場金清港院橋頭陀橋烏巖甯溪次之。餘則僅有日用必需品。無大營業。入境貨。以洋油洋布洋紗羽綢顧繡綢緞五金玻璃紙張顏料之屬爲大宗。出境貨。以橘菓草蓆春茶冬筍紙扇棉布罐頭筍燭芯柴炭等類爲大宗。至經營商業者。以本地人居多。

商販由本邑至甯波。有湖廣新甯台南海等商輪。每旬各往返一次。至海門有永新小輪。逐日航行。僅二小時可達。由海門至石浦定海甯波上海溫州等處。現有台州舟山永甯等商輪十艘。開行之期。一二日不等。至溫嶺水陸可行。西鄉甯溪一帶。距城遼遠。赴仙居貿易者不少。運脚。除輪船運輸貨物。另有定章外。若以小船裝載。人力肩挑。視路程之遠近。定運費之多寡。市面錢幣。銀幣銅幣鈔票。均可流通。漲落視滬甬爲準。由商會隨時議價通知。

商人辦貨。如上海之洋貨。蘇杭之綢緞。多以現銀直接批發。交由輪船遞送。少數物件。亦有交郵局寄遞者。團體。城內路橋鎮各設有商會。又路橋設有明德乙種商業學校。

第二十七篇 甯海縣

考甯海縣自晉析置。厥後或併或分。隸屬靡常。唐復析縣之東北爲象山。而縣境始定。清時屬台州府。民國廢府制隸省。疆域。東界象山西溪嶺。西界天台白溪源。南界臨海甯和嶺。北界奉化柵墟嶺。東南入海爲牛頭洋。卽南田界。西北界新昌杉木嶺。東西廣一百九十里。南北袤二百六十五里。從前自治區域。除城區外。以新甯海游長亭爲三鎮。茂林儒雅新聚亭防松溪拱台秀嶼五雲久安成文洄浦爲十一鄉。共計十五區。面積周圍八千六百四十九里。開方得九十三平方里。其間田地山蕩。約占九十一萬五千六百六十四畝。餘屬海。全境有戶八萬八千二百七十七。有丁二十萬一千五

百九十六人。有口十四萬九千零六十六人。其中業農爲多。漁業次之。東南北皆屬海濱。內地並無長川巨河。間有浮溪大溪白溪清溪海游港橫渡溪數處。面積亦甚窄狹。不過藉蓄山水。保障田畝。其間雖亦可通船隻。而水勢深淺不時。無甚便利。

山脉。天台東幹。綿亘爲臥龍嶺。自西徂東。突出爲象山。其南支海游嶺。至健跳山以成海峽。其來脉有桑洲桐巖二嶺。爲明戚繼光討倭時。控扼要道。全境多山。而東南北三鄉濱海。山海交錯。東鄉雖近海濱。山勢高峻。自牛類絡與蛇騰兩山間。塗面長闊數十里。且東南諸水。襟帶左右。五嶼田灣。關鎖海口。實擅一邑形勢之勝。縣南之石舌水車等處。地多田少。而沿溪之田。每虞水患。海游鎮商務較盛。爲全邑最。第山林荒廢。時患山潮。縣西田地較少。半賴山林。出產甚稀。最爲磽瘠。內惟塔山柘湖竹林金亨塘湖各莊。山脉雄壯。土地寬展。縣北田野開闢。惜乏水利。溪下之

石門張坑。居近高山。土脈礫薄。僅宜栽植茶竹。浮溪缸窰樟樹西塾諸莊。地皆臨海。利於漁業。外此則爲大洋矣。

氣候溫度最高爲九十八度。最低爲二十八度。濕度最高爲八十四度。最低爲六十一度。歷來霜雪不多。惟地近海濱。風勢頗大。似不利於種植。天如少雨。旱象卽呈。倘遇山洪陡發。則成水災。訪詢歷來災害。旱多水少。

全邑山多田少。田土較肥。宜於栽種稻麥。而山土多瘠。並乏水利。大都栽植竹木雜糧爲適宜。統計土性。瘠粗者居十分之六。精肥者僅十分之四。山礫海壩。易爲旱澇。其間爲閘爲塘爲礮。因地制宜。所以爲蓄洩而濟乾溢也。邑中有兩閘五十五礮十二塘。塘名分爲二。曰池塘。曰海塘。池塘以供吸取灌民田。海塘以禦鹽潮。蓄淡水溉塗田。及民居萃聚之處。併可以供吸取也。以上所述閘及礮塘。灌溉附近田疇。約計二十萬餘畝。

農民每年立夏節後。車水灌田。以牛架犁。翻土耙平。撒以稻種。漸成秧苗。芒種前後。移秧分種。及其成活。加以肥料。勤耘數次。至白露後次第成熟。名曰旱稻。其晚稻尙須再遲半月。方可收穫。俟田稻刈割完全。接種大小二麥。至山地土性較瘠。僅可栽種蕃薯苞蘿。一切耕耘方法。均仍舊習。農具中。墾具有犁鋤耜鋤刀斧等物。漁具有大捕網曳網掩網絲鱗網數種。皆係本地所製造。至蠶具無人備製。近來間有育蠶之家。大都因陋就簡。年產蠶絲有限。

官荒民荒。不下萬餘畝。雖其中山巖石質居多。難以墾種。而可以開闢之地。當亦不少。模範森林共三處。苗圃亦有兩處。至茶樹一項。宜於山地。鄉民於山巖空隙之處。間有栽植者。植茶方法。掘鬆泥土。酌揀茶子播種。聽其自由生活。不甚加以培養。

水產物爲黃魚鱸魚鮫魚鰻魚彈塗帶魚墨魚蝦蟹蚶蛭等類。沿海居民。

皆以在海採捕水產爲生計。但並無養魚池塘。惟南鄉逼近茶盤洋面。其海塗較低之處。間有漁戶略加圈築。養殖魚介等類。至捕獲之魚。惟黃魚帶魚鱮魚。有用鹽醃行銷他處者。餘皆隨捕隨賣。畜牧惟鷄鴨豬羊牛隻。各家都有豢養。無專以此爲營業者。至驢馬則甚鮮見。

農產物之主要者。如粳米糯米大麥小麥大豆小豆玉蜀黍芋苻蕃藷蘿蔔蘿等類。落花生南瓜冬瓜所產無多。豐稔之年。民食尙可自給。遇有荒歉。卽虞不足。須向鄰縣購糴。藉資接濟。

農民佃田。先向業主訂立佃票。議定租額。每畝租穀。普通年納兩石。大都按年清繳。抗欠尙少。凡遇災害蟲病。通用石灰青油或青礬水以防制之。團體。舊有縣農會一處。

人民以農漁兩項爲生業。對於工藝。殊少講求。近惟習藝所出有木根雕刻品一種。人物山景鳥獸。各式完備。製造精緻。頗稱特色。其餘關於織工

者。有魚網蝦兜大布土布夏布。關於製造品者。有青油燭黃蠟磚瓦石灰。關於木工者。床椅桌檯櫥櫃箱桶犁耙及一切傢具。關於鐵工者。耜鋤刀斧釘鎖等物。至外來者。惟洋油需用最廣。他如玻璃綢緞銅器磁器以及文具等物。雖係外來。而所用不多。

民間年輕子弟。投師習藝。大都先訂契約。通常以三年爲限。限內聽師指揮。不給工價。但優於手藝者。亦得酌給津貼。限滿出師之後。方可自由營業。

商業之盛衰。視年歲豐歉爲轉移。市鎮。東鄉有長亭鎮胡陳市古渡市瀝洋市茶院市。南鄉有海游鎮停防鎮健跳市沙篋市。西鄉有桑洲鎮朱魯市岔路市。北鄉有新甯鎮橋頭市梅林市西墊市。共十六處。入境貨。以南北貨雜布拆衣煤油藥材黃白糖豆油茶油菸葉爲大宗。出境貨。以食鹽毛猪毛竹柴片烏炭火紙桐油靛青茶葉當衣松板樹料麻蚶苔條等類爲大宗。此外穀米

亦有出境。惟因歲有豐荒。或有或無。不能一定。至經過者惟天台臨海販往甯波兌售之牛羊鷄鴨牛皮等。均係少數。

商販道路有四。一赴甯波。陸路由北鄉西墊。過奉化之大橋。水路由北鄉薛巖。過定海鎮海等處。二赴象山。陸路由東鄉岳井至泗洲頭等處。三赴天台臨海新昌。陸路由西鄉朱巖洞巖瀛坑。至橋頭礁兩頭門大市聚等處。四赴海門至黃巖。水路由東鄉白齋石橋頭。南鄉海游健跳過石浦等處。至運費。輪運較昂。航運較輕。肩挑因時有閒忙。亦有增減。市面錢幣。時有漲落。商人交易。現錢買賣。當由雙方直接交換。賒賬交易。須經賣方允洽。其貨帳總以年節爲限。至各舖進貨。每以輪期交託長行赴甬代辦。主顧內地人爲多。間亦有甯波天台等處商民來境貿易。因係鄰縣。語言尙易通曉。團體。舊有縣商會。此外另有同業公所及異地人同鄉會等。鑛業。彭家村筆架山發見銅鑛一處。又芽山崗村發見銅鋅鑛山一處。均已

由商民呈請探採。

第三十八篇 溫嶺縣

考溫嶺。戰國秦漢均爲東越地。唐爲黃巖樂城二縣地。明始割黃巖南界方巖太平繁昌三鄉置太平縣。清因之。民國避皖省重名。以縣境溫嶺爲縣名。疆域。東至鳳尾山界臨海。西至湖霧界樂清。南至江綰界玉環。北至澤國界黃巖。從前自治區域。分城區及箬橫潘郎兩鎮。並大閩畚環新河永安鎮海橋下旂峯河溪溫虞石門振清等十一鄉。計共十四區。面積。除東南兩方汪洋大海不計外。其陸地約計一千五百八十方里。田地山蕩約占五十七萬七千零三十三畝。全境有戶九萬六千零三。有丁二十一萬五千一百五十九人。有口一十八萬一千五百三十五人。業農者約佔十分之六七。業工商者約佔十分之二三。

河流。縣東有月河。源出王城山之桃嶺。東流會諸山水爲新建河。經縣北

爲官塘河。今爲金清港。西有大溪小溪。合流爲百漿渚入於官塘河。溪流隨處皆有。堪以築堤引水建碓。

山脈。最著者爲溫嶺。北雁蕩之支脈東支突出爲林頭鎮。入海崛起爲松門山。隱伏東迤。爲台州列島。

地勢略係傾斜。東南瀕海稍低。西北負山較高。至險要如南之大雷山。爲舊置烽墩處。形勢極勝。足資防衛。餘如東之鳳尾。東南至石塘。係孤懸海島。防範不易。其道途平坦。或水陸交通便利者。則有新河松門澤國潘郎等處。

氣候溫和。冬少冰雪。關於農業無特殊利害。近歲尙無水旱偏災。

土壤。山地約居十分之二三。俱屬瘠土。僅種雜糧。平原居十分之七八。土性膏腴。可種禾稻。

水利。如東之金清港及大小瀝閘。南之王家浦。北之牛子匯。均爲最要。

農事分水田畑田二種。水田又分秧田稻田。秧田有早晚之別。早秧田於清明前犁鋤各數遍。再以竹竿拖平。竹帚挂細。晚秧田於穀雨後耕之。其精細與早秧田同。耕畢下種。無庸耘草。至耕耘晚稻。雖寄插在早稻田內。而耘法亦不同。早稻田於關水上田壅草時。先耕一次。穀雨後草爛再耕。精者至於三犁三鋤。秧插後。立用推鏝橫耘。俛用手直耘各一次。此專爲早稻耘也。寄晚後。粗者用手縱橫耘各一次。精者則耘至三四次不等。此耘早稻而兼爲晚稻耘也。晚稻於芒種時寄插早稻內。俗謂之寄晚。僅用耘而不用耕者。早稻未登場也。一至登場。則用推鏝橫直推之。推竟。復耘以手。粗工一二次。精而勤者則四五次。至畑田。凡種草棉薔麥等類。先以牛犁之。翻起新土。再用鋤鈎使成隣。能排水。再鋤以牛。然後下種。苗出後。草亦漸生。隨時用鋤削之。無次數。若種甘藷者。先以牛犁翻新土。再以鋤鈎土成構。每構構背高約曲尺二尺許。構底平直。水易排去。

草生輒削。亦無次數。七月半後。復於耨底犁翻一次。擁土於耨之兩旁厚護之。使發生力膨脹。農具中。墾具有犁與鈹。皆用牛力。開土以鋏。起土以錐鋤。土之鬆者以鋤。削草亦以鋤。摘土以釘鈹。或以鋤。漁具。船則有大小釣船。其捕魚皆以釣。有聯網船。有大小網船。其捕魚皆以網。捕小蝦之網船曰張履。不用船捕魚者曰拗罾。不用網而劈竹成條。編若籬圍而扞海中。另用大竹四枝。分立泥塗如柱形。以大繩合捆竹梢。使曲而不覆。懸臥具於其中。俟潮汐退。魚在圍籬中。以擦盆盛而取之。曰張泥棚。水產種類。苔藻無多。捕帶魚自八月至正月。釣船用釣。網船用網。除賣鮮外。以鹽醃之。令久藏不壞。年產約三千餘萬擔。黃魚四時皆可捕。除鮮食外。剖而醃之。曰黃魚包。鹽後浸淡水中漂之。曲其尾令圓。曰黃魚鯊。分洋山早夏初伏二伏三伏秋白數種。立秋後數日捕得之魚。製鯊最佳。價亦最貴。年產二千擔。魚腹有鱠。製爲膠。或長如帶。或圓如盤。年產

約四千擔。鯪魚春季有專以釣捕者。冬至前後。剖鮮風乾。曰風鯪魚。味甚佳。春時製以鹽。年約千餘萬擔。其他鮓魚鱸魚勒魚油鯛及各色雜魚。或有或無。不能一定。黑魚卽烏鯪魚。立夏後爲應發之期。有頭水二水三水。以肉之厚薄分之。捕用網。或用篋。乘鮮破晒成乾。大旺之歲。可千餘擔。中歲亦五六百擔。吐蚨初夏最旺。發生泥塗中。潮水一退。可手拾之。製用鹽滷拌片時。洗去其沫。花蚺及蜻蛤蜊。係海塗蓄養物。有炊熟晒乾者。血蚺非蓄養物。夏時出製以鹽。紫菜生海際巖石上。不須種植。但於收菜後。用柴燒其巖石。明年菜便發生。春收之菜。不及冬收者厚而且長。至畜牧間有在海上荒山牧羊者。爲數甚少。亦祇任其自生自長。用則取之。卽肥瘠亦不復問。

農產物。有紅粳白粳早糯晚糯秈米蠶豆小黑豆豇豆綠豆等。甘藷山居者多種之。有製粉。有晒絲。有切片爲乾。棉花近年種者亦多。麥出產少。僅

供本邑粉食之用。沿海一帶。居民無田可種者。皆仰食於內地。不足。則以甘藷絲雜糧補助之。而水鄉居戶。民食有餘。非販運出外。有穀賤傷農之患。

田地上皮下皮之分。上皮田歸業主承糧收花。下皮田由農民佃種。照額分兩季還租。無納稅之義務。即法律所謂永小作權也。團體。舊有縣農會及南鄉之大閭莊分農會。

工業。習藝所製造藤木器。式樣新奇。花紋精緻。可稱出色。普通者。銅鐵竹木繡織雕鏤均有之。但產額無多。惟陶類有磁料如碗碟。有砂質如大小缸。有泥質如磚瓦。以上各種。產額用途。最多且廣。

僱傭工匠。以技術之精粗。定薪資之多寡。大抵由妥實人介紹。屬於口頭契約者有之。屬於書面契約者亦有之。待遇方法。就習藝所而言。可分爲二。一待遇藝師。月送薪修。或另給往來盤費。一待遇藝徒。月貼膳費。

其成績優者另給獎金。逢節時並以酒食待之。工廠。舊有第一平民習藝所及罪犯工場。此外有民人組織之磁窯織布各廠。

商業。自石箬輪埠開辦後。較爲發達。市鎮。如東鄉之新河。南鄉之松門。西鄉之溫嶺街。北鄉之澤國爲最勝。其餘均屬小市。入境貨。以紅白糖。筍乾魁圓荔枝各式布疋爲大宗。出境貨。以白鯊魚膠螟蚰乾蜻乾棉絮茶葉及鹹貨等爲大宗。至經過者。米與南貨爲大宗。

地居海口。南通閩廣。北達滬甬。內地貨物。均由海門路橋販運而來。運脚。海運到甌較輕。到甬加倍。河運陸運。計道里之遠近。隨時估值。市面錢幣。照上海行情。漲落無定。

鑛業。前經探探者。有北鄉部濱莊馬鞍山之圖書石。當鑛苗發現時。以其視爲玩好品。所採者類皆書畫家。嗣考其石。與滇黃鷄血齊名。探採者接踵而來。因俗多迷信風水。於清光緒初議約廢止。現在開採之鑛。惟石一

種。其所在距縣城東十五里之肖溪。二十五里之婁巖。三十里之長嶼唐巖等處。並無糾集股本。組織公司者。大抵業主僱工自採。或他人向業主包採。其鑛區與他種鑛區有別。開採之始。自上而下。採至穴場。形如覆釜。大者畝許。小者約五六分。地形屈曲尖斜。靡所不有。其畝數難以折算。鑛工年無定額。至其所出之石。不特本境足以敷用。輸運外省亦多。

第二十九篇 天台縣

考天台。吳置始平。晉改始豐。後晉改台興。宋改爲天台。元明清因之。民國仍其舊稱。疆域。東至筋竹嶺與甯海界。南至杜潭嶺與臨海界。西至柴嶺與東陽界。北至洩山架龍巖與新昌界。此爲四正。東南至黃鎮嶺界臨海。西南至月嶺界仙居。東北至馬喬嶺界甯海。西北至關嶺界新昌。此爲四隅。東西相距一百六十五里。南北相距九十里。固有區域。城分八坊。鄉分二十八都一輕軍。前辦自治。以在城及附廓坊堡。劃爲城區。東鄉地

面稍大。析爲東上東下二鄉。西鄉地面最闊。人口亦繁。向有大小西鄉之稱。因於大西鄉劃分爲二。以峇溪爲界。峇溪之上。劃爲西上鄉。峇溪之下。劃爲平鎮。小西鄉則仍以小西名。南鄉地面延斜。山洋參半。北鄉四面皆山。居民稀少。均毋庸分析。故各仍爲一鄉。面積共計五千二百五十方里。原額官田四萬一千七百五十三畝零。民田十九萬九百五十六畝零。地八萬三千六百十三畝零。山六萬三千三百七十二畝。塘七千二百二十畝零。湖二十九畝零。潭五畝。魚樞機二處。又民人帶種屯田十九頃八十八畝零。海門衛屯田二十五頃四十六畝零。又台州衛屯田四十五頃七十六畝零。全縣有戶七萬三千二百二十二。有丁十四萬六千七百六十人。有口十一萬九千五百七十六人。以職業論。農占十分之六。工占十分之二。商占十分之一。餘均軍政學各界人。

地處萬山中。無江河爲之襟帶。祇一線大溪。會納四山衆流之水。屈曲自

西迤東南流。下達郡城靈江而注之海。查大溪古稱始豐溪。發源於東陽大盤山。迤東流二十里。至捲洞橋入邑境。又六十里至邑西湖寶鎮。又二十里至邑西平鎮。又三十里至邑城西南。又二十五里至邑南杜潭嶺麓入臨海界。下通舊台郡之靈江以達海門。此溪溉田運貨。與農商業頗有關係。若工業惟邑西濟溪與北山直溪。用以造紙。莒溪與歡溪。用以洗鐵。赭溪淡溪諸水。則有水碓水磨。足爲工業利用。

山脈。胚胎於東陽大盤山。東行入縣西境。分兩大支。中界始豐溪。一大支自西迤北行。爲西鄉北鄉東鄉諸山之來脈。以華頂峯最高。一大支自西迤南行。爲南鄉諸山之來脈。以大雷峯最高。

地勢。西北高而東南低。惟附郭四周。地稍平坦。至於險要。東由甯海入者。則有筋竹嶺周家嶺。嶺路峻峭。當關可守。南由臨海入者。則有杜潭嶺灘嶺之臨水依山。持械可防。東由東陽入者。則有柴嶺之嶺路盤折。可

以伏兵截敵。西山新昌入者。則有關嶺之嶺路高峻。可以負隅自固。東北由馬吞入者。扼摘星嶺。東南由大石入者。扼黃抓嶺。西南由黃沙入者。扼鞍頭鎮。西北由採烟山入者。扼王會嶺。此險要之大概也。

氣候溫和。四時各得其正。惟北鄉山巒層疊。地鮮平坦。雲霧陰霾。時常凝結。與他鄉略有不同。邑城及東南西三鄉。溫度最高華氏九十餘度。最低三十餘度。北山最高八十餘度。最低二十餘度。四時春多雨。夏多風。秋多霜。冬多雪。所種之穀。北山與他鄉相較。種類多殊。大率以性能避風與避旱爲適宜。卽播種與收穫時期。亦有遲早之異。四面地勢高低。如高屋建瓴。洪水一瀉。頃刻百里。是以沿溪每患水溢。高塍多患旱乾。此其大較也。

僻處山陬。地土瘠瘠。惟負郭及西方洋老鼠嶺脚洋。俗稱鬼叫洋。地稍平坦。土較肥沃。至山面土質。東鄉如黃榜山。西鄉如紫凝山。南鄉如山頭

鄭。北鄉如龍王堂慈聖桐柏山等處。均係天然沃土。其餘瘠土居多。以全邑論。瘠土居十分之九。沃土佔十分之一。土質有粘土。有沙土。有黃土白土。粘土宜黍稻。沙土宜雜糧。黃土白土則耕作頗難。出產稍次。

水利。全賴沸塘以資灌溉。查城北有楊家沸。城西有萬戶沸西濱沸張思沸。下王沸大路褚沸科山沸等。官塘灌田各數千畝。此爲全邑最大之水利。

農民春耕夏耘秋收。與古法相同。稻則耕一次。耘三次。肥壅二次。麥則耕一次。削三次。壅二次。雜糧則每項耕一次。削壅各數次。此普通種法也。最精者。惟城東之種菜秧。城南之種甘蔗。工作較多。肥料較厚。與普通種法。略有不同。農具種類甚多。如墾具有鋤耜鐵耙等。漁具有罾網揭籠等。均係本地自製。至蠶具則祇用桶盤團箕。無新式者。蓋育蠶之戶甚少。惟西鄉浙嶺莊何方莊雙柳亭莊。與東鄉之洪疇戴莊。南鄉之茅園莊。稍爲興盛。

官民荒地甚少。間有一二隙地。若非高巖山頂。卽是大溪石灘。無可耕之土。遇有山溪沖積成地。村民類多種植松竹桐柳蘆葦。藉以取利。模範桑園。創辦於小北門外柿樹灣地方。至植茶山地居多。向於秋間白露節採種。覆以泥灰。至次年春季發生。第三年清明節後。每株可採嫩心。第四年所發嫩葉俱可採取。出產以北山爲最多。

四面崇山。無江河灌輸。故水產甚少。惟大溪及東西兩鄉陂塘。間有魚介養殖。魚類有鯉鯽鮎鱒鱖鯪鯢石斑香魚柳花魚蝦。介類有蟹蟹螺蚌。捕捉均用罾網。至於畜牧。民間餵養牛羊豬雞鵝鴨。並無專營者。

農產物。穀類如粳穀有早紅早白長桿白寒白細葉青花穀廣稻三鮮紅白落蒙野豬梗等種。糯穀有黃皮白壳烏嘴竹筴毛珠等種。稷穀有早稷霜下稷香鮮稷三種。麥類如大麥一名麩麥。色有紅有白。穗四稜或六稜。小麥一名麩麥。有紅火簪矮赤長桿赤鬚洛陽青鯽魚麥芒麥光麥等種。又有花麥一種。

與大麥小麥不同。每年二熟。穀厚粉少。性溫利於消化。菽類如蠶豆川豆白豆綠豆等種。粟類如黃粟苞蘆等。民食。歲豐頗足自給。稍歉不免仰糴於鄰境。並賴麥黃粟苞蘆蕃籐等雜糧以補之。就邑中比較。東西兩鄉。米穀有餘而雜糧不足。南北兩鄉反是。

農田有自種與佃種之分。佃種又有分種與招種之別。自種無論矣。分種則每年穀麥。面割均分。招種則每年普通每畝交麥租一斗五升。穀租一石五斗。其腴者每畝交麥二斗穀二石。瘠者每畝交麥一斗穀一石不等。斗有火印官斗之別。火印每斗十升。官斗每斗八升或九升。石卽以是推之。至驅除蟲病。預防災害。無他良法。惟聽天命而已。團體。舊有縣農會及現在農民協會。

工業。出色之工作物甚少。就中比較。如無稜珠（俗名八佛珠近有以柏木製成者）之銷售普陀上海北京。萬年杖之銷售甯波紹興杭州。餘如水筆油

傘紫烟。每年銷售鄰邑。亦頗有成數。又邑東之魚網麻布。銷售甯海石浦。邑西之棕線松板。銷售甯波上海。附城之毛襪。銷售甯金溫處。北鄉之花尖紙生鐵沙白炭。銷售甯波上海。其他刺繡雕花。技雖有名。但出口無幾。至外來者。如蘇杭之綢緞。黃巖之布疋。溫州之皮貨。紹興之銅器。以及閩產粵產東西洋雜物。歲出漏卮甚鉅。

僱傭工匠。餘供飯外。另給工資。至包工則不另供膳費。工價近年最昂。較往昔實增數倍。學徒以三年爲期。三年內工金。由師收入。年底由師略給押歲金。三年後。徒可自由行動。工廠。舊有平民習藝所一處。

商業。當海門輪舶未通以前。其中如溫台屬之商人。若欲赴蘇杭甯紹等處。採辦貨物。率皆經過天台。藉以逐什一之利。以是萬商雲屯。百貨麇集。不啻五都輻輳之區。自交通改道。一經比較。不勝今昔之感。而各種需要貨物。如南貨布帛荳餅。與夫東西兩洋產品。運輸既便。銷售較多。亦

爲近來所僅見。城區每月六市。以逢五逢十爲期。所貿易者。不過本地商人。以布帛菽粟。互相交易而已。鄉間市面。其市日與城區不同。惟所貿易之貨物。大率類是。

市鎮。縣市以外。在東鄉者。坦頭市洋頭市帶橫市牌門陳市霞嶠市巖店市下坊市靈溪市榷樹市。在南鄉者。銅鐵頭市。在西鄉者。方前市街頭市洋毛市楓樹殿市桐橋市下王市後村市平鎮市莊前市王都市東王市鼻下市飛泉市大路下市官塘市三茅市。在北鄉者。坳頂市。縣市以外。平鎮市最大。街頭市次之。飛泉市坦頭市又次之。餘均清淡。入境貨。黃邑之米及桔。海游之鹽。鎮江之油餅。江蘇之蠶豆。嵎邑之梨。溫嶺大石海門等處之磁器。上海甯波海門之南貨廣貨洋貨等。出境貨。茶葉運售蘇杭滬營。苧麻運售臨黃甯象。藥材桐油運售甯波上海。竹木運售臨海上海。笋荊菜絲運售臨海黃巖。山粉蜜糖楊梅運售新昌嵎縣。以上各商。本地人居多。出產

品以茶尤爲大宗。

商人販運。陸運自縣治出大東門路口村起。至毛上路廊。下通甯海。自縣治出大南門南門庵起。至杜潭嶺。下通臨海。自縣治出大西門臨川橋起。至柴嶺頭。上通東陽。自縣治出北門木魚庵起。至深坑崙。下通甯海。自縣治出小東門黃府園起。至坑橋。旁通臨海。自縣治出小南門廣濟橋起。至鞍頭嶺。外通臨海。自縣治出小西門義里許起。至關嶺。上通新昌。自縣治出小北門楓樹頭起。至洩上。亦通新昌。水運自縣治小南門外溪頭起。下通台郡靈江而注之海。近自海門通輪。百貨之進口出口。均由此水道而行。運價。如由嵎邑甬江海游台郡。運至天台。陸路較昂。水路較輕。市面錢幣。英洋龍洋銅元。漲落無定。其金融流通。惟茶商牛商是賴。每年秋冬時期。茶客由營口匯款。牛客由蘇滬收回牛值。於市面金融。不無裨益。

商業習慣。大略與他處相同。市上交換。銀幣皆流通。商店辦貨。在輪船未通以前。只有一種僱工。俗名水脚。兜收各店銀洋。專赴蘇杭甬紹。代辦各種貨物。今則大商店均派專夥。赴滬甬各處購貨。小商店則托水脚代辦居多。

店主使用商業人。有管賬夥友學徒三等。至於言語。俱本地方言。團體。舊有商會一處。

鑛業。有東鄉巖店之煤鑛。曾經邑人集股開採。嗣以煤苗不多。資本不敷。出水不便。事遂中止。他如南鄉雀岙及北鄉歎岙等處。山澗中往往瀉流鐵沙。民間有以洗鐵沙爲業者。又有北山澄深莊。近甯海交界地方。發見錫鑛。由邑紳探探。運滬試驗。他如北鄉太監府地方。雨後間有水晶石發現。又據各處紳民云。南鄉裏玉有煤質發現。西鄉濟溪有灰石發見。北山張家坑有銀質發見。城北赤城山係屬金鑛。究竟鑛有多少。尙未可知。

第四十篇 仙居縣

考仙居。東晉置樂安縣。隋省入臨海。唐廢而旋復。吳越更名永安。宋更名仙居。元明清以迄於今。仍舊。疆域。由縣城東至界嶺。爲臨海縣界。西至黃榆嶺之王壇。迤西而南。至蒼嶺之南田。爲縉雲縣界。南至道緒山。爲永嘉縣界。北至周坑。爲天台縣界。是爲四正。東南至大邵。迤北至界牌嶺。爲黃巖縣界。西南至界烏嶺。爲永嘉縣界。迤北而西至嶺後。爲縉雲縣界。東北至半山村。爲天台縣界。西北至摘草嶺。迤北至風門嶺。爲永康縣界。是爲四隅。從前自治區域。以城內十坊爲城區。舊有之一二三四都爲湫峯區。五六七三都爲橫溪區。八九十一一二二十三六都爲磡灘區。十四十五十六十七十八十九二十一二二三都爲田市區。二十四二十五二十六二十七二十八二十九三十三十一九都爲衆成區。三十三都爲溪上區。三十四都爲朱溪區。三十五三十六都爲下

張區。三十七三十八都爲廈閣區。三十四三十六之上半三十八附都爲雙廟區。三十一都下半三十二三十八又三十八附都爲慶雲區。面積約一萬六千三百六十二方里。山約佔其七。溪流及沙灘約佔其二。田地約佔其一。全境有戶五萬六千六百四十五。有丁十二萬二千一百三十人。有口九萬八千七百五十七人。農居男丁十分之七八。工商各居十分之一。

河流。一自一都安仁嶺發源。繞縉雲東北流。仍入仙居。名永安溪。又名安仁溪。此謂西源。一自界烏嶺發源。北流爲冷水坑。又經雙港至曹店。與永安溪合流。四十里至橫溪鎮。與蒼嶺坑水合。十里至皤灘鎮。與九都港及十一都港水合。十里至拓溪。與十三都港水合。十五里至下瀝洋溪。與十七八九等三都港水合。十五里至溪口圍溪。與二十都及二十六都港水合。十五里至城南河頭埠。與孟溪港水合。二十里至後林渡。與朱溪港水合。三十里至象坎渡。入臨海界。總名爲大安溪。

山脈。自縉雲來。中分爲三大支。一自蒼嶺入境。又西北爲黃榆嶺。與縉雲界。又北爲張阜山。其北爲谷壇山。與永康界。正北爲孟坑山。又北周坑山。與天台界。又有青尖山。爲縣城後山。又東北爲盧坑山。北爲紫岷山。亦與天台界。又東爲大雷山。與臨海界。東南爲田羅山。又東爲界嶺。入臨海界。一自安仁嶺入境。北爲馮師山。迤東爲錦鳳巖。又東北爲金峯山。北爲萬竹山。又東爲章羌山。又東西爲貢孟山。與永嘉接壤。一自永嘉入境。爲界坑山。北爲黃皮山。又東爲上錦山。又東北爲道赫山。與永嘉界。又東爲梁山。又東爲界牌嶺。與黃巖界。又東北爲括蒼山。又東爲彈子巖。至象坎入臨海界。

四山環繞。僅東與臨海縣毗連之境。最爲低下。溪流奔注。匯而爲一。餘俱依山傍澗。疊石成田。地勢。西北高而東南低。斜欹低昂。相距恆數百丈不等。平地最少。險要。則邑西之蒼嶺黃榆嶺。南之大邵嶺道赫山。北

之馬鬃嶺等。清代每駐防營於皤灘朱溪等要隘。以便就近防範。今仍駐紮軍隊。然四周皆高山峻嶺。土匪時常出沒於其間焉。

氣候。據華氏表溫度最高以百零四五度爲沸點。寒度以三十四五度爲縮點。農業關係。不宜久晴。亦不宜久雨。夏秋之交。十日不雨。則苦旱立見。然霖雨滂沱。經三四日。則山水驟發。冬令霜早。恆有礙於靛葉。仲春雪多。則有害於麥苗。他如風雨不時。均屬普通之害。水旱偏災。水之受害。多係山洪。僅在溪邊澗谷之間。旱之受害。則遍地皆是。故農民恆苦旱災。

土壤之肥而精者。不滿百分之五。瘠而粗者。佔多數。種植以苞粟大小麥爲最宜。平坦之田。卽有種稻者。亦每受未雨則乾。既雨則潦之患。樹木則以松杉柏爲最多。

澗谷紛岐。旁山砌石。溝渠之多。不可勝計。約計吸水大者爲堰。小者爲

溝渠。每堰灌溉田自百餘畝至千餘畝數千畝不等。若溝渠。僅可灌二三十畝至百餘畝爲最多。且每遇洪水暴漲。入水口易致冲塞。

農民性質耐苦。雖土瘠田少。而耕耘之事。皆由老農相傳。農具。除墾具有犁鋤之屬外。若漁具蠶具。皆甚缺乏。

官荒民荒甚鮮。農民因栽種苞粟及桐樹。利息最厚。出產又速。故祇就山之高下。墾種苞粟。於造林觀念甚薄。茶葉間亦有之。但出產甚微。

農產物之種類。穀麥苞粟蕃薯芋油麻黍豆等。民食每年平均計算。尙不足三分之一。故於農業稍暇時。輒就食於金衢嚴等處。客作農民皆是。

佃田風俗不一。近城一帶。每畝交租穀三石。租麥一斗五升。四鄉則田一畝。交租穀二石。租麥一斗。佃戶均先付押租金於田主。視田之肥瘠爲定價。西鄉一帶。又有所謂買田皮者。祇准收租。不准別佃。亦一陋習也。至驅除預防災害蟲病等方法。農民各照舊法施治。團體。舊有縣農會。地

處僻壤。既無商埠。又無輪車。從前商業。較今稍盛者。以有鄰邑經過之客商。概自陸路運輸貨物。今則概有輪船裝載。往來者少。故商業日見衰落。市鎮。如城市橫溪皤灘白塔田市官路橋上張楊府大路徐黃梁陳下張朱溪廈閣等處。除城市外。惟橫溪皤灘廈閣三處。貿易略盛。其餘皆每旬定期交易之市集耳。輸入之物。凡日用所需之品。指不勝屈。輸出者。以木爲大宗。黃豆桐油次之。茶靛又次之。至經過。惟食鹽由臨海運至縉雲永康武義各邑而已。以上商人。本籍人居多。

商販。由邑城西至縉雲縣境。爲越山過嶺之大路。東出至臨海縣境。爲水陸並通之道路。東南出至黃巖縣境。爲越山過嶺之偏路。西南出至永嘉縣境。爲越山過澗之水路。東北出至天台縣境。爲越山過嶺之小路。西北出至永康縣境。爲越山過嶺之僻路。其運價。肩挑以觔計。亦有以日計者。船運分上下水之不同。大率肩挑者居多。小船裝載。間亦有之。錢幣。與

臨海大略相同。人民俱用現幣買賣。或間有用五穀交換。並無代辦主顧之可言。言語多操土音。

鑛業。前經探採者。在邑西橫溪區牛落嶺水剪頭灣湫峯區裏坑莊金山莊。土人相傳。明萬歷間。由官開採。並有鍊廠二所。舊址尙存。清季有土人。將鑛苗隨取隨售。因無具體辦法。缺乏資本。仍不能發展。其未經探採之鑛。六都十三都十九都。共有八處。

第四十一篇 金華縣

考金華。古屬會稽郡烏傷縣地。吳置東陽郡治。隋改金華縣。明改金華府治。清因之。民國廢府制隸省。疆域。東至義烏縣界航慈溪。南至武義縣界焦巖狀石。西至蘭谿縣界柵頭。北至蘭谿縣界盤前。東南至武義縣界石龍頭。東北至浦江縣界太陽嶺。西南至湯溪縣界白龍橋。西北至蘭谿縣界九龍。東西距九十三里。南北距六十八里。從前自治區域。計分九區。今

仍其舊。面積五千七百里。田地山蕩共七十三萬九百二十二畝零。全境有戶五萬零五百八十六。有丁十三萬三千三百七十二人。有口十萬一千六百六十二人。農業約佔十分之八。商業約佔二十分之一。工業約佔三十分之一。

河港有二。一東港。源發東陽大盆山。經義烏由低田入縣界。二南港。源出縉雲大姥山。北流永康。經武義西北。入縣界之焦巖灘。兩港至縣城通遠門外合流。西趨至蘭谿。會衢水入桐江。四鄉農家。每於溪流湍激之處。安設春具。利用水力。以代人工。名曰水碓。

山脈有三。曰北山。曰南山。曰東山。北山正幹。自東陽大盆山來。由義烏入縣界。東山自縉永交界之洪茂嶺來。經義烏入縣界。南山自宣平太陰山。經武義入縣界。

地勢。東高西低。其最高處與最低處。比較約計差一千米達之譜。

環山而居。中夾溪流。氣候適中。夏季熱度。最高九十度以上。冬寒在三
十度左右。春秋兩季。不熱不寒。當春夏之交。有大風自西北方來。年或
一次。或二三次。秋霜不宜太早。霜降後十日無霜。始能保全雜糧。播種
百穀。均在夏令。故夏季多雨。可望有收。但河流狹小。一經久雨。則溪
水溢出。兩岸田禾。易遭淹沒。雪則宜冬而不宜春。冬多雪則兆來年豐收
。春多雪則應本年大水。農民以此卜歲收之豐歉。

土壤。約分三種。近南一帶。地極廣袤。但土帶砂性。故名砂土。人民佈
種早晚各種禾稻。歲收不甚豐盈。此項田地。約佔十分之五。近北沿山一
帶。尚稱肥沃。一年再收。論土性以此項爲高。約佔十分之三。中間溪流
。兩岸均屬砂土。形似瘠薄。但農民能用肥料佈種。則收成甚豐。而且一
年再收。或有至三收者。

白沙溪。發源湯邑。流入境內。築堰三十六處。灌田萬有餘畝。其他如湖

海塘。東瀾塘。東藕塘。周圍大則十餘里。小亦五六里。灌田多則五六千石。少亦一二千石。其水冬春二時蓄之。夏秋二時用之。並無潰決淤塞之患。

農事。南北兩帶田禾。恃山水爲灌溉。農工較逸。中帶田禾。恃人力車戽。農工較勞。每屆冬令。農事完畢。放水之處。築塍脩堰。戽水之處。開泉掘井。爲普通農工。至農具。墾具皆沿舊式。蠶事皆略而不講。卽間有種桑育蠶者。亦拘守舊法。漁具甚少。因溪流狹小。亦無魚利可言。畜牧。則隨意餵養牛羊鷄犬而已。

農產物。有粳穀糯穀大麥小麥大豆青豆粟等類。數量價日。則視歲收之豐歉。本邑以產穀爲大宗。豐收一年。足資三年之食。卽遇災荒。亦無慮不敷。所患商人運輪出境。爲數過多。則青黃不接之時。不免恐慌耳。田產。一田分爲兩層。完糧收租者爲大買。耕種付租者爲小買。大小兩買

爲一人所有。則曰清田。害稼之蟲。惟蝗爲甚。近年尙無蝗蟲。惟雨水最多之年。每有青蟲叢集稻田。吸稻精液。禾遂枯槁。驅除之法。夜間用草堆燒。青蟲見火卽撲。因而燒死。頗有效驗。團體。舊有縣農會暨農業學校。

地屬山鄉。民俗樸厚。各項工業。大率拘守舊式。惟現在習藝所。新發明綢地脫胎退光彩畫花瓶茶杯茶碟並各種漆器。及雕嵌竹木各種美術。又就本地黏土。以新式製成各種漆砂花瓶茶壺等物。款式精良。行銷甚廣。可稱出色。普通者。木器如桌椅床檯櫃箱架几桶。竹器如篋籃篲箕畚挈籬筐。藤器如床檯椅几。鐵器如犁鋤耖耙火鋸刀鍋鎖釘剪。金銀器如項圈手鐲釵環簪挖。棕器如床篷簑衣繩索。其他如簾蓆雨傘雨靴毛筆等物。至外來者。如綢緞及中西各種布疋。皆應有盡有。

各種工業。有受僱於鋪戶者。有受僱於住戶者。隨時按工僱用。計工給價

。並無何種手續。亦無何種待遇方法。普通藝徒。大率三年爲滿。學成後。自營生計。對於藝師。亦無何種關係。

商業。因僻處上游。交通不便。市上銀根奇緊。周轉不靈。營業狀況。未免減色。在城以西市一帶。爲商務稍盛之區。其次則通遠門外馬頭地方。又其次則在四牌坊。至於四鄉。東有孝順低田傅村鞋塘曹宅塘下。南有雅畝澧浦街橫店等處。西北兩鄉。村段零落。並無市鎮。入境貨。以食鹽布疋綢緞南貨藥材洋廣雜貨爲大宗。出境貨。以穀米茶腿桐油爲大宗。至經過或行銷於下江。以穀米火腿南棗茶葉靛青爲大宗。或行銷於上江。以食鹽布疋南貨藥材洋廣等貨爲大宗。以上各商。徽州紹興居半數。福建江西甯波次之。東陽義烏居十分之一五。本地人居十分之二。

商人販運。由水道來者。上游經義烏永康武義三邑。下游經蘭谿。由陸路來者。經浦江湯溪。其運價分水陸兩種。水道以船裝運。視水之漲落。定

價之高低。陸路以脚夫抬挑。視道路遠近核計。大抵往上游水道淺狹。多用竹筏。往下游水道稍寬。多用船裝。市面錢幣。現洋小角銅元制錢均流通。商業上往來賬款。分端午中秋年終三節收繳。僱用夥友。均在正月初三日起至元宵日止。名曰講生意。合則留。不合則去。市面所用之秤。約分三種。一曰曹平。以十六兩爲觔。二曰米秤。以十四兩九錢爲觔。三曰廣秤。以十五兩八錢爲觔。間或有十八兩二十兩爲一觔者。在鄉則然。在城則否。至於交換。以有易無。兩相交換。均以時值之高低爲準。代辦貨物。概由水客。而主僱亦由水客認定。語言除本地外。大概以徽紹口音居多。福建甯波次之。

第四十二篇 蘭谿縣

考蘭谿後漢置長山縣。隋改爲金華縣地。唐置蘭谿縣。元升州。明復爲縣。隸金華府。清因之。民國廢府制隸省。疆域。東界金華竹馬館。南界湯

溪赤井橋。西南界龍游游埠。西界壽昌檀村。西北界建德白雁岐。東北界浦江橫木。從前自治區劃。分城區。及東鄉之板橋。南鄉之從善。西鄉之游埠水亭諸葛上河西地永昌上戴溪西中河西地平渡殿山甘溪下河西地。北鄉之巖山香溪嵩山。共爲十五區。民國改上戴爲桂陽。餘皆因之。面積六千三百平方里。田地山蕩約占十分之七。全境有戶五萬零九百二十。有丁十三萬三千七十二人。有口十一萬零七百七十六人。農業約佔十分之六。工商業約各佔十分之一。

河流。蘭谿有二源。一婺港。自金峯臨江入界。西北流。納黃烟溪雙溪沙溪諸水。經曹家埠後。有洞溪古溪楊溪入之。一衢港。自龍游湖鎮入界。東北流。游埠溪自西來注。經石峯灘。會永昌溪。又東北受清湖湖瀝壩之水。與婺港匯合於蘭陰山下。如縠紋。又名灑水。逮二港既會。北納沙溪虎溪乾溪香溪大梅溪。至建德合於新安江。

山脈。自金華入邑界。突起高峯。名玉壺山。爲金蘭兩縣治之祖山。西南爲金盆山。又西爲大雲山。延袤數里。是爲蘭陰。山多蘭故名。南自湯溪大巖迤邐而來。至南住山截然而止。西則支脉南北分行。山谷深繞。北爲售峯山。山東南屬浦江。北與建德界也。

地勢。以平斜論。東南西三鄉較爲平坦。北鄉爲斜。因其多山也。以高低論。西鄉之接近龍游者爲高。接近建德者爲低。東南鄉幅幘甚隘。上與金華湯溪接壤。亦在較高之列。以險要論。游埠爲上河西之衝。永昌爲中河西之衝。厚仁市爲下河西之衝。北鄉與建德交界處。其隘有二。一將軍巖。一青團嶺。建瓴高據。勢在石渠。內倚梅溪爲池。外可四顧。東通浦江。如嵩山盤山兩處。有險天成。最爲扼要。

氣候。較省城稍溫。準華氏寒暑表。最高溫度九十度。最低三十度。因氣候溫和。發育較速。是以民間種作。以早中兩稻爲最多。風霜雪無甚關係。

。惟遇連日霪雨。則溪必陡漲。若半月不雨。則又需水孔殷。

土壤。分砂土礫土壤土三種。砂礫土約各占十分之二。壤土約占十分之六。砂礫土瘠而粗。宜種雜糧。壤土肥而精。宜種穀麥。

地居上游。高田易旱。低田易潦。故水利以堰壩爲最要。如相山堰仙洞堰毛仁堰新溪堰觀鳥堰雙溪堰深陂堰湖瀝壩坑塘壩等。均歷經灌溉田畝。

農民耕耘。關於辨土選種除害等。均用舊法。農具中。墾具如犁鋤鐵鎬耙鎌草刀等。蠶具如蠶箔蠶架蠶網繅絲車烘繭籠桑篋曾籃桑剪等。上江蠶業。向不興盛。近年由官廳提倡。稍有進步。然一般人民心理。對於養蠶栽桑等。觀念尙弱。漁具如大網小網排釣等。皆產自本地。價目極廉。

官荒民荒。約在萬畝以上。苗圃及模範森林各設一處。生活力尙強。至植茶多沿用舊法。出產無多。

水產有鱗介而無苔藻。其最著者。如鯖魚鮠魚鱖魚鯉魚鯽魚白魚蟹鱉蝦鱉

等類。養殖聽其自然。捕獲多用網釣。均以鮮物臨時供人需要。至畜牧並無專營之人。保護方法。亦多未備。

農產物。穀麥種類。有早稻穀中稻穀見霜青稷稻大麥小麥莠麥油麻等。菓品種類。有柿西瓜香瓜荸薺蓮子南棗花生瓜子桃梅等。蔬菜種類。有冬瓜金瓜絲瓜黃瓜青菜芥菜白菜莧菜落湯青筍辣椒芋等。豆菽種類。有大豆青豆扎豆黃豆六月白菜豆佛豆莞豆飯豆及其他棕芋蕪等。以上各物。除供本地食用外。有餘則運往鄰邑銷售。民食不患不足。卽遇歉收之年。亦尙能自給。

田有民田客田二種。承糧管業者。謂之民田。又名大皮。世襲佃種者。謂之客田。又名小皮。民客皆爲一人所有者。謂之清田。清田以二畝半爲一石。每田一石。交租穀五百觔。或四百三百二百觔者亦有之。遇荒歉之歲。亦有交租不敷納糧者。通常計算。約以四百觔爲率。半歸民田。半歸客

田。至遇水旱蟲害。向無特別驅除預防方法。是亦農業上一大缺點。團體。舊有縣農會及各鄉分農會。

工作物。惟木工較勝。如桶器等尙稱出色。次之如醬油靛青麻油菜油桐油。桐油青油黃酒燒酒高粱酒藥酒白酒水旱菸麥粉絲線絲帶愛國布土布洋襪毛巾生熟漆黃白蠟軋油紙粗製紙牛革石灰陶瓷金銀製器銅錫鐵製器梳篦音樂器雨傘扇子錫箔燧炮石製器等。名目繁多。難以盡述。

僱傭工人。有長工短工之別。長傭以年計。短傭以月計。待遇係平等。素無上下級之分。平日除供給飲食。付給辛資外。別無何等優待。師弟授受。在學業未成以前。頗有密切關係。一俟學成。則各自謀生。工廠。有協隆火柴板片廠。

地爲七省通衢。商業最盛。輪路既通。商販改道。差幸地處衢嚴兩府之中。皖贛閩各省與浙接壤處所。又以取道蘭谿爲便。尙不致有一落千丈之勢。

。市鎮。如東鄉之板橋。南鄉之萬壇。西鄉之游埠水亭上戴厚仁市溪西永昌女埠甘溪殿山。北鄉之大塘洲上。皆頗著名。入境貨。如江西之夏布磁器。福建之菸葉。徽州之生漆。川廣之藥材。紹興義烏之黃酒。皆爲大宗。出境貨。以米穀猪隻火腿爲大宗。至經過如金華龍游之米穀。龍游之竹木。東陽義烏浦江之火腿。義烏之南棗。金衢處各屬之靛青。皆爲大宗。以上各商。徽州嘉興寧波義烏人爲最多。

商人販運。約分四路。經衢縣常山赴贛爲一路。經衢縣江山赴閩爲一路。經建德淳安赴皖爲一路。經建德桐廬富陽赴杭爲一路。運脚有肩運船運之別。肩運較貴。船運較輕。其運輸以水路爲便。

商人交易。通常稱之曰買賣。向無交換名目。代辦惟各業水客。亦無主顧名稱。言語悉操普通口音。團體。城區設有縣商會及永昌鎮諸葛鎮游埠鎮各商會。

第四十三篇 東陽縣

考東陽秦烏傷諸暨縣地。後漢分置吳甯縣。吳屬東陽郡。隋廢。唐析義烏。置東陽縣。宋以後。郡名廢。縣名不廢。疆域。東至天台界梅枝嶺。西至義烏界下岷溪。南至永康界界牌。北至諸暨界顏家坂。東南至天台界烏寨。西南至義烏界下墅。東北至畹縣界白峯。西北至義烏界蒲塘。東西廣一百七十二里。南北袤一百二十八里。從前自治區域。連同城區。共十四區。近城區西爲西部鄉。北爲甘泉鄉。東爲昇蘇孝德鄉。又東爲甯壽鎮玉山鄉。近城區東北爲斯孝鄉。此東北鄉之區域也。由縣治南山之南。偏西爲懷陋鄉。南爲仁壽鄉興賢鄉。東南爲孝順鄉乘驄鄉。居孝順乘驄之東南爲瑞山鄉。此東南鄉之區域也。

面積七千二百五十二方里。田佔五千五百零七頃二十餘畝。地佔一千九百七十九頃二十餘畝。山佔三千三百七十五頃六十餘畝。蕩佔四百六十八頃

五十餘畝。統計田地山蕩一萬一千五百餘頃。全境有戶十一萬五千六百十六。有丁二十五萬三千六百九十八人。有口二十一萬二千零四人。內農業約得十分之六。工業約得十分之三。商業約得十分之一。

河流。分兩大部。東陽江爲浙三源之一。源出大盆山。此北流也。畫溪之源。亦爲大盆山所出。此南流也。北流長而南流短。北流南自大盆山東北上路礪嶺發源。北五里至銅錢板礮。再行四十五里。至金鵝山。有長坑水。自西南來會。再行五里。至雙溪庵。會東坑水。再行三十八里。有十指巖水。自東南來會。行至一里許。至夏溪。折而西流七里半至桃園。有仙門水。自長衢來會。再折而北行五里許爲歌山溪。折而西二十七里至窠盧。有界嵯縣之白溪。從東北來會。行至二十三里。至縣治北。再行十八里。有岷溪。自西南來會。入義烏縣界。至洋灘雙港口。有南流之畫溪入焉。畫溪從大盆山。經安文西南。至湖溪轉南。經橫店。向西行至南馬。與

櫟溪會。至安田王田畷與橫溪會。又西北至逍遙山。北過橫壩頭。西至義烏縣界。與北流之東陽相會。至於南流北流兩大部外。有發源東陽。而流於嵯縣者。則爲夾溪。有發源於永康。流入東陽之殿下東湖防軍。再西過南馬而至王田畷。匯入南流之畫溪。此河流之大概也。

河流所發源。卽山脉所自祖。東陽起祖於大盆山。中條西行。由墨嶺過東坑史姆二嶺。至寶英山又折而西。由官清諸嶺。過高城官山。至西部鄉之三邱山。距縣治南八里許。自大盆山至此。有百餘里。此中條也。若北條北行。再折而西。其最著者爲東白山。自東北山西行二十餘里。有烏竹嶺鷲鷲嶺。又蜿蜒而西。爲鬥鷄巖北高尖澤清尖靈巖山。入義烏縣界。此北條也。南條迤南而西。其最著者爲禹山。其次爲屏山。此山脉之大也概。至論水力。非遇洪水。不通舟楫。其堪爲工業上所利用者。水磨水確而已。

地勢。如瑞山鄉玉山鄉孝順鄉。均欹斜而鮮有平地。至斯孝興賢乘聰甘泉諸鄉。其地勢斜平各半。若懷德仁壽昇蘇西部孝德諸鄉。則甚平矣。地勢之高。南方爲最。東方次之。北方則漸低。而西方尤低。險要之處。如玉山鄉之夾溪。爲天台出入咽喉。嶺口爲玉山之門戶。白峯嶺界嵯縣。前清常設汛於溪口。以資防守。此東方之險要也。又如興賢鄉有大路。更爲縉雲入東陽孔道。東巖嶺爲永康入東陽通衢。此外如瑞山鄉之大盆山。以安文鎮爲管鑰。此南方之險要也。

氣候。據華氏表。溫度最高九十八度。最低三十四度。三七月間。歷有颶風。挾冰雹。損傷種植物。幸爲偏災。不至害及全境。

土壤。平陽一帶。較沿山各處。稍爲精肥。所占成數。肥精占十成之三。瘠粗占十成之七。種植物。惟水稻苞蘿豆麥粟爲宜。

邑無溝渠名目。所恃灌注田畝者。惟咧堰。如十三都三源咧。灌漑四五兩

堡田畝。三十五都萬工堰。水一開放。日夜不竭。他如牛車咧。長五里。灌注繭頭畝上十八都五十九都。山塘堰。灌注數里。二十二都櫻桐咧。長七里。灌注九十畝。二都江車堰。今移築於虞店擇樹脚。每日可灌田五六十畝。

農民生活。耕作爲要。耕田用犁。必須牛力。先耕後耙。由粗入精。水田另用鐵鈔。惟水泥帶滯。不易精細。故耕後用耙。耙後用鈔。求其精細。始行放種。種後。用鐵鋤耘耨二次。若燥田則一耕一耙。卽開畦種植。再以鋤頭耘耨二次。至農具。蠶具用竹篾編成圓籬。再用小木構成三脚木架。一架可層疊數十篇。墾具用犁耙鈔及嘴鋤鐵爪鋤頭等。漁具網筴爲多。均係舊式。

蠶桑。歷來不甚發達。近年稍見興盛。惟採種之法。近始研究向別處購辦。販賣法。有賣繭者。有賣絲者。賣繭由繭商到門收買。賣絲由賣主赴收。

買處。論價出售。人民對於養蠶栽桑。漸知注意新法。

荒山甚多。清光緒間。人民有遵照墾荒條例向官廳承墾者。民國初。亦有照登記條例向官廳承墾者。先後約計五百餘畝。模範森林三處。栽植完好。植茶方法。採子放種。取秧栽植。近年頗有進步。以東北近山一帶爲多。農產物。以稻穀大小麥苞蘿粟豆爲主要。其不足之民食。向由蘭義永三邑接濟。

田戶舊章。本向業主佃種。如不合宜。應卽退還業主。近來佃戶有與佃戶私相佃頂情事。此種惡習。已由官廳革禁。

工業。本有習藝所。其所出之退光漆箸。退光牙花桌椅床廚車木櫬椅篾籠火籠等物。及新華布廠所織之提花愛國布時花線毯各種柳條布各種格子布紡綢斜紋加闊湖縐。均爲出色之品。惜習藝所近已停頓。新華廠亦停閉。

現惟千祥鎮之櫻心扇尙佳。又有碗廠三處。出品不佳。多係私人經營。大半虧折。又有肥皂廠毛巾廠及洋襪廠一。均以私人之資。獨自經營。規模甚小。以女工爲多。

僱用工人。有面訂全年或數月不等。至待遇方法。有供膳包膳之分。學徒從師規約。有以三年爲期者。有以二年爲期者。

地屬山鄉。水道梗塞。陸運維艱。以致商貨出入。阻滯不靈。如將來能籌集鉅款。將溪江開濬。兩岸固以隄防。俾各貨流通。衆商停泊。當必可望發達也。市鎮。有上廬六碌口李宅吳良白坦巍山菱頭郭宅安文千祥防軍橫店湖溪王田畝王壩豆南馬等處。入境貨。以田料穀米爲大宗。出境貨。以茶葉火腿南棗及藥材中之延胡白朮芍藥爲大宗。內除延胡白朮本境銷售外。茶腿南棗。均赴杭滬寧波硤石銷售。商人均本地人爲之。

商販陸路。北至諸暨。東達嵎縣。南臨天台仙居縉雲永康諸縣。西通義烏

水道亦由義邑達金蘭兩縣。但稍晴則涸。僅通竹筏而已。各貨出入。肩挑者多。市面錢幣。行情時有漲落。商業習慣。在城每月以二五八爲市日。在鄉每月或一四七三六九爲市日。其買賣均以現錢交易。鄉僻間之小店。或以穀麥豆粟交換店貨者有之。所進店貨。向由杭省發兌。包解諸暨。再由本店自僱挑夫。肩運到東。並無大批主顧。言語均操土音。

鑛業。其歷經探採之鑛。毛鐵碗泥碗墨三種。鐵鑛所在皆有。碗泥產於孝德區毗連之上盧莊。碗墨產於永壽區大同山背之地。未經探採之鑛。南鄉之八面山。有指爲含有鉄金銀銅鑛者。安田畝。有指爲含有煤鑛者。東永毗連之烏巖洞。有指爲含有金鑛者。但均未經鑛師勘明。至可爲玻璃之紫石英。絕無採用者。在城南五十里之蟾山。亦有石英發現。

第四十四篇 義烏縣

考義烏。秦時以顏孝子烏名烏傷縣。唐武德時。別立稠州。置烏孝華川二

縣。尋廢。改名義烏。隸婺州。宋元皆因之。明清屬金華府。民國廢府制隸省。疆域。東至下岷溪東陽縣界。西至航慈溪金華縣界。南至察嶺永康縣界。北至石斛橋浦江縣界。從前自治區域。分城區及稠南稠西稠東龍祈永甯寺前七區。龍祈永甯寺前三區屬北鄉。面積三千三百六十方里。其田地山蕩約有九十餘萬畝。全境有戶六萬三千三百八十。有丁一十六萬六千七百六十人。有口一十二萬七千三百三十九人。內業農者七萬九千人。業工者三萬人。業商者五千人。

河道。均屬細流。邑西諸溪。皆合東陽水抵郡城。其深溪演溪。則東入浦江出諸暨。繡川湖在城西。週迴九里。水利所關。蜀墅塘。在二十五都。尤巨浸也。山脉則起伏靡常。其水力有堪爲工業上利用者。祇有附近溪流村莊。築堤引水。建碓舂米而已。

地勢。全境斜長。惟東稍高。西南略低。險要。如東北之善坑。南之挂紙

查嶺等處。足資防衛。其道途平坦。或水陸交通。有與商務相關係者。則有佛堂廿三里蘇溪等各市鎮。

氣候。溫度最高時。在華氏九十四度。最低二十四度。霜雪不甚大。惟大風則時傷禾稼。久雨則淹沒種作。水旱偏災。亦常有之。

土質有三。曰雜土。曰沙土。曰膠土。沙土膠土。粗而且瘠。雜土則肥而精。沙土膠土。各佔十分之三。雜土佔十分之四。分配種植禾稻大小麥荳粟棉花落花生甘蔗等物。水田每年種植禾稻荳麥。循環收穫。有二三次。田塍山麓。栽種棗梨石榴。尤爲大宗出產果品。

灌溉田畝之溪塘圳瀆。多係天然形勢。並非人力鑿成。間或有之。亦非鉅工。故無水利之可言。

耕作。耕則全賴牛力。耘則純用人力。水田先犁後耨。務使細膩稠濁。再插秧苗。燥土則先犁後耨。加以鋤工。卽行種植。惟極膠之土。秋冬之交

。先行鋤掘。因土質堅硬。塊坯甚粗。必待冬凍。始能化精。以便種植。農具。耕田器具。犁耙耨等。耘草器具。圈耙翻耙。開掘用鐵鋤。一曰長角板鋤。二曰齒鋤。收割用鈔鎌。車水器具。則視地形之高下。定長短之差度。故水車之式。有自七尺至二十九尺之不同。車水之人。亦有二人至九人之不等。收穫脫穀器具。用稻桶。均係舊式。至養蠶。用竹製蠶篩。或製一蠶架。架有九層。可儲九篩。或用篾簞。鋪置樓上。近來均有進步。惟東北較盛。採種栽養方法。悉仿用杭省模範新法。

荒地墾復居多。至苗圃一所。成立已久。現正從事擴充。將來苗木滋生。苗種分布益廣。農民可得較多利益。模範森林。尙須設法整頓。其由人民團體組織之林業公會造林場。有稠南鄉二十三都孔村之稠南鄉林業公會。又江南之江南林業公會。胡演楊樹灣之培養林業公會。下西陶之龍縉農林公會。大陳之龍溪林業公會。普濟寺之普濟林業公會。培磊區之培磊林業

公會。創辦五六年或十年不等。大都蔚然可觀。

水產物均在池塘。所有種類。惟魚菱藕而已。

畜牧。以豬爲大宗。牛羊次之。皆係農家兼業。無專營者。

農產物。穀爲大宗。大小麥次之。荳粟又次之。年歲豐稔。食固有餘。卽稍歉收。若非販運出境。猶可自支。

佃田習慣。絕賣留種者。名曰客田。絕賣退種。由受主轉租於人者。名曰租田。其業主收租。或穀或錢不等。至驅除蟲病方法。均治以石灰。團體。舊有各農會及乙種農業學校一所。現已取銷。縣農民協會籌備處。曾經組織。嗣以人選問題。飭令停止。村農民協會。約有三四處。亦經組織而未成立。至佃業理事局。所以解決佃業糾紛。

工業。大抵以本地產出之原料。加以人工之製造。作業雖勤。因思想薄弱。不肯運以匠心。別翻花樣。故各項工作物。無出色之品。普通者。陶則

泥土細潔。質厚性堅。如雙開礦磚。篋磚。瓦片等。石則雕文刻鏤。顏色精緻。如石柱。石磬。石坊。石鼓。石牌等。皮則施用咸宜。樸實耐久。如皮靴。皮鞋。皮箱。皮椅。皮袋。皮帶等。其次則爲木與銅鐵。木如各式花床。木棺。棹。椅。櫃。几。桶等。鐵如鐵釘。鐵鎚。銅如銅罐。銅壺。銅五事。銅鎖。銅水鎗。銅面盆。以上均就其用途最廣者言之。至外來者甚夥。如槍彈。鉛筆。粉筆。圖畫儀器。石版。石硯及眼鏡。時計表。寒暑表。機紗顏料。各種機器。

僱傭手續。屬於口頭契約者有之。屬於書面契約者亦有之。待遇方法。就平民習藝所言之。可分爲二級。一待遇技師。每月致送薪脩。優者並給以輿馬等費。一待遇藝徒。每月給以膳費。成績優者。亦給以獎勵金。工廠。除縣立平民習藝所外。另有城內之大綸物華。蓉記。通成等襪廠。佛堂之華聚襪廠。江灣之振華廠等。

商業盛衰。視年歲之豐歉爲斷。清光緒初至宣統末年。歲屢豐。商業頗盛。

。光復後。經濟困難。荒旱頻仍。商業頗見清淡。加之土匪騷擾。佛堂一區。頓形衰滅。近來年歲豐稔。銀根活動。商業漸有起色矣。

市鎮。東鄉有廿三里鎮花溪市尙經市下駱宅市里塘市何宅市。南鄉有佛堂鎮江灣市赤岸市毛店市培磊市雅墅街市。西鄉有上溪鎮吳店市義亭市畝田朱市低田市夏演市(卽下沿)東河市。北鄉有蘇溪鎮楂林市大陳市下殿市胡門市寺前市曹村市柳村市。共計二十七處。入境貨。以官鹽京貨南貨藥材白糖田料冥洋鈔蜡油爲大宗。出境貨。有火腿南棗毛猪醃肉蠶絲蜜糖黃蠟白蠟皮油靛青等。此外米穀亦有出境者。

商販道路有三。一赴甯波旱道。由邑之東鄉。過東陽等處。二赴蘇杭上海大江水路。由邑之南鄉。過金華蘭谿等處。三赴臨紹小江水路。由邑之北鄉。過諸暨等處。運費擔脚較重。水脚較輕。市面錢幣。大洋銀角銅元。漲落不一。

買賣貨物。多以錢幣直接交換。間有由脚友代辦貨物者。其輔助商。有城內之裕源錢莊。佛堂之裕盛源昌等錢莊。資本不滿萬元。利率存息。不過一分。放息高至二分。均係合資股份。

鑛業。前經探採者。縣屬北鄉十三都地方之煤鑛。在清咸豐間。因洪楊兵燹時廢止。又南鄉八保山之金類鑛。在明嘉靖間。因隣邑奸商。盜採擾亂。歷年封閉。近年來南鄉塔下莊之老虎洞滴水巖。又陶斯莊裏側山羅漢塘以及東鄉之青巖傅牛腳跡巖坑山等處。由人民先後領照。開採弗石。運銷滬上。年計二千餘噸。每噸價值十五元。總額在三萬金左右。此項弗石。土人謂之綠石。其效用有三。一製造弗酸。二供各金屬之鎔料。三製七寶料。開採純以古法。用火藥並石匠土工。

第四十五篇 永康縣

考永康。三國時吳分烏傷縣上浦鄉地爲永康縣。屬會稽郡。寶鼎初改屬東

陽郡。唐改置縉雲縣。兼置麗州。旋廢州。復名永康縣。至今仍之。疆域。東北界仙居天台東陽。東南界仙居。南界縉雲。西南界縉雲武義。西界武義。西北界武義義烏。北界義烏。南北相距約百里。東西相距約二百六十五里。從前自治區域。分爲十區。面積三千九百三十四方里。田佔百分之二十。地佔百分之十。山佔百分之六十九。蕩佔百分之一。全境有戶六萬四千七百二十五。有丁十四萬五千一百七十一人。有口十一萬九千四百六十六人。其中業農者約居十分之六。業工者約居十分之二。業商者約居十分之一。

河流。分南北二源。北源名華溪。出縣治北三十八里泮石莊之密浦山。東流至橋下莊。折向西南至縣治東五里後曹橋地方。而蘇溪自北來會。西行至縣治南而南源入焉。南源名南溪。出縉雲縣治西南菱青山。北流至縣治東南十八里裏溪莊而東溪合焉。又西北流至縣治與華溪合。西南流五里至

李店莊。而高坑溪自南來會。西流十五里至椽琴莊入武義境。其在縣治東部。而下流入於鄰縣者。有上本桐及靈溪。以八盆嶺爲分水嶺。皆南流入縉雲。錫坑源潭二溪。以石霞嶺爲分水嶺。皆北流入東陽。擇溪亦發源石霞嶺。東南流入仙居界。至山脈自仙霞而東。至縉雲武義永康交界處爲馬嶺。東行至界牌莊。南爲桃花嶺。折東北至新樓莊爲百疊嶺。北行爲方山華釜山。至四路口莊折而西行。爲五指巖三峯山白窰嶺八素山以入武義。其自四路口莊分支東南行者爲八蟠嶺。東行爲石霞嶺。東北入東陽爲大盤山。東南入仙居界爲八堡山。

地勢。約分東西兩區。西區爲義和游仙德武平義豐長安昇平太平承訓九鄉。東南北三面皆高。而縣治至桐琴間。地勢較低。其最平坦者爲華溪。自世雅莊以下及南溪。自裏溪莊以下。東區以北之盤山爲最高。左達馬紫。右接百丈。南連八堡。萬山重疊。極少平地。全境險要處。在縣治南爲館

頭舟山。西南爲商坑口。正西爲桐琴。西北爲楊公與楓坑。北爲峽源坑長厚坑四路口。東南爲擇溪村八盤嶺。皆往來孔道。兵事之要衝也。

氣候。溫度最高時。約達華氏表百度。最低時零度下三四度。溫度過高或過低時。於農作物每有凍死或燥死之患。霜雪下降太早。則更有害於麥類菜類之生長。如遇過大之暴風烈雨時。常有震坍房舍。倒拔樹木之患。

土壤之肥瘠精粗。約各佔半數。均宜於穀類及普通蔬菜。惟收穫之分量。則肥精者多而瘠粗者少。改良土壤。有用堆肥厩肥諸法。而沙土之地。每用塘泥。

塘堰爲水利之所在。塘以瀦水。堰以節出。塘之水大者數十畝。小則一二畝不等。堰則高卑廣狹。悉有定制。閉塞之則水下流得沾灌溉。決潰之則上流立涸。山水暴漲之時。商人販木順流而下。每致毀壞。故歷屆農月。

禁止放運。防衝潰也。全境塘約有一百三十七。堰約有七十六。

農事耕耘精粗。尙稱適中。農具。墾用鏈與鋤。漁用網。均屬舊式。價值亦廉。惟養蠶試驗場。略有新式器具。然數亦甚少。桑秧均由杭嘉湖購運種植。民間向不種植。亦不注意。創辦模範桑園後。民人始知栽桑之重要。然因無販賣桑葉之方法。故育蠶尙不發達。間有繅絲。均售於本邑絲線店。或製爲衣料。然數亦寥寥。

官荒甚少。民荒以昇平鄉爲最多。模範森林。官有僅西津橋一處。民有有黃岡莊柳墅莊西溪莊庫以莊四處。植茶方法。每於春間下種。隔四尺植一株。

魚類種子。每從他邑輸入。其養殖場所。均在池蕩。捕獲方法。或用網。或用鈎餌。所產之數。僅供民食。畜牧書則放於牧野。任其自食草料。晚間驅回。猪則皆畜於家內。

農產物。主要種類。如粳米糯米大麥小麥大豆小豆棉花茶葉藥材等。普通種類。如黍玉蜀黍高粱落花生芋馬鈴薯蘿蔔等。民食。豐年尙能足食。倘遇荒歉。卽虞不足。田主與佃戶之所得量。通常約爲六與四之比。均於秋收後交付。間有佃戶對於田主不納穀而納銀者。每畝約三四元之譜。惟須於未播種前交納。稻類發生蟲害。則施桐油於水中。以人工撲滅之。無特別驅除之方法。惟儲藏及採擇種子。尙見研究耳。團體。舊有縣農會一處。現已改爲農民協會。

商業。自清同光間至今。約分三時期。前十餘年。甫經兵燹。元氣未復。爲商業衰落時期。中二十餘年。民力稍蘇。爲商業萌芽時期。近二十餘年。營業漸衆。爲商業擴充時期。市鎮。除城區外。鄉間有桐琴芝英古山唐先象珠四路口等處。共計大小舖戶百餘家。入境貨。以洋布洋紗爲大宗。洋油白糖次之。出境貨。有元胡芍藥。食物則醃腿一項較多。至經過者。

則有由蘭谿運台之毛六紙及夏布。由台處運蘭之桂圓及菘筍等。商販。上至溫台處爲陸路。多山嶺。止有肩販。下至金蘭爲水道。然易於乾涸。通船日少。竹筏爲多。至運價。水路由蘭至永較輕。陸路由處至永較貴。市面錢幣。銀元銀角銅元。均隨時漲落。團體。現有商民協會。

第四十六篇 武義縣

考武義本烏傷永康地。唐析永康之東西偏置武義縣。屬婺州東陽郡。宋因之。元屬婺州路。明清屬金華府。民國廢府制隸省。疆域。東至永康楊公橋界。南至縉雲小窰嶺界。西至金華長山界。北至金華梅公山界。西南至宣平后陶界。又至麗水應和界。東北至金華石龍頭界。西北至金華焦溪界。東南至永康桐琴界。東西廣七十里。南北袤六十里。從前自治區域。分城區東區大南區小南區西區北區。共計六區。面積二千六百三十五方里。山約佔十分之四。田地塘約佔十分之六。全境有戶二萬三千。有丁五萬零

四百一十人。有口四萬零一百人。業農者十之七。工商業甚少。

地處山鄉。並無河道。一線溪流。環繞城南者曰熟溪。東南流至距城五里許。永康港自南來會曰白溪。爲全邑之總流。其餘支分脈絡。悉係小溪。平時僅可散放竹木。或竹簰小船。遇雨則溪水暴漲。亦能通舟。直達金蘭。西上可達縣城。南上可達永康。間有藉築水碓舂米。造水槽製紙。然晴久卽涸。並無經常水力。堪爲工業上利用者。

山脉。萬山之中。層巒疊嶂。聯綴全境。西南由括蒼山脉迤邐而來。城西附郭有山曰壺山。爲一邑主山。其與地方有歷史關係者。城內有書台山。爲唐宰相舒元興讀書處。東有蠟屐山。爲晉阮孚棲隱之所。明招山爲宋時朱呂講學之地。其最著也。

地勢。西南多山故高。層級而下。漸趨漸平。隨處皆成原野。與金華永康谿山相綴屬。間道走溫處。下達嚴灘。西南距括蒼僅百餘里。括有警。武

必當之。西南之稽較嶺龍門嶺。爲甌括孔道。實險要也。

氣候。溫度最高約在攝氏六十五度。最低約在二十度。風霜於農業無特殊利害。惟地處山鄉。久雨則潦。久晴則旱。

土質。肥精者約佔十成之七。種植以早中晚稻大小麥豆黍等。最爲相宜。各鄉農田。全賴蓄水池塘。障水壩堰。東八莊洋泉壩。約溉田一萬餘畝。南十二莊七百壩。約溉田二千餘畝。南十莊黃心塘。約溉田二萬餘畝。西十三莊官壩。約溉田五萬餘畝。

農事尙屬精細。其整地方法。皆用牛力。先用犁。後用耙。以耙之多少。分土之粗細。其下種分耘除草收穫等事。皆用人力。農具用犁耙鋤頭苗刀板車等類。均屬舊式。價值甚廉。蠶桑本非素習。民國四五年間。由縣署竭力提倡。全邑蠶業。頗有蒸蒸日上之勢。惟本邑種田時期。與育蠶時期。適相衝突。育蠶之家。又往往因飼育不得其法。多致虧折。當年提倡種

桑之人。轉覺無利可圖。每將已成林者。大施斬伐。改種他項農作物。近年以來。蠶業不特無進步可言。且日形退化矣。

官民荒地。均屬零星。共計約有數百畝。民荒勸令造林。官荒准人民照森林條例承墾。東門外白溪口地方。創設模範森林及苗圃各一處。計官荒一百五十餘畝。種植杉柏松桑等樹秧。計一萬數千株。至植茶均在山上。種植焙製。仍沿舊法。

農產物主要種類。如米麥豆黍。惟米有二成出運。餘均本地自用。普通種類。如綠茶龍青竹木棉花菸葉。惟竹木有五成出運。餘均本地自用。民食豐稔有餘。每年運放蘭谿紹興一帶。本邑金融。全賴米市周轉。

農民有自田自種者。有佃田耕種者。習慣有田皮田骨之分。有賣田骨而不賣田皮者。即佃田權也。佃農以所得利益。轉售他人。積久遂成慣例。本地租額之輕。佃農利益之厚。足見一斑。惟此例僅南鄉一帶有之。業主收

租。以土質之高下。定租額之多寡。業佃雙方議定。由佃戶出立租約。年款則酌量減讓。佃業間極爲相得。其下種收割時。多有僱隣邑人工作者。名謂僱田忙。至驅除預防災害蟲病。亦無何等方法。團體。舊有縣農會一處。近年各鄉紛紛組織農民協會。惟真正農民入會。殊屬寥寥。而入會者。多藉此漁利。並以挑撥佃業間之惡感爲能事。殊可嘆也。

工業。出色之工作物。竹絲簾係製造屏紙必需之品。用作半截窗簾門簾。最爲適宜。普通之工作物。木器鐵器竹器等。永康人居多。至外來者。簾器米斗米斛。由金華蘭谿運來。銅板鎮塊。由紹興甯波運來。

僱用工人。日給工資飯食。徒弟學藝。寫立投師契約。三年期滿後。在本師店盡義務一二年。始得與衆工人同等優待。工廠。舊設平民習藝所及私人設立之茶葉行缸窰瓦灶紙槽亦多。

商業。前清光緒間。民物豐阜。頗稱極盛。近年捐稅繁苛。商業銳減。祇

洋廣貨布業。日形發達。南貨糧食。及各項工作業。較前少百分之二三十。分。綜記全邑歷年營業上所銷印花。每年約計四百餘金之譜。市鎮。除城區外。東有菱道驛。南有東皋鎮。西有下揚埠。北有履坦埠。然有鎮埠。無市場。惟履坦埠水陸交通。稍爲熱鬧。入境貨。以洋油洋布蘇標布及紅糖白糖錫箔海菜鹹貨爲大宗。至所銷捲菸一項。每年印花稅款可收三千餘金。足見地方消費之巨。出境貨。以米穀爲大宗。醃腿茶葉屏紙竹木次之。靛青向爲武義出產之一。自洋靛暢銷內地。土靛一蹶不振。近已無復出產矣。外地人來此營商者。分徽州福建紹興永康各幫。以徽幫爲最多。本地人僅居十分之一。

商販。陸道由永康義烏諸暨渡錢塘江至省。水道由本境順流至金華蘭谿嚴州桐廬橫港至紹興直港至杭州而止。其運價。船筏裝運。視溪水漲落爲貴賤。脚夫肩挑。視道里之遠近計算。錢幣。邑內無錢莊。以金蘭二邑行情

高低爲標準。商人貿易。現錢買賣者少。賒借居多。年終結賬。恆多掛欠不清。外貨輸入。現盤交繳。本店賣出。賒賬未完。商業多受虧折。團體。有商務分會一處。

第四十七篇 浦江縣

考浦江。唐天寶中。析義烏蘭谿富陽三縣。置浦陽縣。吳越改稱浦江。相沿至今。名稱仍舊。疆域。東界諸暨。西距建德。南接金華。北鄰桐廬。東西相距一百十里。南北相距一百二十里。舊分七鄉三十都。曰德政鄉。一都至五都屬之。曰通化鄉。六都至十二都屬之。曰嘉興鄉。十三都至十六都屬之。曰靈泉鄉。十七都至十九都屬之。曰感德鄉。二十都至二十三都屬之。曰政內鄉。二十四都至二十七都屬之。曰興賢鄉。二十八都至三十都屬之。宣統二年。劃分自治區域。以城區及五都並四都之西半都爲浦江城。以一都及四都之東半都爲仙華鄉。以十七都十八都及十三都之在浦

陽江北者爲左合鄉。以十九都二十都二十一都二十二都二十三都爲孝義鄉。以十四都十五都及十三都之在浦陽江南者爲嘉善鄉。以六都七都爲烏蜀鄉。以八都十二都爲凌溪鄉。以九都十都十一都爲洪溪鄉。以二都三都爲廣明鄉。以二十四都二十五都爲政新鄉。以二十六都二十七都爲壺溪鄉。以二十八都爲興仁鄉。以二十九都三十都爲賢能鄉。共計一城十二鄉。面積三千七百零四方里。內田三千一百十三頃四十畝。地一千一百二十四頃五十一畝。山四千四百二十三頃六十六畝。蕩一百七十二頃二十七畝。全境有戶四萬五千九百八十。有丁十二萬五百零八人。有口九萬八千八百五十四人。業農者約十五萬七千人。業商者約一萬五千人。業工者二萬一千人。

浦江。以浦陽江得名。故浦陽江爲縣中一大河流。計自縣西廣明鄉之井坑嶺發源。東流經浦江城仙華鄉嘉善鄉左合鄉孝義鄉。入諸暨界。凡一百十

里。所合小水。以數十計。惟因地勢傾斜。不能通舟。僅可通筏。以運貨物。實爲商業不振之原因。其不合浦陽江而自爲一經流者二。一曰梅溪。自烏蜀鄉之大黃嶺發源。經烏蜀鄉凌溪鄉至洪溪鄉之橫木。入蘭谿界。下流合於蘭江。計在縣境西流。凡四十里。不通舟楫。僅資灌溉之用。一曰壺溪。自政新鄉之壺山發源。經政新鄉壺溪鄉至賢能鄉之金沙。入富陽界。流長凡九十里。下流合於富春江。凡縣北松木松板杉木之至杭縣銷售者。均由此溪放運。

山脉。自東陽大盆山。蜿蜒而來。經義烏之北境及西境之香山嶺。西行入縣之嘉善鄉境楊田岡。又西十里至白石山。分一支南行。東界義烏金華。西界縣之烏蜀鄉凌溪鄉洪溪鄉至西玉壺山。入金華界。爲金華蘭谿兩縣縣山之祖。是爲南支。其幹脉自白石山西行。起周公山逾大黃嶺五路嶺。南界烏蜀鄉。北界浦江城廣明鄉。迤邐至茨新嶺。又分一南支行

。西界蘭溪。東界縣之凌溪鄉洪溪鄉。盡於洪溪鄉之掛鐘尖。與玉壺山之支山對峙。爲梅溪之關鎖。亦爲南支。其幹脉復西行。曲折二十里。至蘭溪建德。與浦江交界之壽峯山。折向北行。經井坑嶺。至高塘嶺。凡十里。分一支東北行。北界建德桐廬。南界縣之政新鄉壺溪鄉。凡六十餘里。至牛脊嶺。折北行。入桐廬界。又自桐廬折東行。入縣之賢能鄉境。起三界尖。爲富陽桐廬。與浦江交界之所。是爲北支。其幹脉由高塘嶺界行遞深裏山石廬山清遠山。逾桃嶺杭口嶺起富潤尖。爲縣脉之祖。自富潤尖東行。遞金坑嶺。起八角尖。分一小支。起仙華山。爲一縣名勝處。幹脉由八角尖東下。遞彭嶺大嶺白巖嶺淡竹嶺石柱嶺。起江公山。分一支。爲諸暨縣治之祖山。幹脉自江公山折北行。遞楊源嶺楊塘嶺起天堂岡。入諸暨界。計自楊田岡西行。至壽峯山。凡六十里。自壽峯山。至高塘嶺。凡十里。自高塘嶺。至天堂岡。凡一百里。曲折共

一百七十里。是爲中支。其天堂岡之東。分一小支。由九靈山北行二十餘里。至今沙嶺。與三界尖。遙相對峙。爲壺溪之關鎖。此山脉之大略也。

地勢。分浦陽江梅溪壺溪三原。梅溪一原。東高西下。浦陽壺溪二原。皆西高而東下。水勢然也。其地面。浦陽江原較寬。梅溪原次之。壺溪原則兩山夾溪。屈曲逼窄。至有溪岸無一畝之田者。故其所產之米穀。浦陽江原。常有盈餘。梅溪原。足以自給。壺溪原之民食。米穀爲補助品。而其大宗。則以玉蜀黍爲主。以民皆種山故也。至於險要。則廣明鄉之井坑嶺夷嶺。凌溪鄉之烏燒嶺。洪溪鄉之西玉壺山。皆爲盜賊出入之所。孝義鄉之楊家牌。爲通諸暨之孔道。嘉善鄉步虛嶺。爲通義烏之孔道。洪溪鄉之太陽嶺。爲通金華之孔道。政新鄉之截拓嶺馬嶺。爲通建德桐廬之間道。壺溪鄉之倒山嶺牛脊嶺。爲通桐廬之間道。興盛鄉之楊源嶺。賢能鄉之楊

塘嶺。爲通諸暨之間道。有寇警時。皆設防者所宜注意也。

氣候。溫度最高八十四度。最低三十六度。濕度最高七十六度。最低四十四度。最喜西風。最忌東風。西風多則穀實。東風多則穀殼。但夏至以後。西風多晴。未免引出亢旱。霜以遲爲妙。太早則收麥無收。過遲則秋蔬多蟲。未免有園蔬不熟之慮。最忌黃梅時節淫雨。蓋浦江三河流。兩岸率皆逼窄。若經三日淫雨。則溪流暴漲。常有出蛟之患。雪喜冬忌春。冬雪多則來年不旱。且無蟲災。春雪多則油菜凍霉。二麥亦不長。歷年以來。水旱之災。壺溪一原最多。因山多開種。一經雨漲。則沙石混下。而有淹沒田廬之患。又岸高水深。經旬不雨。則灌注無方。而成亢旱之災。此災害所以較多也。

土壤。最肥者佔百分之十一。次肥者佔百分之五十四。又次肥者佔百分之二十三。最瘠者佔百分之十二。田均宜禾。地則靈泉感德宜桑。嘉興德政

宜櫚。通化宜漆。興賢宜茶。政內宜茶與竹。山則政內興賢宜竹宜杉。德政靈泉感德宜松。嘉興通化宜松及雜果。

水利。除三河流兩岸。各引河流灌注外。餘均於田畔開濬池塘。以資車戽。嘉興一鄉。水脈較深。往往掘井。以脩綆汲水灌田。有古桔槔之遺意。其塘較大者。爲通化鄉之東湖塘西湖塘椒湖塘。面積皆十餘畝。溉田約以千畝計。

農民正月間。鋤麥肥油菜。栽桑接桑。二月繼續鋤麥。挑種白豆。耕犁秧田。三月則下穀種。耕田肥秧。扞種靛青。栽種菸葉。下蠟種。四月分秧插田。收穫油菜。下玉蜀黍種。五月收二麥。種晚稻。用石灰肥田。去田草。六月白豆熟。大暑後數日。早稻登場。七月秋禾成熟。收穫稻穀。畝田種苡麥。撒豆。種蔓菁。八月耕田種菜。蘿蔔菘芥之屬。皆下種。收拾瓜場。九月種二麥。收穫麥及玉蜀黍。十月收撒豆。種油菜。收桐子。十

一月十二月農事完畢。鋤麥以外。樵採而已。農具如犁耙耖田鋤田刮鐵爪長角釘耙鎌刀稻桶水車竹車戽桶牛輓等。墾具如草刀柴刀炭刀斧頭山鋤尖鋤兩角等。蠶具如桑剪蠶箔繅車繅鍋繅架繅籠繅筐等。漁具如網罾桁絲蟹叉等。均係舊式。由本地自製。

地質高燥。不宜桑。惟左合孝義二鄉。頗有種植。民國以來。經官提倡。每年三四月間。均有蠶桑傳習所之組織。惜隨興隨閉。成績毫無。

林業。如壺溪源之杉木。梅溪源廣明鄉之松木。政新鄉之猫竹。除供本縣需要外。且輸於外縣。官荒山地。嘉善鄉戚村橋。寬得二百五十餘畝。購種松秧十萬株。北鄉大嶺坪官荒。亦經始佃承墾。政新鄉壺溪鄉之茶樹。多半爲天然產物。其有恃人工種植。亦皆於開墾之山。乘春時而種。不施肥料。所採之葉。味淡而清。至仙華鄉之茶。年年施肥。其味濃濁。但能製紅茶。而欲以之製綠茶。則不能也。

農產物。主要種類。如粳穀粟穀大麥小麥玉蜀黍黃豆白豆菘菜蘿蔔薤菜黃矮菜竹筍南肉南腿菜油桐油桐油豆油木棉菸葉靛青杉木松木猫竹等。普通種類。如苽麥赤豆藁豆甜菜萵苣菜茄子豇豆蠶豆梅豆羊眼豆八月豆芋芡山蘋梨李杏楊梅枇杷石榴桃子栗子榧子蓮子葡萄甘蔗南瓜黃瓜東瓜絲瓜葫蘆梓木柵木桐木棗木椿木綠茶紅茶等。民食以米穀爲大宗。小麥次之。玉蜀黍又次之。有餘或不足。各區不能一致。就全縣平均計算。可餘十成之二。皆運外銷售。

農民佃田。須履行償田料之義務。佃戶如不履行時。業主得自由改佃。佃料分錢穀兩種。償錢者。須於前一年秋收後履行。償穀者。於本年秋收後履行。其驅除蟲病方法。則於禾苗方長時。用石灰綠礬肥田。以絕水蟲。若蜚蟲。則於夜間用火逐之。

工業。出色之工作物。一絲線。浦江所產之絲。其質不柔。故不適於他用。

。而製線縫衣。則爲適宜。二皮紙。以楮木之皮爲之。產自壺溪鄉之大姑原。適於寫契裱褙及糊窗櫺之用。三火紙。以竹爲之。產自賢能鄉之龍門山石門等村。適於燃紙煤糊蠶具及冥鑑之用。次之如木製器竹製器皮製器鐵製器銅製器銀製器陶冶器等。至外來者。如江西之瓷器。徽歙之墨。金華之筆。甯波之蓆。杭州之絲織品等。

僱傭人工。均用口頭契約。以一年爲度。限滿再訂。工徒學藝。須用中保立約。名曰投師。約其年限。大率以三年爲標準。限滿如仍幫師工作。僱傭例。工廠。近來設有小規模之電燈廠及洋襪廠等。不甚發達。

商業。現在較前似有進步。如醬園業提莊業木廠以及京貨業南貨業各商店。歲有增加。市鎮。如城區黃宅市馬墅市巖頭陳市鄭宅市傅宅市潘宅市橫溪市墩頭市白沙陳市等處。入境貨。由蘭溪來者。以江西磁衢州紙爲大宗。由諸暨來者。以杭州綢甯波蓆及海味臨浦布爲大宗。出境貨。如肉腿銷

售於臨浦杭州。茶銷售於杭州蘇州天津營口。木植銷售於義橋江干。菸葉銷售於金華蘭谿紹興。靛青銷售於富陽義橋蘇州鎮江。各貨運輸。分筏運銀錢進出肩運兩種。筏運價值計件數。肩運價值計舢數。此其大較也。市面錢幣。視諸暨爲轉移。蓋因入境之貨。強半自諸暨來。故有之關係。

商業交換。一爲金錢交換。一爲貨物交換。惟貨物交換。不過肩挑小買。如以穀麥換麥麵冷淘乾。以桐子換桐油蠟燭。以豆換豆腐之屬。其餘俱用金錢。主顧。則記賬者有主顧。現易者無主顧。其賬以年終爲一大結束。至端午中秋。雖有三節結算之語。事實上殊罕見也。言語均用土音。其慣走蘇杭者。亦能作普通語。團體。舊有縣商會。

鑛業。有廣明鄉之塘汊一處。現由鑛商購得鑛山五十餘畝。領探照試辦。

考湯溪。明成化初。割龍游遂昌金華蘭溪四縣之邊地。轄合成邑。因地有湯塘。遂名湯溪。疆域。東至金華縣界白龍橋。西至龍游縣界白渡橋。南至遂昌縣界銀嶺。北至蘭溪縣界樟林。東西相距四十五里。南北相距一百十里。從前自治區域。分城區。東鄉開化區白沙區。南鄉厚大區椰椰區。西鄉蘭源區黃堂區洋埠區。北鄉內北區外北區。共計十區。面積二千五百九十五方里。田佔百分之五十二。山佔百分之三十七。地佔百分之七。塘佔百分之四。全境有戶二萬四千一百四十八。有丁六萬七千六百五十六人。有口五萬一千五百八十一人。業農者居十分之七。業工商者居十分之一。澱江。自龍游境流入。至伍家圩流出蘭溪。計長二十里。又厚大源。自南鄉銀嶺山發脉。其下爲越溪。流至葉灣入澱江。計長八十里。又莘華坂。源自清涼山發脉。其下爲蘭源。爲小龍溪。至唐家橋。一支東流至黃稍。與厚大源合併。一支北流至上陳鵝頭頸。入澱江。計長六十五里。又蘭

背源。一名白沙溪。自遂昌流入。至豐樂橋流出金華。計長九十五里。以上三溪。由上而下。勢若建瓴。裝置水碓。各莊皆有。是以全縣穀米。均藉水力。無勞人工。

地勢。南鄉近山爲最高。東次之。西北最低。故東南鄉則患旱。西北鄉則患水。至於險要。則莫如銀嶺。去縣南七十里。高山接雲。勢若屏幃。由山麓而上。重岡疊嶺。高約十餘里。橫亘於衢處二郡間。嶺之陽。卽遂昌北界。有扼隘處。可以防寇盜。明天順間。陶公成紮寨山口殿以禦寇。銀嶺之外口也。

氣候。據攝氏表溫度最高爲八十度。最低爲十度。平時風霜雨雪。並無利害之可言。惟五月至八月。多晴多雨。均易成災。

土壤。南鄉一帶。悉合沙質。約佔全境十分之二。其地宜豆麥菽粟。東鄉土壤礫瘠。佔全境十分之二五。農作物悉皆種植。然收成較他處歉薄。惟

西北兩鄉。土質較腴。佔全境十分之五。雜糧五穀。無一不宜。甘蔗則爲該兩鄉特別出產。

水利均在塘堰。其名稱甚夥。不備述。

農民從事田畝。凡闢草萊。勤耨耩。施肥壅灰。培秧刈稻。與各屬大略相同。至於耕之一法。於下種時。以牛負犁而覆其土。復以鐵耙碎其泥。更以木耖平其凹凸。手續完了。然後以之施種。至於耘。大抵均用田耙。每田一坵。須下耙三次。每耙一次。非水旱爲災。每畝可收穫稻子五六石不等。其農具。墾具如耜犁木耖鐵耙田耙。漁具如百袋網罟魚套。蠶具除蠶簾絲車以外。更無他物。

育蠶先惟西北鄉有之。近因每年冬或春時。向嘉湖間採購桑秧。運回半價發給農民。已有七八年。故現在種桑者多。東南鄉亦有之。近三年內。全境產繭約三千擔。售繭者約十之七。繅絲者約十之三。

官荒民荒。約一千數百畝。並無商人承墾。模範森林。創辦五處。南鄉瑯琊區高上莊。土名馬山。一百零七畝。東鄉白沙區後童莊。土名青牆園。五十七畝。東鄉北沙莊橫路塘。土名黃八塘。二十四畝。東鄉北沙區後童莊。土名王安隴頂。二十三畝。東鄉白沙莊橫路塘。土名坎山石馬山脚塘兒。二十一畝。近又新增東鄉白沙莊。土名轎夫山。九十六畝。苗圃就農事試驗場內劃分一部分爲之。農民植茶方法。并未講求。產茶各山。顛倒錯亂。絕無行列。

漁牧兩項。山鄉僻處。鄉民間有在溪塘捕魚者。爲數甚少。縣城之內。竟有歷數月不見鮮魚者。畜牧。則牛羊豬雞。農民多養之。

農產物。如粳米糯米菽麥甘蔗等。或自食。或運出銷售。民食。卽遇欠收之年。尙足以自給。若遇豐年。可以運銷各處。

富戶田多。除僱工種植外。餘田租與農民種植。先時每畝約收租穀二三百

舛不等。近照減租章程。每畝租穀。減至一百五十舛。或一百八十舛。然亦有大田小田之別。如農民種植此田。非償還其小田之價值。則亦不能轉移於他戶。至預防災害蟲病。則不其發明。間有硬壳之小青蟲發生。農民每於晚間放銃以驅之。推其用意。大約以陰霾而生蟲。以陽尅陰之義也。團體。舊有鄉農會。現已取消。改組農民協會籌備處及農事試驗場等。商業。因交通不便。境內僅羅洋兩埠。尙可通舟。爲衢江至蘭江必經之路。然羅埠僅店舖百二十餘家。洋埠僅店舖一百十餘家。其餘各鄉。店舖尤少。因均須陸路肩挑背負。極形不便。故城區亦止店舖三十餘家。入境貨。除山貨足以自給。餘均由他縣輸入。而尤以南貨布疋爲最。出境貨。有粳米甘蔗靛青黃表紙南屏紙等。各業徽幫居其半數。商人大宗貨物。運由杭紹。小本營業。販自蘭溪。運價。杭紹較多。蘭谿較少。錢幣以銀元爲本位。銀角銅元。隨時漲落。因無錢莊。是以不通匯

兌。不用錢票。凡外來客商。辦購米木及豬隻等項。必須捆載現洋而來。其數目較巨者。方能於蘭溪各錢莊代爲匯付。資本少者。則裹足不前。營業之不能發達。此一大原因也。若本邑商家。赴外埠購辦物品。則均由蘭莊匯寄。鄉民赴市。持有米穀等物。皆可代換物品。團體。舊有商會。設立於羅埠鎮。

鑛業。縣屬南鄉梧亭莊銀坑地方。土名銀山。有鉛鑛一區。共一百九十二畝三分。業經組織公司。集股開採。於民國六年。因苗路狹窄。虧本停採。迄今十年。無人顧問。

第四十九篇 衢縣

考衢縣。秦屬會稽郡太末縣地。至唐始號西安。元爲衢州路治。明清爲衢州府治。民國改衢縣。疆域。東至龍游縣界。西至常山縣界。南至遂昌縣界。北至遂安縣界。西南至江山縣界。東西廣七十五里。南北袤二百二十

里。從前自治區域。分城區。及東鄉之梓潭高家全旺凡三區。南鄉之洋口大洲上字將軍殿黃壩口破石凡六區。西鄉之下村溝溪石梁航埠毓秀瑋塘凡六區。北鄉之浮石峽口杜澤蓮花玉泉凡五區。共計二十一區。面積七千零四十五方里。田佔十分之三。地佔十分之三五。山佔十分之三。蕩佔十分之零五。全境有戶五萬九千六百二十七。有丁十七萬三千九百二十五人。有口十二萬四千三十五人。業農者約七萬八千人。業工者一萬六千人。業商者五千人。

河流。幹河曰衢港。其源有二。一自江山北流入縣境。一是常港東流入縣境。至城西南與幹河合流。迴環曲折。以達於龍。南有小源。自遂昌縣之周公源。循縣南之九龍山。經響谷東北而入石室堰。過樟樹潭以至正港。延長凡百餘里。灘多水湍。皆可引水成渠。故民間於港身兩旁。多置水碓。備爲春糧之用。

山脉。南由江遂交界之八月腰山。分東西二大山脉。一東由遂安邊界之魚莊嶺頂。迤邐經薄刀岡以趨龍之草鞋嶺。一西由江山邊界之廿里塢。經石背嶺至清明山而止。是謂南山脉。其北自遂安界之灰嶺。又分爲二股。一由東北之葱嶺茶坪。經壽界之梅樹塢以入龍境。一由西北之仙洞源。經千里岡過木嶺以趨常境。是謂北山脉。四面萬山環抱。自西至東。中貫一河。卽衢港。

地勢。東西狹而南北長。東西兩鄉。地多平坦。南北萬山重疊。故高地最居多數。約佔十分之五。平地佔十分之三。低地不過百分之一二。其險要如呂東之全旺。毘連龍境。西之溝溪北淤爲常港入境之咽喉。南之黃塘源及後溪街等處。係江遂出入要道。北之上方源梅嶺威嶺等處。路通壽遂。尤爲扼要。此衢邑地勢之大概也。

氣候。據華氏表最高九十八度。最低三十五度。關於農業利害。並無何等

特殊。惟入夏西風多。則小麥易萎。霜早則收麥無收。春雨過多。則山洪暴發。勢如傾盆。東西及小南鄉田房時被冲沒。

土壤。肥瘠不一。大別可分三種。一黃土。出自附郭之塘田術及西鄉黃泥塘等處。俗名黃沙泥。土性鬆而且潤。最適種蘿蔔。而普通作物亦佳。二沙土。產自西北兩鄉鹿鳴山等處及北鄉一帶。土性乾燥。農作物豆麥膏粱玉蜀黍及果品等類爲適宜。禾稻雖可種。惟水易乾涸。時時車灌。工本頗繁。所產穀米。收成較遜。三黑土。東鄉及小南兩鄉皆有之。俗稱大泥土。土性潤而且肥。最適種稻。蔬菜亦宜。惟不宜棉麻等物。農田多資堰水。邑中溝堰。大小共有一百二十餘處。最著者爲石室東蹟楊賴等三堰。灌田二十餘萬畝。計分七大溝。七十二小溝。其總溝直達城南而爲城東南大濠。復引濠入城而爲內河。蓋一邑水利之關鍵焉。

農民樸實耐勞。春耕夏耘。尙稱動作。惟僅耕春田。多不知冬耕之利。農

具可分爲木製鐵製竹製三種。木製者爲風車粉床米床稻桶木礮犁架水車杓杓架等。鐵製者如鈹四齒鋤犁頭鏟鋤刈杓犁耨等。竹製者如箬帽箬衣蓆笠畚斗籬簞掉車扒箕篩茶桶等。蠶具有蠶籬蠶埭蠶簇絲車絲箸桑剪等類。漁具有罾網網罟之類。以上各項農具。均本地自製。多係舊式。

蠶桑素未講求。雖間有育蠶之家。因桑葉不多。故產蠶甚稀。現有模範桑園二處。蠶業傳習所一處。

官荒甚鮮。演武場有官荒三百餘畝。已由商人創辦精勤植牧公司。民荒地亦無多。山場到處皆有。東門外七里街張公祠戶內民荒四十餘畝。籌設森林苗圃一處。北鄉民荒三處。一赤山。二擂鼓。三馬鞍等山。共計百餘畝。籌設模範森林。又南鄉嶺裏民荒約七十餘畝。徐洪兩姓自行造林。至種茶以南北兩鄉爲多。然僅綠茶一種。亦非本地著名出產。故年產亦不多。植茶方法。在高山隙地散種。並非整嶺施肥灌溉。聽其自然生長而已。

灘高水淺。向無大宗水產。除私有池塘養魚以供本地食用外。並無何種製造物。產額甚稀。年約一萬餘觔。畜牧。除家畜外。無專營者。

農產物。以粳米糯米粟米爲大宗。大麥小麥莠麥大豆小豆茶葉油菜子桐子桐子茶子菸葉及橘榴桃李落花生竹筍甘蔗靛青次之。民食。每年平均若得七分收成。尙有餘米運出銷售。如不及五分收成。卽虞缺乏。

農田。自種與佃戶。各居其半。自種之田。僅完糧而不收租。佃戶之田。則繳租而不納糧。并有大賣小賣田之名目。大賣者卽業主可將己田自由處分。惟不另換佃戶。小賣者卽佃戶永遠佃種。并可轉佃他人耕種。業主祇憑收租。不加干涉。如遇水旱歉收。佃戶邀同業主到田。面割均分。至災害蟲病。僅有蛀心蟲一種。爲害最烈。驅除之法。民間先將田邊雜草連根剷除。用火焚燒。蟲自漸滅。團體。舊設有縣農會。

工業。出色之工作物。僅有皮箱一種。此項皮箱。質色堅實。箱口較深。

內藏衣服。不易受潮。頗爲各界歡迎。此外普通物品。可分爲織類製造器皿雜工四項。織類。如柳條布愛國布斜紋布白平布毛巾馬帶。均係平民習藝所出品。至民間織物。僅有男女帽子鞋子及草鞋等。製造類。如清油燭普通磚瓦南屏紙花尖紙上等獸皮普通獸皮各種物品。均係民間所製造。器皿類。如木器漆器雜用器金銀製器銅錫製器各物。均係舖家所製造。又雜工。如竹製器雨傘扇子香類筆墨燧爆釘靴石灰等。各物零星散漫。至外來者。以江西之磁器爲大宗。其餘如綢緞洋貨京廣各貨亦甚夥。

紙槽工人。每逢暑假。停工四五十日。其餘各項工人。均不停工。僱傭有大小工之別。大工按月支給薪工。小工卽徒弟。僅給飯食。不支薪工。待遇方法。平日膳食。並不給葷。惟每月逢六。按名給肉四兩。自中秋起至來年立夏日止。均作夜工。立夏至中秋。停做夜工。徒弟學藝。三年期滿。視其技術之良窳。以定去留。工廠。舊有平民習藝所。此外四鄉山源有

槽紙七百餘所。

商業。從前海道未通。素稱七省通衢。贛閩皖等省商販。由陸輸運。取道於此以達於蘭而轉輸蘇杭紹甬。故營業日盛。至光緒初年。海運漸通。鄰省各設商埠。各貨不由陸而由水。贛閩皖等商貨。逕趨滬蘇。本邑僅肩挑貿易而已。市鎮。東鄉樟樹潭爲最。店舖林立。商業繁盛。來往客商。輻集於此。全旺高家盈川安仁舖等處次之。至南鄉大洲前河埠洋口石室街及西鄉航埠北鄉杜澤峽口等處。雖有市面而店舖不多。入境貨。以江西之瓷器爲最。蘇杭之京貨綢緞。甯波之藥材草蓆。海甯紹滬之布疋。滬甬之南貨。滬杭之煤油。廣豐松陽之菸葉。紹興之食鹽。蘇滬之洋廣雜貨次之。出境貨。以米豆花尖南屏爲最。皮箱桐油青油桐油杉木靛青橘麥等次之。至經過者。爲杉木杉板靛青三種。各商業以皖贛人爲多。紹次之。蘭又次之。本地人最少。

商販均運至杭州紹興甯波及蘭谿等處銷售。其中運杭者最多。紹興甬蘭次之。由衢至紹。計水程六百里。舟可直達。運甬者至紹之義橋。撥入內河。運蘭水程一百六十里。至運價由衢至杭紹甬。有水時較輕。水涸時較昂。錢幣。銀元銀角銅元。時有漲落。

商人以現錢交換者居多。其向來做賬主顧。則於正月元宵後送摺。憑摺支貨。至年終結帳付清。不准拖欠。端午中秋兩節。不過分發帳單。作小結束。并不認真追取。各種交易。係用現錢。惟花尖南屏兩行紙貨。先銀後貨。例如乙年之貨。先於甲年議定件數價格。載明成票。即於甲年冬先付灰本銀若干。至乙年初夏又付剖竹醃料工銀若干。至秋製紙付齊工價。陸續交貨。此紙業之習慣也。至度量衡。民間賣買。均用十六兩天平秤爲一觔。出進一律。金銀兌換。悉用天平戥。以曹平計算。惟南貨菸店酒店零買者有用九折。以十四兩爲一觔。言語均多操土音。間有用普通話者。團

體。城區舊設有縣商會。凡營業較大者。均有會員入會。惟鹽業不入會。以有鹽公堂主持。

鑛業。前經探探者。共有煤鑛六區。一在大洲。計面積一畝。一在橫路。計面積二畝。一在何家壠。計面積一畝。一在三里塘尾。計面積二畝。一在晉塢。計面積一畝。一在下石埠。計面積一畝零。曾於光緒三十一年開採。所採礦質。僅有少數煤坯。未出大煤。

第五十篇 龍游縣

考龍游。秦漢立太末縣。吳改爲龍邱。後又改爲龍游。至今仍之。疆域。東至湯溪縣界五十里。南至遂昌縣界九十里。西至衢縣界三十里。北至壽昌縣界六十五里。從前自治區域。除城區外。東鄉劃爲湖鎮希唐社陽港七都狀元五區。南鄉劃爲靈山溪口廟下官村沐塵五區。西鄉劃爲五都磨圍石汪官潭頭三區。北鄉劃爲新王塔石頭塔下葉澤隨石佛蠻王蓮塘七區。共計

二十一區。面積三千三百六十八方里。田佔十分之三。地佔十分之二。山佔十分之四。蕩佔十分之一。全境有戶三萬三千一百六十三。有丁十一萬零一百九十六人。有口七萬二千八百六十二人。農約十分之七八。工商各約十分之一。

河流有澱溪。發源於常山。由衢縣經本縣之西北隅。東行入蘭谿縣界。又有靈山港。發源於括蒼。自遂昌經本縣東南隅。北行入於澱溪。利用水力者。惟水碓油車。

山脈。境內西南有楊樹山脈。東行入湯溪縣界。東有白鶴山脉。分兩支。一北行稍西至梅嶺山。入壽昌縣界。一西行稍北至大垂山。入衢縣界。地勢。東南多山。西北多平原。東之湖鎮。南之靈山。西之五都詹。北之茶圩等處。皆爲往來衝要之地。

氣候溫和。溫度濕度均適中。暴風烈雨。常年稀少。惟冬季有雪。則翌年

收成較豐。

全境土壤。西多砂土。其質較粗。餘皆黏土居多。約計砂土佔十分之三。黏土佔十分之七。砂土宜於豆粟黍稷各種雜糧。黏土則宜於稻麥油菜等項。惟砂土能重用肥料。灌溉便利。亦頗肥厚。

水利最大者。有姜村堰席村堰。該堰水源。發自衢縣。由治南十七都隄茅溪之水。分爲二堰。上姜下席。相距數百武。分子堰七十有二。肥田五萬餘畝。受二堰之水者。田質肥厚。每年於陰歷四月初一日封堰。九月初一日開堰。其餘瑣小堰壩甚多。不及備述。

農事。通常農作。均耕二次耘三次。即可刈穫。農具。耕用犁耙耖。刈草用田鏢闌板鋤平鋤尖角鋤地割鐵爪。灌溉用水車。有二踏四踏手搖之分。收穫用鎌刀稻桶籬風車墊皮。以上各具。均係本地自製。

官荒民荒。均經農戶先後報墾成熟。縣中並設有苗圃一處。模範森林場三

處。至植茶一項。出產有限。大都聽其自然生長。並無如何方法。

漁牧。境內山多水少。溪流清澈。無魚可捕。至畜牧事業。除農家餵養豬雞外。亦無專營者。

農產物。主要種類。爲稻麥豆菽。民食。年歲豐稔。以就地所產。供就地食用。尙無不足。

佃戶承種田畝。每畝田地。平均約納租金二元。如田戶不欠田租。則業主不能轉佃他人。驅除預防蟲病。並無何等方法。團體。舊有縣農會一處。工業幼稚。並無出色之工作物。習藝所各種紗織品。以及本地木器竹器雨傘洋鐵器錫器蒲包。均係普通之物。外來者。甯波草蓆各種京廣洋貨緞鞋皮鞋大小鐵鍋等類。僱傭工資。按日計算。視手藝之優劣。定工資之多寡。現因百物昂貴。工價稍漲。學徒以三年爲期。言定工資若干元。三年期滿。脫離關係。工廠。舊有縣立平民習藝所一處。

地勢。處兩浙上游。土瘠民貧。交通不便。商務未能發達。近來商業狀況較前尤爲清淡。市鎮。若東鄉之湖鎮。南鄉之靈山溪口廟下沐塵。西鄉之團石汪馬葉。北鄉之茶圩塔石頭蠻王殿石佛等處。均商店無多。入境貨。以食鹽絲綢布疋南北海貨紅白糖紹酒京廣洋貨草蓆磁器爲大宗。出境貨。以屏紙竹木食米雜糧冬筍粉乾爲大宗。至經過貨物。其由閩贛運下者。磁器菸葉夏布紙張棕蔴板木靛青福橘衢橘藥材等類。由蘇中杭紹運上者。綢緞布疋雜貨洋貨燒紹酒金腿藥材南貨等類。以上各商。徽州紹興蘭谿江西人居多。本地人次之。商販。入境貨。均來自甬紹杭嘉蘇中等處。出境貨。往杭紹者爲多。甬蘭次之。蘇中以路遠。販往者實居少數。至運脚。杭紹往來運費。如遇水淺。價值酌增。挑脚以路之遠近計值。市面錢幣。鈔票通用中國銀行所發者。然爲數不多。大洋小角。時有漲落。地處偏隅。貿易範圍甚小。凡南貨布疋等店。遇鄉民挑有食米求售者。不

得不通融交換。各店僱用夥友。須經妥友推荐。土語方言。客之初至者。或不甚明了。聽之稍久。即不難領會。團體。舊有縣商會一處。

鑛業。北鄉沿口蓬白象山脚煤鑛。前經試探。因煤色不佳。售價低微。虧本停止。

第五十一篇 江山縣

考江山。唐置須江縣。吳越更名江山縣。南宋更名禮賢鄉。元復名江山縣。屬衢州路治。明清屬衢州府治。民國廢府制隸省。疆域。東界遂昌衢縣。西至江西之玉山廣豐。南連閩省浦城。北至常山衢縣。跨連三省。萬山之。中儼立郊坵。從前自治區域。分城區鄭家塢區賀村區仕陽區禮賢區淤頭區二十八都區茅坂區峽口區清湖區白石區鳳林鄉區趙家區新塘邊區長台區吳村區大陳區官溪區廣渡區仙霞區石門區大溪灘區壇石頭區。共計二十三區。東西廣一百三十里。南北袤一百三十里。面積六千零五十九方里。

西北低田佔十之九。東南高山佔十之六。額田三千三百四十七頃四十八畝零。額地五百九十五頃四十畝零。額山三千三百七十三頃七十三畝零。塘坎一百十七頃八畝零。全境有戶五萬零九百一十一。有丁十五萬八千零十四人。有口十一萬零九百三十六人。業農者約居四分之三。工商鑛三項。不過四分之一。

大溪。一名鹿溪。卽古濑水。又名須江。源出仙霞諸嶺。匯流至清湖渡。始通舟楫。北經城下入衢縣爲衢港。順流至錢塘入匯於江。沿溪兩旁。多設水碓。

山脉。以仙霞小竿嶺爲祖山。蜿蜒百里許。至縣西南斜狀嶺分支。趨坳頭。過早坂。歷方菴。經樟山。降迄繁峯。逶迤而下爲縣城。其東南諸山。皆仙霞旁支。曰江郎山。曰仙人山。曰太陽山。曰大靈山。地勢。西南高聳。東北低平。極南仙霞關一帶。山高路狹。崎嶇難行。西

達江西。南通福建。東連本省之處州。其形勢獨高。地處險要。有一夫當關。萬夫莫入之勢。

氣候。溫度最高。不過百度。最低不過三十度。惟遇大寒之年。峽口仙霞二十八都等鄉。以山深林密。氣候較寒。或降至二十餘度。然數年不一見也。風霜雨雪。向無特殊利害。

土壤。肥土佔十成之三。瘠土佔十成之七。精壤佔十成之四。粗壤佔十成之六。種植宜松杉竹樟桐槲茶子及靛青棉花麻油菽粟稻等。大概屬於平坦者。土質肥而精。屬於高山溪沿者。土質粗而瘠。肥精者宜每年變更種植。如本年種稻麥。明年種油菜蕃薯等類。土質粗瘠者。每年所種稻麥。不宜變更。變更收成反少。若峽口茅坂一帶。純係高山峻嶺。土礮薄而硬黃。惟種松杉梟子等樹為宜。

水利。如城河鹿溪堰永濟溪長蛇壩長鼻壩西邊板壩巾竹壩上街壩淤頭溝東

坂溝九曲溪箬壩大賢壩馬跡壩金錢壩等。其灌溉田畝。多少不一。

耕用牛力。耘用人工。耕或一次。耘則非三次不可。至農具。耕用犁。墾用鋤。惟犁全部木製。鋤以鐵製。質輕易於搬運。構造簡單。摩擦力大。又有耖耙器。祇用一人一牛。均能細碎土壤。勻平地面。耘鋤器。陸田則有錢鏟耨耨鉏等具。水田則有耘盪耘刮等具。以上各具。價值低廉。購置極便。至於漁具蠶具。則甚稀少。

官荒不過三十餘畝。民荒則逾量數倍。無人墾治。縣農會設立苗圃一所。約三十畝。爲樟桐茶子皂樹之類。復創辦模範森林一處。離縣城五六里。名曰操場岡地方。約計有八十畝。所種皆竹木桐櫟松杉茶子等類。南鄉一帶。地土高寒。茶葉出產極富。俗呼仙霞龍井茶。每年由江山運往衢縣龍游嚴州出售。爲數不少。祇以種戶不甚研究。各鄉未能推廣。故產茶之利。一時未易普及耳。

邑本山鄉。僅有小溪而鮮陂塘。間有於塘內養殖魚類者。每年春間。向江西採販魚苗。蓄於池內。日以人糞食之。二十日後。放入塘內。食以蘋草。至次年春。分養各塘。冬則捕之。大者約有四五觔。小者亦重二三觔。漁業大概如此。至於畜牧。亦無專營事業。野居牧牛。山居牧羊。亦農家兼營之事。惟牧豬養鴨。則到處皆有。

農產物主要者。爲粳米糯米大麥小麥菽麥大豆小豆等類。至於普通種類。爲黍玉蜀黍膏粱落花生瓜蔬菜芋馬鈴薯蘿蔔甘蔗麻棉花菸葉綠茶等類。以本地所產之食品。不足以供給人民之需食。歷來仰給於江西玉山縣。源源輸入。方不致於缺乏。

田業有大根小根兩種。買田者爲大根。卽田主。不自種而出包與人種者。爲小根。其包種之人爲佃家。佃家與田主。有押攬交租關係。其押攬錢。卽認爲小根田價。故佃戶得以小根過頂。佃人向田主包種。秋收穀熟。上

田每畝交租一石六斗。下田交租八斗至一石不等。惟有一種惡習。佃戶欠租。積年不繳。抗租風潮。日盛一日。往往因小根致釀命案。層見迭出。且有買主買田。不能換佃。致爲惡佃把持。此農業習慣上之宜改良者也。至於驅除預防災害蟲病等方法。大率用石灰壅田。既能殺蟲。兼可救水冷之病。團體。舊有縣農會。此外禮賢鄉茅板鄉鳳林鄉壇石鄉大陳鄉賀村鄉。共有農會六處。惟鳳林鄉創辦模範森林一所。辦理頗有成績。工業。無出色之工作物。惟城鄉所出之麥桿扇麥桿辮。差強人意。鄉間農家婦女。取麥桿細編之。可製扇及草帽。因無大資本家出而組織工廠。因之銷路亦屬有限。次之爲針釘竹製器梳篦篋席雨傘扇香筆墨燧炮油光碗粗缸錫銅器鐵器木雕刻器普通磚瓦粗製紙稻草紙愛國布粗細夏布手套洋襪等。至外來者。惟衢縣輸入木器爲多。

工作一道。例收藝徒。惟藝徒須貼補藝師伙食。全年至多不過二十元。若

習藝所學徒。則伙食概不貼補。師弟頗有感情。藝成之後。藝徒如願從師。必須酌議薪工。工廠。除習藝所外。有紙槽瓦窰碗廠石灰廠等。

商業。前清道光間。頗爲繁盛。福建浦城。往來貨品。悉經於此。商賈雲集。挑販載途。城之東北門外。均設市場。咸豐以後。閩貨由海洋航行。商家亦避勞就逸。昔之盛者。一蹶不振。至今不過稍有起色而已。

市鎮。城區有南門街中街下市街等。其他清湖鄉峽口鄉鳳林禮賢石門長臺保安官溪廣渡等處。店雖不多。亦均各有市場。入境貨。以煤油爲大宗。南貨次之。鹽布又次之。鋼鐵窰器又次之。出境貨。以竹木柴板土靛方高紙麥桿扇桐油棕爲大宗。豐稔之年。五穀亦有出境者。紹甯之布。廣豐之菸。他如南貨洋貨。由清湖而過江西者尤多。以上各商。本地人居多數。

商販運貨。出進均以清龍埠爲中心點。如鹽布南貨藥材洋貨京貨自下江來

者。必經此埠。方能入境。其靛青棕紙竹木糧食運售下江者。亦必由此經過。惟菸葉進自玉山者。須由西鄉陸行。不通水道。其運價或由上海杭州衢州江西廣玉等處。運入與運出。略有低昂。錢幣行情。視衢縣爲轉移。故漲落不能一定。

各處市面。有市日習慣。其市日雖各處不同。但均以陰歷計算。如城區以二四七九爲市日。清湖鄉以一六爲市日。峽口鄉以四九爲市日。石門鄉以三八爲市日。壇石頭鄉以五爲市日。大橋鄉以四八爲市日。其各處歸賬。均以年底爲限。

鑛業。一前經探採之鑛。茅板鄉游溪壩豆湖清湖鄉泉家壠東壠降泉井山。新塘邊鄉石後三角坵虎巖山。清湖鄉東儒村一帶。禮賢鄉石后虎崑山。仕陽鄉煤嶺人仙洞。以上各鑛。均係產煤。開採屢止。二現在探採之鑛。煤鑛石灰鑛兩種。煤鑛間或鑛苗不旺。石灰鑛則大陳鄉趙家鄉大溪灘鄉。均

有人採燒。三未經探採之鑛。聞茅坂鄉政黨祠堂山前烏祀山南塢衆山。尙有煤鑛。又禮賢鄉狀元山。亦有煤苗發見。尙未開採。

第五十二篇 常山縣

考常山。三國吳名定陽縣。晉改稱信安。唐改稱常山。宋復改稱信安。元初仍稱常山。明清以後仍之。疆域。南至進塘。與江山縣分界。東至北淤。與衢縣分界。東北至燈盞坑。與遂安縣分界。西北至上界首村。與開化縣分界。西至草萍鎮。與江西玉山縣分界。廣袤勻計約八十里。從前自治區域。分城區東魯鄉輝埠鄉芙蓉鄉芳村鄉招賢鄉敷教鄉聲教鄉君子鄉萃文鄉關莊鄉定陽鄉繡溪鄉宣風鄉登豐鄉。共計十五區。面積三千四百八十九方里。田約佔十成之三。地約佔十成之二。山則佔十成之五。全境有戶二萬八千七百。有丁七萬九千九百八十七人。有口五萬四千三百三十五人。河流之最大者爲常山港。一名馬金溪。卽錢塘江南源之上流也。此港發源

開化。東南流經華埠鎮。過上界首村入常山境。又東南流。繞縣城東北而南。轉而東流。至招賢鎮。過北淤。入衢縣境。由入境起至出境止。計長八十九里又九十丈。帆楫往來不絕。惟砂磧甚多。交通欠利。其餘如儻溪虹橋溪菱湖溪芳溪。則皆發源北境高山。南流與常山港合。南溪硯山溪。發源南境高山。北流入常山港。此數溪均不滿三十里。水淺灘多。素無舟楫。大雨後用竹筏。以運貨物。人民有利用水力。製成水碓以舂米者。

山脉。來自南嶺。由粵閩贛三省交界處之仙霞嶺右幹。蜿蜒而北。繞常山西北兩邊境。分向開化遂安兩縣而去。北入吳會。東抵錢江。俱此山所發脉。境內之山。皆分支也。故山勢常由西南而東北。西北之山。有葉溪嶺馬金嶺馬冠嶺。最高之處。達五千四百尺。南境之山。亦爲仙霞嶺右幹之分支。由江山來。繞常邑邊境。迤邐而東。入衢縣境。最高者爲木棉嶺。

亦達五千餘尺。

山勢。由西南斜向東北。仙霞嶺右幹之南北支。環繞北西南三面。故此三面。俱爲山地。地勢極高。中央沿常山港之兩傍。則平原地與邱陵地相錯雜。地勢稍低。然以浙江全省而論。則常山爲最高之地。西門外有大路。一直通江西玉山。爲商販往來運貨之要道。而亦兵家所注重之哨線。去城二十里。高山橫亘。大路經過山巔之處。名曹會關。兩山對列。作虎牙狀。以一丸泥封之。任萬馬不能仰越。又西二十里。有草萍鎮。形勢彷彿。爲贛浙交界之處。若以浙拒贛。封草萍之關。則萬騎可遏。進戰退守。兩收其利。城東北六十里。有迴龍橋。爲通遂安之要道。四面窮源僻壤。層岫疊嶂。僅有一路以通行旅。橋旁壁峯插天。橋下深潭百丈。水行怪石作獅吼聲。亦爲險要之地。稍南有芳村鎮。設有保衛團以遙控之。城東南四十里。有招賢鎮。背山面河。形勢扼要。爲商賈必經之地。東方之門戶也。

。亦設保衛團以防守之。

氣候。夏季熱度。有高至華氏表一百十度。有時夜間降至九十度以內。冬季溫度。最低至二十度。然亦有時升至四十度以上。氣候不和。斯雨量不得勻稱。林木稀少。而風力遂畸重畸輕。以致藉雨潤者。轉而因雨衝壞。因風媒者。反受風之摧殘。

土性過燥。四鄉略有不同之處。東鄉土壤。稍肥而精。佔全縣十成之三。宜茶皂橘瓜花生甘蔗等物。南鄉土壤。瘠薄而粗。佔全縣十成之二。宜桐子蕃薯苡麥等物。西鄉土壤。厚肥而粗。佔全縣十成之三。宜蓮子豆粟蕃薯等物。北鄉土壤。瘠薄而粗。佔全縣十成之二。宜橘子花生小粟等物。以上各種及禾稻大小麥苞蘿油菜等。均爲固有之物。與土性尙屬相宜。

農民智識甚淺。故耕耘播種採集等事。均係舊法。惟依時力作。尙有經驗。收藏方法。有力者用磚倉板倉。貧家則用插箴爲之。惟收藏各種子。必

須用大甕小壘。裝固封口。蓋以爐灰。使勿洩氣。法極精密。至農具。蠶具則用葡籃山架桑葉鈎。墾具則用兩齒鋤及尖角鋤。刈稻具則用鎌刀及稻桶。漁具則用細網及筏簍等。

地土乾燥。不產柔桑。故四鄉向無桑田。亦無蠶戶。近年農民於場圃隙地。略種數株。由婦女養蠶少許。所獲之絲。每戶三四兩。自創辦蠶桑傳習所及模範桑園。從事提倡。人民漸知養蠶方法。種桑利益。至蠶之種類。祇有春蠶一種。採集種籽者有之。販賣者則無。栽桑一節。人民雖具有此種觀念。尙未十分踴躍。現蠶業傳習所停頓。蠶桑事業。益形冷淡。

官荒無幾。民荒約有五萬餘畝。概係沙淤石積。故無商人承墾。苗圃暫試辦模範森林。共有五處。佔民荒地二百二十畝。分栽松杉柏椿等樹。植茶方法。尙未改良。惟東南鄉橋亭地方。頗有進步。惜未得烘葉方法。故其

味雖佳。其料甚粗。其價亦賤。

邑在山谷間。絕少湖蕩。故無養殖水產場所。捕魚多在常山港之文圖灣。礮石潭湖澄潭朱家潭象湖潭招賢潭等處。全仗天然魚利。並無先養殖而後捕獲之者。然間有民人就私有山塘。向江西境買鱖鱧魚花養之。平時割草以飼。長則捕之出售。業此甚少。出產無多。至於河港所出之魚。祇有鯽鱖鯉鯽數種及其他蝦蟹等類而已。至畜牧事業。各農家多養耕牛以代人力。近山之家。間有以牧牛之便。兼牧山羊。但非專營。爲數無多。僅供本地食用。

農產物。如稻麥豆苞蘿粟瓜花生菜菓麻棉花綠竹筍蓮子菸草糖蔗蕃薯蘿蔔山藥百合等。以人口十三萬餘計之。田內出產稻麥之數。共約有五十八萬石。每人歲食穀七石計之。尙缺三分之一。除以附屬苞蘿蕃薯粟麥等補助外。全仗江西玉山縣運來接濟。

鄉民已產自種者。固屬不少。而佃種者。必須托中人。向業主立攬約後。方得前往耕作。上田每畝付押攬洋二元。中田一元。下田則無。所產花息。有交租及分穀兩種。若交租。至秋收時。佃戶將穀晒乾。照議定數目繳納。如分穀。則業主臨田均分。至於預防災害。農民就私有山塘。掘深澗水。以備旱荒蟲病。如春季兩麥。每多黃粉病。係一種極細害蟲。受之遂成麥殼。農民對此。亦無法挽救也。團體。舊有縣農會一處。

工業。習藝所製出之藤器毛巾。頗爲出色。次之則爲器具與飲食兩項。關於器用者。如家織棉布夏布棉紗帶棕索棕衣雨傘燧爆粗製紙本尖紙鹽篋油篋麥草扇麥草帽油燭等。關於飲食者。蕪油菜子油桐油茶油桐油米酒燒酒蔗糖藕粉葛粉菸草掛麵等。至外來者。如瓷器錫箔草蓆火柴等。僱傭工人。每日供給工資飯食。亦有估定工數。先得訂約包定。然後造作。如是則工作之期有長短。而包定之銀。亦無增減。工廠。舊有平民習藝所一處。

惜已停閉矣。

地稱兩浙首站。爲皖贛湘粵閩交通必由之路。故從前經過貨物。日夜不絕。市面頗稱繁盛。自海禁開放。市面頓形衰落矣。

市鎮。一城市。爲浙贛兩省水陸之要道。二招賢市。爲通衢縣水道之中心。三芳村鎮。在常東北。爲通遂安陸路之要區。入境貨。以標布破石布紹布石門布洋布花尖紙錫箔紹酒紅白糖黑棗紅棗鹹魚海帶爲大宗。出境貨。以茶油菜油桐油桐油麻油蓮子橘菸葉掛麵煤炭本尖紙等爲大宗。至經過者。以瓷器油鹽菸箱茶篋夏布白糖各棗鹹魚等爲大宗。以上各商。本地人徽州人各居其半。

商販水道。有由常山港來。自開化至上界首村之文圖灣入常山界。計三十九里半抵縣城。又五十里至北淤毛村灘。入衢縣界。河道深處約一丈餘。淺處僅二三尺。運貨概用民船。

陸道計分四路。一自常山縣城西出四十里。至草萍鎮。入江西玉山有大路。修築縣界。又四十里。至玉山縣城。運貨用小車騾匹及肩夫。現由商人呈浙贛當局。就原常玉汽車路。自常山三里灘直達玉山縣城。計本年內。即可通車。二自縣城東左出發五十里。過猷閣嶺。又三十里。過東嶺。卽鷲嶺。又二十里。至界牌。入遂安縣界。又九十里。至遂安縣城。運貨用肩夫。三自縣城東右出發三十里。過停潭嶺。又二十里。至官莊。入衢縣界。又三十里。至衢縣城。運貨用肩夫。四自縣城西北出發。三十五里。至上界首村。入開化縣界。又四十五里。至開化縣城。運貨用肩夫。其運價。水運較輕。陸運較重。市面錢幣。銀元銀角銅元。均隨時漲落。交易。間有鄉間小店。以米穀雜糧兌換者。代辦則有買賣牙行。主顧平日信用好者。逐月賒貨。至年終結算還洋。清同光時。此種交易頗大。近以金融困難。年漸收束。現盤交易。惟巧是趨。做主顧者。實居少數。言語均用

常山土話。惟四鄉來者。以江西南豐話爲最多。

鑛業。前經探探者。有球川銀針山之銀鑛。惟銀質不佳。且含銻甚多。白石街之銅鑛。其質尙好。惜無資本家從事開採耳。現在探探之鑛。僅有石煤一種。如靈湖源口外坵芳村棋盤山各處。均係土人用土法開採。所產之鑛。可供燒石灰及燃料之用。

第五十三篇 開化縣

考開化。卽古之姑蔑地。秦置太末縣。屬會稽郡。宋置開化縣。元屬衢州路。明屬衢州府。清因之。民國廢府制隸省。疆域。自東至南。界連遂安常山兩縣。自南至西。界連常山暨江西之玉山德興三縣。自西至北。界連江西德興及安徽休甯婺源三縣。自北至東。界連安徽之休甯暨建德遂安三縣。東西廣二百二十里。南北袤二百三十里。周圍九百里。面積六千五百五十四方里。區域。分七鄉三十六都。田地山蕩。共佔三千二百五十頃。

全境有戶三萬零二十八。有丁七萬八千三百六十七人。有口五萬四千八百七十人。業農居十分之七。工商業居百分之二五。士不過百分之五。

四面環山。無長川大河。所有溪潭。盡是沙灘積石。工業上利用者。惟築堤捍壩。設置水碓舂米。地勢。東南高而西北低。陸路交通。必須逾山過嶺。少平坦路。北如北苑山。西如苦夢山。西北如廣洞山等處。皆爲防務上險要之地。

氣候。地處高燥。寒多熱少。溫度最高九十六度。最低二十二度。濕度最高七十度。最低四十度。霜雪甚多。河水易漲易涸。故易受水旱之災。

全境山多田少。田土甚鬆。足以栽種稻麥以及苞蘿等雜糧。或種蕃薯棉花。或種芝蔴苡麥。亦甚適宜。惟瘦峻之山。多石少土。不能種高大樹木。間種茶桑。尙屬相宜。

農民每年自立夏前後。以牛耕鬆其土。分秧播種。秧長成苗。耘去非類。

糞以肥料。至禾熟登場。不露積。刈而脫其穀。藏於倉箱。再種豆麥或菜蔬等物。所用農具。不外犁耙耩鋤等器。用以翻掘泥土。鎌刀稻斗用以收穫禾稼。灌溉則用戽水車。或以牛牽。或以腳踏。或以手挽。均便於用。價亦不昂。漁業器具。用網者多。亦有用鐵叉戳者。蠶業不興。間有幾家養蠶器具。亦皆舊式。竹製蠶篩木製蠶架而已。

漁獲物。惟鯽魚較多。鯉魚次之。他如白魚鱖魚等。間亦有之。因河水漲涸無定。價之貴賤。由魚之多寡爲升降。畜牧牛豕雞鴨。不過農家隨意養而己。

農產物。以稻麥爲最。粳穀糯穀大麥小麥苞蘆膏粱豆次之。民食。年歲順成。足以自給。卽稍遇歉收。以雜糧補助之。尙可支持。

佃田習慣。農民先立契約。其田種稻。或種雜糧。一經約定。卽由佃戶主持。田租於收穫後。或錢或穀。照約收給。團體。舊有縣農會及鄉農會。

工業。惟木雕工作物。精緻細巧。頗有可觀。至尋常之木工石工金工及縫紉等工。不過築造房屋。製作日用器具。至外來者。綢綾緞疋漆類陶器食鹽紹酒等物。必由他邑運入。

僱傭工人。技術間有精粗。工價或有高低。料作自備。供給飯食。工價以日計。料作由工匠置備。論件計價。不給飯食。此爲包工承辦。大則成立契約。小則限日約期。皆以目的物完全成就爲程式。不拘何工。俱不外此。

商業素不發達。全邑市鎮。祇有二處。一華埠鎮。一馬金鎮。兩鎮比較。華埠較盛。入境貨。以鹽糖布疋窰貨爲多。出境貨。以茶葉杉木靛青爲大宗。商販。西南至江西德興玉山。西北至安徽婺源休甯。惟至常山一路。水道約計九十里。水運僱船。船價無定。陸運僱挑。挑力較貴。市面錢幣。銀元銅元。隨銀價之大小爲漲跌。鈔票除華埠一鎮有少數通用外。餘均

不適用。各商店購辦貨物。若非自行製造。必由別處運購。洋貨則多從省垣置辦。其餘或自衢州或自紹興甯波等處批發而來。市上交易。通用銀元銅元銅錢三項。

第五十四篇 建德縣

考建德設縣。始於吳。洎唐徙睦州治於建德。而建德遂爲首縣。宋改睦州爲嚴州軍。明初又改爲嚴州府。建德仍爲首縣。清因之。民國府制已廢。縣名仍舊。疆域。水路東至桐廬縣。以冷水坑爲界。西至淳安縣。以禽坑爲界。南至蘭溪縣。以荷花塘爲界。西南至壽昌縣。以菱塘爲界。北至分水縣。以胥嶺爲界。東南至浦江縣。以井硎嶺爲界。西至淳安縣。以洞關爲界。西北至分水縣。以峽嶺爲界。東西廣一百三十里。南北袤一百三十里。以前自治區域。分城區。東鄉泰明區。南鄉親睦區純善區。西鄉龍山區光華區。北鄉芝川區仁行區。共計八區。面積五千零三十七方里。額田

十六萬三千三百八十七畝零。額地八萬四千二百六十畝零。額基八千三百八十畝零。額塘六千三百十四畝零。額山五十萬八百六十八畝零。全境有戶二萬一千四百零五。有丁六萬一千二百九十人。有口四萬六千六百二十六人。業農者約十分之六以上。業工者約十分之一不足。業商者約十分中之零五。業鑛者不過二百餘人。

山脈。北境爲黃山。南境爲仙霞嶺。黃山東入浙省。由淳安分水來。而盡於新安江之北岸。跨江而南。系屬仙霞嶺。其經流曰東陽江。東陽之水。由衢州來。衢屬山川。俱係仙霞遠脉。其環繞於浙省之西南隅。與江西分界者。皆仙霞嶺也。新安東陽兩江。會合於縣南。而水勢益盛。下流之七里瀧。兩岸皆山。江面甚窄。水流爲之束而不暢。平時尙可宣洩。一遇山水暴發。金衢徽嚴四郡之水。建瓴而下。悉屯聚於縣城左右。漲及南門雉堞。此建德切膚之痛。無可捍禦。非徒農業受損。卽城廂內外。不宜工廠

。不宜行棧。工商業之不振。亦一大原因也。

地形如水溝。西高東下。南北又若仰盂。中央最低。故百道泉源。皆匯流於新安江。東趨出境。自東至西。逐漸增高。地居衝要。表裏河山。節節可守。乃浙東之屏蔽也。

氣候。據華氏寒暑表。溫度最高九十七八度。最低三十度。冬天不甚結冰。雪亦甚少。四圍皆山。海風不到。日受山氣薰蒸。人民多濕毒之症。民間種稻甚早。收穫亦早。利用梅雨。然利之所在。害亦隨之。山水暴發。下流宣洩不及。即泛濫爲患。田禾盡淹。迨天氣晴朗。其水一瀉千里。山土鬆疏。水分不易久含。故平疇尙不待雨。而此間早已憂旱。此水旱之災。較諸他處爲多。

田係黃壤。土質甚佳。然田僅十之二。地則土質亦不惡。山則砂礫土。最爲礱瘠。然居十之七。田種水稻。地種豆麥雜糧。山種樹木。間有茶葉。

每遇發水。新安江驟增三四丈。腹內山溪。亦滿坑滿谷。低田卽成澤國。迨外江水洩。山澗亦涓滴不流。蓋地勢傾斜。高下殊絕。溪水既不適於用。所可資以灌溉者。惟湖塘是賴。其最稱天然利便者。在山泉下注之區。層層壅遏。曲爲堤防。爲此間特別優點。然爭奪鬥毆。亦由此興。每遇山泉奔放。上流隨意洩水。不免以隣爲壑。而下流怒泉源枯竭之時。壅遏不放。甚至偷挖上塍田中之水。以致糾葛紛紜。最難理論。湖塘之利。有一家私有者。有數家共有者。有官爲修築者。於田中挖一小水坑。以備旱時取水。此私有之塘。山水下注。閘而蓄之。瀦而爲湖。沿湖之田。利益均沾。此共有之湖。費出民間者爲民有。費籌於官者爲官有。然爲數無多。面積亦小。故利益未能普及。

人民注重農事。鄉紳上戶。幾於無家不耕。惟經歷太深。轉無進步。從前大難初平。人丁稀少。但求種植及時。卽可天然收穫。各持廣種薄收主義。

。不用肥料。至今亦然。卽間或用之。亦不過厩肥腐草。至農具均係舊式。如耜鎌犁耙扒抄水車風車稻桶篾簞等物。價值不等。蠶桑素不講求。現在縣署左右兩旁。修築模範桑園一區。並創辦蠶業傳習所。以資提倡。官荒山有二十餘萬畝。並無商人承墾。城內創辦苗圃一處。計三十畝。北鄉設苗圃一處。計三十畝。模範森林。設在城北烏龍山。植茶方法。各鄉尙能研究。近年所穫茶利頗巨。種植之處。逐漸推廣。七里瀧產魚。鱖魚鱒魚。最爲著名。有漁戶常川採捕。瀧轄於桐廬者六。轄於建德者四。所產之魚。亦銷於桐廬者爲多。因下水甚捷。便於入市。若溯流而至建德。總須半日。天熱時。已不甚新鮮。此天然之利。無待蓄養者也。近城所產者。東西湖爲多。間有來自四鄉池塘者。爲數不多。漁具用網罟。隨捕隨銷。絕無販運出境。亦無醃漬出售。至畜牧。農家餵養少數牛隻。藉用耕作。飼羊甚少。因市上不售羊肉。銷路無多也。

農產物。如糯穀秈穀粟玉蜀黍大麥小麥收麥青豆黃豆綠豆赤豆馬料豆蠶豆豌豆油麻等物。本邑糧食。向例不准出境。即以本地所產之糧。養本地人民。豐歉統計。羨補不足。數目相當。

農田。向有大租小租及歸戶之區別。大租指業主而言。錢糧由業主自完者。每畝歲納租穀一石。由佃戶完者。歲納租穀三斗或五斗不等。小租指佃主而言。每畝歲納租穀一石。歸戶指大小租合併而言。每畝歲納租穀一石四斗或二斗不等。蟲害以殺蟲劑除之。或用排水法治之。水害則大水暴漲。無法可治。團體舊有縣農會及北區西區鄉農會。

商業。向不發達。現在城廂內外。大小商店。一百二十餘家。鄉市亦有數處。小或三四家。多亦不過二十餘家。日市甚微。商家不敷開支。各兼耕作。其地點東鄉曰東關三都。西鄉曰洋溪。南鄉曰三河大洋。北鄉曰乾潭安仁。入境貨。以洋油土布洋布愛國布紹酒湖屏紙毛六紙燒酒紅白糖估衣

菸草燧爆等爲大宗。出境貨。以油麻黃豆青豆馬料豆茶葉杉木油菜青油皮油樺樹葉青蒿半夏松板靛青松段雜木柴炭桐油麻油棕山檀五倍子皮紙煤灰爲大宗。至經過者。以徽州之木及茶兩項爲多。

商販運來之貨。由富陽桐廬來者爲多。由蘭谿徽州來者少。運去之貨。均販至杭州寧紹而止。運價不一。市面銀幣與鈔幣通用。惟鈔票祇用中國銀行之浙江票。外省不用。銀元銀角銅元。隨時價漲落。商家向無行棧。陸續收屯土貨。以待客商之交換。大宗土產。其權利不在本地商人之手。如茶葉木料油蠟。或由出貨之家。自運銷售。或由京蘇客商。到山收買。本地商人。無收屯焙製之所。可見商力之薄弱矣。

鑛業。一前經探採者。東鄉楊家莊大塢山村。有小石鑛一區。係產青石。曾經開採。旋即禁止。二現在探採者。西鄉東銅官埠。有白煤鑛一處。現已開工採挖。三未經探採者。共有四處。一在西小洋莊銅山塢。係銅鉛硫

石鑛。一在西小洋莊陳家塢。係銅鉛硫石鑛。一在西小洋莊下黃山。係五金煤石鑛。一在嶺子塢。係銅鉛硫石鑛。

第五十五篇 淳安縣

考淳安。漢隸丹陽郡。吳析爲新都郡。晉爲新安郡。隋廢新安。設遂安郡。宋改淳化。屬嚴州。紹興初。改淳安。元明清至今因之。疆域。東界建德桐官嶺。西界遂安楊嶺。南界遂安安礪嶺。北界昌化銅坑巷獨石。東南界壽昌遼嶺。東北界分水塔嶺。西北界安徽歙縣深渡。東西廣一百七十里。南北袤一百五十里。從前自治區域。分城區梓桐鄉威坪鎮方新鄉臨岐鎮安樂鄉進達鄉清福鄉龍山鄉仁壽鄉。共計十區。面積八千六百五十二方里。計四百六十七萬畝。其中平地佔千分之七十三。山地佔千分之九百二十二。道路佔千分之二。河湖佔千分之二。沙塗不及千分之一。有稅地面積僅六十一萬六千餘畝。其中田佔百分之三十三。地佔百分之二十五。山佔

百分之四十一。蕩不及百分之一。全境有戶四萬三千一百四十五。有丁十一萬七千零六十五人。有口九萬九千一百零六人。其中業農者十四萬六千餘人。業工者四萬六千人。業商者四萬人。業鑛者四千人。

河流。幹流僅一新安江。上至安徽之屯溪鎮。下逮本省之錢塘江。一氣相貫。可通舟楫。支流頗多。可通小帆船者。惟東溪港。其他如梓桐鄉支流。威坪鎮之雲源及蜀口支流。方新鄉之小五都支流。南村富置支流。臨岐鎮之八都及十二都支流。安樂鄉之十五都及十八都支流。進達鄉之十九都源支流。清福鄉之清平源及賦德源支流。龍山鄉之太平源及武源支流。仁壽鄉之文源及阮家源支流等。均直接流入新安江。其水力堪爲築堤裝碓。運動水戽。灌溉田畝。及碾磨穀麥之用。山脈則隨水流蜿蜒盤曲。

地勢。多傾斜而少平坦。以表面約略窺測之。西北高而東南低。平面比較高度。不下一千五百尺。崇山峻嶺。高聳雲端。可據爲險要者。如東之桐

關朱池嶺。西之梅花洪萬歲嶺沓嶺。南之玳瑁嶺遼嶺。北之客嶺楊嶺等處。童山曠土。隨處皆有。

氣候。溫度最高九十度。最低四十度左右。風霜雪及冰雹等。雖可爲害。尙不至於成災。惟久雨久晴。易生災害。良以地處萬山中。疏泄無自。蓄水又難。一經大雨。水卽噴湧。苟彌月不雨。旋患亢旱。所有田地。皆賴天然之雨以滋長之。

土質。壤土爲多。粘土砂土尙少。平均計算。砂土約百分之一五。粘土約百分之十七。墟土更少。水田宜稻蓮藕芋甘蔗菽麥雲苔菜。陸田宜麥粟膏粱玉蜀黍油麻黃豆白豆飯芋草棉等。溝渠間多磊石。位置山麓。水流湍急而下。天造地設。不假人工。其築堤橫截。蓄水灌田者。隨處皆有。惟臨岐鎮安東鄉爲最多。本地田畝。藉築堤灌溉者。不下五萬餘畝。

農事悉仍古法。如水田之稻。係清明下種。立夏插秧。小滿耘田。處暑刈

收。陸田之麥。係霜降下種。三次耘草壅肥。小滿刈收。又玉蜀黍係立夏下種。三次耘草壅肥。霜降刈收。若肥田料。以石灰桐麻餅人糞及豬牛欄等糞。農具。蠶具用竹簞木架脚踏絲車等。墾具用鋤犁耙籬箕風車耕牛刈刀等。漁具用小艇網罟水車鷺鷥等。

蠶桑向不興盛。年產瘠絲。約共二千二百餘斤。除本地銷售外。零星運往他處。模範桑園。尙在籌辦。官荒山地。不知若干畝。民荒地亦不少。官荒山產。臨歧鎮安東鄉頗多。進達鄉仁壽鄉清福鄉次之。苗圃設於跑馬場。佔地十八畝半。模範森林在安坑源。現由苗圃兼管。舊有苗圃在楓潭洲。嗣因大水衝蕩。無一存者。

漁業。分家畜野捕兩種。家畜於仲春農隙時。購種子於揚子江畔。蓄養於塘。割草喂養。長而售之。野捕以小艇爲家。隨時網罟捕獲。至畜牧則農家喂養豬鷄等類。皆附產物。無專營者。

農產物。如秈稻糯稻麥玉蜀黍種稜桐子菜子茶葉黃白豆飯芋蘿蔔甘蔗草棉桑苧麥苧麻毛竹等。民食一項。東南田地多而食常不足。西北之民。田地少而食常有餘。蓋東南民多奢侈故不足。西北民頗儉約故有餘。實則東南民食。比較西北多多矣。

佃田辦法。賣實留佃者。謂之大賣。單獨頂佃者。謂之小賣。佃實均在者。謂之大小賣。大賣者。業主祇收租納稅。不能自行耕種。小賣者。佃戶祇種田償租。不能收租納稅。大小賣者。業主有全權。此一習慣辦法也。又有某甲以田地向乙某抵押銀元。祇償子金。不予耕作者。又有某甲以田地典質銀元。明定期限耕作。銀不起息。田不起租者。此又一辦法也。至於點燈驅蟲。施藥殺蟲。車水救旱等事。大致與各處同。

工業。惟茶葉桐蠟蜜棗黃肉等之製造。尙稱出色。洋莊茶葉。質味香厚。若能除去換灰下靛之積習。必爲海外所歡迎。本莊茶葉。能吸珠蘭茉莉花

香味較多。亦必能爲營口東三省所暢銷。洋莊年產約八千箱。本莊年產約五千二百筭。桐蠟年產約八千塊。蜜棗年產約四百桶。黃肉較川產肥厚。其出產數目。年約一萬餘觔。次之如桐油菜油菸染色縫紉土酒金銀器銅鐵器竹木石器醬貨漆器藥材豆油糕餅八月尖紙等類甚多。件數價格不一。機器工業。有機器縫紉與織襪織毛巾等。

工業習慣。僱工有論年計算。或論日計算者。長工工資。每人每年約數十元。短工工資。每人每日在二三角之間。無大小工之區別。待遇頗易。學徒以三年爲滿期。其第四年爲謝師。略給工資。

商業情形。以表面觀之。似較從前爲盛。如煤油標布甬布洋布蘇燒酒菸葉及紙捲菸木段柴板。每年添銷。爲數不少。又添設客棧茶樓酒菜館多處。而實際上反不如昔。因來貨價昂。獲利無多。生活程度日高。而生計日拙故也。

市鎮。西有威坪鎮。南有港口鎮。東有東園鎮。北有渡市鎮橋西鎮航頭鎮臨歧鎮等處。入境貨。以鹽糖洋油布疋南貨藥材菸葉各色紙張等爲大宗。出境貨。以茶葉米穀雜糧桐蠟水油松杉柏雜木柴板煤炭荳肉蜜棗白朮八月尖紙等爲大宗。至經過者。有安徽之洋裝茶葉杉木及雜貨等。均由威坪鎮入口。商販可分出入兩路。販出者。如茶葉販於杭州蘇州上海北通州天津營口等處。柴板木料紙張。販於蕭山之義橋及杭州上海等處。桐蠟油荳肉蜜棗藥材。販於上海漢口等處。穀販於蕭山之臨浦。豆麥販於安徽紹興等處。此販出之道路也。其販入者。如布疋鹽糖及南北貨京廣貨。均由上海紹興販入。菸葉藥材。由安徽江西暨本省之甯波紹興壽昌松陽等處販入。此販入之道路也。運脚。有以擔計者。有以舡計者。又有以件計者。更須分別貨物之貴賤。運脚之上下。道路之遠近。航路之難易而定。市面錢帶。銀元紙幣。按照數目所定相往來。尙無折扣。

鄉民交換。以囊台菜子換油。桐子換鹽。相沿已久。幾成通例。平日向商家告貸。多用口頭訂約。一俟秋收。即將糧食折價抵償。

鑛業。有銀鉛青錫兩種。蘊蓄甚富。一在梓桐源劍門山。一在里同。均先經開採。旋即停辦。又鳩坑源老林塢及牯牛塢干演坦與八都金竹坑口等處。亦有銀鉛青錫等鑛。此外如六都和村之銀鑛。富置源之錫鑛。牢山及商家源十五坑之鐵鑛。南村源王家巖之銅鑛。十二邵項村之硫化鐵鑛。均探而未採。至於肥田石灰之灰鑛。燒煉石灰之石煤鑛。已探未採者尙多。

第五十六篇 桐廬縣

考桐廬。秦漢富春地。吳析置桐廬縣。至唐卽縣置嚴州爲州治。旋州廢。復置縣。徙治桐廬鄉。卽今舊縣是也。開元二十六年。以僻在一隅。接應不便。乃徙於今處。去舊縣十五里。歷宋元明清。隸屬代更。而名稱不改。疆域。東抵富陽縣界。西抵建德縣界。南抵浦江縣界。北抵分水縣界。

東西相距八十五里。南北相距一百三十里。面積三千零四方形。區域。向分在城孝泉金牛孝仁水濱定安桐廬鍾山常樂安樂質素至德十二鄉。清宣統二年。籌辦自治。以常樂安樂兩鄉。併爲常安鄉。在城鄉。改爲桐廬城。計劃分城一鄉十。民國四年。劃分自治區域。以桐廬城孝泉金牛孝仁鄉爲第一區。水濱定安鄉爲第二區。桐廬鍾山常安鄉爲第三區。至德質素爲第四區。實計額田一千四百八十六頃七十三畝零。額地六百七十七頃九十五畝零。額山一千八百三十四頃八十三畝零。額塘五十一頃八十三畝零。全境有戶二萬五千九百二十九。有丁六萬六千二百十四人。有口五萬零二百九十八人。內農占二萬七千人。工占三千人。商占一千三百人。萬山夾會。衆水抱流。自徽州衢州金華三水合流而東北建德九十里至桐廬縣郭之南。曰桐江。自天目山發源。經於潛分水二縣東流六十里。繞郭而東南出桐君山下入於桐江。曰桐溪。一名橫港。地勢漸低。水流頗急。邑

民沿岸決流。造製水碓。利用水力舂穀磨粉之用。或有以此舂造紙竹料者。氣候。溫度最高爲攝氏表九十六度。最低至二十七度。邑中貫大江。江面狹小。上江一帶。或有大雨。桐邑卽遭洪水。故每年夏間。屢發洪水。沿江田禾。難免淹沒。

土質。以江南之定安孝仁江北之常安鄉爲最精肥。種植稻麥。收數頗厚。其餘各鄉。雖多種稻麥。然必多加肥料。方可有成。統計精肥約占十成之四。

沿江之田。全恃江水之灌溉。若雨暘不調。洪水暴漲。田禾易遭淹沒。除隨時設法補救外。實無人力可以防禦。腹地田畝。則以塘井溪流爲灌溉。凡溪水衝要之處。預築壩堰。以爲保護。如水濱之保禾壩。保衛鳳岡區。廬舍千餘戶。田地萬餘畝。保安壩。保衛居民數十村。田地數千畝。金牛鄉峙山莊之剪溪堰。灌溉田三千餘畝。而居民賴此堰保衛者。二十餘莊。

田畝既佔少數。而少數之田畝中。粗瘠者又占十成之六。自不得不加以資本。施適當之肥料與工作。使收成略得豐裕。未插秧以前。將田畝灌水。用犁耕遍。用耙使之平。用耖使之和。插秧以後。約二十日。施以石灰礬餅麻餅等肥料。用耙於秧間往復翻耘。使肥料調勻。根土疏鬆。此之謂耘田。二三次不等。農具。耕田器具有犁耙耖等件。鋤土用耖頭鐵耙。漁具。有柔絲網旋網大網畚箕網神仙鈎撩灰兜等。蠶具。有竹團及縲絲土機。惟蠶桑素不講求。北鄉之至德質素。雖有蠶戶。但均養春蠶。不知養夏蠶。秋蠶野蠶柞蠶。所產蠶繭。大都銷售上海各絲廠。其餘揀製白絲出售。現經創辦模範桑園一所。購種湖桑。以資提倡。

官荒五千三百三十餘畝。民荒一萬八千六百二十餘畝。民荒有各業主隨時開墾。官荒尙無商人承墾。模範森林。成立一所。以種松爲主體。夾種楊梅枇杷蜜桃等樹。種植茶葉。以南鄉之水濱金牛較多。葉味亦佳。銷售東

三省等處。

中貫大江。漁業生活甚夥。但均係天然產物。實無人工養殖。魚類鯉鯽鮪鮫鱸鱠以及蝦蟹蟹等。至製造。惟鮪魚多用糟。儲之罈內。固封出售。所出不多。

農產物。如粳米糯米大麥小麥玉蜀黍芋馬鈴薯蘿蔔菸葉綠茶蜜棗等。南鄉人稠地狹。北鄉地廣人稀。豐稔之歲。移粟於南。稍有盈餘。一遇荒歉。悉由金衢各屬接濟。

佃田之法。約分三種。一曰佃田。種戶預納佃租一年。折洋若干。簽立租票。載明年限。如業主欲另招佃戶時。得除租一年。或還原洋。一曰當田。業主將田當出一年。每畝約當價洋二三元不等。由種戶種收。不必償租。一曰租田。由種戶播種。收成若干。與業主均分。驅除蟲害。惟晚稻可用菸莖插入稻根。俗名菸榔頭。早稻則無效。

工業。工作物。不外粗笨竹木等件。如木床木桌椅箱櫥及竹櫥竹榻竹椅紅燭紙爆等類。

僱用工人。或由介紹人作保。或雙方面訂工價時期。待遇與家人無異。師弟關係。初時須寫投師約。至出師後。價值之多寡。須視所業之優劣定之。南鄉以手工業之草紙爲多。年約輸出百萬餘塊。約植三十餘萬元。俱係家人父子。於農暇時合作。工廠。舊設平民習藝所一處。現在停止間。他如水濱鄉之翻崗。孝仁鄉之石牆。則設有結帽女子傳習所各一處。修業二月。以結滿草帽三頂爲學費。畢業後。由所發給原料。結帽繳所取資。月可編結四五頂不等。每頂工資二元。城區則設潤華成衣廠。新新織襪廠。窄溪則設有源福織襪廠。質素之宋家。至德之袁川埠。則有女子職業社之創設。其內容分織襪毛巾成衣三部。惟規模狹小。又係鄉僻。未能發達。商業。惟沿江經過貨物。爲數頗巨。蓋自金衢起。至杭紹止。計程五百里

。而桐城正處適中之地。現有輪船往來。交通甚便。將來逐漸經營。開闢商埠。未始非一極好商場也。市鎮。南有窄溪鎮。北有黃村埠舊縣鎮。西有芝廬鎮。入境貨。以南貨布疋棉花洋油洋貨爲大宗。出境貨。茶繭柴炭草紙桐子石灰爲大宗。雜糧次之。至經過者。以木料柴炭穀米雜糧爲多。各商業。紹籍居多。本地次之。

商販。上自金衢。下達杭紹。均係商貨經過要道。但多非本埠營業。惟於分昌三縣來貨。間有與本埠交易者。運價高低不一。大抵以貨物之輕重貴賤。路途之遠近。隨時論值。市面錢幣。悉聽紹市。商家互通有無。稱曰交易。其鄉民上市。到店買物。通稱店官。客人間有謂主顧者。至代辦營業。有舶來煤油香菸等件。凡外國商人發貨來埠。本埠設棧代爲兜銷。略取手續費。名曰經理。交易時。語言最普通者。惟紹興話。

鑛業。前經探採者。北鄉皇甫家地方。開採煤鑛。名寶興煤鑛公司。嗣因

經費不足停辦。現有西村廟下老山坡白石鑛。南鄉外塢口北鄉皇甫家各煤鑛。北鄉煤鑛。曾經寶興公司集資探採。嗣因耗本。亦停辦。

第五十七篇 遂安縣

考遂安。秦漢名歙縣。吳分歙縣南鄉安定里。置新定縣。晉改新定名遂安縣。歷唐宋元明清。皆仍舊稱。民國因之。疆域。東北均界淳安縣。東以界橋爲界。北以楊嶺爲界。南界衢縣。以黃連嶺爲界。西界休甯縣。以白礫嶺爲界。從前自治區域。分城區東亭安陽大墅橫沿汾口。共計六區。面積四千五百六十三方里。田地山蕩。約占百萬畝之譜。其中山最居多數。全境有戶三萬三千六百九十二。有丁七萬五千二百七十二人。有口五萬八千五十五人。其中業農者約四萬人。業工者一萬三千人。業商者七千人。河流淺隘。其最著者。惟縣西之武強溪。迤東北流。至縣治。會合諸溪。東流入淳安縣境。至山脈亦以武強山爲最。環繞西南而多嶺。其水流自上

而下。便於裝置水碓。用以搗竹舂米。以代人工。

地勢。西北高而東南低。入境之路。除東通淳安道途尙平坦外。他如南之黃連嶺。西之白礫嶺。西北之大連嶺。北之楊嶺。皆爲險要之孔道。

氣候。溫度最高時。在華氏表九十七度。最低二十九度。霜雪之降得其時。則於稼穡有利。失時則害。且大風暴雨之傷禾苗。時有所聞。至水旱偏災。頻年迭見。

土壤。有粘土砂土雜土三種。其所配合之成數。隨地而異。最肥而精者。雜土四成。粘土砂土各三成。最瘠而粗者。粘土砂土各四成。雜土二成。概宜種植禾稻玉蜀黍大小麥菽粟油菜等物。

農事。耕用牛力。耘用人力。水作先犁次耙後耨。燥作先犁次耙後鋤。西鄉北鄉。人衆地稀。農作精勤。東鄉南鄉則稍遜。農具。墾具耕有犁耙耨。耘有田耙。鋤有羊角鋤長板鋤。耙有鐵耙草耙。收刈有鎌。車水有手旋。

車腳踏車。漁具有漁網魚叉。以上各具。皆係舊式。尙能適用。蠶具有蠶架竹筐。惟桑未發達。養蠶者少。業經創辦模範桑園蠶業傳習所。以資提倡。

水產物。有魚鱉鱔蝦等。魚之產於溪澗者。有鷺鷥沒水噙之。養於池塘者。有叉網隨水捕之。鱉用鑽。蝦用網。鱔則徒手捕之。畜牧惟豬牛鷄鴨。人多飼養。但無專營之家。

農產物。以穀爲主要。次則玉蜀黍大麥小麥菽粟油菜等。民食。年歲豐收。僅有十成之七。不敷之糧。概從湖墅及蘭壽各市鎮購運。以資接濟。

田地。業主佃戶。各具買賣之性質。佃戶不欠租。業主無自由管種之權。田則繳穀。地則分繳菽與玉蜀黍黃豆。租息之多寡。視土質之肥瘠爲轉移。至預防蟲病方法。從前治以石灰與毒藥。現已設立治蟲委員會。遵照昆蟲局治蟲辦法。分期辦理。其他如荒山中產有一種薇蕨。係天然植物。根

可磨粉。向來鄉間貧民。可隨意掘取。近因糧食騰貴。採掘者多。頗有山主出而爭執者。此可見生計之艱難也。

工業幼稚。普通之工作物。如木桌木箱木椅木樹木几木櫥木床木櫃木桶木棺泥磚泥瓦泥鉢泥瓶鐵釘鐵鋤各式鐵耙鐵鍋鐵窗柵石門圈石窗圈石片皮釘靴鞋箬笠錫燭臺錫酒壺銅面盆等物。

僱用工人。概屬口頭契約。待遇方法。供以膳食。並給工資。師弟關係。師盡教訓之義。弟有服從之責。

工廠。舊有平民習藝所。現因費絀停辦。近年城內開設電燈廠。附置碾米機。每日可舂米三百餘擔。甚爲便捷。

商業。因交通不便。運輸困難。加以水旱迭見。貿易減色。市鎮。除城區外。東有東亭鎮。南有安陽鎮。西有橫沿汾口二鎮。北有郭村鎮。然名爲鄉鎮。實則商店零落。不見繁盛。入境貨。以鹽洋油各式布疋京廣雜貨蘇

燒藥材爲大宗。出境貨。以茶紙靛松杉箬皮烏墨柴炭爲大宗。

商販。一由邑東水道。過淳安建德等縣往杭滬。一由邑北陸道。過休甯石埭等縣往皖南。至連脚。分擔脚水脚兩種。擔脚較貴。水脚較輕。市面錢幣。大洋銀角銅元之兌換。一律照市價計算。商人交易。有用錢幣。有用貨物。均屬直接。並無代辦。主顧除本地人外。餘則隣境之開化永康等縣人。言語亦無隔閡。

鑛業一項。從前探採者。一都地方有銀鑛一處。十六都九都均有銅鑛一處。在明季俱經開採。至現在探採之鑛。郭村區有錫鑛一處。又東南各鄉有一種石灰。土名探石。就近掘窰燒灰。白者爲石灰。可粉牆屋。次者爲霉灰。可作肥田之用。

第五十八篇 壽昌縣

考壽昌。漢爲富春地。吳置新昌縣。至晉始有壽昌之名。厥後或隸新安郡

。或隸陸州。或併入雉山。歷有沿革。疆域。東至建德界菱塘。南至龍游界梅嶺。西至遂安界黃連嶺。北至淳安界杜瀆。東南至蘭溪界賂山。西南至衢縣界鵝籠山。東西廣一百一十里。南北袤九十里。從前自治區域。計分九區。面積二千二百二十四方里。田約佔百分之二十。地約佔百分之十。山約佔百分之六五。蕩約佔百分之五。全境有戶一萬二千零四十一。有丁四萬零一百七十六人。有口二萬六千九百十五人。業農者約三萬二千餘人。業工者約五千人。商業約一千人。

溪流。發源於西鄉鵝籠山。自西至東。綿亘六十餘里。至東鄉羅桐埠。入建德大江。名曰壽昌溪。支流凡十四。長短不等。沿溪流多有建水碓以舂米磨麥。其水力堪爲工業上利用。

山脈。起自西鄉衢壽交界三元尖。分爲兩支。一支環繞東北出建德。一支環繞東南出蘭谿。

地勢斜形。西北高而東南低。其南與龍游接界處。則有梅嶺。其北與淳安毘連處。則有遼嶺。二者在昔。皆爲險要之處。

氣候。攝氏表溫度最高九十六度。最低二十八度。近年來未患風災。降霜之期。起自立冬。至次年清明節止。對於農業。無何等利害。孟春多雪。則麥不能發育。植物萌芽。亦受其損。霖雨多。稻必發蟲。夏多雨。豐年可卜。冬少雪。次年秋後多蟲。此種利害。詢之老農。僉云可信。

土壤。肥土約占十分之四。瘠土約占十分之六。精者約占十分之三。粗者約占十分之七。植物。地土則宜於稻麥荳黍麻菸靛青棉瓜蔬菜等類。山土則宜於松木杉木桐木毛竹茶葉苞蘆及茶樹等類。農民種植方法。近亦稍知研究。交換種子。以求播種之改良。

耕耘方法。稻田耕二次。耙一次。耨一次。至立夏節插秧。施肥三次。除草二次或三次。收穫期在立秋節左右。麥田耕二次。碎土一次。耙一次。

用治畦法。畦幅三尺。畦間相距一尺五寸。畦上離八寸許。點播麥子十餘粒。播種期間。在中秋後立冬前。施肥料二次或三次。除草二次。其種植各種蔬菜。播種及整地法。亦與種麥大致相同。黃豆則散布於稻田。青豆則植於稻根。苞蘆則植於山上居多。不施肥料。農具。整地用犁耙耨耨草。耨田耨。引水用牛車踏車手車。收穫用稻桶簞皮風車篋籬稻鎌。墾具用兩齒鋤磚鋤。蠶具有抽絲架催青器桑筐蠶簞。漁具有撒網扛網攔網魚叉。以上各具。大都沿用舊式。本地自製。價目亦廉。歷來使用。尙稱便利。蠶桑。境內素無成林桑樹。不過民間私有園圃。寥寥數株。卽有養蠶者。大抵墨守舊法。出產無幾。販賣方法。更不足論。茶葉大都植於山上。每年除草一次。初種時先行碎土。然後布放茶子。地處山鄉。四境皆無河港。而一脈溪流。驟漲驟落。水勢本無常度。其平曠原野。間有壅塘蓄水之處。係專爲車灌田禾而設。夏秋之交。時虞乾涸。

。故溪壑之魚。任民自由採取。出數甚微。至畜牧祇有耕牛豬羊。農家大都餵養。並無專營者。

農產物。如粳米糯米大麥小麥大豆小豆黍玉蜀黍茶葉菸葉棉花膏梁芋蕪等類。民食。年歲豐稔。可餘十分之五。

農業習慣。分民田客田二種。民田屬於所有權。客田屬於永佃權。須與永佃權頂立租批。每畝納押租洋一元。所有權之租穀。由永佃權負責。至驅逐預防災害蟲病等方法。菜苗遇有蟲蝕。以菜蟲藥毒之。稻禾有蟲。田中掘一小洞。夜間點燈。蟲爲燈所引。投水自斃。團體。有林業公會水利公會等。

工業幼稚。南鄉一帶。婦女雖知紡紗。然皆墨守成規。不圖改進。城市近已設有襪廠。因限於銷路。難期發達。其他普通出品。以花尖南屏爲大宗。至於竹木鐵器及磚瓦等。不過供應本地需用而已。

僱傭手續。陰歷二月以前。訂立口頭契約。預定一年。先付定洋一二元。二月二日上工。須聽主人指揮。至其他各項工匠。均係臨時僱用。或由工匠承攬。無一定之手續。工匠則有包頭夥計。生活工資。均歸包頭負責支配。包工僱用夥計。亦須先付定洋。其工作期間。臨時酌定。徒弟無論智愚。三年出師。三年以內。或酌給津貼。多少不等。

商業。在前清時。各商家與蘭谿錢莊通挪。尙能週轉。迨光復後。蘭邑錢莊時有倒閉。以致金融恐慌。商業頗受影響。市場有二。城東有更樓鎮。城西有大同鎮。入境貨。以食鹽布疋爲大宗。南北雜貨糖食等次之。出境貨。以米穀雜糧茶葉紙類爲大宗。菸葉桐油苧麻等次之。

商販。各項商品。運自省城及臨浦等處者。船舶經過富春江。達新安江羅桐埠。換轉運城內。水道三百四十餘里。販自蘭谿者。旱道七十里。運脚。水運視水勢之大小。臨時估給。羅桐埠運至城中及大同鎮更樓鎮。按

路程加減之。蘭谿挑力較貴。市面錢幣。鷹洋龍洋。無分高低。價格漲跌。由各商集議。商人交易。春借秋歸。屆時結束。言語多操土音。鑛業。西鄉管村橋地方。有鑛山一處。因奸商竊採。勒令廢止。

第五十九篇 分水縣

考分水。秦屬富春縣地。吳屬桐廬縣地。唐析桐廬七鄉。置分水縣。五代因之。宋元明清隸建德嚴州府。民國廢府制隸省。疆域。東至新登縣。以席陵溪爲界。西至淳安縣。以塔嶺爲界。南至建德縣。以胥嶺爲界。北至於潛縣。以印渚渡爲界。東南至桐廬縣。以畢嶺爲界。西南至建德縣。以峽嶺爲界。東北至新登縣。以栗礪口爲界。西北至淳安縣。以隄礪嶺爲界。從前自治區域。分爲城區水安區招賢區振武區崇文區生仙區。共計六區。東西廣一百四十里。南北袤一百七十里。面積二千二百七十七方里。成熟田約三百十二頃三十四畝。地約三百九十五頃五十畝。山約五百三十三頃

四十七畝。蕩約三頃五十四畝。全境有戶八千四百六十九。有丁二萬三千五百二十三人。有口一萬六千七百零四人。

河流。由於潛縣天目溪。流至九排嶺。東南折流。西南至白山渡五里。自白山渡西南流。復折而東少北。至印渚渡九里。東南流至石壁山西四里。石壁山西麓南少東。流至中台村三里村東南流至河頭渡三里。渡東流至龍潭山北二里。東北流至望江嶺麓二里。東南流至糝口渡三里。東南流折而東北。至洛口村四里。東流至畢浦二里。畢浦東南流至界牌一里。入桐廬縣界。青坑溪自陽安嶺發源。西流至永興橋四里。橋西北流。折而西。至小紅嶺麓七里。麓北流。折而西。至青坑溪口五里。口東北流。至青坑口三里入昌化縣界。廣陵溪自大山發源。北流折而東少北。至雙溪橋七里。橋東流大堰一里。東少北流。折而北。復折而東流。三溪橋五里。入新登縣界。琴溪自北青山發源。東南流。至珠村十里。村南流。至石青橋外莊

三里。入桐廬縣界。訶舞溪自訶舞嶺發源。東南流。至太源橋五里。橋東流至章家塢五里。塢東少南。曲曲流。至裏飛山七里。山南麓東南流。至界牌四里。入桐廬縣界。

山脉。由縣治東行四十五里龍洞山爲起點。五里至北大山。十里至龍門山。五里至嶠山。十里至暨陽山。東行三至。至新登縣界。西接北青山。五里至長子山。十里至揚青山。五里至方魁山。五里至紫羅山。二十里至中台山。折東北。十里至蓮池山。五里至天井山。十五里至良梅山。十里至巨龍山。西行四里。入於潛縣界。由縣治南行四里。至九龍山爲起點。分東南二支。一東行十五里至方山。折東南十五里至石柱山。折西南二十里至大興山。五里至宋陰山。十里至橫山。折東南二十里至裏外飛山。五里至上河山。距二里入桐廬縣界。一南行十五里至設方山。與紫峯山相接。計十五里。西南十里。斜連回龍山。二十里至斛尖山。十里至眠牛山。眠

眠牛山東接天尊山大尖山。共計三十里。南行五里。入建德縣界。由縣治西南六十里之雲梯嶺爲起點。五里至道靜山。南行直接十里至南屏山。南行二里。入淳安縣界。由縣北行一里之雙峯山。西接羅迦山。五里至青牛山。直入析山。計十五里。又五里至八角山。折而南。八里連左源山。西南十五里。迤邐接泥尖山。五里至屏山。二十里西達雲板山。分爲二支。一十里西接徐連山。再折而西北五里。至朱岡山。五里至長連山。三里入淳安縣界。一十里東連楮山。折而北上十里。至湯安嶺仙姑山。五里至寬道山。再十里西接鐵鏈山。西北行四里。入昌化縣界。由於潛折入縣北九排嶺。西行五里至婆狗山。五里至收山。又五里至高潭山。七里至白雲山。十里至烏頭山。十五里至十計山。西行五里。入昌化縣界。

氣候。全年平均溫度。約攝氏四十度左右。雨以春季爲最多。夏秋次之。冬季最少。近年大雪時見。霜則自霜降至翌年清明常有之。雹却不多。風

有和暴之別。雨多則被淹。晴久則患旱。秋季暴風。最爲農害。

土壤最瘠。砂土佔十分之六。肥土佔十分之四。農田祇宜早稻。地內宜苞蘿豆麥蒞青及桑柘等樹。

春耕夏耘。悉用舊法。農具。普通施用之墾具。有犁耙耖鋤及耘田耙。收穫用鎌刀。漁具有魚網魚罩魚簪魚鈎魚簍。以上各具。均係本地製造。價值亦廉。蠶具有桑剪刀蠶筐蠶籠蠶架及縲絲之木輪。人民對於蠶桑。尙有普通智識。桑秧蠶種。採自餘杭。成繭後。售繭居多。間有希望高價者。縲絲待售。

官荒民荒。類皆畸零。城東附郭五雲山一處。計面積三十畝。係屬官荒。該山闢爲苗圃。由農會採集各項種子及樹苗。分畦栽種。植茶素用種子法。以清明下子。出芽後。勤加培壅。四五年後卽採摘。近來逐漸推廣。運銷北京。爲最良之品。

農產物。以稻麥玉蜀黍爲大宗。年產稻約二萬八千餘石。麥約五千六百餘石。玉蜀黍約二萬九千六百餘石。桐子栗子茶葉桐子等爲特產物。年產桐子約五萬八千餘觔。栗子約四萬二千餘觔。茶葉約六十六萬餘觔。桐子約二千四百餘觔。民食。豐年堪以自給。一遇收成歉薄。卽須輸運接濟。佃田。由佃戶向田主賃定。年交租息若干。雙方應允。出立租約。每年秋成。交清租穀。遇有災歉。請田主看明減讓。如有無故欠租。田主稟官追繳。並得收回另招。至逢災害。潦則排去積水。旱則車灌以救。設有蟲病發生。以桐油洒入田內。或用石灰糝於稻根。及時救濟。團體。舊有縣農會及招賢生仙各鄉農會。並於高小學校內附設農業課。以開兒童農業之智識。

商業。自民國以來。交通便捷。逐漸發達。然必以年歲豐歉爲標準。市鎮。有城市畢浦鎮百江鎮百歲坊等處。入境貨。以魚鯊煤油南北雜貨布疋爲

大宗。出境貨。茶葉柴炭杉木繭桐子桐油爲大宗。

商販。由分水至桐廬六十里。至富陽一百五十五里。至杭州二百四十五里。至蘭溪與杭州同。其運價。由分水至桐廬較少。至杭州則多。市面錢幣。銀元銀角銅元。均隨時價爲漲落。

第六十篇 永嘉縣

考永嘉。秦屬閩中郡。漢初爲東甌國。晉置永嘉郡。唐爲溫州治。宋以後爲溫州府治。民國廢府制爲永嘉縣。疆域。東界甌海。南界瑞安。西界青田。北界仙居。舊分爲六大區。一城區。二永場。三上河鄉。四下河鄉。五柵溪。六西溪。清末劃分自治區域。分爲城區永強會昌膺符鐘山承化水西西內仰山七都孝義臨江永安江北賢宰龍沙水東。共計十七區。東西廣一百六十九里。南北袤三百二十里。面積一萬二千四百六十五方里。田地約佔十分之三。山蕩約佔十分之五。全境有戶十六萬二千七百三十六。有丁

三十八萬二千七百九十一人。有口二十九萬五千五百八十五人。業農者居大多數。商次之。工又次之。

河流。支分派別。上下河鄉。由雄溪瞿溪郭溪三溪之水。匯於會昌湖。分流入江而注於海。永場之水。皆由三四兩都陡門入海。西溪柵溪。有大原小原。二水俱由永寧江入海。其來自處州青田。順流而下。與永境諸水同委而異源焉。

山脈。來自閩中。至查田而分。在甌江之南者。凡三大支。其北一支。自上戍至渚浦。沿北東行。環列九山。結郡城。稍南爲陽岙西山。西南爲三溪岷岡及華亭諸山。皆其脈也。中一支爲桐嶺。折而東爲吹臺慈湖諸山。至漁潭穿水過峽重起爲大羅山。磅礴數十里。至永場見海而止。南一支亦自桐嶺而分。迤邐東南行。結瑞安縣城。江北諸山。盡於羅浮。其在江東江北者。盡掛綵強岙。上通台之黃巖仙居。處之青田縉雲。雖有柵溪中界

。要其原則。皆相聯屬也。

地勢。控山帶海。利兼水陸。洵東南之沃壤。一都之巨會也。西南兩溪多山。形勢最高。平原之地故少。上下河鄉。地多平衍。並無欹斜。惟下鄉沿江一帶。地最低下。若論險要之區。海路如霓岙黃大岙三盤鳳凰山等處。陸路如柵溪箬鼻鶴乘上鄉之天長嶺。永強之龍灣梅頭等處。均當加意圖維也。

氣候。溫度最高爲華氏八十八九度。最低爲三十四度。濕度因海潮之變動。大約最高爲八十三度。最低爲六十三四度。霜雪不甚烈。惟風雨時所恆有。七八月每有颶風陡作。大雨傾注。田禾雜糧。受其害者頗巨。水旱偏災。間或有之。

土壤。近山之區多黃土。近海之區多沙土。就普通言之。概屬運積土。每百分中。含有細沙三十分。種植稻麥豆柑桔荸薺甘蔗等作物。均屬相宜。

水利。大概有四。在縣城內外者。以便運輸爲利。在河鄉者。以資灌溉爲利。在溪鄉者。以供飲料爲利。在江海者。以通輪舶爲利。就城內論。舊有錢氏子城。四面有濠。舟楫可通。運輸利便。城垣以外。東瞰花柳塘。南臨南湖。西路西湖。繞會昌湖。受三溪之水。分流貫注。惟北沿甌江。爲船舶往來之孔道。上下河鄉水利。上鄉有郭雄瞿三溪之水。合流入會昌湖。復與下鄉衆流匯合。東行而入於海。下鄉沿江一帶。舊有陡門三所。水湫九處。以保水利。惟沿江長埭。屢壞屢修。計有二十四萬畝田園。均受灌溉之利。又查各處水湫。年代久遠。多緣泥塗積漲。不能開復。所開復者。僅有蒲州中埠狀元橋三港。廟西二小湫已耳。上而溪鄉。枌溪大原小原二水。俱從東西入界。與李樟蓬小藤珍檔羅等入溪水合流而南。至潮際而進入甌江。西溪則有安溪荆溪菰溪各水。經浦通江。以上各溪。水清而澈。足供數十萬居民之飲料。至於甌江。上接青田。下達大海。潮汐往

來。日凡二次。輪舶入口。必須潮流上漲時方可抵埠。若大小海船。無論潮流順逆。均可行駛。凡沿江沿海等處。或築塘埭。或設陡門。以時蓄洩。如有修築工程。均由官紳合力籌款。以充經費。

農民耕耘方法。大都習常蹈故。惟勤於農事。加壅肥料。年計收穫。頗覺豐富。而其粗者。則稍遜耳。農具。普通之蠶具爲蠶籠蠶架蠶網等。繅絲概屬手繅。所出之絲。強半惡劣。是其缺點。近來間有以新法試養者。所用器具。如有桑刀桑篩桑箕桑篋蠶糠乾濕計改良絲車等之完備。則成績較勝。墾具有耜頭犁頭耨箕水車等。漁具有魚罾魚網魚鈎等。在海洋業漁者。無論緝贖釣贖。器具完備。尙無缺點。

蠶桑。向以西柵兩溪爲最。除桑秧由養蠶家直接購買外。其餘絲量。概由絲行售銷。人民對於養蠶。尙守舊法。

官荒。城鎮各處。大片之地絕少。惟永安鄉驛頭地方。尙有塗六七百畝。

該處爲處州十縣水所經流。一遇洪水暴漲。卽被沖塌。苗圃。指定西門外大校場內。約計數十畝。模範森林。於城區江北兩處。先辦第一第二兩所。此外公同設立者。膺符鎮有私立石川森林社。臨江鄉有培本森林公司。生活力頗強。

地濱海。多河流。故產魚頗夥。如枏溪之香魚。江心寺之子鱖。城下河之鯪魚。江頭之朱鮓。最爲著名。此外如鱗魚魴魚石首魚。則產於永強鎮。若鯉魚鯊魚。沿江一帶皆有之。產於內河者。以鱸魚鯽魚爲較多。至介屬則有白蝦蠶蝦蟪蠓龜脚江蟹等類。概產於永強鎮。惟田蟪則隨處皆有。復有石髮菜。亦生永強鎮附近海山石上。內江則無。水產物不可謂之不富。所惜者無人提倡水產學校。招集漁家子弟。授以養殖捕獲製造各新法。使逐漸改良耳。業漁者雖有數千餘家。類皆墨守舊法。如鯽魚鱸魚鯪魚等類。皆張網捕之。鯉魚魴魚。則以鈎餌釣之。有設網於浦口。俟潮涸而取之。

者。俗謂之隔浦。有乘一木簰。上列鷓鴣十餘隻。能入水取魚。恐其吞下。則以繩繫其項。使不能食。俗爲鷓鴣脚捕。以篙盪水者有之。以手擊柝者有之。所得之魚。如鱒魚鯉魚等。或以糟釀之。子鱗及香魚。皆宜乾製。甌人未有築成魚池。以專供養魚之用者。惟捕獲自能生長之魚。以充食品耳。

至畜牧。惟餵養豬牛羊之家。城鄉多有之。河鄉有蓄鵝鴨者。恃每日所產之卵。販之以糊口。故夜則聚羣鴨於船中。略給以飼料。日間則散放於河畔隙地。使自覓食。

農產物之主要者。稻則有京成早白。豆則有赤豆綠豆烏豆黃豆白豆淮豆。麥則有大麥小麥。菜則有芥菜白菜芹菜菜韭菜。草則有草棉田草。菓則有柑橘荸薺番薺茹絲等。民食。每年生產穀麥番薺及茹絲等。預計不敷約十分之二。此就年歲豐收者言之。若歉歲則不足尤鉅。

農民佃田。憑中向業戶承佃。立有租札。每畝大概交租穀三百觔。分作早晚二季清繳。如有欠租情事。悉聽業主改佃。此佃戶對於業主之關係如是。若預防災害。城區鎮海門外則有外沙陡門。迎恩門外則有西郭廣化二陡門。下鄉有石墩瞿嶼茅川三處陡門。永場有龍灣黃鐘黃石四顧四處陡門。每逢水旱。一啓一閉。蓄洩最靈。至蟲害。則有蝗蟲斷根蟲兩種。晴雨過多。間或生此蟲類。農民無法驅除。團體。舊有縣農會暨溫屬縣立乙種蠶業學校。

工業。如木刻人物石刻人物楹木石嵌屏龍鬚地氈足點臺鼎漆光木器籐製坐具綢簇花鳥銀鑄模型通草花卉刺繡掛紉皮製雨鞋皮製箱椅甌綢被面等。皆稱特色。普通者。則爲釘靴皮鞋線襪布襪緞帽禮帽學生帽雨傘腿帶絨巾土面巾棕蓆鑄花錫品鐵製織襪打辦機銀器錫箔土布被面絲線絲綉縐紗苧線苧

布鈞鈎木床木椅木棹木箱皮床皮椅皮箱皮橈竹椅竹床雨笠棕繩油紙燈籠土
烟絲酒類醬類豆類皮紙粗紙菜油麻袋紙篷磚瓦筆剪燧炮麻油糕餅燭肥皂香
粉篋盒紙盒籐椅籐床苧網坭罐鐵鍋粗碗等類。至外來者。如棉紗絲光紗各
種機器布疋愛國布絲錦緞芝麻呢電光紗嗶嘰呢香雲紗泰西緞光牙衣京紡摹
本緞呢絨毡毯毛織椅墊鏡面呢麵粉各種餅乾罐頭物食荷蘭水啤酒白蘭地酒
紙捲菸各種藥丹藥水牛痘苗天然墨硃砂印色白粉筆黑板拭膽寫板鋼針各種
油墨學校各種器具各種紙箋摺扇洋傘軋髮刀衛生衣褲牙刷痰盂煤汽燈紗罩
鐵床保險鐵箱洋式桌椅洋線純絲巾毛巾各種鞋脚帶各種絨呢毡帽草帽火柴
洋燭磁器水門汀玻璃瓶盒燈罩燈壺漆畫自鳴鐘花露香水花粉潤髮油洋油洋
布顏料洋靛等類。

僱傭工匠。其工資有以年計者。有以月計者。有以日計者。如有不規則之
行爲。介紹人與有責焉。待遇方法。各業之中。悉有成規。如甲業有薪工

而併留膳費。乙業有薪工而扣膳費。折中而論。留膳之薪工。較扣膳之薪工必稍低。藝徒從師。有以三年爲度者。有三年後須盡義務一年者。視學徒之技能如何。以觀感情之厚薄。團體。有平民習藝所。此外民立之各公司工廠甚夥。

商業。市鎮之最繁盛者爲城區。其次爲永強梧埭瞿溪狀元橋蒲州新橋白象等處。入境貨。外國之棉貨各種布疋綢緞呢絨五金鋼鐵銅條雜貨海味中國之棉貨各種布疋棉紗雜貨。爲數甚夥。出境貨。棕鮮蛋鴨毛紫牌魚膠薑牛皮豬油藥材柑土絲甌綢皮椅紙傘油紙布等類。至經過者。平陽南北港之茶。礬山之礬。處州之炭菸葉木段筍乾長梢茶油滑石桐油等類皆爲大宗。

商販。東至江海。水路直達。南至瑞安。水陸計程七十里。西至青田。一潮可至。計程八十里。惟北至柘溪。西北至西溪。山路蜿蜒。崎嶇難行。

至運價。約分水陸二種。陸路之運脚。較水路爲昂。若貨到地。則各貨有指定之班夫。價格較低。市面錢幣。以鷹洋爲正位。其原洋坤洋規洋。均有折扣。

商埠。約分三種。有外海之通埠。內江之通埠。內地之通埠。如朔門外甌局招商碼頭。輪船往來。由甌而滬而津。區劃甚大。交通甚便。加東門外新碼頭寶華碼頭。化魚港永川碼頭。輪船往來。由甌而坎門而海門。區劃次之。交通次之。此內江之商埠也。此外如東門至枏溪。西門至西溪。小南門至瑞安。雖有碼頭。小輪舢板。可以往來。區劃不大。交通不遠。此內地之商埠也。團體。舊有縣商會。另有公司董事會工會等。

鑛業。前經探採者。有溫溪黃山鉛鑛。鄭山鉛鑛。孫坑錫鑛。均曾經商民試辦。因經費不敷中止。以上三鑛。鑛苗甚旺。面積甚大。非組織鑛務公司。則利棄於地。殊可惜也。

第六十一篇 瑞安縣

考瑞安。秦爲閩中郡。漢初爲東甌國。唐析置始陽。改名瑞安。五季及宋因之。元升爲州。明清復爲縣。民國仍之。疆城。東至海十里。西至龍門山。泰順縣界二百里。南越飛雲江至平陽縣界十五里。北至航遊山永嘉縣界五十二里。東西廣二百一十里。南北袤六十七里。而積九千四百五十九方里。從前自治區域。分五鄉三鎮並城區爲九區後改爲五。城區以外。分東西南北四鄉。田地約占四千七百五十一頃。山蕩約佔一百零一頃。全境有戶十一萬三千八百一十九。有丁二十九萬八千五百四十三人。有口二十一萬九千七百八十七人。業農者十五萬人。業工者五萬人。業商者四萬人。河流之大者爲飛雲江。其源有二。曰大溪。曰小溪。大溪之源有五。發源於福建政和及泰順等處。先後併合。至澄水入大港。小溪之源亦有五。發源於處州青田及仙人屋白沙嶺等處。先後併合爲一。至潮至入小港。小港

至南口入江。大港至塗頭入江。兩港合後。盤行三曲至白塔。又行五里經縣南門外。又二十五里入於海。河流。分東西中三支。均發源於城北之集雲山。中支爲北濠。西支爲沙河。會於北濠。入北水門爲西河。東支爲東河。入虞池水門爲虞池河。貫通城內。匯合出東水門。是爲北濠。北流經東安橋爲豐湖。南通南濠。別支流至月井陡門入於江。豐湖下流爲東湖。東鄉諸山之水並注焉。東流至九里。北折行三十餘里至航遊。與永嘉河接。總名爲塘河。此通永瑞之河也。飛雲江南岸之河流。西起塘角。東達沙園。南入平陽。此通瑞平之河也。

山脈。自處州入縣界。越桐嶺。乃起雲峯山。行三十里至北郭之集雲山。是爲東支。以最近縣城爲第一支。從雲峯山東迤邐北行至吹臺山。轉抵帆游渡塘河。起大羅山。南行至石岡渡澗。起百家夫。此東支之分支也。自仙屋南行。下至北山爲第二支。在桐嶺之西。自石壁嶺行至巾子山。又分

兩支。左支行至金谷山止。右支行至梅尖山止。是爲第三支。自朱寮山至高樓山爲第四支。自牛山尖至枝山爲第五支。自萬盤嶺至白雲尖爲第六支。自福建入泰順轉入縣界。行至許峯山。沿飛雲江而下。至卓岙峯止。是爲第七支。爲瑞邑最南之支。此山脈之大概也。

地形廣而長。東臨東海。西南北三面多山。地勢西北高。迤邐東南而漸低焉。險要之處。飛雲江南岸大河。爲瑞平之孔道。大畧山徑。爲瑞泰之要津。港鄉之桐嶺。河鄉之航遊。爲永瑞之咽喉。古來用兵。每藉以爲防堵之所。論海防則鳳凰江橫二島。爲飛雲江之鎖鑰。餘如北關官山琵琶南鹿金鄉大岙四大嶼六處。尤爲海洋防衛之要地。

氣候。寒暖適宜。最高溫度在華氏九十度。最低三四十度。濕度最高八十八度。最低五十度。風霜雨雪。未盡失時。上中兩則田畝。早晚稻禾登場後。冬間可種蔬菜豆麥薯苔等物。收成亦佳。農民藉此花息。作青黃不接之

補助。惟地屬沿海。夏秋間時有颶風。殊爲農業之窒礙。

土壤之肥瘠。田園山地。河塘塗漲。各有不同。其於植物之宜否亦異。如田園土色黑而鬆。含腐植質十之五六。宜於禾稻大小麥瓜菜藍靛等類。山土色黃赤。含礦物質十之二三。經耕種後。可得腐植質以補益之。色略帶黑。宜種甘藷茶樹。加以油餅草灰。得淡氣與鉀。則可種蘿蔔。山港兩鄉。多種旱稜大小麥。如山土僅有礦物質。而無腐植磷鉀淡氣各質。則僅種落花生赤松烏桕桐樟之類。河塘土性。如城鄉各處。大略與田土同。耕耨令熟。施以畜糞。瘠可使肥。山鄉土性多含礦質。農民用溝泥和草。堆積腐爛。及油餅畜糞加入。種蔗頗佳。沿海塗漲。土性膠粘。其質微鹹。墾種時加以火泥草灰人畜各糞。可種甘藷大小麥豌豆棉花。惟種禾稻。則尙欠肥。山港兩鄉之塗漲。較之河鄉城區則稍異。城區河鄉。漁業蕃盛。沿海一帶。時有腥水滲入。大含磷質。山港兩鄉則無之。此山港兩鄉之農民

。所以用猪牛骨灰及羽毛之屬爲肥料。以資補益。近更有試用肥田粉者。又南岸之林垵。東鄉之羅陽等處。有改種柑桔水蜜桃蔬菜等類者。

濱海名區。水利較他邑爲勝。城之北門外。集雲山爲衆流之所滂。水泉由此發源。城東北建築二壩。使水自北水門外及虞池水門入城。迴繞城內四隅。從東水門出。與城外濠河合流。循東郊河塘。直達郡城。約七十里。近城洩水之口。爲小東門外月井陡門。迴繞曲折而通於江。諸鄉水道。如清泰羅陽。河流承溪源者。約八十餘處。集廣芳山之溪流入河者。約三十餘處。南岸嘉安嘉義。溪流分脈。支河通入港浦者。不可枚舉。

農事。於禾稻穫後。隨卽耕治。或用一犁。或用兩犁。耕後加糞壅培。以種豆麥蔬菜。因已熟土壤而肥沃之。以省來歲功役。若低下之田。冬季不種其他農物者。亦必洩水令乾。用犁深耕。使霜雪凍沍。此非特土壤得以鬆。兼可以殺盡蟲子。天時晴燥。則用腐草敗葉以燒治之。謂之火泥。此

亦古火耨之遺法也。如是。則來春種稻。苗易生長。凡稻田自分秧後。以手去草。塞入泥底下。使之腐爛。如是三四次。謂之耘草。種蔬果者。以鋤去草。一則去草令鬆而翻土。一則使草根淨盡。是亦耘之一法也。至農具。如蠶具有架簾網簾等類。墾具有犁鋤長鑿四齒釘耙水車等類。漁具有網罟等類。均係舊式。尙未改良也。

山港兩鄉。間有養蠶之家。然拘守舊法。不能改良。繭薄絲劣。以致織成紗絹。質粗而不滑。色黃而不潔。卽俗所稱之山港紗也。推原其故。蓋由於寒熱燥濕。察病預防。以及選種交蛾製種繅絲各法。毫不注意。知識未廣。風氣難開。爲改良計。必須設蠶業學校。爲之提倡。

官民荒地。山港二鄉爲多。河鄉次之。城區又次之。約計不下千餘畝。城區北湖勘岸。漲地約有三十餘畝。南喬外陶尖前荒地三畝餘。均經遵例報墾。又東郊萬松山民地。亦經植松千餘株。先農耨田及隙地約共十畝。播

種柏桑桐茶等苗。模範桑園。設在豐積倉舊址。地約八畝零。栽植湖桑。現計苗圃桑園。共有兩處。又南岸鎮河塘經栽植樹苗。並於寶香山民荒栽植赤松桐樟等樹。又於嘉義鄉荻埭司基及堂壟各處。官荒約三十畝零。經栽植樹木。剏辦林場。城區所有荒地。成片段者甚少。月井陡門墘岸。約三十畝左右。亦經剏辦森林。栽植桑柳櫻榕等樹。但地僻民頑。管理至爲不易耳。至茶樹出產。以集雲大羅聖井爲最。潘埭會桐等處次之。收子。在陰歷九月間。至來春二月下種。播種。有移栽穴種二法。辨土性。施肥料。及鋤治修整探摘諸事。尙屬合宜。

地處海濱。頗富鱗介。有黃魚鮆魚鱈魚鮑魚馬鮫鱸魷魚黃脊銀魚帶魚鰻龍頭魚弓魚火魚比目魚黃魴水母墨魚鱧魚沙蒜彈塗蟹魚鱒白魚望潮香魚金鯽魚文唇蟹蟾蚌唇眼龜脚淡菜蝦吐鉄等。畜牧事尙屬闕如。曾經有人創辦。因未能得法。徒虧資本。其餘惟孵化鷄鵝鴨雛。與農家豢養母菴及

耕牛而已。

農產物。如穀麥豆粟雜糧菜蔬果品麻棉茶櫻桑苧靛青竹木菸薑黃法夏等。民食豐稔之歲。穀物豐登。雜物充足。全境差足自給。一遭減收。飢饉現象立見。是以向藉客米以資支給。

農田向有兩季單季之分。單季者。以嘉安嘉義芳山三鄉爲多。因其地多山田。專種旱稜。(早稻名)其餘悉種兩季。佃戶每於冬季收成後。向業主賃種。出佃札於業主。作爲質信。每畝約二三金。其租穀上則每畝三百觔。中則二百觔。下則百餘觔。分爲早四晚六交納。(自一二五減租後頗有更改)若租穀短交。卽以佃札之金。照價扣抵。至雜糧概由佃戶收取。遇有災變。農民但知祈禳乞靈。不知臨事補救。更不知先事預防。實缺點也。團體。舊有縣農會。

工業。出色者惟彈捲棉機器一種。構造方法。頗爲精巧。作用亦頗靈敏。

木邑棉業竊商多購用之。客地亦常有定購者。次之則惟錫爲最。紙工如製造花燈中之人物花鳥。活動如生。然至今精是業者祇四五家。手工惟綢緞之花鳥及刺繡等品。但亦罕覩。他如清泰鄉南岸鎮所出之竹器。城區所出漆髹之木器。均屬出色。至普通者。爲金銀器銅鐵錫器石器陶器泥水篋纜大木方木圓木雕刻器色紙裱畫紙紮裁縫帽腰纏布襪靴鞋布疋繡花繪畫印刷玩具漆髹餅餌染色等類。若外來者。如縫紉機印刷器碾米機製麵機軋花機留聲機彈花機照相機風雨表時計寒暑表燥濕表圖畫儀器理化儀器風琴東西洋及江西福建平陽泰順各處磁器皮箱皮椅皮床籐床籐椅剪火箱風車風箱等類甚夥。

僱傭手續。及待遇方法。各有不同。民家僱用工匠。有照件計值。有按日給資。均僅供午餼小點。其同業僱用。長年計價。投師習藝。年須津貼伙食費。按年遞減。但遞減之率。亦視子弟工作之能否爲斷。大率三年或四

年爲學成之期。惟鐵染二業。免貼火食。此工界之習慣也。

商業。以今方昔。較爲改良。從前福建甯波各商船或漁船到埠。多由商客自覓行家。或由各行家自行攬攬。比年南門外設立各業公所。所有客貨到埠。均由公所中出爲主持。至各商回頭貨物。代辦亦由公所。如有各業行家向與商船交易者。亦可代爲運送。至言語一節。閩商到埠。各行夥友。多有能操閩音者爲之接洽。甯波船到埠時亦如之。故南門一帶。行家之語言錯雜。人亦南北不齊。此近年來商業之大較也。市鎮。如城區居民稠密。商賈輻輳。遂成巨市。自縣治左迤東至大東門。右迤西南折遞至南門。摩肩接踵。攘往熙來。晝夜不絕。附郭之處。自小東門外魚行前而西。繞過南郭。逶迤至西門外河頭。魚鹹小貨及南北貨商行林立。蓋以地屬飛雲江北岸大小衢衢之衝。甯閩船舶之所停泊。平泰及山港鄉往來之孔道也。東郊永豐廂及豐湖南北兩岸。各業店舖。彼此毗連。商業情形。亦屬繁盛。

。蓋是處爲由瑞赴永之孔道而又爲河鄉行人來往所必經之路也。此外各鄉市鎮。清泰鄉有汀田莘塍。羅陽鎮有海安塘下梅頭。南岸鎮有林垵孫橋。嘉安鄉有高樓柴橋頭。嘉義鄉有大畧畧口。來安鄉有曹村馬岙。芳山鄉有潮至彭埠。集廣鎮有陶山峴下沙岙。就中以莘塍海安塘下大畧等處。較爲繁盛。其餘各鄉。雖有一二小舖。不能齒於市鎮之列。入境貨。以魚鹹南北貨洋貨雜貨爲大宗。出境貨亦同。

商販。南越飛雲江抵平陽。而遠達於福建。西渡百丈口抵泰順。而遠至於括蒼。北循塘河。直接抵永嘉。間接抵玉樂。最遠則至上海杭州及甯紹等處。其餘肩挑負販之流。或分播於河鄉。或跋涉於山港。間有附漁船赴嶺海各島嶼者。範圍甚小。運價各有不同。飛雲江近有輪船三四艘。直放上海甯波。河南岸則有河輪。直達平陽縣境。往來永嘉之河輪。除原有通濟公司四五艘外。近復有新公司安平添置河輪數艘。裝運貨物。視件數而定

。航船運載茶葉江南米及各零星貨物。價值不等。市面錢幣。以大小銀元爲主幣。銅幣爲輔。團體。城區設有商會。此外有民立之漁業公所。山貨公司。花紗竹木柴米各業董事。

礦業。相傳嘉義鄉大羅山出鐵。究其實。出於青田西坑地方。離大羅四十里。又羅陽鄉大羅山。發現一種鑛。似銀非銀。地民紛往掘取。邑人以此寄英國化學家試驗化分。據云。此種礦質。含銀之成分甚少。未便開採提鍊。

第六十二篇 樂清縣

考樂清。漢爲永甯縣地。晉孝武時。始置縣。名樂成。屬永嘉郡。隋唐凡再廢再復。後梁間。吳越王奏改今名。宋屬溫州。元明清因之。民國廢府制隸省。疆域。東南至海。西南濱甌江。爲永嘉縣界。東北至盤山嶺。爲黃巖縣界。西北至柘溪桐嶺。爲永嘉縣界。從前自治區域。除城區外。縣

東分虹橋鎮大荆鎮溪港鄉蕩陽鄉芙蓉鄉白溪鄉新儒鄉南閣鄉北閣鄉。縣西分柳市鎮白象鄉盤石鄉翁垟鄉黃華鄉地團鄉長崎鄉萬家鄉豹與鄉萬石鄉後所鄉。共計一城三鎮十九鄉。面積四千四百九十八方里。田地山蕩約共有四十五萬三千四百餘畝。全境有戶八萬二千二百四十。有丁二十萬四千九百七十四人。有口十六萬一千九百四十四人。

河流。縣西各處。舟可四達。灌溉尙便利。然皆細流。縣東最遠僅達四十里。至烏石嶺脚止。過此均爲陸地。

山脈。來自括倉。入縣境西北爲正廣山。分兩支。一東行爲雁蕩山。一西行又分爲三。一爲白龍山。一爲後山。一爲白石山。水力堪爲工業利用。故有沿溪流引水築碓舂米砌缸浸靛及漂布之用。又有雁蕩山內大龍湫之瀑布。據專門家之估計云。可抵四百匹馬力。

地勢係長斜形。自東徂西。其廣二倍自南至北。東北及西北多山較高。西

南及東南濱海多平原較低。險要舊重磐石。設衛置戍。儼然甌江門戶。今則無軍用之關係。就盜匪論。海防以蒲岐海口爲最。陸防以大荆鎮之楊公岙。芙蓉鄉之西谷。白石鄉之東岙爲扼要。

氣候溫和。溫度最高爲華氏表一百一十度。最低三十二度。大風時作。稻禾初花時遇之。則大受損害。久雨禾稼有淹沒之慮。每年七八月間。必有大風大水一次。幸陡門多。宣洩尙易。雪不多靚。近年以蘇彝士運之後。貿易風因之變更。冬季亦時見雪。但不大耳。農家惟望多霜。以殺蟲種。

土質。大別可區爲粘土壤土沙土三種。粘土最精肥。宜禾稼。壤土次之。宜園蔬。沙土又次之。宜山木甘藷。

高原之田。多沿溪流以注之。或用桔槔戽水。平原率多用龍骨車。灌溉田畝無數。溝渠塘瀆。創鑿先後不一。其時間最近。工程最鉅。有竹嶼壩清

河陽塘二處。管理方法。除沿海陡門。置有閘夫外。大抵無專員主持。如圯廢。則由紳董募資興修。

農事。山多種甘藷。近溪則墾田。僅插晚禾一次。平原則秋晚兩次。耕田之法。清明浸種播穀。立夏插秧。半月後補插晚禾。大暑早禾熟。立冬晚禾熟。早晚兩禾比較。則晚禾種者較多。甘藷五月下種。苗生藤蔓。剪而分插。至十月掘藷。刨爲絲曝乾。貧家率資爲餼糧。又平原於晚禾收穫後。多接種豆麥蔬菜。農民終歲勞動。山闢梯田。水耕鹵土。就人力而論。其精勤蔑以加矣。農具。類別頗多。計鐵製器有犁耙板耜耨耨錐鎌刀草刀。木製器有水車稻桶稻篷稻桶拔河泥桶壅桶。以上各具。尙均適用。漁具。在海船有蝦播網。又名振網。及鐵鈎鐵釣木插鐵插等。內河除手網外。有罾篋扞蟹篩等名目。罾具以蠶業未發達。故未完備。間有翁埤磬石兩鄉中。從事蠶桑。其所用蠶具。有蠶扞及縲絲架而已。

官荒頗多。然均爲高山礮瘠之土。人民所棄而不報墾者。民荒亦不造林。有二姓林業。頗有動機。苗圃及模範森林。尙待擴充。茶均植在山園。分畦排列。中則種蘚。係分秧栽插。生長聽其自然。鮮加澆壅。故茶葉味薄。惟產於雁蕩山者。香味甚郁。年銷江蘇。秀南棧發售者。有一萬八千餘元。

邑境外海內河。漁捕甚易。故水產物無養殖場所。魚類。海以黃魚爲最多。(卽石首魚)次則鱉魚帶魚鱸魚鱠魚鯪魚白魚鰻魚鮮魚章魚魷魚及烏鯽鮫魚望潮彈塗等。河以銀魚爲最佳。餘有鯽魚鱒魚鯉魚鱸魚黑魚鮓魚鱉魚鱔魚泥鰱等。溪以香魚爲最貴。餘有細鱗溪鰻等。介類有江蟹蟾蠩田螃花蚶白蛤蠣勾蛭子田螺蝦蟳蜆香螺等。畜牧大抵兼營。惟牛羊豚菴鷄鴨間有專飼。

農產物之種類。如穀甘藷茶葉靛青等。或本地食用。或販運出口。民食。

豐年產穀。約有二百萬石而強。本地自食。當餘三分之一。卽歉歲亦不致十分缺乏。

佃戶種田。須向業主先立扎約。並付保證金。從前每畝僅納二三元。近年漸增。上田或至十元。欠租則以保證金折抵。間有數鄉佃農可以自由覓替。名曰盜倍。其倍耕輾轉增加。因而牽掣。致業主無權收回另佃。租穀秋晚禾分交不等。蟲病之驅除。注水器灑以油。篝燈其中。引蟲飛來斃之。此外則祈神祓禳。由迷信所致。至預防方法。惟先於冬日犁土受霜。以絕蟲種。團體。舊有縣農會一處。現已取消。另組織縣農民協會。又各鄉區農民協會。亦已紛紛成立。

工業。工作物之出色者。縣西有竹工出品。以細韌篾絲。織成聯幅牌匾。及茶壺箱香煙盒之類。頗爲工緻。爲溫屬所獨有。普通者。如銀器鐵器銅器木器磚瓦麵粉醬酒糕餅等。至外來者。綢緞布疋紙墨筆硯盃盤碗盞等皆

是。

僱傭工人。由人介紹。無保證。無契約。有以年計者。有以季計者。更有出品時期。爲僱用之限度者。如孵坊鷄鴨蛋焙烘不宜之際。謝去藝師者是。待遇無軒輊階級之分。收用學徒。率以三年爲期。期滿出師。重要之工技。習者須貼膳食。平常則無之。間有至第三年轉給學徒以津貼者。工廠。有平民習藝所一處。又有民立之肥皂廠織襪廠各一處。又城區虹橋。已有電燈公司開辦。

僻處甌北。交通不便。商業本不興旺。大荆毗連黃溫。舊尙繁盛。台船趁墟。貿易頗多。自海門商埠興闢之後。日漸退化。縣東有市日。或三八日。或三六九日爲市日。市鎮之大者。縣以東。虹橋大荆二處。次者芙蓉白溪蕩陽三處。縣以西。柳市白象二處。次者翁垵磐石白石三處。入境貨。如煤油洋紗藥材南貨絲織品布織品菸紙等。均爲大宗。出境貨。米鹽最鉅。

。靛青茶葉蕃薯絲麥魚鮮毛猪次之。鷄鴨蛋亦爲出產之一。年銷滬上。約六七十萬元。商販。自城中至館頭。有汽輪行駛。自館頭至永嘉。亦有淺水輪行駛。一日轉回。商旅稱便。又虹橋迤北清江渡地方。近有台輪經過暫泊。可以直達上海。至運價。水路以船計。或以件計。價值不一。自虹橋至大荆。陸行百里中且越嶺。臨時以輕重忙閒估計。無定例。市面錢幣。墨洋最通行。角洋次之。惟浙江之新單角。福建之旗角。廣東之新老兩種貳毫雙角。均不適用。

商人貿易。率用錢幣。惟柑橘荸薺米粉乾魚鹹等貨。常挑售鄉間以易穀。現無代辦商人。主顧囿於境內。外地僅穀米靛青或來定購。言語。除大荆二三十里內與台州接壤。略帶官音。尙易領略外。餘所操方言。與永嘉語同。甚難通解。

第六十三篇 平陽縣

考平陽。吳爲安陽地。晉置始陽縣。更名橫陽。隋省入永嘉。唐復置橫陽。吳越更名平陽。元升爲州。明清爲縣。今仍之。疆域。東極大海。西界泰順笠帽山。南至福建福鼎縣海濱鼠尾礁。北至瑞安縣散嶼。東西廣一百五十里。南北袤二百十五里。面積計一萬七千一百五十一方里。從前自治區域。分城廂萬全小南江南金鎮南港北港蒲門。共計八區。田地約佔十分之六。山蕩約佔十分之四。全境有戶十四萬八千零二十七。有丁三十八萬七千七百一十八人。有口二十六萬七千八百六十四人。農業居十分之五。工業居十分之二。商業居十分之一。漁業居十分之一。鑛業約百數人。南北港蒲門爲山鄉。萬全小南江南爲水鄉。而以玉蒼覆鼎望三洲山爲最高。河流則南港之靈溪藻溪莒溪。北港之順溪。皆源出縣西南。入於鰲江。濱海一帶。入海小流甚多。

地勢。縣城居羣山之中。無險可守。其最隘要處。海疆以南麂爲第一重門。

戶。鎮下關爲第二重門戶。熬江爲第三重門戶。陸路以南港之分水關。江南之大漁炎亭江口。北港之水頭。萬全之瑞平分界處。均宜扼守。

氣候溫和。溫度最高占十分之三。最低占十分之二。而濕度亦隨溫度爲比例差。風霜雨雪。與農業利害。息息相關。當夏禾將穗。秋稻方華之際。若遇颶風霪雨。則摧折零落。百穀將無收成之望。冬季霜雪時降。來年得免蟲災。可期豐穰。蓋無螟螣蠹賊之憂。始有多黍多稌之慶也。

土壤。萬全江南小南金鎮等處。地勢平衍。厥土肥沃。產穀豐富。南北兩港蒲門等處。羣山環繞。厥土礮瘠。大抵肥沃者占十分之五。瘠薄者占十分之三。平原宜稻。山谷間多種蕃茹。

濱海之區。大水多而亢旱少。故疏濬江河。修築塘堤。最爲要政。縣治以北之萬全鄉。其地平衍。河流深廣。民田引漑。力半功倍。河東西分流。經緯吠渚。舊各爲塊。此利彼害。宋時倡築陡門於沙塘。以洩諸村之水。

時其啓閉。向之私埭俱廢。自後永無水患。縣治以南爲陰均陡門。宋時築土堰於陰均山麓。外禦鹽潮。復興水閘三間。以備水潦。

農民耕耘。大抵墨守舊法。一遇水旱。則秋收歉薄。糧食不敷。每遷徙於本省之杭嘉湖。蘇皖之常吳廣德各處。藉資餬口。農具。墾具用犁鋤。蠶具用篋爲籬。漁具則用網。率皆粗舊。

蠶桑向例視爲副業。沿溪河一帶。雖有桑樹栽植。然占地既屬無多。成績自難優美。且所植野桑。葉大莖粗。以之飼蠶。多不適用。近年地方人士。每有購買湖桑。加意栽植。乃養蠶新法。不甚講求。植桑之家。轉多虧蝕。故仍無進步。

幅員遼闊。地少山多。農田約計五十萬畝。而官荒占百分之一。民荒亦占百分之一。近年雖有商人承墾。但荒地尙多。墾殖非易。設立苗圃六處。創辦模範森林二處。生活力頗不弱。植茶方法。亦知加意改良。

濱海人民。以漁業爲大宗。捕獲則用網。網有大小二種。製造則用鹽醃晒作鯫。或用酒糟之。魚鱮曝乾爲膠。魚鱈晒乾爲翅。蝦則炊熟爲蝦皮。或晒乾爲蝦米。其大者名金鈎。蠶子則晒燥爲蠶乾。製造雖無成法。大致不外用鹽醃透曝乾。使之經久不壞。至畜牧無人專營。不過尋常家畜。加以參養而已。

農產物。主要在稻。稻有二季。曰秋稻晚稻。秋稻有早秋遲秋軟骨秋之名。晚稻有龍秬黃糯紅芒秬晚之別。民食尙足自給。中稔之年。八口之家。可以無饑。而南北兩港以及蒲門等處。地少山多。民多種植蕃茄。以補穀食之不足。

工業。製造土碗工廠有三處。一係南港鎮焦灘地方。一係北港鎮順溪地方。一係小南壘城地方。共計碗窑十三所。其餘工作物。均屬瑣屑。

僱傭工人。均以口頭契約行之。訂有年限。限滿後。雙方同意。再行續訂

。待遇方法。伙食由僱傭者供給。至投師學藝。亦用口頭契約。以三年爲度。間有補貼膳費者。藝成後方可自由。無何等拘束。

阻山濱海。交通阻滯。各鄉鎮均自爲風氣。商業不甚發達。惟古鰲頭逼近江口。外省外縣之帆船。時有進去。商業差盛。蓋鰲江上游。可通南港北港二鎮。下游出江口。卽通大海。惜入口之處。江水稍淺。須俟潮漲時。淺水汽輪。方可進口。

市鎮。如城廂鰲江宜山金鎮水頭街靈溪橋墩礬山街沿浦鎮下關錢倉。尙稱繁盛。至榆城觀美赤溪蕭家渡蘭松垵鶴溪山門馬站蒲門騰蛟堡詹家埠。均屬偏僻。入境貨。以棉花洋紗洋油火柴藥材洋廣貨豆麥豆餅顏料紙洋靛靑綢緞布疋南北菓品爲大宗。出境貨。以茶葉明礬爲大宗。土碗江南布牛皮菸葉甘蔗雨傘鐵毛猪牛隻魚鮮次之。茶運銷上海乍浦硤石。礬運銷上海台州富陽寧波。土碗運銷甯波及他埠。

商販入境。由陸路大率運自溫州。經過瑞安。始達縣城。再由縣城分運各鄉。間有由海運至熬江北港南港江南蒲門等鄉者。爲程雖捷。第風濤海盜。在在堪虞。出境亦分陸運海運二途。惟海運須請護送。方免危險。運價因交通阻滯。運費不等。市面錢幣。素以鷹洋爲本位。龍洋雜洋。均須貼水。隨時漲落無定。輔幣以湖北廣東福建之銀角爲最通行。

商人貿易。均以貨幣計算。每屆茶市。外幫客商。到溫州買茶。均由本地茶販代辦。又甯波商人來平邑買礬。均先指定某窰代辦。礬之上品者。向無一定主顧。惟下脚礬作肥料用者。每年二三月。均由台州富陽客商。來平採購。言語以甯波台州福建等方言爲多。團體。舊有縣商會及熬江商務分會。此外另有茶葉公會礬業公所漁業公會染業公所及四明公所等。

鑛業。前經探採者計三處。均屬銀鑛。一係歸仁鄉四十都焦溪山。一係崇政鄉五十一都天井洋山。一係宰清鄉四十二都赤巖山。俱明永樂間開採。

今考歸仁鄉四十都。業已劃歸泰順管轄。至崇政鄉五十一都宰清鄉四十二都。卽今北港鎮。該鎮封閉已久。現在深探之鑛。以鑛爲大宗。鐵次之。明鑛產於南港鑛山地方。每年產額。少則六七十萬。多則百萬。各窰組爲振華有限公司。約有二十窰。鐵鑛產自南港莒溪地方。業此者多係本地佃民。每日挑取溪流鐵沙。淘汰鎔鍊。獲利有限。至未經探探之鑛。查蒲門鄉馬站地方。發見一種鑛石。金光耀目。質甚凝重。曾有人將該鑛沙寄至上海化學家化驗。聞係銅鑛。

第六十四篇 泰順縣

考泰順。自前明置爲縣。舊時屬瑞安平陽二縣境。其城區舊名羅陽鎮。義翔鎮。舊名義翔鄉。均爲瑞安所轄。歸仁鎮。舊名歸仁鄉。爲平陽所轄。當有明中葉。處州有葉無敵之亂。閩境亦匪亂頻仍。干戈擾攘。經年始已。於是巡撫孫原貞奏請設置縣治。而處州之景甯縣。閩省之福安縣壽甯縣

縣。亦同時設置。蓋取景泰安寧之意也。泰順縣治。極偏於西。其西南境。距壽寧縣不過五里。蓋當時設縣之初。不過爲禦亂起見。本無政治上關係。有清一代。國家視同甌脫。數百年來。地不加闢。而戶口既日就孳乳。降至今日。居民生計維艱。已演成蕭瑟之現象矣。疆域。東南與閩之福鼎霞浦福安壽寧接壤。東北與舊溫屬之平陽瑞安接壤。西北與舊處屬之青田景寧接壤。犬牙相錯者。凡兩省八縣。從前自治區域。分城區義翔鎮歸仁鎮。計一城兩鎮。面積五千八百八十八方里。有糧田約七萬零二百零七畝。又地一千六百九十三畝。又山六百八十四畝。荒山不計。全境有戶三萬七千八百零一。有丁十萬一千八百二十三人。有口六萬一千四百二十人。農業居多。工商不過百分之二。

全縣皆山。並無河流。各山脈又無絕大瀑布。雖山溪濛繞。均不能爲工業之利用。離縣城之東北隅六十里。有名百丈口者。水陸通衢。往來之孔道。

也。地既高峻。處建瓴之勢。下有溪港。潏洄曲折。順流而下。經瑞安而瀉於海。卽所謂飛雲江也。再由瑞安取道運河。而達永嘉。其地則舟楫可通。商人販運貨物。皆取道於此。自百丈口起。至瑞安止。計程二百四十里。舟楫下行。快則二日。慢約三四日。溯江而上。快則四日。慢則六七日。至於險要。則有分水關。爲秦順平陽暨閩之福鼎三縣交界之地。一旦有事。以兵駐紮其地。可以睥睨一切。

氣候。居浙閩兩界之間。溫度頗宜。但重巒疊嶂。地形過高。一遇風雨。氣候卽變。依華氏寒暑表推測。最高在九十六度。最低在二十度。秋八九月之間。稻禾登場。最忌狂風。經旬不雨。禾卽枯槁。田畝俱在山間。下流之水。不能上灌山田。倘遭旱一月。卽生特殊之害。

土質類多砂石。肥土僅用百分之一二。其地宜種竹木茶甘藷。此外香菰藥材。頗操勝利。竹木兩種。出產本多。但艱於運輸。竟成棄材。

山水灌注。自成溪港。本天然之水利。其可灌溉最下之田畝。爲數甚少。農民耕耘頗勤。但墨守成法。不知辨別土宜。交換種子。故一切種植。均無特別之利益。所用農具。有耜鋤犁鏟之屬。蠶具墾具漁具。因無此種事業。亦無此種器具。

官民荒山爲數甚多。並無商人承墾。模範森林。已創辦三處。

水產物。惟與瑞安連界之近水各處。間有捕獲。然亦時有時無。每觔需洋三四角不等。畜猪牧羊。均係農民兼營。保護皆照習慣方法。

農產物。如糯穀早穀晚穀秈穀蕃茹絲竹筍茶大小麥菸葉等。惟茶出產稍大。近年竹木柴炭。出產亦盛。一方取道洪口百丈口。以達瑞安。一方取道交溪以抵閩。如能培植森林。則材木不可勝用。而獲利頗饒。無如祇知砍伐。遠近彌望。皆童山濯濯。將來卽區區竹木柴炭之收入。亦必枯竭難繼。每年糧食不敷甚鉅。全賴茹絲豆麥以濟不足。倘遇水旱。尤爲可慮。

農民佃田。每畝年交租穀二百五十觔。次下之田。以次遞差。至少必有二百觔之數，佃戶出立佃札。并無保證金抵押。如業主有變更。或佃戶有欠租時。聽憑改佃。至遇旱災。最難補救。蟲病等患。除以桐油洒澆外。恆以迎神祈禱爲驅除之方法。

工業。西北鄉設有紙廠數十處。東鄉洪口設有碗窰二處。所製之紙。皆係土紙。所製之碗。瓷料甚劣。價格亦低。此外如銅鐵竹木織布織蓆等工作。產額無多。年計不過數百件。至外來者。如溫州之絲光布鞭爆及皮製藤製櫟椅。洋貨中之火柴肥皂牛油燭燈洋襪鐘表等類均有之。

僱傭工作。有長僱短僱之分。長僱者按年給資。短僱者按月或按日計算。受僱時。雙方口頭允可。並無契約。待遇尙優。督工亦嚴。至待遇藝徒。與僱工不同。不免有視同使役者。藝徒學藝期滿。感情極洽。或仍受僱工作。或自營生業。均聽其便。工廠。舊有平民習藝所。久已停辦。

商業。從前與近來比較。適成反比例。昔年百貨。皆由閩之福鼎壽甯輸入。近則皆由溫運泰。轉販福鼎壽甯及處州之景寧各縣。商業較昔爲盛。獲利亦頗多。此由時勢變遷之故。以市鎮而論。惟百丈口洪口兩地。爲商人會集之區。入境貨。以洋油布疋魚鹹爲大宗。出境貨。以紙箋茶葉爲大宗。至經過者以牛皮藥材食鹽爲大宗。以上各商。福建及溫州處州皆有之。商販。由東陸運六十里至百丈口。乘舟販往溫州。由南陸運八十里至壽甯縣城。由西陸運百餘里至景甯。皆崇山峻嶺。道路難行。此外東南行至福鼎。西北行至青田。皆山路險峻。程途有百餘里之遙。故商販往來遲滯。蓋由於此。運價按舫計算。市面錢幣。時有漲落。紙幣通用。且多貯藏。以備帶出外用。

第六十五篇 玉環縣

考玉環。太平寰宇記。始載玉環山。古名木嶼。一名木榴。一名地肺。孤

懸海中。舊爲樂清太平兩邑分轄之地。明初倭寇爲患。徙民內地。久等珠崖之棄。至清雍正間始展復。設同知。稱玉環廳。民國改廳爲縣。疆域。東環鹿島。西達烏洋。北至楚門小閘。南抵黃坎二門。歷分三大部分。曰江南。曰江北。曰海山。而山盤島爲海山區中面積最大者。挺峙海中。旁附小島。出入均坐帆船。凡遇風浪。行駛爲難。頗不便焉。從前自治區域。共分四區。一城區。以縣城內外及南大畚鄉屬之。二江南區。以坎門陳畚二鄉屬之。三江北區。以楚門芳杜密溪桐林四鄉屬之。四海山區。以三盤黃大畚靈峴三鄉屬之。現已分爲城區坎門陳畚靈峴三盤楚門桐林密溪南大塩黃大塩等十一區。面積八千零八十九方里。田地山共占二十一萬八千四百二十三畝。全境丁口有十五萬五千七百六十九人。戶則有三萬六千七百二十二。江南北陸地較多。民多務農。濱海及海山一帶。漁業爲多。楚門有鹽垣千餘支。鹽戶亦屬不少。農佔十分之五。漁佔十分之二強。工商

佔十分之二。學界不及十分之一。出外人數甚少。祇六百名左右云。

四面環山。外圍皆海境。內無長川巨河。間有小河如天開河等。亦甚窄小。藉以蓄洩山水。保障田廬而已。與他處河流之可通舟楫。得工業上利用者不同。至山脈均屬巖質。積土甚淺。兼之海風猛烈。栽種竹木。不易滋長。卽有天生草木。亦僅足供居民柴薪之用。工業上無甚利用。

地勢。孤懸海中。地本低窪。其山隩間寬平之土。如附城南門外西青衛衛一帶。及江北之楚門外塘地方。現可耕種之地。俱賴築塘以禦潮之浸灌。否則除山岙外。均爲澤國。西南由烏洋過黃華關。進盤石口。可至永嘉樂清等縣。北由深浦橫渡水面。僅里許卽登岸。踰嶺直至溫嶺縣城。東南以黃坎二門。爲通海要口。出此則爲大洋矣。

氣候。地近溫帶。熱多寒少。最高溫度爲九十度。最低爲四十五度。濕度最高爲八十五度。最低爲六十度。歷來霜雪甚稀。惟海風浩大。枝幹較高

之植物。頗不利於栽種。至水旱各災。尙較他處爲輕。

土壤。田土較肥。於栽種稻麥等項。頗稱合宜。山土多瘠。除甘藷外。無他物可種。卽樹木一項。亦祇松木尙可栽植。然亦不能繁盛。以土淺風淫故也。其他竹木均不適宜。統計土性。粗瘠者居十分之七。精肥者僅十分之三。稍有土壤之處。無不墾栽蕃茹。以代民食。故全邑並無曠地焉。

河流之最著者。在城之內外有城河。由縣署後山。流至署西。迤東通玉環河及天開河。約長十里許。灌田一千餘畝。在塘洋者。有塘洋河。灌田約一千畝。在密鶯者。有密鶯河。灌田約六百畝左右。在大陳隩者。有陳隩河。灌田約千餘畝。在大普竹者。有大普河。灌田約二千畝。在青塘者。有西青塘河。灌田約二千畝。在江北之芳杜者。有樊河。灌田約三千餘畝。在楚門者。有官河。灌田約八百畝。此外皆細小溝渠。無足數焉。

田稻年可收穫兩次。每年清明節。車水灌入田內。以牛架犁。翻土耙平施

肥。將禾苗插下。名曰早禾。越兩星期。早禾成活。復將晚禾嵌插。又加肥料。勤耘數次。不使莠蔓。大暑節。早禾成熟。先行收穫。然後將晚禾勤加培養。至霜降節後。亦可收割矣。所有收稻穫穀。俱即時除去稻稈晒儲於倉。與嘉湖等處多露積者不同。山地均種甘藷。以夏至節下種。立冬後收起。鐮絲晒乾。名曰茹絲。鄉民多藉此爲糧食。冬季田間。除種豆麥外。均種草子。以作次年肥料。對於菜菔菽麥等項。不甚講求。凡一切耕耘方法。雖仍舊習。而農民頗稱便焉。農具。墾具用犁耙耨鋤刀斧等物。漁具春用流網或攬釣。夏用捕黃網或手網。秋用大網或鮮魚簪。冬用銅絲釣或冬網矮網。由各漁戶用苧僱工織造。蠶具。因山土植桑。殊不相宜。故無製備。

邑爲海中孤島。山場雖多。全露巖石。難於開墾。其地勢較平。稍有積土之處。亦均栽植甘藷。以代民食。是以林業向屬稀少。縣署後有官荒山十

餘畝。頗含泥土。已購植松秧。作有模範森林。茶樹一項。因風大不易發達。山隙處。卽有種植。數亦甚鮮。

水產物。以帶魚黃魚鰻魚鱈魚鯧魚鰱魚蝦蟹蚶等類爲大宗。其收穫數量。至多年可得百萬觔。少則五六十萬觔。沿海居民。皆賴此以爲生計。除帶魚有用鹽醃運售他處外。餘皆隨捕隨賣。爲居民日常用品。畜收。雞鴨豬羊。皆有豢養。以供食品。然無專以此爲營業者。惟雞鴨蛋出口。全年統計。約有十二萬元之譜云。

農產物之主要者。如早穀晚穀糯穀金成小白落花生芋苳甘諸蘿蔔等。惟瓜果出產無多。民食統計。豐年不過十分之七。一遇荒歉。尤爲拮据。歷年須赴永嘉樂清等縣購糴。並賴茹絲攪食。(中戶以下大概多食茹絲)以資接濟。

農民佃田。先向業戶訂立契約。議定租額。每畝最多納租穀三百觔。少則

百餘觔。按期清繳。民風尙稱樸實。凡遇蟲害災病。普通均用石灰或青礬水以殺之。

工業素不講求。卽民間日常用品。其製造形式。亦甚粗陋。關於木工者。有床椅桌櫈水車犁耙櫥櫃桶等物。關於鐵工者。有耜鋤刀斧釘鎖等物。他如縫紉油漆等工作。亦皆古樸。至外來者。惟洋油洋布。需用最多。他如玻璃綢緞。所用不廣。民間年輕子弟。投師習藝。不論何項工作。必先訂立契約。以三年爲限。隨師指導。限滿方可自由營業。僱用工匠。工價尙廉。飯食點心。均由僱主供給。

商業向不發達。自上海甯波至永嘉輪船。經過坎門楚門兩埠。人民智識略開。漸設商店。市鎮祇有三處。卽城區西青街坎門楚門。入境貨甚少。內以洋布南貨二種爲大宗。出境貨以帶魚茄絲二種爲大宗。餘如蝦蟹等類。皆在本地銷售。出境甚少。各業商人。土著爲多。客商甚少。

商販。南由坎門乘輪船至上海甯波等處。計一二日可到。西由衢衢乘航船至樂清縣。計水陸路一百三十里。北由楚門至溫嶺縣。計陸路一百二十里。東屬海洋。向無交通之路。各商運輸。多由陸路肩挑。輪運爲少。運價。輪運視貨之大小輕重。隨時定價。人工挑運。按劬計算。市面錢幣。通用大小銀元及銅元。平時漲落無定。鈔票市中甚少。各商號購辦貨物。如雜貨洋貨布疋。均由上海寧波永嘉等縣。直接批發而來。亦有交換代辦名目。

鑛業。在縣東坡山地方。發現鉛鑛一處。有商人稟請開採。尙未實行。

第六十六篇 麗水縣

考麗水之名。始於唐。按唐書地理志。武德四年。平李子通。置括州。領括蒼麗水二縣。麗水之名。始見於此。其境析而爲縉雲爲青田。然所析者。爲何鄉何里。末由深考。明景泰中。復割浮雲鄉及元利之半。置雲和。

宣慈應和二鄉及懿德之半。置宣平。而準其疆里。猶爲寥廓。此沿革之大略也。疆域。東至青田縣界十五里。西至松陽縣界五十里。南至青田縣界三十里。北至武義縣界一百里。從前自治區域。除城區外。分爲東康東喜南元南孝西來西義北懿北河八鄉。共計九區。東西廣一百二十里。南北袤一百三十里。面積三千四百六十六方里。田額約占一千五百零四頃七畝零。地額三百六十六頃七十五畝零。山額七十一頃十八畝零。塘額三十一頃六十七畝零。全境有戶三萬一千七百七十六。有丁七萬一千零七十五人。有口五人萬三千七百五十六人。農業約佔十分之五。工業約佔十分之二。商業約佔十分之一。

河流。西北遂昌松陽之水。合西南龍泉雲和諸水。匯爲大港。離縣十餘里。宣平之水會焉。是爲大溪。一名洄溪。一名洞溪。麗水源出縣北之麗陽山。西南流入大溪。縉雲所出之好溪下流。至縣東匯爲大港正流。亦呼麗

水。經金村東南流入青田界。

山脈。括蒼山爲一縣之鎮。治在小括蒼山之東。萬象山之東北。最高曰樺山。山經盤紆。連接九盤嶺。亦名蓮城山。絕頂有眉巖。其南之大梁山。則爲楓嶺山脈之岡阜相連者也。

地勢。平斜高低不一。大約東西二鄉。田野開曠。地勢平行。南北二鄉。山嶺重疊。地勢高峻。至險要之處。按括蒼彙記云。東北以桃花隘稽勾嶺爲門戶。西南以堰頭石塘爲襟喉。此爲得其大概。今桃花隘爲縉雲境。石塘已割隸雲和。時勢變遷。今昔不同。險要之所。亦因時而異也。

氣候。據華氏表溫度最高九十八度。最低二十六度。倘遇霖雨連天。濕度過重至飽和度。至風霜雨雪。麗水處萬山環繞中。風害甚稀。霜自霜降後。間有天氣倏冷。收麥藍靛寒豆等物。收穫之時未至。遽遭殺死。因而歉收者有之。雪若春雪過大。萁荳大小麥蠶豆豌豆等類下種較早。被其壓折

者。收成略減。至水旱偏災。年來間亦有之。

土壤。西鄉最精肥。南鄉次之。東北二鄉。均屬粗瘠。西南十占其六。東北十占其四。西南宜種八穀。東北宜植森林。

城中水脈。自宋開創二渠。分麗陽溪水。隨勢導之入城。民甚便之。又有通濟渠。於縣西五十五里松陽界內築巨堰。障其水爲渠。現名西堰。共可溉田二十萬畝。又有好溪渠。在縣東二十里靈鷲山下。疊石爲堰。名曰東堰。障縉雲溪水入渠。西流至浪蕩口分水壩。析爲東北二渠。灌田二十餘頃。蓋東堰西堰。爲麗邑水利關係之最大者。餘則爲北鄉之鳳山官堰。西鄉之洪塘橫塘山塘。以及高溪莊之水壩。南鄉縣頭莊之埠頭八索橋水壩等處。

農民種稻最精。種麥次之。種豆極爲粗疏。農具。墾具用犁耙耨鋤之屬。漁具用掩網曳網之類。惟蠶具寥寥。現有實業家仿照新法。考種則用高倍

顯微鏡。飼育則用鋸齒形蠶架。並給桑台之類。爲養蠶最優之新具。復由省購辦桑樹。創辦模範桑園。以資提倡。

荒山甚多。中皆砂石。以故無人承墾。本年由縣就舊縣倉基址。新設苗圃。因該處南面。本有新墾熟之地畝。一併劃入。極爲得用。又東鄉水東村。設立浙江省立第二造林場。至植茶方法。尙無人研究。

農產物之種類。如早穀糯穀晚穀甘藷豆麥棉花等。民食。豐年則有餘。可以運出銷售。歲歉則不足。購自隣近各縣。以資接濟。

農民佃田。悉先出立租約。名曰仰荷。其驅除預防災害蟲病等方法。設遇水稻有蟲病。用煤油菜油等洒之。豆料蟲害。則用刷簾及畚箕撲滅之。團體。舊有縣農會及乙種農業學校。

工業。自利用織布有限公司暨習藝所設立後。貧民生計。實利賴之。最近又有光明電燈公司燧昌火柴公司普昌梗片盒子公司等成立。資本共計十餘

萬。規模極大。目前又在大港頭地方。設立普昌分公司。資本三萬。貧民賴以謀生者。約在二千人。出色工作物。爲時花色布麥草屏風。色布年產約六萬餘丈。惟麥草屏風。手技精工。出產稀少。僅供本地之需。普通工作物。如金工竹工木工棕工。類皆粗窳。金工產額甚稀。竹工以竹椅竹床畚箕掃帚簞篋篾籃箬帽等項爲多。木工以水車風柜椅桌床板雜項木器居多。棕工以棕繩篋衣爲最。以上各物。鄉人俟市日聚售於西鄉碧湖鎮。價值甚廉。至外來者。如溫州雨傘草蓆蒲鞋以及洋傘洋皂洋燈洋燭爲大宗。僱用工人。以日計者多。以貨計者少。兩方均無契約。藝徒對於藝師。三年學業有成。便可自立。

僻處山鄉。交通不便。市面蕭條。歷古已然。且無銀行錢莊之設立。匯兌不靈。是以商業近無起色。市鎮。如城區每月向以陰歷三八爲市日。西鄉之碧湖鎮。每逢辰丑爲市日。入境貨。以糖鹽海味松紙洋紗布疋爲大宗。

出境貨。以麻蓮油豆麥靛爲大宗。至經過者。筍竹木菸松邊香菰爲大宗。商業略分京貨南貨藥業三種。京貨業本地人居多。南貨業溫州人居多。藥業多係蘭溪人。溫州人間亦有之。

商販。水道上自龍泉。下至溫州。陸路以通縉雲之桃花嶺爲大道。其餘各貨。均由小徑往來。運價。由溫州運至麗埠較昂。由麗埠運至溫州較低。市面錢幣。漲落無定。商人交換貨物。每將兩貨估價抵算。多少照補。代辦則有牙中。主顧無一定。團體。舊有縣商會一處。

第六十七篇 青田縣

考青田。隋括蒼地。唐分括蒼置青田縣。明析青田縣西南地置景甯縣。清仍之。民國無所改革。疆域。東至永嘉縣界安溪三十里。南至瑞安縣界烏杉一百里。西至麗水縣界金村一百二十五里。北至縉雲縣界廬塘一百里。境內凡一十八都。從前自治區域。分爲城區彭括鄉山口鄉章日鄉黃富鄉仁

莊鄉石溪鄉大垵鄉仁驛鄉玉山鄉黃壩鄉熬里鄉南田鄉黃巖鄉大雲鄉東平橋鄉黃放口鄉芝溪鄉海口鄉禎埠鄉西平橋鄉禎巷鄉連雲鄉葉村鄉浮石鄉。共計二十五區。面積八千三百七十七方里。田十四萬零九百一十一畝零。地七百三十四畝零。塘二百四十五畝零。蕩二畝零。合田地塘蕩四項。約占面積百分之九。山約佔面積百分之七十。全境有戶五萬四百三十九。有丁十三萬五千七百五十八人。有口十萬一千五百零五人。內業農者約占六萬一千餘人。業工者約占一萬一千五百餘人。業商者約占二萬二千五百人。鑛業約占四千四百餘人。

河流。其經流爲大溪。其支流爲小溪。大溪在縣城南。源出慶元縣。合龍泉雲和遂昌松陽宣平諸水。經舊府城南。匯縉雲諸水東南行。至古竹入青田界。(古竹在縣西一百二十里)復東南行。會小溪之水。經縣城南。東行三里爲石郭匯。水勢迴漩。舟行避之。又東北行七里爲魁市灘。石磧(俗

呼鬼市磧）中峙。溪水外環。若黃河之有砥柱。又東行至沙埠。自古竹至此。長一百五十里。入永嘉界爲安溪。至舊溫州府城北爲甌江。至雙峴口入於海。小溪源出景寧金獅岱。東北行入青田界。東流入七都。經六下都。迤北至湖濱。合於大溪。自小溪之水。匯入大溪。水面漸寬。最寬處爲魁市灘。約三十餘丈。最深處爲石郭匯。約三丈餘。

山脉。均來自括蒼。大溪北岸諸山。皆括蒼山之麓。南岸諸山。皆括蒼山分支之羅列者。山脉可別爲南北二條。北條自西北縉雲入境。西南行至十七都爲五方尖。至十三都爲芝溪嶺。至十都爲鯉魚山。至六上都爲白山。至五都爲石龜山。其東南爲縣城。坐青田山麓。又東北行。至一都爲小石門山。直入永嘉。此北條山脉之大略。面積約佔全縣五分之一。南條自麗水入境。爲十六都連雲山。迤邐至十八都爲石帆山。又東至十五都爲九天嶺。又東至十三都爲石門山。東南行至十都爲白鶴洞。至六下都爲木窟

山。又東北至五都爲石佛山。至三外都爲水南嶺。歷二都石郭。入一都爲凌雲峯。直接永嘉諸山。此南條山脉之大略。面積約佔全縣五分之一。地勢。層巒疊嶂。除大溪沿岸稍有平原外。餘均屬邱陵地。約佔全縣五分之三。又縣南一百五十里。有南田山。其巔獨開平壤。廣袤數十里。良田千頃。賦當一縣之半。又東南接壤永嘉。水陸所會。實山海襟帶之區。然上患景雲橫徒之竊發。下防閩甌海寇之深入。故據高沈老鼠梯。可控上游。屯高江上濟洪。爲扼吭背。舊設巡檢司於談洋。以蔽福甯秦順。而南通瑞安平陽之三港。東達永嘉之南溪。各常立寨於其界。則青田地勢之險要。觀此可見一斑矣。

氣候。溫度最高至九十八九度。最低至冰點而止。無折屋拔木之大風。其霜雪亦不甚大。惟交秋大水。間年勃發。邑城漂沒。不免爲特別之奇災。土壤。沙土黑壤居多。赤壤間亦有之。俗稱爲黃金坭。與植物不甚相宜。

其餘瘠土實占多數。

農民耕耘。率用舊法。農具。如蠶具間用蒸籠養蠶。廚灶繅絲。近年蠶學發明。得風氣之先者。遣子弟入溫處蠶桑學堂。研究蠶業。若戈溪高市邑城等處。栽種湖桑。其放青飼育採繭繅絲放種選種浴種各法。諸有進步。惟蠶事幼稚時代。創辦難獲厚利。後起未見多人。推而廣之。俟諸異日。邑無可墾之地。惟荒山則無處無之。已訂定推廣森林辦法簡章。分別官荒民荒。強制造林。並由縣籌劃設立苗圃一處。播種桐茶松杉洋槐數種。又經擇定地點。創辦模範森林場五處。分別栽種桐茶松杉及線柳洋槐等。一律滋長暢茂。

漁牧兩項。漁業向不講求。緣各溪水淺灘多。無魚可捕。亦無業漁之戶。畜牧則雞鴨牛羊犬豕。農家多養之。至驢馬不產於其地。鮮有營此業者。農產物之主要者。爲早穀晚糯穀小麥大麥唐梨麥等。普通者蠶豆飯豆黍梁

芝蔴苞蘿番薯芋瓜菜靛青蘿蔔等。民食。豐稔之年。尙可自給。但粗糲已甚。

佃戶向富家承田。須費佃洋若干。是謂田皮。佃戶不繼。轉將田皮出售。納穀若干。是謂皮租。一田二租。富者愈富。貧者愈貧。而正租因之而奚落。卽正稅亦因之而減色。蓋正租價重有糧。皮租價輕無糧故也。至於驅除蟲害。惟糯稻於盛暑時。用桐油洒入水中。熱氣薰蒸。蟲卽落水。農民時常行之。團體。舊有縣農會。此外六上都。設有永昌農林公司。

工業。極不發達。惟圖書石雕刻品。工作雖未完全精巧。頗爲外人所樂購。除圖章印盒筆插水池等可作文具外。餘均玩品居多。每年輸出外洋。統計約二千餘箱。普通者。爲龍鬚草蓆。但成品粗劣。行銷不遠。年產約二三千條。每條價洋不過一二角。粗碗工作粗劣。行銷海岸。以其能收水分。凡船夫工人。均喜用之。年產約三千筒。每筒不過八九分或一角四五分。

僱傭工匠。例給茶飯。學徒以三年爲準。其工作稍易者。則由藝師酌給藝徒工資若干。工作較難者。由藝徒津貼藝師學費若干。如學期三年未滿。藝徒不得自由營業。工廠。設有平民習藝所。惟交通不便。所出物品。難於暢銷耳。

商務以木石兩業爲大宗。市鎮。城區稍爲熱鬧。餘如大峙港口油竹山口大安石溪口大垵船寮高湖海口石帆禎埠臘溪口白巖嶺根黃坦等處。生意甚小。入境貨。以穀米豆麥鹽糖菸酒布疋綿紗煤油藥材洋廣貨爲大宗。出境貨。以青田石絲茶草蓆油炭竹木雜柴磁器鐵器蠟灰紙錠爲大宗。至經過者。以松陽景寧之竹木板段爲大宗。各商業。本地人居多。商販運出運入。必由溫處。惟青田石一種。由溫直運歐美銷售居多。運價上達麗水。下逮永嘉。水陸均可通行。大約用船運者其價輕。陸路肩挑者其價貴。市面錢幣

。通用銀洋銀角銅元。鈔票亦可通行。客商來青購辦貨物。必投歇行家介紹以成交易。其兌換價值。分現洋期限不等。（有十日期或一月期不等）如客人不來。有托夥友代辦者。亦有托行家代辦者。惟主顧由客自便。言語多土語。輸運由客人自便。行家但居中接洽耳。

鑛業。如黃富區黃放區。有圖書石鑛山。乃青邑之特產物。邑人賴此工商業爲生計者。以數千計。倘能設法改良。精益求精。裝運海外。深得外人之所好。則銷路必廣。獲利必可倍蓰矣。團體。舊有縣商會一所。

第六十八篇 縉雲縣

考縉雲。漢初回浦地。漢末松陽縣地。吳又爲永康縣地。隋又析松陽縣東鄉立爲括蒼縣。迨唐嗣聖初。始析括蒼東北地及婺州南地。置縉雲縣。屬括州。後改括州爲處州。宋元明清皆因之。爲舊處屬。民國廢府制隸省。疆域。東界仙居。南界青田。西界麗水。北界永康。東南界永嘉。東北界

東陽。西北界武義。東西距一百六十里。南北距一百七十里。東南距西北一百四十里。東北距西南一百五十里。從前自治區域。分城區保安區和善區靖和區捲青區鍾慶區集善區招賢區普化區仁美區練金區三溪區宮前區溪西區溪東區石龍區。共計十六區。面積五千一百十五方里。田地山蕩共佔三十二萬二千八百六十六畝。全境有戶五萬零七百三十五。有丁十一萬三千五百三十一人。有口八萬四千三百八十人。業農者約八萬餘人。業工者約一萬人。業商者約六千人。

萬山盤據。並無巨河。所有縣境諸水。經流曰好溪。源出東鄉大盆山。西流匯棠溪管溪及南鄉山溪貞溪。合流出麗水達青田入甌江。西鄉之溪曰南源溪。源出西鄉雪峯山及大姥山。東北流。匯烏坑長坑楊橋坑及筠溪梅溪諸水。出永康與華溪會。達蘭溪入浙江。各溪流類皆築堰蓄水。灌溉田畝。兼有建碓舂磨米麥。惟西鄉南源溪支流之烏坑長坑楊橋坑諸水。爲附近

製紙工廠所利用以洗料及建碓舂料者。惜源短易涸。設遇亢旱。各廠均須停歇。

地勢。東南高而西北低。地面斜長。險要處。以麗水界之桃花隘。仙居界之蒼嶺爲最。如界永康之白疊山交嶺紫武嶺。界武義之雪峯山。界永嘉之南溪。皆守險者所當注意。

氣候。溫度最高時在華氏表百度。最低時三十二度。歷來霜雪不大。於農事無甚關係。至雨水在春冬無虞不足。在四五月間。恆有供農作物生育必要之水分。惟夏秋之間。雨量較少。每於此時受多大之影響。若遇狂風大雨。如山場農作物苞粟蕃茄等。屢被損壞。

土壤。田土多肥。山土多瘠。田土之肥者爲黏土。宜種稻麥。田土之瘠者爲沙土。宜種花生田瓜等。山土之肥者爲雜土。宜種苞粟蕃茄桐子等。山土之瘠者爲礫土。祇種竹木松杉而已。

田畝沿溪一帶居多。除塘之外。全賴溪水築堰蓄積。灌溉田畝。計全縣溪堰。約有百餘處。其中以好溪之杜堰廣濟堰長欄堰永濟堰雙潭堰及西鄉南源溪之黃檀堰黃桑堰。溉田最多。杜堰溉田七十餘頃。廣濟堰溉田八十餘頃。長欄堰溉田三十餘頃。永濟堰溉田二十餘頃。雙潭堰溉田六十餘頃。黃檀堰溉田三十餘頃。黃桑堰溉田二十餘頃。

田稻年收一次。其種法耕後抄平。泥粗者爬之。於清明後穀雨前下種。約四十日。將田水灌足。始行分秧。下以肥料。分秧後。每閱半月。須耘一次。加肥料一次。精勤者必耘至四次。若惰農則僅耘二次者有之。其間如遇雨量不敷。須由塘或溪車水注足。約白露前後收成。其在上等田畝。於稻未收穫前。可夾種馬料豆。過立冬豆拔後。仍舊耕耘。接種大小麥。名曰三收田。若下等田畝。僅可種稻而已。至於山場。無論種任何農作物。先將泥土鋤鬆。削除草木根株。然後應時下種。下種後。加以肥料。倘天

然雨水充分。祇須剷除蔓草數次。即可收穫。似較種田爲易。農具有犁耖耙釘爬板爬圈爬水車沙鏟稻桶山鋤板鋤齒鋤草削。耕田用犁耖耙。均藉牛力。注水用水車。車架有二人車及三四人車之分。車桶有八尺至二十四尺之別。收割用沙鏟。打穀用稻桶。開墾用山鋤板鋤齒鋤。除草用草削。各種農具。均係舊式。製自本地。至蠶具從前皆用米篩簸箕等。近來有專製蠶篩蠶架者。漁業則並無專門。漁具僅有網及絲綸罾數種而已。蠶業向不興盛。迨民國後。歷年由縣署採辦桑苗。分給各鄉領種。現在逐漸擴充。以縣東鄉爲最。其採集栽養。皆趨新法。所有絲繭。由客商過境收買。

荒山頗多。前經縣署製定表式。分列官公私三種。飭發自治委員詳查填報。爲普及造林之預備。縣治後有仙巖寺餘基五畝餘。東門外西寮地方。有永甯廢寺公地二十餘畝。作爲苗圃地畝。其永甯廢寺之公產荒山。作爲模

範林場。植茶向不發達。急宜編集種茶方法。分發民間參考。以資觀感而圖振興。

山僻之地。水產無多。藉此以爲生計者絕少。除溪魚外。僅有塘魚及菱二種。塘魚之種。來自長江。菱產於本地。皆聽其自然生長。並無養殖一定方法。捕魚時。皆用網及絲綸或罾數種。其製造方法。將魚剖開。或用火焙。或就日晒乾後收藏。至畜牧向係農民兼業。專以養豬爲生計者。間或有之。其保護方法。概於欄內鋪以稻草。濕時再換。每日喂三次或四次。設遇發瘟。大都轉養別處。別無預防之法。

農產物。以秬穀糯穀晚穀大麥小麥包粟蕃茄絲爲主要。黃豆料花生芋蘿蔔南瓜等次之。以產穀無多。全賴蕃茄苞粟等物。補充民食。間或不敷。則向永康武義兩縣。運購接濟。

農民佃田。田主每年僅收租穀一次。餘如豆麥等皆歸種戶。普通佃田。佃

戶向田主訂立租約。每年於秋收時納租。若租穀短欠。可由田主自行改佃。其在農田缺種之處。有由種戶先墊存田主年洋若干元。名曰買田脚。穀照常繳納。如將田改佃。田主須將墊存之洋歸還種戶。亦有種戶自願不種。將所買田脚轉賣與人者。此種習慣。易滋流弊。在前清咸同前爲多。現亦逐漸減除。另有田皮田骨之買賣。買田皮能承種。買田骨祇能收租完糧。每年租穀三股均分。佃戶田皮田骨。各得其一。西鄉居多。所有租田納穀。在中等田畝。每畝計二百四十觔。次或一百六十觔或百觔。如遇旱荒蟲害。多由種戶向田主求讓。或由田主到田面割照分。所割之穀。在上等田畝。十成中田主得七成。曰三七分。在下等田畝。十成中田主得六成。曰四六分。至於蟲害。大都以桐油治之。

工業。以製紙一業居多數。至飲食類。有菜油桐油茶油桐油黃酒燒酒旱菸水菸粉乾素麵。服用類。有大布柳條布愛國布斜紋布線毯格子布麻布被面

衛生衣褲洋襪毛巾。化學製造類。有青油燭靛青普通甌瓦仿造西洋紙粗製紙中方紙南屏紙普通獸皮。器皿類。有雜用器家具金銀製器銅錫製器鐵製器釘竹製器梳篦龍鬚席香類鞭炮燈籠蒲扇蒲袋等。至外來者。以磁器洋油洋紗洋布各種絲織品毛織品及白糖紅糖等爲多。如家用之銅壺銅罐。及人民所帶之帽筆墨紙張雨傘洋傘紙菸染色各種皮貨等次之。

僱工有長工月工及臨時僱用。其工價有供飯工點清工之分。供飯工除每日給工資外。每日用酒肉一次。點清工又謂之包工。膳食由工人自備。月工則僱用一月或二月。長工則僱用以一年爲限。一年無故。主家不得謝絕。工人亦不得告辭。至師徒關係。先須訂立契約。名曰投師。約以三年爲期。期滿後聽其自便。

僻處山陬。交通阻滯。商業向屬寥寥。卽有稍大之舖戶。多屬閩幫徽幫之客民。市鎮。以東鄉壺鎮西鄉新建爲最。如南鄉之東渡方坑口臚騰舒洪及

西鄉之小溪楊公橋黃龍等次之。入境貨。以食鹽米穀洋油棉紗藥品及各種南貨等大宗。出境貨。以南瓶紙錠青及元胡白朮芍藥等爲大宗。至經過者。以筍磁器茶葉香菰等爲大宗。商販道路有三。一由西鄉至永康。赴蘭谿杭州紹興甯波等處。一由南鄉至麗水。赴龍泉青田溫州等處。一由東鄉至仙居。赴台州。現在一切運輸。皆由永康麗水二縣直接運入。其運價視路之遠近計算。市面錢幣。銀元銀角銅元。隨時價之漲落。均無一定。商人均用錢幣直接交易。至向所交易之主顧。被他家勾引時。如賬項並無拖欠。亦不至有何等干涉。代辦在運脚幫頭中恆有之。倘有損失。須負賠償之責。至言語。各行業中。遇貨物高下關係處。恆有用隱語者。外界無從得悉。

第六十九篇 松陽縣

考松陽。吳孫權析漢章安地。置松陽縣。屬會稽郡。唐設松州旋廢。吳越

更名長松。旋改白龍。宋復名松陽。至今沿之。疆域。東界麗水。西界遂昌。南界龍泉。北界宣平。從前自治區域。分城區古市區五都區廬田區大竹溪區玉巖區石倉區靖居區。共計八區。面積四千一百九十一方里。田地約占十分之三。山蕩約占十分之六。全境有戶二萬八千七百三十二。有丁六萬九千七百十九人。有口五萬一千八百五十五人。業農者居十分之六。業工者居十分之一五。商居十分之二。

河流。僅松溪一帶水源。發端遂昌。經過麗水青田。逕達甌江。可通舟楫。其次惟有石倉區小溪。上由大棟壩。至縣下江口地方。計六十里。與松溪合流。航船竹筏。亦能通達。餘均山坑。係屬無源之水。於工業上無甚利用。

境內平衍寬廣。四面皆山。東以石佛嶺釣魚嶺爲門戶。在縣東二十里。爲麗水達松必由之路。雙峯遙對。中隔松溪。峻嶺崎嶇。下瞰如天塹。西南

以龍虎險爲藩籬。在縣西南一百三十里。爲龍泉達松必由之路。兩山對峙。中通一線。倚山設險。鳥雀不通。北以竹喀嶺爲扃鑰。在縣北三十里。山高四千餘丈。四面可望數十里。北通宣平。足稱要扼。清咸同時。居民築寨禦洪楊。故名寨頭嶺。

氣候。溫度最高之點。約九十五六度。濕度最低之點。零度以下一二左右。土質。浮土尺許。性燥淡。鹽質稀少。肥壤約占三分之一。瘠壤約占十分之七。山土宜於松杉茶桐靛青。平地宜於穀麥菸菜。

水利。有青龍圳。在縣南三里。灌十九都田十七頃。白龍圳在縣南三里。灌九都田三十頃。通澤圳在縣西三十里。灌八都田十二頃。芳澤圳在縣西三十里。灌十三十四兩都田八十頃。響石圳在縣西四十里。灌十都田二十頃。金梁圳在縣西十里。灌十五十六都田八十頃。此外均私築塘堤與無源。

山坑。難以縷述。

民國元年以後。水旱頻仍。糧食昂貴。農民覓食維艱。始知當日耕耘之粗。因之歉收。致令糧食愈形不足。於是倏然猛省。倍加肥料精勤。卽間有游惰性成者。有所觀感。種作亦稍能整飭。農具。耕田用犁。碎泥用耙。耙用牛力。每日可碎泥土四五畝。平田用杪。除草器具。旱種用鐵板鋤。水種用田鉋。每人一日可耘田二畝。收穫用稻釘鎌刀。打稻用稻桶桶梯。漁具。用麻線結成三角形。上用竹柄。俗名罾揭大網絲網。蠶具。以向無蠶桑。故蠶具亦少。

官荒約五千餘畝。義塚居十分之三。現尙無人承墾。民荒約三千餘畝。不能種植之石山。居十分之五。創辦苗圃一處。模範森林一處。僅採樟楓柳松等樹。

水產稀少。僅松溪一帶。有少數鱗介。捕法用鷺鷥車輪鈎扛網。畜牧。惟

豬牛羊等有養之者。

農產物之種類。如穀麥豆料菸葉靛青蕃薯黍芋蓮子棉粟木板桐油茶油桐油茶葉薑等。民食。除穀米外。附以雜糧。年可餘十分之二。

農民佃田。每租一石。須繳保證金一角。或用鷄隻。俗名押筭。此外通例。八月完租。如非旱荒。不能爽約。其驅除害蟲方法。通用石灰或桐油灰。於晨露未乾時。撒於稻葉。害蟲非死即逃。或用桐油菜油。於日光劇烈時。滴於田水中。用田鉋盡力搨之。俾水潑於稻葉。蟲即入水。或於黑夜用火燒於田邊。使蟲趨火。自行觸死而已。團體。縣有農民協會籌備處。各鄉村農民協會。亦多設立。

商業。本地所產之物。惟菸葉木料。從前暢銷時。市面稍可活動。嗣因捐稅重擾。阻礙行銷。頗受影響。市鎮。除城區外。僅有離城二十里之古市鎮。入境貨。以煤油糖海味藥材布疋爲大宗。出境貨。以菸葉木料爲大宗。

。至經過者。宣平箬。遂昌苧麻。碧湖茶油爲大宗。商販。交通不便。上流四日。可抵蘭江。且須過山。下流四日。可抵甌江。運價。陸路較水路稍昂。市面錢幣。銀元銅元。時有漲落。銀角不甚通行。其餘交換代辦主顧言語等類。與普通習慣相同。

鑛業。現在所採之鐵沙。俱由山溪洗出。用泥爐鼓鑄。全縣有爐三座。殿岡莊南坑莊百步莊等處。鑛工均屬農民。

第七十篇 遂昌縣

考遂昌。吳析太末置平昌縣。晉更名遂昌。隋廢復置。唐武德省入松陽。景雲初復置。宋元以來無改革。疆域。東至松陽縣界二十里。南至龍泉縣界九十里。西至江山縣界一百四十里。北至龍游縣界五十里。此爲四正。東南至松陽白巖區三十里。東北至宣平湯溪銀嶺七十里。西南至浦城礫下二百三十里。西北至衢縣龍鼻頭(屬遂昌管)一百里。此爲四隅。從前自治

區域。分城區資忠建德保仁保義保禮保智保信內桃源外桃源。共計十區。面積七千六百六十一方里。山約佔十分之九。田約佔百分之七。地約佔百分之二。蕩約佔百分之一。全境有戶二萬八千九百六十一。有丁七萬三千八百四十七人。有口五萬二千一百三十九人。農業佔半數以上。工業最少。商而兼農者約十分之二。餘均勞力者。

環境皆山。發脈於閩浦。由仙霞嶺歷三衢入遂。展嶂於洋溪源周公源。襟帶龍泉。如磬口關川諸處。俱與龍泉接壤。水流王村口山。復分支於蔡源。起蔡山九峯巖。渡青城山及大梧桐小梧桐山。至石飛門頭嶺出口。溪面一闊。是爲石練。水出大田峽口門。合柘溪上游。歷華陽直趨湖山。衆水匯聚。經衢縣而達龍游。此西鄉山川境壤。最爲深邃。所謂分太末一隅者。共一出水也。至幹脈則由貴義嶺迤邐而來。至車床龍亭坳。一伏一起而爲鷄冠峯。至西嶺過峽。蜿蜒而至於丁嶺峽後。聳然崛起。則爲鷄冠寨。

再起爲蓮花峯。復上而爲白馬山。枝脚雄峻。頂背平闊。高出羣山。風日清朗。回瞰婺衢。隱然在望。此實婺紹之祖山也。山之半爲大坪田。其下爲小坪田。由是分支爲梭溪源。起高坪石母巖。伏而爲奕山。起而爲黃兆山。雄跨遂邑之西北。其水向西流而匯於梭溪橋湖山者爲西鄉。向北流而匯於應村白水者爲北鄉。其南鄉十四都源之山水屈曲潏洄。與松陽西鄉接壤。亦發源於貴義嶺川。行八十里。歸於邑南眠牛山下。直出河頭。與北溪合流。至北溪之水。其源有四。一從西嶺分流而下。一以丁嶺分流而下。合於丁口。一以七里源分流而出大定橋。一以東峯流而出吳突頭。四派匯聚。行至飛鶴山前。與南溪合流十餘里。復匯四都濂溪。東注松川。此邑城山川之出口也。至縣城諸山。分脈於鷄冠峯。重巒疊嶂。起伏靡常。由上簞而過樟樹嶺。崛起則爲妙高山。中爲君子山。西爲吳皋天馬月岫屏風。北則兌谷。南有拜山。下則西明山。迴環拱揖。棋布星羅。至白馬山

分行東北之侵雲嶺。爲縣城後障。過東則爲尹公山。百丈陡起。覆螺巖分入湯溪。趨結婺州。直達東越而止。又旋繞過白沙源天塘嶺。復起九雲峯背。分松宣面結四五都爲東鄉。轉北則過天師壇。一爲茶圩源。一爲應付源。崇山峻嶺。深流長谷。輿行七八十里。山水會聚於北界馬戍口。歷靈山以抵龍游。達於錢江。此遂邑溪流分出於三口也。

形勢。東鄉略爲平曠。西鄉最高。南鄉次之。北鄉又次之。西有龍鼻頭。與衢毗連。路如曲尺。下有深潭。最爲扼要。右有西坑隘。與福建浦城毘連。是處山形高聳。巉巖壘石。乃要害之處。北有高坪隘。居環山之巔。中寬平廠。四圍翠嶺。嶺通一線。餘無別徑。尙有居義嶺。與龍泉接壤。兩山夾峙。嶺高百丈。必由之路。均爲險要之地。東鄉惟九盤嶺爲最要。左通湯溪。右達宣平。

氣候。最高溫度九十三四度。最低三十五六度。

土壤。瘠者多而肥者少。約計瘠者佔十分之八。除稻禾外。宜於種植者。四鄉各有不同。東鄉宜種豆麥。西北宜種靛青。惟南鄉氣候較晚。收割後略種菜蔬而已。

農事。清明後穀雨前。爲下秧之期。忙種爲種田之期。耘田肥料。大都以灰拌糞。插秧逾三日。卽下灰一次。均拌有肥料。凡自種至收。共耘三次。至冬鋤槁根燒灰。春分後。刈雜樹嫩枝。踏入田中。四鄉均屬相同。

農具。耘田之具。用犁鋤耜耙。皆本地所製舊式。至蠶具。城鄉居民。多不知蠶桑之利。種桑甚少。曠地試種。業已成林。因乏人培植。現僅存數百株。每年採用。平均可收蠶絲二百餘兩。

杉木出產。爲遂昌大宗。由民間自行扞種。或招佃承種。凡扞種杉木。先一年。由民間播種玉蜀黍甘藷芋粟豆等雜糧。次年扞種杉苗。俟五六年。卽行停種雜糧。錄養苗木。或二三十年。就可砍伐。其不能扞種杉木等山

均屬雜糧。天然發生。縣東常平倉基。前曾闢爲苗圃。現因地狹。改作公衆運動場。苗圃地址。另在西城外七里之諫壁街。模範森林。亦就公有妙高山。僱工開掘。扞種杉柳等木。約計三十餘畝。各鄉松木。飛子成林。遍處皆是。苗木較多。無勞人民扞種。就地可採。大者鋸成松板。小者可作柴薪。

農產物。如早稻晚稻大麥小麥黃豆蠶豆玉蜀黍高粱菸葉靛青茶葉杉木毛竹松木筍茶油等。豐稔之年。無慮缺乏。倘遇歉收。城區及東南北等鄉。乞糶於松陽溫州龍游等屬。西鄉乞糶於福建浦城或衢州。

田產類多佃種。至秋收時。佃戶收割。視年歲之豐歉。酌量繳納。卽承佃時。亦不計明畝分。僅計租幾糶。遞年除納租穀外。其餘所種雜糧。由佃戶收割。並不分繳業主。其田出賣時。佃戶易人與否。應得業主之認可。至驅除病蟲方法。遇田間有蟲。每用菜油。於夜間洒於禾上。以資驅除。

是項病蟲。東西北三鄉罕有。惟南鄉略有見之。

工業。惟皮雨靴製工尙屬堅實。而底用鐵釘。不免故步自封。其餘竹類。則有竹籃竹盒竹箱竹籠竹椅竹帚竹烘籠。木類。則有大小方桌茶几大小背椅方檯條檯粗細床櫥櫃架以及家常日用粗料木件。鐵類。有犁鋤耜耙大小菜刀柴刀箝。布類。則有便衣襪鞋襪。至外來者。雨傘涼帽等物。徒弟學藝。或三年四年。期滿出師。給與相當工資。凡僱傭工匠。按月給薪。更換以年節爲限。或因事故。亦有中途辭退者。

商業現狀。凋零已極。最大店家。全年生意。不過七八千元之譜。小者三五百元不等。市鎮。如西鄉王村口湖山石練大柘。北鄉新路坡北界。東鄉馬頭等處。稍有市面。全城每逢二七爲市日。各鄉農民。凡有買賣行爲。均以市日來城。如豬雞鵝鴨。由衢龍一帶。於市前一日挑進。次日至街市銷售。入境貨。蘭溪龍游之布疋。甌江之南貨魚鯊糖鹽爲大宗。出境貨。

松杉木板爲大宗。菸箬桐油鐵錠筍炭藥材等類次之。至經過者。惟龍泉由蘭挑運之布疋。以上各商。本地人居多。

商販。由蘭溪陸路挑運至遂一百八十里。由甌江水路船運至松陽三百二十里。由松陽竹筏至遂六十里。衢縣陸路挑遂一百八十里。運脚。蘭溪衢縣龍游各陸路。多寡不一。松陽水運較輕。市面錢幣。銀元銀角銅元。時有漲落。凡裝運杭紹等處銷售之貨。均用本行匯票。帶回交與就地商店兌換現洋。如本地各商店至衢蘭一帶辦貨。俱用該匯票交換貨物。取其途中攜帶便利也。

鑛業。西鄉西坑地方有銀鑛。該鑛山主爲官姓。民國十一年間有衢縣葉姓。訂約開採。嗣因運輸不便暫停。東鄉五都七都等處有鐵鑛。現正開採鐵沙。計有八九家鐵爐燒煉。每家每年。約產鐵八百擔。金衢等處。時來購運。如採煉人多。資本充裕。尙不止此數。東鄉岑嶺頭有硫磺鑛。屬周姓

私有山內。現未開採。

第七十一篇 龍泉縣

考龍泉。漢初爲回浦地。後漢改爲章安。分置松陽縣。晉分松陽縣置龍淵縣。唐避高祖諱。改爲龍泉縣。屬處州。元明清因之。今仍稱爲龍泉縣。疆域。東自章墩。西抵披雲橋凡八里。北自九姑山。南抵螺絲山凡五里。由縣治東北至武溪八十里。與雲和連界。東南至庫網際一百一十里。與景甯連界。南至小梅八十里。與慶元連界。西至牌頭山九十里。與閩之浦城連界。西北至黃鶴嶺八十里。與遂昌連界。北至龍虎坳八十里。與松陽連界。從前自治區域。劃分郭內爲城區。東鄉爲東平區東安區。南鄉爲南山區南溪區。西鄉爲西遠區西近區。北鄉爲上北區下北區。更以東北隅之湯浩門等爲龍門區。面積九千零二十三方里。已墾田地約一千九百二十五頃。未墾地畝約占八頃。其餘皆崇山峻嶺。僅有溪坑數道。並無蓄水堤塘。

全境有戶三萬二千八百五十六。有丁八萬一千五百六十六人。有口五萬八千零六十八人。農業約佔十分之七。工商業不過十分之二。

劍川之水。一名大溪。發源於臺湖山。自慶元縣流至縣南鄉水上魚山北麓入境。水勢湍洄。東北流經過縣治。至湯浩門出境入雲和縣界。附會於大溪。稱爲支流者。有小梅溪漿溪豫章溪錦川溪獨源溪大貴溪鐵杓溪白雁溪道泰溪安仁溪數道。要皆源流短少。不通舟楫。此外邑西有住溪一水。由浦城入境。經流三十餘里入於遂昌。又有一溪一水。發源於邑南九礫山。東南流三十里。至龔嶺橋入於景甯。全縣山脉。悉由浦城慶元入境。勢趨東北。蜿蜒夾大溪而行。溪流湍急。僅能行駛小舟及建築水碓水車之用。地勢。處括郡上游。西與閩疆毘連。菁峒深窈。昔稱巖邑。官則就鄰設隘以資守禦。民亦聚衆立寨。藉圖自保。如鴉脊嶺小梅嶺武溪嶺粗髻嶺攀竹嶺龍虎坳等處。皆爲古時防汛之區。現設立保衛團。以資防禦。西鄉八都

。並設警察分駐所。南鄉小梅。正在籌設。縣境成三角形。四面皆層巒疊嶂。西南高於東北。惟縣治所在及南鄉查田一帶。較爲夷曠。

氣候。接近溫帶。夏不甚暑。冬不甚寒。熱度最高不過九十度。寒度最低不下三十度。立冬後始行落霜。間亦下雪。不成冰凍。雨水以春夏二季爲最多。溫度亦以春夏爲較高。夏秋動風多雨。春冬遇風則晴。

土壤黃色。含有砂質。田原皆依山傍澗。肥沃者約占四分之一。磽瘠者占四分之三。山場以西北兩鄉土腳較厚。種植松杉毛竹。最爲適宜。合全邑計算。已有十分之四墾種成林。此外未經開墾者。多屬石山。或係土質瘠薄。

鄭公坪官溝。自城西蔣溪堰引水入溝。貫城而東。至應奎坊。分爲東西二派。東達馬埠十餘里。北爲雲水渠。附郭之河背大坪一帶田疇。賴以灌溉者數千餘畝。

農民耕耘。尙知勤奮。近年因米糧昂貴。食用維艱。凡屬春耕夏耨以及採用肥料等事。較有進步。農具。墾具如整地翻土則用鋤鐮犁鋤。平田則用踏田鏡。芟草則用田鋤田鋤。均係舊式。漁具。除溪河少數漁船外。別無何項漁具。蠶桑一項。向無養蠶栽桑之家。故蠶具亦缺乏。近擬在城東營地。設立模範桑園。以資提倡。

官荒僅有營地一種。散處畸零。惟城區校場尙有五畝。並無人民承墾。民荒地約在千畝以上。設立林業公會。從事墾植者。已有數處。現就城北官有之九姑山。開闢數畝。栽種桐樹。以桐樹可以爲油。獲利甚厚。凡荒隙空地。皆可栽種。不必整片山場也。至茶樹僅各於園圃附帶種植。出產甚稀。僅供就地之飲料而已。

農產物主要者。如米麥豆杉木毛竹香菇竹筍等。普通者。如雜糧瓜菜麻棉花菸葉藥材茶葉菓品等。每年所產米糧。不敷民食四分之一。向賴松陽及

溫州等處運米到境。以資接濟。

農民佃田。祇立佃約。不付押金。秋收納租。純係濕穀。由田主自行掀晒。上田則二百觔。中下則一百五十觔或百觔不等。遇有蟲病。用桐油合水以厚之。亦有夜燃燈火者。團體。舊有縣農會一處。

工業。有龍泉劍一種。係屬玩品。鑄時用銅鑲成龍鳳文或七星等文。鋒能斷鐵。年產約數百柄。又有花梨木文具一種。產無定額。其最著者則爲磁業。所製磁器。不亞江西。宋代哥窰。近時尙有家藏龍虎瓶者。頗爲珍貴。民國六年創辦磁業工場。旋以時局關係停工。現在已由建設廳續繼開辦。此外西鄉有土碗窰四五十處。出產亦不少。多銷售甬台各埠。其餘習藝所所出之愛國布毛巾。及造紙科所出之綿紙。尙能適用。至外來者。自鳴鐘洋傘肥皂以及學校所用之儀器而已。

僻處山陬。甌江淺窄。距溫州四百八十里。境內僅有信康匯兌莊一家。此

外大達木行及各大南貨店布店。與溫州亦可通匯。市鎮。除城區外。東鄉之安仁。南鄉之小梅查田。西鄉之八都。北鄉之道泰。均係零星小店。並無殷實商家。入境貨。以米鹽麥豆蘇松布疋魚鯨藥材煤油爲大宗。出境貨。以杉木毛竹香菰筍爲大宗。至經過者。有筍乾毛邊紙二種。以上各商。江西蘭谿人居多。

商販運貨。東達甌江。僅有一溪可通小舟。南至慶元。北至遂昌。西至蒲城。均屬山高嶺峻。路與羊腸無異。運價。水路較輕。陸路按日計算較貴。市面錢幣。大洋或鈔票銅元。銀角不通用。鈔票亦祇用中交兩銀行所發行者。

鑛業。北下區道泰源莊內。發見煤鑛一處。已有溫州商人集資呈請開採。

第七十二篇 慶元縣

考慶元。周爲七閩地。吳越時爲東平鄉。歷秦漢暨唐因之。五代時。王審

之據聞。改名松源鎮。屬處州龍泉。至宋甯宗慶元三年置縣治。卽以紀元爲名。元明清迄今因之。疆域。東與景甯縣之張章村及閩省之壽甯縣托溪前西溪村爲界。南與閩省松溪縣嶺源東關底等村爲界。西與閩省政和縣上楓溪嶺鑑等村爲界。北與閩省浦城縣圳邊仙洋村及本省之龍泉縣小梅落莊等村爲界。東西廣二百三十里。南北袤一百二十里。從前自治區域。分城區舉水賢良隆宮竹溪槎溪六區。面積六千三百二十方里。山佔十分之七。田佔十分之二強。地且不及十分之一。全境有戶二萬一千八百零二。有丁五萬三千七百二十二。有口四萬一千三百二十六。業農者佔十分之八九。業工商者不及十分之一。

河流有二。一爲松源川。在縣南十里。其源出松源之梅坳山。流入大溪。一爲竹口溪。在縣北五十里。其水流入梓亭溪。二者皆淺隘激湍。形同山溝。不可通舟。沿溪居民。咸置水碓。用以舂米。藉省人工。

山脈。疊嶂層巒。其高度達五千尺以上。則惟竹溪之巾子峯一山。

地勢。環境皆山。北鄉較爲低平。東鄉最高。該鄉之舉水溪。與夫北鄉之棘蘭隘。爲天設之險。所謂制人而不制於人者。據險扼要。莫過於此。

氣候。夏無酷暑。冬無嚴寒。最高溫度至華氏九十度。最低至二十度。且地勢極高。土質乾燥。春夏之交。其溼度不過七十。秋冬之間。其溼約五十度。冬令霜雪稀少。惟全境地勢高斜。故稍晴則溪澗立涸。稍雨則溝陰皆盈。於農業一方面。大都不患亢旱而患洪水。土壤肥沃者。不過百分之五。所種植物。大都以稻爲主。杉竹等次之。東鄉山田。土性尤嚴淡。故農人有以硫磺代用肥料。爲田禾生長之助。

山田居多。高下階級。遠望之。其形如梯。東鄉有一百十三邱而合成一畝者。故耕耘犁耙。類多專藉人力。不能用牛。且農民怠惰性成。分秧後。鮮有從事耘草者。土質堅硬而礫薄。每屆收成後。均須蓄水田內。藉以滋

養肥料。農具。掘田之器用鋤。平田之器用耙。又有名田籬者。專爲去草之用。有名濁盂者。爲盛肥料之用。漁具。祇有漁網。其製用藤線結成。口寬三尺。裝以竹柄。爲網取池魚之用。蠶具。因地不宜桑。無人養蠶。故闕如也。

官民荒地甚少。惟荒山尙多。計劃闢立苗圃。共計兩處。一在東門外大明寺前。土名倉邊。計占面積八畝。擬播種桐樹等。一在東門外大坂垵。土名瓦窰崗。計面積五畝。他如模範森林場。在北鄉百丈山。面積十餘畝。栽插杉苗。又創設模範桑場一處。在城區后田街尾之舊有萬壽庵荒址。因土性不宜。徒具其名。此外民間向閩省購來銀針茶種子一種。因其葉較常茶厚而且大。形狀如針。毫白如銀。故名之。是項銀針茶行銷歐洲。價值較常茶昂至十倍。關山五畝。約可植茶萬株。三年後即產茶二十餘擔。可以坐得美利。惜鄉民注意者少。出產不多耳。

農產物之主要者。爲穀大麥小麥豆粟等。普通如各種瓜蘿葡萄芋桐芋蕨桐茯苓等。民食不敷甚鉅。而尤以東鄉爲最。故該鄉人民。每年冬收後。悉赴閩省政和松溪等縣幫種香菇。迨次年春耕時始返。冬往春還。共計四個月。皆食力閩省。

佃業關係。佃戶向業主承種田畝。由佃戶出立佃約。交業主收執。其繳租或由佃戶挑至倉前完納者。或由業主向收者。自行訂定。並非一律。惟三七兩都。有骨租皮租之分。骨骨者收租完糧。管皮者納租種田。皮骨均可分別買賣。杭嘉湖甯紹等處^蘇有大買小買之分。似卽類此。其有公益教育祭田及地方橋梁寺廟等各佃農。均世代相承。含有一種永佃之意義。租額亦低。至預防害蟲。法以硫磺研成細末。和入肥料。於插秧時。塗抹根際。耘田時。又以硫磺和肥料耘之。因其藥性最烈。具有殺蟲之功用。不致有害蟲之發生。

工業。出色之工作物。有一種菓盒。俗名批貨。凡圓形如盤盂之屬。其徑直在二尺五寸以下者。皆可如意製成。專爲裝置菓品之用。其餘僅有竹工所製出之竹籃竹榻等。

商業以香菰爲大宗。其次則運木。前清同光間。業毛邊紙及筍。亦頗稱盛。自洋紙盛行。毛邊紙大有一落千丈之勢。因毛邊紙滯銷。而種竹者亦漸減少。故筍亦連類及之。不禁有今昔之感。惟香菰與杉木。至今猶能堅持不敗。民國以後。洋廣雜貨等項。較前爲旺。業此者亦大率有力之家。頗獲多財善賈之効。

市鎮。僅附城之后田市。北鄉之竹口鎮。各有住戶四百餘家。商店三五十家。餘則村莊零落。地廣人稀。入境貨。以食鹽爲大宗。出境貨。以杉木紙筍爲大宗。以上各商。本地人居多。

商販。赴溫州水路七百餘里。赴龍泉陸路一百八十里。赴閩省之松谿縣陸

路八十里。又浦城縣陸路一百八十里。運脚。如赴龍泉松溪浦城等處。均係陸路。其價稍昂。商人運輸。多由陸路。市面錢幣。以日本龍洋爲本。位如以英洋行用。每元則須中水二三分。然英洋殊不多見。以其真贋難分。故相沿樂用日本洋龍洋。現在閩省多故。交通斷絕。龍洋與英洋。市面已一律平等。並無補貼。

商人交換貨物。均已現銀直接。向無代辦機關。惟香菰紙筭。有牙行居中代爲買賣。主顧則隸東路者。福建人居多。隸北路者。溫台人居多。

第七十三篇 雲和縣

考雲和。明景泰三年。析麗水之浮雲元和二鄉。置縣曰雲和。今仍其舊。疆域。東界麗水。西界龍泉。南界景寧。北界松陽。廣袤皆不及百里。舊分一城兩坊九都。從前自治區域。劃分兩坊一城爲城區。一二六都爲協利鄉。三都爲濛際鄉。四都爲芝石鄉。五都爲谷溪鄉。七都爲悅豐鄉。八都

爲龍亭鄉。九都爲錦屏鄉。後因地理關係。復改協和之一部歸入城區。併龍亭錦屏二鄉及谷溪之半爲東溪區。劃谷溪之半歸芝石。共分爲六區。面積二千九百六十一方里。山約佔百分之九十六七。田地僅居百分之三四。全境有戶一萬六千一百六十四。有丁四萬零五百四十一人。有口二萬八千九百二十三人。業農者三萬人。工商各千餘人。

大溪發源於松源。經龍泉境。穿芝石東溪二區。下注麗水。出永嘉以入海。西起武溪。東迄規溪亭。東西延長。計九十里。有舟楫之利。可資運輸。其他兩山之間。多出細流。其水湍急。多挾沙石。僅供灌溉。無可紀述。山則隨地皆是。連亘境內。北有牛頭山脉。爲松雲天然界線。南有筆架高峯。以爲景雲屏藩。其他若婁狗山雲際山。非不聳然高峙。然山高氣冷。土質礫瘠。不適物產生植。濯濯牛山。有由來矣。

地勢。城區一帶稍平。西南北三面離城僅十餘里。山嶺重疊。高入雲霄。其形若孟。惟東面地居下流。山如奔赴。重關要峽。所在多有。如東鄉石塘鎮。南鄉泗洲嶺。西鄉張家地。北鄉石子嶺。類皆一夫當關。千人莫進。雲雖小邑。然控甌接閩。未可輕也。

氣候溫和。自華氏表四十餘度。至九十四五度止。無疾風暴雨之患。惟春雨常多。夏雨常少。然能爲水患者。常在夏至之間。霜雪亦甚稀少。每年降雪。大率以三四次爲度。或有一次不降者。雪水入土不深。故溶化力甚薄。而蟄蟲恆不能殺。

邑無平疇曠野。其山之平處。卽闢爲田。故土質多雜砂石。非常礫瘠。惟沿溪兩岸。稍稱肥沃。總計瘠土約佔十之九。而肥土僅得十之一。植物以五穀雜糧爲宜。

春社過後。農民始事佈種。夏月耘田。力勤而功頗精細。總計農民一歲之

中。惟冬月小得閒暇。其春夏秋三時。恆無一日之休息。農具僅有犁鋤等類。蠶具漁具。則所業無人。

林場共有七處。官立第一林場在南門外。第二林場在龜山突。民立第一林場在五花嶺。第二林場在大角山。第三林場在河岱坑。第四林場在陳村。第五林場在雙洲。

農產物之種類。如粳米糯米大麥小麥稞麥大豆小豆菜豆碗豆蠶豆黍玉蜀黍高粱落花生各種瓜白菜油菜大頭菜芋馬鈴薯蘿蔔山藥薑百合甘蔗葱藕菱角筍大麻芋蕨亞蕨蕨麻棉花菸葉桃李杏梅葡萄枇杷栗梨蘋果橘橙柑柚荔枝柿棗櫻桃石榴香蕉山查龍眼紅綠茶芽等。民食僅可自保。近年民間添種雜糧頗多。倘遇凶荒。可無處缺乏。

佃戶對於業主。純爲僱傭性質。以特定一種契約成立之。遞年照約執行。然遇水旱災荒。恆得讓減。鄉間亦間有田皮田骨之分。則業主不能行使其

所有權矣。水旱偏災。民無預防之能力。惟驅除蟲害。用一種油汁。遍洒田間。掃而落之。使不得飛騰。易就撲滅。

工業。除平民習藝所外。尙有集成布廠爐廠。惟爐廠作較靡常。其餘茶油桐油之類。運銷麗甌等處者有之。又有龍鬚蔗竹製器陶瓦器五金器棉織麻織等物。皆產額無多。不足以供需用。至外來者。有紙製雨傘藤椅藤轎之類。僱傭手續。極其簡單。一言可定。無須訂立契約。徒弟學藝。另具師帖。爲師服務。三年期滿。可自由營業。

地處偏隅。交通不便。人口稀少。故商業冷淡。商人鮮有獨營一業之能力。總計城鄉店舖。不過一千家。入境貨。以布疋南貨食鹽海味爲大宗。出境貨。以油鐵木板爲大宗。至經過者。以竹木鹽米爲大宗。商販。布貨多販自蘭溪龍泉。南貨及雜貨。則販自甌江。運價。由蘭溪龍泉陸運。脚力稍貴。惟甌江船舶可通。運費較輕。市面錢幣。最流通者。爲墨洋龍洋。

鈔票甚少。小角雖有不多。用亦不廣。無重大之需用。故不發生交換代辦主顧等一切關係。商人通用蘭語。因商業之較大者。多出蘭谿故也。

第七十四篇 宣平縣

考宣平。明景泰三年析置宣平縣。清以來沿之。疆域。東距麗水七十里戴弄朱弄分界。南距麗水六十里橋嶺木杓壇分界。西距松陽三十里竹客嶺上分界。北距武義六十里大后陶小后陶分界。西南距松陽六十里白岸口桐郎分界。東北距武義六十里小妃嶺下湯分界。西北距遂昌六十里和尚田分界。舊自治區。分爲城區履道區聚德區振武區親仁區登瀛區集賢區保和區廣惠區安良區崇義區永豐區。東西廣一百六十里。南北袤一百四十里。面積二千七百七十四方里。田地約佔一千餘方里。山蕩約佔一千三百方里。全境有戶一萬八千二百零九。有丁四萬九千二百十八人。有口三萬一千五百七十八人。業農者約佔十分之九。業工商者甚屬寥寥。

萬山重疊。並無大河。全縣諸水。皆自本境山嶺之水發源。北有桃溪。始於樊嶺下流呂埠口。會大井背水至陶村。合紫坑破田坑水。東南流。經項灣澤村下蔣。會松溪水。經章岸岡山與坦溪合。坦溪之水。一由白巖南園。會上陶水。流入上坦。受上坦嶺水至大院後。一由安村西流。經黃家坑白水坑葉坑。會上周趙村水出大院後。與坦溪合流。至溪口受西塘上江水。經荷樣合烏巖坑水。至雙溪口。一由雙水至備子源。會大合水西流金村出雙溪口。經華塘梵天寺至岡山。與桃溪合。由岡山而下。入白殿潭。受楊子里順源之水。經鄭廻流入城之東邊。是曰東溪。縣西之水。自東坑上田至鷓坑出大溪口。北受章五里溪口水。南受飯甌嶺頭水。至馬口之下。經金山尖。流入城之西邊。是曰西溪。東西溪之水。均入城。東南綠巖潭。合流至前灣之下。受杉坑水。杉坑發源於新塘後之西經半塘。至烏漱嶺脚。合李村上黃水。東南流。經烏漱至龍門洞。南受竹客石門洲水。出杉

坑山。坑水與前灣水合流。經金山前。至大溪口。受山下鮑水。過曾公鄭岸洪潭三港。受石浦水。至章灣。合曳坑水經赤圩五赤口。受五赤坑水至馬村。入洗灘。會周坦水。周坦之水發源曳嶺。至八橫溪。東會丁川水。至老竹之下。受梁村水。經破橋周坦入洗灘。與馬村合流。達於麗水。新錦源之水。東北行經大黃源吳畷田後大坑口五洞坑和山頭。入武義境。樊嶺脚水。東北出吳宅後陶至武邑松村。南受清風嶺俞源水。北出武義。小妃水東南流入武邑塘頭烏門下等處。茶坑後湯水。東北過東衢金巖村。至溪下與小妃水合流。水經溪上渠溪而入麗水朱弄。以上諸水道。惟東溪一條又名午溪。水大時可行小舟。水小時可用筏。紮排運貨。亦祇發六十里之遙。若爲水碓水磨。製造米穀及製油之用。多半合宜。

境內諸山。皆西北界東坑之獅子巖發脉。由獅子巖而南。經九盤嶺。挺起數峯。曰牛頭山。分支并趨。環繞西南各鄉。其一支過寨嶺而東者。爲城

西之搵樣山。再東爲城南之白馬山。一支由新塘後西南過李村嶺。至竹客嶺。自竹客嶺分支東趨。直達石門嶺。由竹客嶺而東南爲張大山。其西南諸山。則達於松麗之境。山獅子巖而北。經大岡至大高山九明山入溪武境。其由大岡東經石柱峯至大會壇尖分二支。南支至湯溪而巖山。直達城北鰲山而止。其一支過新錦嶺而東北至樊嶺。樊嶺一支南趨者。經西塘上洋潘家洋。直達岡山。樊嶺東趨爲清風嶺。再東爲北巖山。分數支。一支過陳術之南。東達小妃嶺。至武義境內。一支過大菜之南。爲大菜岡背。自大菜岡分支而東南。經安付雙水嶺頭分數支。一支折入西趨者爲台山。南一支經東河坳頭。至謝豹山。謝豹山之西爲岱石巖。其南爲城東之樓臺巖閣山。達於荷葉山頭金山前寺等處。自雙水嶺東趨至安鳳。安鳳以東諸山脈入麗水界。安鳳南支。過竹翠水頭。西至曳嶺。南達於黃弄竹翠之南。一支爲三巖。經霧嶺西南過橋嶺入麗水境。以上諸山脈。蓋均相連貫也。

山多田少。道路崎嶇。古稱爲小桃源。蓋有由焉。全縣惟縣城與陶村。人烟稍爲稠密。地勢亦稍平坦。其餘高者或十數丈。低者亦如之。最高者。則岱石山搵樣山。高約五千五百尺。曳嶺高約五千八百尺。樊嶺高約四千尺。此外又有石門嶺。高亦三千餘尺。且與曳嶺同爲縣南最險要之地。溫處等處往來宣邑者。必由此道經過。若猝遇事變。則遣一人守其上。十餘人伏其下。雖千百人不易入也。

氣候較寒。每年種稻一次。至陰歷七月中旬前後。始獲登場。其最高之處則懼旱。風霜雪次之。雨又次之。最低之處則患水。風霜雪次之。

土壤。肥佔十分之三。瘠佔十分之七。精佔十分之二。粗佔十分之八。除種稻外。最低近水之處。宜種蓮子靛青。故邑中歷年所出蓮靛二種。貨物甚佳。行銷亦暢。

溝渠源流之長者。以東溪西溪爲最。東溪之水。可灌田一萬五千畝。西溪

之水。可灌田一萬二千五百畝。其餘各溝渠。皆由二溪連灌分支灌溉。農民耕耘。皆沿舊習。尙見精勤。農具則有犁耙耒耜鋤鎌。墾具則有大小鋤鑿。漁具則有魚網絲欄等。蠶具因地土乾燥。不宜種桑。僅縣署右傍模範桑園。植桑三百株。年出桑葉五百擔。

官荒。祇有山地二處。一在山下鮑附近。約三百畝。一在縣門外。民荒均已開墾。種植松杉竹茶等樹。或種山薯雜糧等物。其未開墾者。皆在山嶺高峯。不能避風之處。平日風至。卽草木亦難生長。故地方人民。祇能任其荒蕪。無法可墾。大約此種民荒山地。亦有一二百畝之譜。向來並無商人承墾。其官荒山地。在山下鮑一處。近已租與民間開墾。而北門外之三十畝。已指定爲中山林場。栽種杉木。苗圃。租得北門外鄭迴下畝民田二畝。分爲九區。同時栽種茶梨桃各苗。至植茶方法。每年春將子入土。候翌年春初成苗。長五六寸許。再行分栽。試以本地土宜尙合。人民亦知注

意焉。

農產物。以米穀山薯靛青菸葉蓮子茶葉苞箬桐茶油梨麻杉木等爲大宗。民食。若遇豐稔之歲。除穀米外。加以甘藷雜糧接濟。尙無不足。設遇災歉。則非由外埠運入不可。

農民租田。先立據約。上等田每畝租三擔一籬。中等三擔。下等二擔半。南北兩鄉。擔之分量不同。北鄉以百觔爲一擔。名曰大擔。南鄉則以七十五觔爲一擔。名曰小擔。亦因二鄉地土之肥瘠而然。自減租條例頒布之後。十六年度胥照原額減輕百分之二五繳租。十七年度依估定正產全收量最高額之年。再減輕百分之二五繳租。可分繳租之標準爲五項。一上上田繳租每畝二百十觔。二上田每畝繳租一百九十觔。三中上田每畝繳租一百七十觔。四中田每畝繳租一百五十觔。五下田每畝繳租一百一十觔。此農田繳租變遷之大較也。至驅除預防蟲病等事。高田稍可蓄水。則多蓄之以防

旱。低田厚築堤增道路。恐雨水過多。被其衝塌。下半年共議禁止捕蛙。蓋蛙可以捕食害苗之蟲故也。團體。舊有縣農會一處。

工業。自習藝所停閉之後。繼之者有小陶村織布廠。爲三五私人所組織。此外如履道鄉荷樣工廠。親仁鄉陶村工廠。廣惠鄉嶺脚工廠。集資鄉愈源工廠。親仁鄉樊嶺脚工廠。每年所出桐茶柏油甚夥。至外來者。平日所用之各種瓷品。以及各種洋貨綢緞紙筆墨硯銅錫鐵器等皆有之。

地處山僻。交通不便。人烟疏散。商業本極蕭條。近年風氣漸開。人民衣物器用。漸見改良。是以商業亦較有起色。市鎮。除城市外。祇有縣北陶村一處。居民約有六百餘戶。入境貨。以洋油布疋磁器食鹽爲大宗。出境貨。以靛青菸葉蓮子茶葉苞箬桐油爲大宗。近年播種銀耳香菰兩種。出口各在萬觔以上。銀耳精於川產。尤稱特色。以上各商。本地人居多。台幫溫幫之僑商次之。而贛幫南京幫。則久居而同化矣。

商販赴蘭溪者多。蓋蘭溪商埠稍大。貨色亦稍齊備。陸路一百四十里。水路五十里。最遠者。至杭州溫州而止。最近者。則在金華一百四十里。運費按舫計算。市面錢幣。大洋銅元均漲落無定。角洋則不盡通用。商人以銀錢交換。平時販貨。則用通信法。以原店牌名圖章爲憑。凡向日往來之店。此店信去。彼店則照信發貨。交妥便挑夫運回。如立等需用之貨。方派店夥往辦。凡購貨均有一定主顧。言語皆本處土音。團體。舊設有縣商會。

第七十五篇 景甯縣

考景甯。明景泰間析青田縣柔遠鄉仙上里及鳴鶴鄉之地。置縣曰景甯。清因之。疆域。東界青田。南界泰順壽甯。西界龍泉慶元。北界麗水雲和。東西距三百一十里。南北距一百五十里。原分爲七都。從前自治區域。分爲十三區。面積六千零四十四方里。田計八萬九千六百五十三畝。地計二

千二百一十三畝。山蕩共計二萬二千六百二十四畝。全境有戶二萬七千一百七十五。有丁六萬五千五百五十六人。有口五萬零一百四十五人。農業約五萬人。工業約三千人。商業約五千人。

河流。發源於四都。經道化村會三都之水。至二都之沙灣。始通帆船。東北行達標溪。合縣南諸水。過大均外舍葦草大澗渤海大順諸埠。而至一都之鶴江。入青田界。卽甌江孝溪之上游。自沙溪至鶴口。共長二百二十里。計極深處四丈。極淺處一尺六寸。溪流湍急。居民每利用此種水力。設碓舂米。

山脈分二支。一來自慶元。卽楓嶺支脈。經四都突起三角寨。西折入三都。最高爲落料峯。迤邐入二都。爲雲景交界之分水嶺。一來自壽甯。卽浙閩之界山。南雁蕩之發脈。在五都大際矗起爲上山頭。全縣諸山。此爲最高。北行人六都至七都。有敕木山高接雲霄。折而東行。入一都至青田縣

界。

萬山重疊。平原甚少。其土地面積約佔十分之八五。平原不過十分之一五。而二都之泗洲嶺。三都之庫網際。四都之黃陔隘。五都之上標東坑。六都之綠桐。尤爲險要之處。

氣候。最高溫度在九十六度。最低在三十四度。雨水春夏較多。春分節後尙有雪。立冬節前卽降霜。雹見於四月。風生於八月。屢有傷及田禾者。土壤。粘土佔十分之四。沙土佔十分之六。粘土宜種稻麥。沙土宜種蕃薯。玉蜀黍及松杉各木。

農產物。因山高氣寒。一年僅能收成一次。

農事。冬耕一次。至明年春。又耕一次。再用耖。將田土排勻。然後插秧。插秧後半月耘田。並施肥一次。再過半月。復耘一次。早禾收成在立秋節。中禾在寒露節。若晚禾至霜降前後。始可收穫。山地大都種植蕃薯。

於小滿節扦插。中間施肥刈草。於霜降後掘取。刨絲晒乾。農具。有耙耖。誅鋤碌碡。閘板鋤圈等類。均係本地自製。蠶桑因地土不宜種桑。兼之天氣晴雨寒暖不時。與育蠶有礙。是以人民對於蠶桑一項。素不講求。

山多田少。材木爲出產大宗。杉榲松竹四種。每年由孝溪運銷溫州者。約百萬餘元。雜木燒炭運售者。亦在二三十萬元以上。其造林方法。先墾山地。栽植蕃薯。約一二年後。於早春時。杉用扦插。榲用苗植。再加除草整枝。十年成林。二十年後即可砍伐。松則於鄰近已有古松之山。禁止樵木而成者。曰天然林。由松苗栽植者。曰人造林。竹林係先在山間植母竹若干竿。任其逐年滋生。雜木俱屬天然林。至少須四五十年。方可砍伐。至炭有烏光大青柞炭三種。烏光由最堅木質燒成。運銷外洋。故又名洋莊。茶葉品質甚佳。民國三年間。巴拿瑪賽會。得一等金章。惜種植甚少。烘製又不講求。未能暢銷。此外如桐茶桐油厚朴茯苓地榆等。亦略有出產。

僻處深山。並無大溪深澤。水產物均付闕如。畜牧。民間飼養鷄豕牛羊四項。無專營者。

農產物之種類。如粳米糯米大麥小麥蕃薯玉米大豆小豆赤豆菜豆油菜蘿蔔薑葱韭蒜瓜茄蒿蒿蘆薹蘿蔔茭菱芡蔴菸葉等。民食向來不足。每至青黃不接之際。須向溫州購米接濟。

佃種制度。凡佃戶承種之田。年還原田濕穀。如無欠租情事。即永歸該戶耕種。不遽改佃。至繳租數量。現依新頒條例辦理。遇有災歉時。則向業主商減。或到田而割照分。又驅除害蟲方法。以桐油少許。滴入苗根。蟲受油氣之鬱蒸。即時殞斃。團體。有縣區鄉各農民協會。

工業。工作物除裁縫有勝家機器二三部外。餘俱屬手工業。其種類有木工竹工鐵工銅錫工泥工陶工縫工織工製紙製油燭等。僱工分常年臨時兩種。不立僱傭契約。待遇與家人同等。凡子弟投師習藝。須先立投師狀。訂定

三年或四年。期滿設席謝師。其師當席給還投師狀。表示承認畢業之意。僻處山陬。商販凋零。店舖寥落。欲求發達。重在森林。如有大宗木植運售。商業亦可期其進步。市鎮。除城區外。惟二都之沙灣大均。附城之外舍。一都之大順。營業較盛。入境貨。以常熟布永康布食鹽食米四項爲大宗。出境貨。以竹木二項爲大宗。

商販。從前往來。有蘭溪麗水青田永嘉泰順及福建之壽甯等縣人。現在以青田永康壽甯等縣往來貿易者居多數。運價。按路程之遠近計算。市面錢幣。通行銀圓銀角銅元。紙幣除中國銀行通用外。餘則輸入者少。且亦不甚通用。商家購買貨物。均以現金交易。間有畚民以米柴易鹽布者。店夥對於此種畚民。則用畚民土語相問答。

鑛業。附城包山地方。有石灰鑛一處。設窯燒灰。惟交通不便。僅銷售本地。

55
264180